

B9C 270

2 91

POSTOLK LEVY

POSTOLK LEVY

POSTOLK LEVY

POSTOLK LEVY

POSTOLK LEVY

POSTOLK LEVY

POSTOLK LEVY

POSTOLK LEVY

POSTOLK LEVY

POSTOLK LEVY

POSTOLK LEVY

POSTOLK LEVY

POSTOLK LEVY

POSTOLK LEVY

POSTOLK LEVY

POSTOLK LEVY


POSTOLK LEVY

POSTOLK LEVY



APOSTOLICARVM
PII QVINTI
PONT. MAX.
EPISTOLARVM
LIBRI QVINQVE.

*Nunc primùm in lucem editi
operâ & curâ
FRANCISCI GOVBAY.*



SERENISSIMO
PRINCIPI
FERDINANDO
AVSTRIACO
HISPANIARVM
INFANTI,
BELGICÆ PROREGI.



ERIÒ mihi cum ani-
mo meo consideranti,
PRINCEPS SERENIS-
SIME, quod potissi-
mum ab homine priua-
to, in hac temporum ini-
quitate, quibus Ecclesia Christianum

sanguinem foedis inter se diffidentium odiis cædibusque dolet permisceri, grassantibus malis scutum obijci posset; quo vel malignantium infringi impetus, vel gentium, quæ bella volunt, tela retundi, vel denique Christianorum Principum arma procul aduersus communem Religionis nostræ hostem in Orientis oras deportari conuertique queant; opportunè se mihi obtulerunt Epistolæ PII Quinti Pontificis, verè pij vereque Maximi, quas ille dum viueret (vixit autem sanctissimè) eo diuini nominis pacisque publicæ promouendæ studio ad complures externos domesticosque Reges ac Dynastas perscripsit, vt, sperato foederum victoriarumque amplissimarum successu, conatus sui vtriusque fructus retulerit, non vberes modò, verùm etiam gloriosos. Quam ego occasionem procurandi

curandi boni publici hoc animosius
complexus sum, quò recentior hac
tempestate se metus exferebat Turci-
cæ contra Venetam Rempublicam,
imò Ecclesiam, perfidiæ; & in his ip-
sis litteris perspiciebam manifestius, pa-
ternam optimi Pontificis curam tam
Catholico contra barbarum hunc im-
manemque hostem niti præsidio, quàm
eorum, qui pridem cum eo fœdus,
P I O iudice non pium satis neque
Christiano nomini laudabile, icerant,
auxilio diffidere. Atque hæc me ra-
tio inter ceteras vna quoque impulit,
vt non aliis, quàm T V Æ C A T H O-
L I C Æ C E L S I T V D I N I S auspiciis
lucem viderent; quia videlicet, Te v-
su exemploque posteritatis Belgicam
nostram felicissimè gubernante, alij
nemini ab homine Belgâ Opus of-
ferri decebat, quod aut cum Ma-
iorum tuorum laudibus coniunctum,

aut cum tuis esset virtutibus com-
mune. Siquidem in iis persæpè repe-
ries parentum tuorum erga Sedem A-
postolicam fidem, quam vir ille san-
ctissimus citra omnem assentationem,
nedum alienæ gloriæ obtrectationem,
orbi quâ patet vniuerso, stylo scri-
ptioneque suâ conspicuam reddidit,
cùm impendente fatali illâ temporum
difficultate, quam ad Echinadas insu-
las metuebamus, lentiora videbat ab
iis auxilia præstari, quorum nominis
vel maximè intererat Christianos hoc
prælio minimè vinci. Reperies & bel-
licam parentum gloriam, quâ, supera-
tis terrâ marique hostibus, Catholi-
cum imperium sempiternâ nominis sui
famâ longè lateque protulere. Quam
quidem Tu ita æmularis studiosè, vt,
si, quod non optamus tantum, sed
etiam ex manifestis indiciis speramus,
adeoque nobis pollicemur, felicissi-
mis

mis initiis pares progressus exitusque
responderint, vnum Te pacis belli-
que arbitrum, totâ Europâ habituri
simus omnes: sed in primis Belgæ tui,
quorum dum vitas fortunasque, atque
acceptam retrò à maioribus Religio-
nem, obiectu capitis tui, inter vibra-
tas vndique armorum faces, gemini-
que hostis florentissimos exercitus,
non fortiter minùs quàm feliciter di-
micando sapiùs defendisti; in tuâ sa-
lute suam esse sitam eò gaudent ex-
pressiùs, veriusque gloriantur, quò se
virtute ac fortunâ tuâ, quam Supe-
ris ob insignem pietatem tuam curæ
esse cernunt, securiores fore certiùs
confidunt, atque etiam experiuntur.
Quam ego nostrum omnium collo-
catam in Te spem, cùm egregiè sus-
tentari augerique etiam posse existi-
marem ex his Pontificiis Epistolis,
quas CATHOLICÆ TVÆ CEL-

SITV-

SITVDINI inscribendas iudicaui,
nolui diutiùs, vt ne publici iuris non
essent, committere. Nam profectò
eo zelo atque ad debellandos Eccle-
siæ hostes desiderio atque animo sunt
exaratae, vt quicumque eas Princeps
attentè perlegerit, optimi Patris exem-
plo, neque thesauris amplissimarum
opum, quas ille benignissimâ manu
in suppetias bellorum aduersus hæ-
reticos & Turcas profudit, neque la-
boribus vllis pro Dei gloriâ subdito-
rumque sibi fidelium tuendâ incolu-
mitate exantlandis sit parciturus. Ha-
buere sanè diuinum quoddam ad per-
mouendas inflammandasque Princi-
pum, qui ætate istâ vixerunt, men-
tes pondus ac momentum, quæ à piis-
simo hoc Pontifice profectæ fuere
cohortationes atque consilia: vt non
temerè in spem mihi venire videar,
FERDINANDE PRINCEPS CA-
THOLI-

THOLICE, eodem abs te legendas
euentu, qui earumdem virtutum fan-
guinisque Austriaci heres, iisdem ni-
mirum vestigiis, cum ad famæ nomi-
nisque Tui immortalitatem, tum ad
Ecclesiæ Catholicæ (cuius Tu semper
cum Maioribus tuis propugnator ac
vindex extitisti) incrementum, & pa-
cem orbi Christiano stabiliendam, per
heroica facinora constantissimè nite-
ris. Hoc certè consilio, cum eò curas
à Te publicas priuatasque conuerti
omnes cernerem, Epistolæ illæ supe-
rioribus annis à me Romæ collectæ
sunt, vbi tum fortè Legato Fratris tui
Regis nostri Clementissimi, Marchio-
ni Castelli Rodricij, operam dabam;
ratus non modò nihil me ab institu-
ti mei ratione alienum, si quod ad
epistolicum munus attineret, ipse
Legationi ab epistolis existens, hau-
riendæ rerum cognitioni conquire-
rem,

rem, sed operæ quoque pretium non
leue facturum, si virtutum tuarum
præclarissimorumque facinorum, quæ
in Te admiramur, consilia præceptio-
nesque, olim à Pio Pontifice promi-
scuè cunctis Principibus propositas,
& primis sui velut lineamentis ad-
umbratas, Tu ipse perfectas à Te per-
politasque iam esse, consilia cum fa-
ctis ipsis conferendo, liquidò perspi-
ceres. Quo in genere laudis sicut ex-
ploratum bonis omnibus est, quòd a-
lienum nihil Tibi possis asserere, qui
cuncta sic gesseris hætenus, vt Tuo
vnus exemplo Pontificiarum littera-
rum admonitiones queant confirma-
ri; ita Deum ter Optimum Maximum
precantur rogantque sedulò, vt fe-
licitatem hanc quàm maximè diutur-
nam esse velit: quâ Te victoriis trium-
phisque celebrem Ecclesiæ Austriaci-
que nominis hostes timeant, focij a-
ment,

ment, exteri laudent Principes, domestici imitentur, orbis verò Christianus suspiciat atque admiretur uniuersus. Ita voueo

CATHOLICÆ TVÆ CELSITVDINI.

æternùm deuotus

Franciscus Goubaux.

LECTORI.

EN tibi Pastoralis hoc cura pignus, à
Ioanne Antonio Gabutio, in fine Vita
verè Pij Pontificis, non piè minùs quàm
elegantè ab ipso conscripta, promissum, ac
tantoperè bonorum omnium votis expetitum.
Quas ille Epistolas, tamquam rerum à se
memoratarum testes, si Vita ei superfuisset,
edendas promiserat; has ego, Veteribus Romæ
ruinis oppressas, in lucem edere decreui: qua
lux ipsa, ad propulsandam tam densa noctis
caliginem, in quâ versamur, appellari meren-
tur. Vale, & frue.


1

APOSTOLICARVM
PII QVINTI
PONT. MAX.
EPISTOLARVM
LIBER PRIMVS,

Continens Epistolas annorum primi
& secundi eius PONTIFICATVS.

EPISTOLA PRIMA.

ARGVMENTVM.

ACRI Concilij Tridentini Decreta
in vsum induci, Clericorum discipli-
nam restitui, eorumque ritè educan-
dorum seminarium institui, ab here-
ticis caueri; proborum virorum, qui-
bus Ecclesiastica munera mandari possint, censu habito,
certum ad se indicem mitti procurat. Eodem ferè exem-
A plo

plo litteras PIVS ad alios quoque Antistites per orbem dedit, ut in eius Vitâ legitur lib.1. cap. XI.

Ven. Fratri Christophoro Episcopo Palentino
PIVS Papa V.

Venerabilis Frater, salutem & Apostolicam benedictionem. Posteaquàm, ita providente Deo, Apostolicæ servitutis officium indignis humeris nostris impositum est, non sine acerbissimo animi dolore gemituque, miserabilem ac flebilem Christianæ Reipublicæ statum attentè considerantes, eos omnes excitare, commovere & exstimulare cogimur, quos Deus in partem sollicitudinis sub nostrâ vigiliâ ad Ecclesiæ suæ sanctæ regimen conuocavit; ut nobiscum omnes in hanc curam incumbant, & ad tam graue hoc magnumque onus sustinendum adiuvent, atque corroborent infirmitatem nostram: ut, dum caput membrorum, & membra capitis mutuis fulciuntur auxiliis, Ecclesia Dei, quæ tam afflicta ac deformata reperitur, recreata tandem erigatur, & erecta ritè conformetur; atque in tot tantisque calamitatibus non solum à domesticis, sed ab externis etiam inimicis defendere se tutarique possit. Non ignorat Fraternitas tua, quàm longè lateque sese perniciosæ diffuderint hæreses: neque te fugit, quàm certam & efficacem huiusmodi malo ad perdendas Dominicas

oues

oues occasionem dederit Pastorum negligentia, & quàm magnam vim ad hunc morbum augendum habeant corrupti ac deprauati Ecclesiasticorum hominum mores. Iam verò perspicere potuisti, quàm imminutus inter laicos sit cultus pietatis, quàm aucta licentia simul & impudentia. At planè intelligis, Frater, quantoperè sint nobis pertimescenda iræ diuinæ flagella, ob nostra populiq̃ue Christiani peccata nobis intenta. Ad has igitur, quibus afflicta laborat Ecclesia, tot tantasq̃ue plagas vtcumque sanandas, & ad iram Dei aliquo modo auertendam, atque placandam; vnicum nobis remedium superest, diligens videlicet sacrosancti Oecumenici Concilij Tridentini Decretorum custodia, ac fidelis obseruatio. Itaque pro eo quanti facis Omnipotentis Dei cultum, Fraternitatem tuam admonemus ac rogamus, vt eius quam sustines personæ memòr, & officij, omnia quæ in ipsâ Synodo tam pio, prudenti ac maturo iudicio, Deo fauente, constituta ac sancita sunt, deinde sacrosanctæ huius Apostolicæ Sedis auctoritate & decreto comprobata, & vt per vniuersum Christianum orbem conseruarentur, in vsumq̃ue inducerentur, promulgata ac mandata fuerunt, plenè præstare & exequi omnino procures. Et verò quoniam sacri Præsules subditis suis ad rectè viuendum exemplar esse debent, sæcularesq̃ue homines mores suos ad Sacerdotum vitam & exemplum instituere & conformare consueuerunt; da-

operam, Frater, atque effice diligenter, vt Ecclesiæ tuæ Clerum, populumque vniuersum, cum salutaribus monitis ac præceptis, tum etiam virtutum exemplis, & charitatis consiliis & officiis, ad colenda pietatis studia excites & impellas; cauens in primis, ne in te quidquam offendatur, quod animabus tibi commissis peccandi occasionem præbere possit, aut malum exemplum: curabisque diligenter, opportunè & importunè, vt Clerici, qui minùs honestè viuunt, admoniti corrigantur: eos argue, obsecra, increpa, vt probè vitam instituant; ac, si opus fuerit, Ecclesiasticæ disciplinæ seueritatem in eos exerce. Clericorum verò collegium, quod proborum Sacerdotum seminarium ac fundamentum esse debet, ex salutari eiusdem Concilij Decreto, vt quamprimùm erigatur, enitere, erectumque omni ope & officio prosequere. Denique Christi oues, curæ tuæ commissas, ab hæreticorum fraudibus, tamquam à lupis, aut à carnificibus ac latronibus, segregandas & arcendas summo studio contende: dabisque operam quàm accuratissimè, vt, si fortè quispiam in isto grege hac execrandâ peste reperiatur infectus, ne is pernicioso contagio alios commaculet. Confidera, Frater mi, diligenter, ac perpetuò recogita, post breuem fragilis huius & mortalis vitæ cursum, de grege tibi commissio, summo & æterno Pastori, eidemque tremendo ac terribili Iudici, rationem te reddere oportere. Da igitur operam, vt, cum in eius diui-

diuino conspectu fueris constitutus, fidelis serui mercedem, non autem pigri & negligentis mercenarij pœnam, consequi merearis. Ac scito, quemadmodum ad Pastorale munus nostrum rectè præstandum auxilium tuum imploramus, ita planè ad officium tuum strenuè obeundum operam ac studium nostrum tibi non defuturum. Illud verò te monitum volumus, vt omni officio ac diligentia de ciuitatis istius diœcesisque tuæ Clericis indagando probè cognoscas, qui Catholicæ pietatis laude, morum integritate, probitate vitæ, ac doctrinâ præstent, idoneique sint vt huic sanctæ & Apostolicæ Sedi fideliter atque vtiliter inseruire possint. Ac de iis omnibus censu habito, indicem probâ fide conscriptum, & manu sigilloque tuo obsignatum, cum vniuscuiusque nomine, ac loco vbi degat, singillatim adnotato, ad nos cures perferendum. Nos enim, qui omnium fidelium Patris personam licet indigni sustinemus, eiusmodi virorum operâ & industriâ, prout occasio tulerit, ad eas res, quibus ad honorem Dei, & ad sanctæ huius Sedis Apostolicæ obsequia fuerit opus, vti, eosque honestis laboribus ad communem sanctæ Ecclesiæ vtilitatem applicare constituimus. Datum Romæ apud S. Petrum sub annulo Piscatoris, Kalend. Februarij, M. D. LXVI. Pontificatus nostri anno primo.

EPISTOLA II.

Sacri Concilij Tridentini Decreta seruari, Clericorum seminarium iubet institui.

Venerabili Fratri Archiepiscopo Strigoniensi, Regni Hungariæ Primate, & Suffraganeis eius.

Venerabiles Fratres, salutem & Apostolicam benedictionem. Ad exequendum Apostolicæ seruitutis officium, quod non sine timore ac tremore, in spiritus humilitate, diuinæ vocationi obediens, suscepimus, oportet nos omnium, qui in sollicitudinis nostræ partem vocati sunt, auxilio tantò studiosius subleuari, quantò infirmiores vires nostræ, & Ecclesiæ grauiora ac turbulentiora sunt tempora. Nullum enim occurrit nobis, mentem nostram huc & illuc versantibus, aliud remedium, ad Ecclesiam ipsam in commodiorem & tranquilliorem statum redigendam, quàm vt sacrum generale Concilium Tridentinum, quod sub fel. recor. Pio Papâ quarto, prædecessore nostro, Deo auctore, tandem feliciter peractum fuit, vtique seruetur. Nullum certè est aliud remedium, quod tot tantisque malis Ecclesiæ adhiberi possit nullum restat auxilium, quo possit Religioni Catholicæ & saluti gregis Domini subueniri. Hoc bonorum omnium

nium votis optatum, hoc precibus à Deo semper expetitur fuit. Proinde vos in Domino salutantes obtestamur, vt officij vestri memores, cùm alia, quæ tam piè, tam maturè, tam prouidè in ipso Concilio statuta fuerunt, debitâ obedientiâ obseruare curetis; tum illud de Clericorum seminario in vtrâque Ecclesiâ instituendo: quo nihil vtilius, nihil his temporibus Ecclesiis opportunius neque accommodari statui potuit. Actum de eâ re fuisse vobiscum audimus, dum idem prædecessor noster viueret, à dilecto Filio nostro Zachariâ Cardinale Delfino, & à duobus aliis Sedis Apostolicæ Nuntiis; & vos responsum, dignum vestrâ erga hanc Sedem deuotione & reuerentiâ, dignum vestrâ pietate, dedisse; & speramus, vos id, quod promisistis, præstituros. Sed quia vehementer optamus, Decretum, quod tantopere Ecclesiæ vtile esse constat, atque ad eò necessarium, sine longiore morâ ad effectum vbique, quacumque ratione fieri poterit, adduci; mandauimus dilecto Filio Antonio de Grosupeto, Ordinis Prædicatorum Professore, viro nobis probatissimo, vt vos ad id, quod tum polliciti fuistis, sine longiore morâ præstandum nostro nomine moneat & hortetur. Cuius orationi fidem vt habeatis, & vt præclarum testimonium, quod de vobis ab eodem Cardinale habuimus, re comprobetis, petimus. Si quid autem ipsi à nobis requiritis, quod vobis ac vestris Ecclesiis opportunum sit,

fit, desiderijs vestris, quatenus cum Deo poterimus, satisfacere, & vos, vt eximios Fratres, iuuare atque honorare curabimus. Datum Romæ apud S. Petrum sub annulo Piscatoris, die XI. Februarij, M. D. LXVI. Pontificatus nostri anno primo.

EPISTOLA III.

Magistrum Hospitalis S. Ioannis Ierosolymitani, quod nouam urbem in insulâ Melitâ contra Turcas præsidio futuram seriùs inchoasset, clementer excusat, eumque à consilio inde discedendi reuocat.

Dilecto Filio Ioanni de Valetta, Magistro Hospitalis S. Ioannis Ierosolymitani.

Dilecte Fili, salutem & Apostolicam benedictionem. Lectis litteris tuis die XXIII. Februarij datis, & iis, quæ mandato tuo nobis Cambianus Orator tuus exposuit, auditis, cognouimus, te certiore factum fuisse, conceptam à nobis esse quamdam minùs commodam de te opinionem, quòd non eâ quâ opus fuerit diligentia, illa quæ ad istius insulæ defensionem necessaria sunt, paraueris. Molestè ferimus, hoc de nobis te suspicari, qui de te non possumus non honorificentissimè & sentire semper, & loqui, & tua merita in Christianam Rempublicam prædicare, qui viderimus, quantâ virtute, quantâque constantiâ superiore anno à potentissimorum

morum hostium assiduis tot mensium oppugnationibus insulam istam defenderis; & quantâ cum laude & gloriâ tuâ eos ad extremum, multis & maximis acceptis detrimentis, recedere coëgeris; ac Siciliam & Italiam tuis laboribus & periculis, ac plurimo tuorum sanguine, ex tanti belli periculo eripueris. Illud tamen fatemur, non defuisse, qui diligentiam tuam nonnullis in rebus, & in eâ maximè, desiderauerint, quòd non statim post discessum hostium, nouum oppidum condere aggressus sis, sicuti Prædecessori nostro promissum fuerat: qui eo promisso inductus, illam pecuniæ summam ad urbem nouam condendam pollicitus fuit, cuius etiam partem soluit, vt ea vrbs quamprimum inchoaretur. Nostamen, quo minùs inchoata fuerit, culpâ tuâ factum non esse putamus, sed rerum necessariorum inopiâ, quam in tuis litteris excusas. Neque enim adduci possumus, vt credamus, te, cùm tantam gloriam tibi illo obsidionis atrocissimæ tempore compararis, indiligentiâ postea quadam eam imminui passurum fuisse, & in re tam necessariâ officio tuo defuisse. Non possemus tamen non improbare & reprehendere consilium tuum, si id faceres, quod tibi in animo esse scripsisti, vt, relictâ insulâ Melitâ, te cum tuo Ordine in Siciliam reciperes, præsidio illis duabus arcibus tantùm imposito, quòd hac ratione putes Ordinem tuum faciliùs à classe Turcicâ defensum iri. Etenim pro tuâ pruden-

dentiâ cogitare debes, si tu inde discederes, hostes
facile cùm reliquas insulæ partes statim, tum illas
duas arces breuî in potestatem suam redacturos fore:
atque ita illâ Insulâ, quæ Siciliae imminet, quod
Deus auertat, amissâ, Siciliam & Italiam deinceps,
& totam Christianam Rempubicam in maximum
periculum adductum iri: atque ita futurum, vt laus
& gloria tibi & Ordini tuo superiore anno parta
non modò euanescat, sed in maximum dedecus con-
uertatur. Neque verò existimatio vestra tantum
agitur, sed ipsius Ordinis vestri salus. Neque enim
Principem vllum reperturi essetis, qui vos vllò suæ
ditionis loco reciperet, cùm attenderet, vobis reci-
piendis, & aliquo vobis oppido attribuendo, futu-
rum, vt bellum Turcarum ad se attraheret. Quod
si disiecti & segregati, sibi quisque vestrûm consi-
lium caperet, & præceptoriiis suis frui se posse spe-
raret; cogitare debet, non defuturos, quibus occa-
sio hæc minimè prætermittenda videretur, ipsas
præceptorias vestras occupandi, & de iis quidquid
sibi libitum fuisset faciendi. Hæc pro tuâ prudentiâ
cogitans, statuere & deliberare debes, desistendum
tibi esse consilio tuo Insulæ relinquendæ: sed in eâ
permanendum, vnâ cum ipso tuo Ordine. Urgebit
maiores in modum præsentia tua; & cùm animos
Christianorum militum accendet, tum hostes ipsos
deterrebit, à quo se superiore anno victos fuisse me-
minerint: maiorisquæ momenti tua vnus erit præ-
sentia,

sentia, quàm, si tu abesses, magna militum manus. Quòd si superiore anno tam parua manu potuisti, Deo iuuante, hostes repellere; quantò magis confidere debes, Hispaniarum Regis Catholici auxiliis, & nostris, adiutum, præter illa quæ ipse conducturus es, te illos repulsurum, cum quibus etiam acie ipsâ, si necesse fuerit, poteris dimicare, nedum pauca aduersus eos præsidia tueri? Quid verò animi futurum ipsis hostibus, dimicaturis cum tantò maiore Christianorum militum numero, quàm is fuit, à quo superiore anno deuicti fuerunt; & ipsorum copiis futuris, vt verisimile est, minoribus, propterea quòd Turcarum tyrannum bellum aliâ ex parte Christianis terrâ illaturum esse pro certo habetur? Mane igitur, dilecte Fili, in præsidio tuo, mane in possessione laudis & gloriæ, quam tibi apud omnes gentes immortalem peperisti. Non defutura tibi auxilia sunt Regis Catholici, cuius ipsius gloria, & Regnorum salus agitur. Non deerunt nostra, qui sanguinem ipsum parati sumus pro Dei Redemptoris nostri honore, & pro Christianæ Reipublicæ salute profundere. Aderit verò in primis tibi Deus ipse, qui priore anno tam manifestò etiam iuuit. Non deerit supernum eius auxilium militibus suis. Quod quò certius adsit, nos omnes pias & religiosas personas, & vniuersos Christi fideles ad id inuocandum apertis Ecclesiæ thesauris nuper inuitauimus. Regem autem, etsi non dubitamus, parari

iam iussisse auxilia, & reliquas res quas pollicitus fuit; tamen ad eum nos hoc tempore scribimus, ad mittenda vobis primo quoque tempore auxilia promissa nostris litteris vehementer vrgentes: scribimus etiam ad Proreges Neapolis atque Siciliae, eos exstimulantes, vt eas res, de quibus mandatum à Rege acceperunt, sine morâ vobis subministrent. Datum Romæ apud sanctum Petrum sub annulo Piscatoris, die XXII. Martij, M. D. LXVI. Pontificatus nostri anno primo.

EPISTOLA IV.

Concubinatus labem ex Clero omnino tolli, & Ecclesiasticorum mores corrigi iubet. Eodem exemplo litteras dedit Archiepiscopo Moguntino & Treuirensi. Vide lib. II. cap. I. Vitæ PII V.

Io. Iacobo Archiepiscopo Salisburgensi.

Venerabilis Frater, salutem & Apostolicam benedictionem. Relatum est nobis à viris rerum Germaniæ peritis, & Dei zelo præditis, plerosque eorum qui beneficia & dignitates Ecclesiasticas obtinent, quos oporteret officij sui memores laicis exempla præbere rectè honesteque viuendi, abiecto Dei timore, & sine vllâ hominum verecundiâ, concubinas palàm habere, easque perinde ac si legitimæ eorum vxores essent, in Ecclesiis & aliis locis

locis publicis conspici, vulgò iisdem, quibus illi vocantur, officiorum & dignitatum nominibus appellatas; eoque hæreses tantopere creuisse ac multiplicatas fuisse, quòd Ecclesiastici tam turpiter & nequiter viuendo omnem planè existimationem amiserint, & in summam non apud hæreticos modò, sed etiam Catholicos, contemptiorem venerint: quo tam graui scandalo commoti, ad illud tollendum non mediocriter pro nostri officij sollicitudine exarsimus. Nisi enim tam nefandum concubinitus vitium extirpetur, nullam spem reliquam esse videmus, reprimi posse hæreses. Sed timemus (quod Deus auertat) ne breui tempore istæ, quæ supersunt, Catholicorum reliquiæ amittantur, & omnis prorsus Catholicæ Religionis cultus apud nos extinguatur. Etsi autem te hortatione nostrâ non egere confidimus; tamen pium animum tuum Apostolicis monitis & hortationibus incitandum duximus. Proinde Fraternitatem tuam etiam atque etiam hortamur & monemus, vt, cum scias, ruinam populi esse improbos sacerdotes, & pro tuâ prudentiâ intelligas, si Ecclesiastici corrigantur, sperari posse, futurum vt laici quoque emendentur, atque ita hæreticis propagandarum hæresum materia subtrahatur; Clerum tam diœcesis tuæ quàm ciuitatis, primo quoque tempore visites, & vitâ omnium & moribus inquisitis, quæcumque in eis corrigenda reperis, Deum tantum respiciens, corrigas; & cum alia

vitia, tum in primis tam detestandum concubina-
 tus vitium extirpes: subiectos tibi ordinariâ tuâ,
 exemptos autem nostrâ, quam tibi, quatenus opus
 sit, tenore præsentium delegamus, auctoritate, iux-
 ta canonicas sanctiones coërceas ac punias. Quia
 verò Suffraganeos quoque tuos ad idem hortandos
 duximus, petimus, vt nostras ad singulos eorum lit-
 teras, quas cum his coniungendas esse iussimus, di-
 ligenter cures perferendas. Datum Romæ apud
 S. Petrum sub annulo Piscatoris, die xvii. Iunii,
 M.D.LXVI. Pontificatus nostri anno primo.

EPISTOLA V.

Vt ad sedandos tumultus, in Flandriam traïciat, Hispaniarum Regem hortatur. Vide lib. II. cap. X. Vitæ PII. V.

Charissimo in CHRISTO Filio nostro, Philippo
 Hispaniarum Regi Catholico.

Charissime in CHRISTO Fili noster, salutem
 & Apostolicam benedictionem. Cogit nos
 & commissum nobis à Deo officium, & paternus
 erga te amor, eâ de re cum Maiestate tuâ agere, de
 quâ sæpiùs iam egimus; & quò peiore in dies loco
 res Flandriæ esse audimus, eò impensius hortari,
 monere & instare, vt sine longiore cunctatione ad
 eos sedandos tumultus sese conferat. Potest etiam
 nunc Maiestas tua, si illuc ierit, aut saltem in Ita-
 liam

liam primo quoque tempore venerit, & eò firmum exercitum præmiserit, salutis eius provinciæ prouidere: sed si segnius egerit, tum cupiet illis rebus succurrere, cum minimè poterit. Crescit in dies studiosis nouarum rerum hominibus animus, quòd nondum Maiestatem tuam te istinc commouere audiunt: è contrario autem debilitantur & franguntur Catholicorum animi, quòd nondum certum vllum nuntium acceperunt te ex Hispaniâ discessurum. Proinde hortamur te, & rogamus, ac per Redemptorem nostrum obtestamur, charissime Fili, vt, cum primùm veniendi facultatem nactus fueris, omni morâ omisâ in Italiam venias. Quò cum veneris, de eundo in Flandriam commodius deliberare poteris. Fama ipsa interim tui in Italiam aduentus, si modò maturè, & cum magnis copiis veneris, non parum eorum, qui in fide & deuotione manent, animos confirmabit, & rebelles ac seditiosos deterrebit. Plurimùm autem Maieitati tuæ expedire censemus, fauorem tibi in hoc bello adiungere Christianissimi Francorum Regis, affinis tui: quem tibi propensè affuturum esse confidere debes; sicut nos quoque intelligere cœpimus: propterea quòd ipsi quoque non parum expedit, cum Regnum plenum hæreticis & seditiosis hominibus habeat, qui essent cum hæreticis Flandriæ societatem initura, incendium illud abs te extinguere, ne latius serpat, & ad ipsum quoque traijciat. Utinam perspicere
planè

planè posset Maiestas tua curam & angorem nostrum, cùm tamquam ea quæ oculis aspiciuntur, cernamus ruinam quæ imminet, nisi tanto periculo per te obuiam eatur. Itaque non contenti his litteris, hac eadem de re cum Maiestate tuâ quàm diligentissimè agere volumus venerabilem Fratrem nostrum Archiepiscopum Rossanensem, Nuntium nostrum; auidissimè aliquem certum nuntium de te in Italiam venturo expectantes. Datum Romæ apud S. Petrum sub annulo Piscatoris, die XVII. Ianuarij, M. D. LXVII. Pontificatus nostri anno secundo.

EPISTOLA VI.

Ecclesiarum in Regno Neapolitano visitationem impediri non debere, ut habetur lib. III. cap. I. Vitæ PII V.

Dilecto Filio Gaspari Quirogæ Con-
filiario Regio.

Dilecte Fili, salutem & Apostolicam benedictionem. Quia probitatem & integritatem tuam cognitam habemus, & te scimus, eâ quâ decet deuotione, sanctam hanc Sedem prosequi; idcirco gauisi sumus, te assumptum fuisse in concilium Regium, & charissimi Filij nostri Regis iudicium magnopere probauimus. Nullum autem tam pio Regi præstari à te officium, vel te dignius, vel quod
ei

ci gratius esse debeat, potest, quàm si de iis rebus certio rem eum facere curaueris, quæ ad Dei obsequium, & ipsius honorem atque existimationem pertinent. Cùm pro commissio nobis officio misissemus quemdam nobis valdè probatum Episcopum, qui in Cleris ciuitatum quarundam Regni Neapolitani, ea quæ essent exploranda, cognosceret, nosque edoceret, vt quæ corrigenda essent corrigere possemus; tam pium ac necessarium mandatum Apostolicum exequi minimè potuit, nisi Regium diploma, quod vocant Exequatur, quod hoc illi permitteret, acciperet. Sanè commoti fuimus, vbi hoc audiui mus. Nimis enim indignum nobis visum est imminui tantopere hac in re ius atque auctoritatem nostram, & Apostolicæ Sedis dignitatem, in eo præsertim Regno, quod iuris ipsius est, nec posse nos Ecclesiasticas personas per eos, quos miserimus, visitare, nisi hoc à ministris Regiis permittatur. quod aliud non est, quàm superbè velle ei Sedi præscribere, cuius præceptis & monitis, si Christiani & Catholici sunt, reuerenter & humiliter parere debent. Cùm igitur tantam huius sacrosanctæ Sedis contumeliam & iniuriam nec velimus, nec debeamus animo æquo ferre, nec dissimulare; charissimum Filium nostrum Regem, quo ignorante tale committi persuasum habemus, de hac re edocendum curauimus, & hortandum, vt consulat famæ atque existimationi suæ, & huius sanctæ Sedis

dignitati, cuius auctoritatem & ius censuris Ecclesiasticis tueri ac defendere cogeremus, si eius iniurias, quod credere non possumus, Rex negligeret. De eâdem autem re scripsimus ad dilectum Filium Didacum Spinofam, Regij Concilij Præsidem, cum quo loqui poteris. Datum Romæ apud S. Petrum sub annulo Piscatoris, die xvii. Ianuarij, M.D.LXVII. Pontificatus nostri anno secundo.

EPISTOLA VII.

Præstitum per Oratorem obedientiæ officium se grato animo accepisse scribit, Regem Poloniae, ut, hæreticis amovendis, probis administris Catholicis uti velit, hortatur. Vide lib. III. cap. X. Vitæ PII V.

Charissimo in CHRISTO Filio nostro Sigismundo Regi Poloniae illustri.

CHarissime in CHRISTO Fili noster, salutem & Apostolicam benedictionem. Ex obedientiâ, quam per dilectum Filium, nobilem virum, Petrum Barzæum, Oratorem tuum, nobis & Apostolicæ Sedi, more institutoque omnium Catholicorum Regum, reuerenter admodum præstitisti, libentissimè agnouimus deuotionem ac pietatem, quâ maiorum tuorum piæ memoriæ Regum exemplo, sanctam hanc Sedem prosequeris, ac tale officium grato, perinde ac debuimus, animo accepimus. De dilecto

dilecto Filio Petro Miscouio, Coadiutore Placensi, Regni tui Vice-cancellario, Maiestatis tuæ desiderio, & tuæ commendationis causâ, & propter eius virtutes ac merita, libenter satisfacimus. Indulsumus enim, vt Decanatum Cracouiensem retinere possit, sicut rogasti; ad Sedis tamen Apostolicæ beneplacitum, quam confidere debes non reuocaturam gratiam suam, iisdem manentibus causis. Libenter ex tuis litteris intelligimus, quàm grata tibi & opportuna sit eius opera in illo munere obeundo. Talium ministrorum vehementer cuperemus habere te copiam magnam; multò enim meliore loco res istius Regni essent: est autem prudentiæ tuæ, viros tali fide & probitate præditos, & cùm honoris tui tum Catholicæ Religionis studiosos, diligenter conquirere atque prouehere, eisquæ potissimum Officia, Præfecturas & Magistratus committere atque mandare. Id ad continendos in Religione Catholicâ, & fide & deuotione erga Maiestatem tuam populos, remedium omnium vtilissimum experieris: sicut econtrâ nihil potest inutilius esse, nec perniciosius, quàm eorum operâ in Magistratibus vti, qui hæreticæ prauitatis labe polluti sint. tales enim ministri potestate sibi commissâ, ad deprauandos populos & disseminanda hæreticæ prauitatis zizania, abutuntur; non honorem, non famam Regiam diligunt; sui similibus, hoc est hæreticis, fauent; bonos & Catholicos insectantur & opprimunt;

Ecclesiasticis verò personis in primis inimici atque infesti sunt. Quocircà hortamur, vt in hac re, quàm maximam potes, semper diligentiam ac circumspeditionem adhibeas; & si quos minùs tibi, quales essent, cognitos, vllis officiis nimîa quadam facilitate præposuisti, eos quamprimùm poteris remoueas, aliis in eorum locum, qui Catholici sint, succectis: & omnibus aliis remediis, quibuscumque potes, sicuti ceteros quosque Reges & Principes hortari non desistimus, enitere, vt hæreticæ prauitatis pestem in Regno tuo reprimas. Illud enim, charissime Fili, semper cogitare debes, quod admonere quoque alios Reges consueuimus, ita potestatem Regiam tibi, & ceteris Regibus, ab illo Rege Regum datam fuisse, vt actionum & operum vestrorum rationem ei reddituri sitis. Hæc breuî Maiestatem tuam admonendam duximus, quia nos quoque de officio nostro, & de te ac ceteris Principibus rationem reddendam fore meminimus. Quæ paterno animo à nobis dicta, Maiestatem tuam non dubitamus ipsam quoque pio esse animo accepturam. Datum Romæ apud S. Petrum sub annulo Piscatoris, die XIII. Ianuarij, M. D. LXVII. Pontificatus nostri anno secundo.

EPISTOLA VIII.

Scotiæ Regina virtutem ac pietatem commendat, eiûque de filio nato gratulatur, atque illum Catholico ritu baptizari mandat. Vide lib. III. cap. VIII. Vita PII V.

Charissimæ in CHRISTO Filia nostræ
Mariæ Scotiæ Reginae.

Charissima in CHRISTO Filia nostra, salutem & Apostolicam benedictionem. Ex literis tuis & à nuntio tuo de tuâ incolumitate optatissimum & iucundissimum nuntium accepimus. Grata, lectis tuis, fuisse officia nonnulla erga te nostra gaudemus. Non tam ex illis tamen quàm ex meritis tuis metiri animum nostrum debes: illa enim minora voluntate nostrâ fuerunt. Tibi verò pro virtute tuâ, pro constantiâ, pro pietate & deuotione erga hanc sanctam Sedem eximiâ ac singulari, multò maiora debentur. Quod Nuntij nostri opportuno iam tempore è Galliâ ad te accersiti aduentum tibi gratum fore significas, & studium atque auxilium tuum ei non defuturum esse polliceris, ad ea quæ ad Dei honorem & Regni tui tranquillitatem constituendam pertinebunt; libenter admodum id cognouimus, optamusque, vt quàm opportunissima tibi Regnoque tuo sit eius præsentia. De filio tibi nato ingentem lætitiâ capimus; & cùm Serenitati tuæ de tanto Dei munere denuò gratula-

mur, tum ex hoc initio reliqua quæ ad salutem istius Regni pertinent, nobis expectare posse videmur. Quod eum baptizandum publicè curatura eras, laudamus in Domino pium studium tuum reducendi in vsum & consuetudinem sanctos Ecclesiæ Catholicæ ritus in tanto Sacramento administrando. Faxit misericors Dominus, vt isto exemplo, ij qui decepti miserandum in modum ab hæreticis fuerunt, in vero ac salutari huius & aliorum Sacramentorum vfu, ad ea rectè riteque & salubriter suscipienda, commoueantur, &, eiectionis errorum tenebris, Catholicæ veritatis lucem recipiant. Filio verò isti tuo Deus gratiam in sacro Fonte suscipiendam perpetuò conseruet, tibi que lætitiā ex eo conceptam in dies magis augeat, atque aliis multis donis & gratiis munus suum cumulet. Reliqua cognosces ex nuntio tuo: quem desideria tua nobis exponentem, eā quā decuit benignitate audiuius, & ad te cum nostrā benedictione remisimus. Datum Romæ apud sanctum Petrum sub annulo Piscatoris, die XXII. Ianuarij, M.D.LXVII. anno Pontificatus nostri secundo.

EPISTOLA IX.

Concilij Tridentini Decreta exequi, deprauatosque mores corrigi, vt pro suo munere procuret, Archiepisc. Cameracensem hortatur: vt habes lib. I. cap. II. de Vitâ PII V.

Venerabili Fratri Maximiliano Archiepiscopo Cameracensi.

Venerabilis Frater, salutem & Apostolicam benedictionem. Ex pluribus Fraternitatis tuæ litteris perspectum desiderium exequendi sacri Concilij Tridentini Decreta, magnis, vt debemus, in Domino laudibus prosequimur. Id ipsum nos pro commissâ nobis Ecclesiarum omnium solitudine quantopere cupiamus, re ipsâ ab omnibus iam cognitum fuisse putamus. Frustrâ certè tot & tam salubria Decreta facta fuissent, nisi ea in vsum & consuetudinem per nos, & te, atque alios Fratres nostros adducerentur. Sed postulatione tuâ à nobis, vnâ cum venerabilibus Fratribus nostris Cardinalibus Congregationis sacri Concilij, maturè considerata atque perpensâ, existimauimus, Fraternitatem tuam eo contentam esse in præsentia debere, si, non obstante indulto exemptionis dilectorum Filiorum Capituli Cameracensis, & concordia cum prædecessoribus tuis initâ, & abs te iuratâ, vices nostras tibi, in iis quæ ad correctionem morum pertinent, delegaremus. Non paruum sanè, si diligenter attendas,

das, facultatem tibi impertitam esse cognosces expromendi pium zelum tuum: latè patet correctio morum; ad eos corrigendos Fraternitas tua sedulò & diligenter vnà cum suis Suffraganeis incumbat. Cleri corrupti & deprauati mores sicut hæresum initium attulerunt; ita, si correcti fuerint, primum id & præcipuum remedium erit extirpandarum hæresum. Hac in re vbi cum grege tibi commissò officium tuum præstiteris, ad ea quæ restabunt perficienda viam tibi munies ac patefacies. Datum Romæ apud S. Petrum sub annulo Piscatoris, die xxvi. Ianuarij, M. D. LXVII. anno secundo Pontificatus nostri.

EPISTOLA X.

Cancellarij in tuendâ Catholicâ Religione studium commendat, vt Clericorum seminarium in Ecclesiâ Frisingensi institui, aliaque pietatis officia præstari curet, hortatur. Vide lib. II. cap. I. Vitæ PII V.

Dilecto Filio Simoni Thadæo Echio, dilecti Filij, nobilis viri, Alberti Bauariæ Ducis Cancellario.

Dilecte Fili, salutem & Apostolicam benedictionem. Inter ceteros istius inclytæ nationis, quos in tantâ hæresum multitudine permanere adhuc in Catholicæ Ecclesiæ vnitæ, & fidei orthodoxæ

doxæ constantes esse defensores ac propugnatores accepimus, luculentum tibi testimonium à viris grauib. apud nos datum fuit. Sic enim relatum nobis fuit, nullo te loco Catholicæ Religioni deesse; sed quocumque studij & officij genere possis, eam aduersus hæreticos tueri atque defendere. Latamur admodum, & Deo gratias agimus, quòd supersunt adhuc viri vetere Germaniâ digni, quos nulla Ecclesiæ procella, nullæ hæreticorum fraudes potuerunt ab Ecclesiæ corpore abducere ac segregare. Dilecti verò Filij nobilis viri Alberti Bauariæ Ducis ex hac re quoque singularem prudentiam, & pietatem eximiam, libenter agnouimus, qui talium virorum operâ & consilio vtatur, eosque præcipuè honoret. Quia verò, Catholicorum reliquias in istâ nobili natione, quantâ maximâ possumus diligentia, pro commissio nobis officio tueri & conseruare cupientes, plurimùm expedire duximus, in Ecclesiâ Frisingensi, cuius, vt scis, administrationem in temporalibus commisimus dilecto Filio Ernesto, ipsius Ducis filio, Seminarium iuxta sacri Concilij Tridentini saluberrimum Decretum erigere, deuotionem tuam hortandam in Domino duximus, vt ad eam rem perficiendam, & ad omnia quæ in illâ Ecclesiâ atque diocesi reformanda fuerint, quidquid poteris studij & auxilij, propensè impertias. Quod etsi te, pro tuo diuini honoris studio, etiâ sine hortatione nostrâ facturum esse confidebamus; ta-

men te ex his litteris intelligere volumus, talia tua officia nobis quoque grata esse futura; sicut ex dilecti Filij Magistri Ioannis Phisteri Canonici Frisingensis, & Sedis Apostolicæ Protonotarij, relatione cognosces: quem officio sibi commisso prudenter & diligenter admodum functum, ad ipsum Ducem cum nostrâ benedictione remisimus. Datum Romæ apud S. Petrum sub annulo Piscatoris, die XIV. Februarij, M. D. LXVII. Pontificatus nostri anno secundo.

EPISTOLA XI.

Anglos Catholicos Religionis causâ patriâ pulsos, & in Belgium receptos, ut omnibus charitatis officiis benignè fouendos curet, Regi commendat: ut lib. III. cap. IX. Vitæ PII V. legitur.

Charissimo in CHRISTO Filio nostro Philippo
Hispaniarum Regi Catholico.

Charissime in CHRISTO Fili noster, salutem & Apostolicam benedictionem. Etsi omnium, qui calamitatibus affecti sunt, misereri, Christianæ charitatis officium est; tamen ij præcipuè misericordiâ & primùm omnium auxilio digni sunt, qui exilium pati, & domos ac facultates suas amittere, & grauissimas calamitates atque ærumnas subire præoptarunt, quàm à Catholicâ Religione deficere,

deficere, rebus omnibus humanis diuini honoris gloriam, & orthodoxæ fidei cultum præferentes. Quò pauciores autem reperiuntur vbique his turbulentissimis Ecclesiæ temporibus, qui tali virtute, grauitate, constantiâ præditi, non charissimarum & iucundissimarum rerum amissione permoueantur, neque aut propositorum præmiorum spe, aut periculorum metu à CHRISTO & eius corpore Ecclesiâ separari sese patiantur, eò studiosius iuari & subleuari illos conuenit. Cùm igitur complures Anglos Catholicos ex illâ Angliæ miserabili tempestate, ne vllâ hæreticæ prauitatis contagione polluerentur, in Flandriam profugisse, & Louanium & in alias ditionis tuæ ciuitates sese recepisse cognouerimus, quos necessariorum rerum inopiâ premi, ac vehementer laborare non sine dolore audimus; nostrum officium esse existimauimus, non modò eorum egestatem aliquo subsidio subleuare, sicuti fecimus, & facere in animo habemus; sed Maiestati etiam tuæ tantam occasionem æternæ mercedis, & superni præsidij, tibi ac rebus tuis promerendi, indicare. Quocircà tua apud Deum merita crescere cupientes, pietati eos tuæ maiorem in modum commendamus, hortantes, vt tales Dei seruos illius amore, cuius causâ exulant, & cuius tu beneficio regnas, commendatos habeas, & liberalitate tuâ complectaris ac foueas. Ad quod non esse te longiori oratione à nobis incitandum nouimus, cùm sciamus,

D 2 quàm

quàm sis ad huiusmodi opera, sicut Rege verè Catholico dignum est, propensus. Datum Romæ apud sanctum Petrum sub annulo Piscatoris, die XXI. Februarij, M. D. LXVII. Pontificatus nostri anno secundo.

EPISTOLA XII.

Deprauatis sacrorum hominum moribus hæreses potissimum excitari ostendit: quod vt caueatur, eos ad vitam moresque suos piè componendos, & ad Christianam disciplinam religiosè conformandos, Clericorumq; Seminarium ritè instituendum, hortatur. Vide lib. II. cap. I. Vitæ PII V.

Dilectis Filiis, Abbatibus quorumcumque Ordinum, & Præpositis in Frisingensi diœcesi constitutis.

Dilecti Filij, salutem & Apostolicam benedictionem. Cùm nobiscum ipsi cogitamus, quæ res materiam præbuerit tot tantisque pestiferis hæresibus, quæ in Germaniâ ortæ per vniuersas postea ferè Christiani nominis prouincias propagatæ fuerunt; tanti mali causam præcipuè fuisse iudicamus, corruptos Prælatorum mores, qui officij sui immemores, ac salutis obliti, Ecclesiasticorum bonorum fructus & reditus non in pios & honestos, vt debuerant, vsus conuertentes, sed ad voluptates suas,

suas, ad luxum, ad pompas & vanitates sæculi abutentes, eandemque viuendi licentiam, iis quibus præerant, permittentes, & exemplo eos suo corrum-pentes, maximum apud laicos odium, contemptio-nem & inuidiam non immeritò contraxerunt. Ita enim factum est, vt populos illorum vitæ nequitia vehementer offensos hæretici faciliè hæresum sua-rum venenis infecerint, eisque quidquid voluerint, quamuis impium, & Catholicæ veritati apertè re-pugnans, persuaferint. Quod cum ita sit, huic ma-lo nullum constat aptius nec magis necessarium ad-hiberi posse remedium, quàm, vt ij qui licenter & inhonestè ad hoc tempus vixerunt, de salute suâ & de commisso sibi officio diligentius cogitantes res-piscant, & sese ac vitam suam corrigant, recordan-tes, se actionum suarum in tremendo Iudicij die rationem esse æterno illi Iudici reddituros. Itaque de vestrà, & eorum simul quibus præestis, salute solliciti, in Domino vos hortamur, & paternè ad-monemus, vt vnusquisque vestrùm in vitam & mo-res suos diligenter inquirens, in seipso corrigat, quid-quid corrigendum esse sua eum conscientia monue-rit; & dum potest, dum tempus habet, præteritas culpas & negligentias pœnitentiâ ac morum muta-tione redimere properet; & cum vitæ honestioris exemplo, tum etiam hortando, monendo, arguen-do, & increpando, eos quibus præest corrigere, & ad bonam, vt dicitur, frugem reducere studeat,

quidquid in eis emendandum & reformandum no-
uerit, secundum sacros Canones & Ordinis sui re-
gularia instituta emendans atque reformans. Et si
autem communiter aliis litteris omnes, qui diœce-
sanæ Frisingensi Synodo interfuturi sunt, hortati su-
mus, vt ad Seminarium in ciuitate Frisingensi ex
Decreto sacri Tridentini Concilij instituendum de
reditibus beneficiorum Ecclesiasticorum conferant;
tamen his quoque litteris vos propriè hortamur, vt
prompto animo in opus tam pium, quantum æ-
quum fuerit, pro modo reddituum vestrorum con-
feratis, cum nullam in rem vel Deo gratiorem, vel
Ecclesiæ ac toti diœcesi salubriorem, eam pecuniam
erogare possitis. Datum Romæ apud S. Petrum sub
annulo Piscatoris, die vltimâ Februarij, M. D. LXVII.
Pontificatus nostri anno secundo.

EPISTOLA XIII.

*Diœcesanam Synodum ritè haberi, & Clericorum Semi-
narium institui, rectèque curari hortatur: vt lib. II.
cap. I. Vitæ PII. V. habetur.*

Dilectis Filiis Abbatibus, Capitulis, Præpo-
sitis, Canonicis, & Clero vniuerso in Frisin-
geni diœcesanâ Synodo congregandis.

Dilecti Filij, salutem & Apostolicam benedi-
ctionem. Præter alia, quæ in sacro Oecu-
menico

menico Tridentino Concilio ad tollendos abusus, & reformandam Ecclesiasticam disciplinam, vtiliter admodum & prouidè statuta ac sancita fuerunt, nemo est qui non intelligat, quantopere Decretum eius de diœcesanis Synodis habendis salubre, & hoc tam calamitoso Ecclesiæ tempore necessarium fuerit. Itaque vos omnes & singulos in Domino hortandos duximus, vt ipsius Ecclesiæ necessitatem vobiscum reputantes, in vestrà Synodo celebrandâ fideliter & diligenter officium vestrum Deo, ipsique Ecclesiæ præstetis; & quæ iuxta sacros Canones, ipsiusque Tridentini Concilij Decretum, in tali Synodo agenda; constituenda corrigendæue fuerint, ita agatis, constituatis & corrigatis, vt ipsa Ecclesia fructum, quem optamus, ex huiusmodi Synodi celebratione percipiat, nosque religiosum & pium studium vestrum collaudare in Domino debeamus. Quia verò Seminarium, sicut idem Concilium decreuit, in eadem Ecclesiâ instituere in primis expedit, atque adeò necessarium est, in quo pro diœcesis Frisingensis magnitudine certus puerorum & adolescentium numerus bonâ ad virtutem & pietatem indole præditorum, qui spem afferunt, se Ecclesiæ ipsique diœcesi esse vtilis euasuros, sub virorum fidei vitæque probatissimæ curâ atque regimine alatur, & bonis moribus ac disciplinis Ecclesiasticis instruatur: ad eos autem alendos, quia non paruis sumptibus opus est; vestrum officium est, vt pro
ratâ

ratâ vestrorum Ecclesiasticorum reddituum portione subsidium aliquod annuum in tam pium & vtile opus propensè conferatis. Quod vt faciatis, vobis in virtute sanctæ obedientiæ mandamus, atque præcipimus. Quâ eâdem de re vobiscum mandato nostro coràm aget dilectus Filius, Magister Ioannes Phisterus, Canonicus Frisingensis, qui has vobis litteras reddet: eius orationi fidem habeatis. Datum Romæ apud S. Petrum sub annulo Piscatoris, die vltimâ Februarij, M. D. LXVII. Pontificatus nostri anno secundo.

EPISTOLA XIV.

Puerum Episcopum non eligendum, in eâque re non temporalia, sed spiritualia bona spectari oportere, atque Halberstadenſi Ecclesiæ virum tanto muneri idoneum Episcopum dandum esse demonstrat. Vide lib. VI. cap. IX. de Vitâ PII V.

Dilectis Filiis, Præposito, Decano, & reliquo
Capitulo Ecclesiæ Halberstadenſis.

Dilecti Filij, salutem & Apostolicam benedictionem. Postquam lectis litteris vestris, & postulatione vestrâ cognitâ, nobiscum de eâ re cogitare cœpimus, non potuimus non admirari, his tam calamitosis temporibus, ad eiusmodi vos consilium descendisse. Attendimus quidem, quæ vos
ratio-

rationes impulerint : sed eâ in re videmus, vos plus necessitatem Ecclesiæ, quoad temporalia attinet, quàm quoad spiritualia, respexisse. Brunswicensem Ducem amamus nos, vt Principem Catholicæ Religionis studio, & erga sanctam Sedem Apostolicam obseruantia excellentem, omni à nobis cum honore dignum esse scimus; fauemus eius nepoti, eumque tali auo dignum euadere cupimus. Sed ita eos diligimus, vt conscientiam nostram, & existimationem huius sanctæ Sedis, minimè lædendam esse putemus. Nimis absurdum, nimis alienum ab instituto Pontificatus nostri foret, nimis non Catholicos modò, sed etiam Ecclesiæ aduersarios, & huius sanctæ Sedis inimicos offensurum, si puero illâ ætate Ecclesia ista nobis approbantibus committeretur. Quam Deo rationem in tremendo Iudicij die facti nostri reddere possemus? Quid non modò Catholici, sed ij etiam qui ab Ecclesiâ recesserunt, dicturi essent, si potestate nobis ad ædificationem datâ à Deo abuteremur? Requisiuius hac in re sanè prudentiam vestram. Illud tamen probauimus, quòd vestri officij memores, postulationem vestram, postquam eius rationem reddidistis, arbitrio nostro permisistis; sed vellemus, vos oculos potius ad spiritualia, quàm ad temporalia intendisse: cum dilectus Filius nobilis puer Henricus Iulius, Deo dante, adoleuerit, tum quos illi honores Apostolica Sedes pro dignitate illius familiæ, & pro aui

sui meritis habere poterit, habebit. Numquam hæc Sedes benignitatem suam & gratam voluntatem erga benemeritos Principes desiderari passa est : hoc autem tempore consulendum est summæ istius Ecclesiæ necessitati. Proinde hortamur vos, & pro nostro officio auctoritate Apostolicâ monemus, ut nihil, nisi Dei honorem, & Ecclesiæ utilitatem respicientes, maturo iudicio eligatis in demortui Episcopi locum talem virum, qualem tam calamitosa tempora efflagitant; qui Catholicus sit, qui & vitæ honestate, & litterarum scientiâ tanto muneri aptus sit atque idoneus. Agitur conscientia vestra, agitur ipsius Ecclesiæ salus. Quid prodest consulere temporalibus, si spiritualia negligantur? At verò si Ecclesiæ in spiritualibus præcipuè prouisum fuerit, si vir ad ea tuenda idoneus deligetur, Deo fauente, is temporalia quoque conseruabit, atque tuebitur. Sed eum à vobis deligi oportet, qui morum, ut diximus, honestate commendetur: cuius vita sit ad imitandum omnibus, quibus præsit, proposita: cuius ad mores, tamquam ad normam quamdam, Clerus mores suos corrigat ac reformet. Quam nos certissimam rationem esse reprimendarum hæresum iudicamus; sicut eis excitandis & augendis, & bonis Ecclesiarum temporalibus amittendis, Prælatorum & aliorum Ecclesiasticorum prauos mores præcipuam causam dedisse constat. Datum Romæ apud sanctum Petrum sub annulo
Piscato-

Piscatoris, die XXI. Martij, M. D. LXVII. Pontificatus nostri anno secundo.

EPISTOLA XV.

Puerum in Episcopum electum approbare se non posse ostendit: ut lib. VI. cap. IX. Vitæ PII V.

Dilecto Filio nobili viro Henrico Iuniori Duci Brunsvicensi.

Dilecte Fili, nobilis Vir, salutem & Apostolicam benedictionem. Acceptis litteris tuis super negotio Halberstadenſis Eccleſiæ, recordati continuò ſumus, quanta & quàm inſignis & quàm multis rebus teſtata fuerit tua in Catholicâ fide conſtantia, & erga Apoſtolicam Sedem pietas atque obſervantia. Quo nomine te & ante Pontificatum ſingulari ſtudio proſecuti fuimus, & poſtquam huius ſervitutis onus, Deo ita diſponente, ſuſcepimus, omnigeno honore, quatenus noſtra, & huius ſanctæ Sedis dignitas pateretur, dignum iudicamus. Ceterum quò pluris te facimus, & quò propenſiore erga te voluntate ſumus, eò moleſtiùs ferimus, non eſſe hanc rem huiusmodi, in quâ deſiderio tuo ac noſtro erga te ſtudio ſatisfacere poſſimus. Quâ in re Nobilitatem tuam rogamus, ut ſecum diligentius conſideret, quid officium noſtrum requirat, quid hæc tempora poſtulent, quid Halberſtadenſis Eccleſiæ

necessitas poscat, quanto & quàm graui scandalo non Catholicos modò, sed etiam Ecclesiæ inimicos offensuri essemus, si puero illius ætatis, auctoritate nostrâ, Ecclesia committeretur. Certè non sine pudore & rubore possemus de hac re verba cum Fratribus nostris facere. Cogitemus, dilecte Fili, vtrumque nostrum Deo rationem reddere debere, quamquam es tu multò senior, etiam quàm nos. Quam, quæsumus, in tremendo illo iudicio rationem reddere possemus promotionis adeò immaturæ, adeò contra sacros omnes Canones factæ? cùm in nepote tuo præter generis nobilitatem nulla prorsus earum rerum inesse per ætatem possit, quæ ab ipsis Canonibus requiruntur. Speramus quidem de eo illa, quæ sunt speranda de puero tali genere nato; sed expectanda est maturitas ætatis, aut, si dispensatione aliquâ super ætate opus fuerit, expectandum saltem est tempus, dum adolescat, vt certius suscipiendi oneris magnitudinem, & quid professurus, quibusque se legibus obstricturus sit, intelligere possit, cùm ad talem ætatem, Deo dante, peruenerit. Tum si apparebit, eum maiorum suorum, tuique in primis, aui sui, tam Catholici Principis, imitorem fore; confidere potes, sanctam hanc Sedem quoscunque poterit honores pro vestræ familiæ dignitate, ac pro tuis erga religionem Catholicam meritis, illi habituram esse. Quocirca hortamur, & petimus, vt hæc tecum diligenter perpendens, desistas id à nobis petere,

tere, quod nec nos sine grauissimâ Dei & hominum
offensione concedere, nec tu sine animæ tuæ peri-
culo impetrare posses, quodque non modò Ecclesiæ
illi, sed ne ipsi quidem nepoti tuo expedit. Illud
multò magis pietate erga Deum tuâ dignum est, vt
dilectis Filiis Capitulo Halberstadensis Ecclesiæ gra-
tias actis pro studio, quod erga te & nepotem tuum
declararunt, eos horteris, vt Ecclesiæ suæ necessitati
consultant, aliquo Catholico viro, & vitæ honesta-
te ac litterarum scientiâ prædito, quæ à sacris Cano-
nibus requiritur, ad Ecclesiæ suæ regimen in de-
mortui Episcopi locum sufficiendo. Ad quod nos
quoque pro officio nostro diligenter eoshorta-
mur. Datum Romæ apud S. Petrum sub annulo
Piscatoris, die XXI. Martij, M. D. LXVII. Pontifi-
catus nostri anno secundo.

EPISTOLA XVI.

*Ecclesiæ Mediolanensis iura defendit: vt lib. III.
cap. XIII. Vitæ PII V. habes.*

Dilecto Filio nobili viro, Gabrieli à Cueva,
Duci de Albuquerque, Status Mediola-
nensis Gubernatori.

Dilecte Fili, nobilis Vir, salutem & Apostoli-
cam benedictionem. Ex litteris tuis die XXI.
Septembris datis perspeximus, quantopere Nobilitas

tua laboret, ne quod præiudicium inferatur charissimo in CHRISTO Filio nostro, Regi Catholico, in controuersia, quæ est inter dilectos Filios, Cardinalem Borromæum & Senatum Mediolanensem. Ceterum sicut Nobilitati tuæ curæ esse videmus, ut ius temporale ipsius Regis defendas, ita nos pro loco, quem licet immeriti obtinemus, curare conuenit & oportet, ut Regis Regum honorem præ oculis habentes, iura Ecclesiastica tueamur. In quo ipsis Principibus consulere non immerito nos putamus, cum, suo Ecclesiarum Præsulibus iure reseruato, etiam ius temporale Principum stabiliatur. Atque eam causam quidem, quod ad petitorium attingit, cognoscendam, æquis iudicibus mandauimus, qui quæcumque Procurator fisci Mediolanensis super eâ re proponenda duxerit, diligenter audient, eamque rem, prout iustum fuerit, iudicabunt. Ipsum Cardinalem interim in possessione, à quâ deturbatus fuit, redintegrari, & quoad causâ ipsâ decisa sit, in eâ permanere æquum esse censemus. Datum Romæ apud sanctum Petrum sub anulo Piscatoris, die III. Octobris, M. D. LXVII. Pontificatus nostri anno secundo.

EPISTOLA XVII.

Io. Paulum ab Ecclesiâ, Senatorem Mediolanensem, quem ipse deinde elegit Cardinalem, quòd Ducis nomine certum negotium Romæ diligenter procurasset, commendat; hortaturque Ducem ipsum, vt Ecclesiæ Mediolanensis dignitatem & iura tueatur.

Dilecto Filio, nobili viro, Gabrieli à Cueua,
Duci Albuquerque, ditionis Mediolanensis Gubernatori.

Dilecte Fili, nobilis Vir, salutem & Apostolicam benedictionem. Fidelis ac diligentis operæ Ioannis Pauli ab Ecclesiâ Senatoris, in agendo negotio, de quo cum ad nos misisti, probè consciij, faciendum nobis duximus, vt eius ad te reditum debito hoc laudis testimonio prosequamur. Non potuit igitur is eam rem accuratiùs gerere, nec meliùs: quæ quò minùs confecta sit, cum ipsius rei vis suam præ se ferat difficultatem, nihil attinet causas exponere: quam tamen controuersiam, vbi primum poterit, perspectis & explicatis omnibus quæ vtramque in partem necessario allata fuerint, & causæ veritate, dirimendam curabimus. Excellentiam quidem tuam, non quia necesse sit, in cuius animo & actionibus cum prudentis Principis officio pium curæ sacerdotalis affectum libenter agnoscimus & collau-

collaudamus, paternæ in te charitatis abundantia commoti, vehementius hortamur in Domino, ut Pastores resque Ecclesiasticas istius urbis ac prouinciæ singulari studio ac defensione complectaris. Nam præter illam necessitatem, quam Principes à Deo impositam sustinent, ut iis honorem habeant, qui ad curam piorum gregum delecti sunt ab eo cuius patrocínio & munere dominantur, eâ præterea pietate confirmant Regna, populos in officio obedientiæ continent. Hanc auctoritatem, quæ debetur Ecclesiasticæ iurisdictioni, si multi, quorum pro communi Pastoris ac Parentis officio & temporarias calamitates & æterna supplicia sæpissimè lugemus, non ademissent, cum præsentis rerum prosperitate, tum cælestis beatitudinis expectatione florent. Quorum enim dexteræ Principum promptæ sunt ad tuenda & amplificanda iura Ecclesiarum, eorum imperia ac status perpetuâ Dei dexterâ defenduntur; ac liberè illi & quietè suâ ditione perfrui solent, qui libertatem & quietem Ecclesiasticam saluam & rectam conseruare student. Quorum præsidio freti etiam Episcopi, sui officij munus vigilantius exequentes; in gregis curam, quem Deus suo Sanguine acquisiuit, vehementius incumbunt. Prouexit orationem nostram longius perspecta nobis religio ac pietas tua; cui salutem precantes, sacrum Apostolicæ benedictionis munus impertimur. Datum Romæ apud sanctum Petrum sub
annulo

annulo Piscatoris, die III. Octobris, M. D. LXVII.
Pontificatus nostri anno secundo.

EPISTOLA XVIII.

*De sacri Concilij Tridentini Decretis abs se in Indiam
transmissis : de iniuncto sibi Summi Pontificis officio;
vicem suam dolendam potius quàm gratulandam of-
tendit : Ecclesiam Dei in Indiâ crescere & propagari
letatur : Cardinalis Portugalliæ pietatis studium com-
mendat : Antistitem, pastoralî curâ se eximi postulan-
tem, confirmat in officio, & exemplo suo consolatur:
dispensandi ritè in causis coniugalibus, & certis die-
bus sacras Indulgentias elargiendi, tribuit facultatem.
Vide lib. III. cap. V. Vitæ PII V. & lib. VI. cap. XI.*

Venerabili Fratri nostro Gaspari, Archi-
episcopo Goano.

Venerabilis Frater, salutem & Apostolicam
benedictionem. Peruenisse ad te litteras no-
stras vnâ cum volumine Decretorum sacri Concilij
Tridentini, libenter ex tuis litteris cognouimus. De
iniuncto nobis officio, quòd nobis aliorum more
gratularis, Fraternitas tua vicem nostram potius do-
lere debet : sustinemus enim onus, & meritis & vi-
ribus nostris longè impar : sed non deficimus ani-
mo in tot tantisque laboribus, de Domini miseri-
cordiâ confisi, qui eos qui laborant & onerati sunt,
F confu-

confugientes ad se, non deserit. Gratum nobis fuit, quòd de statu istius Prouinciæ nos breuiter certiores fecisti. Non sine maximâ consolatione intelleximus, auctam esse Ecclesiam Catholicam, tot gentilium millibus ad Christi fidem conuersis, & quotannis nouorum filiorum accessione crescere. Benedictus Deûs, qui tot & tantas, ac tam disiunctas nationes, in tenebris ambulantes, respicere & illuminare dignatus est. Sicut lugemus & assidue deploramus Ecclesiæ damna, quæ in Europâ propter Lutheranam & alias hæresum pestes fecit, tantum eiusdem incrementis in istis orbis terrarum partibus gaudemus atque lætamur. Illud optandum esset, pro magnitudine messis operariorum copiam suppetere. Quòd dilectum Filium nostrum Henricum Portugalliæ Cardinalem laudas, cuius diligentia scribis officium inquisitionis hæreticæ prauitatis apud vos vigere, eiusque vigilantia multum & sæpè profectum fuisse; libenter agnouimus eius insignem ac præstantem Catholicæ fidei ac Religionis zelum: nec dubium habemus, quin is, pro sua pietate, tibi & reliquis istarum partium Episcopis, quidquid potuit opis & auxilij ad colendam & augendam istam vineæ Dominicæ partem, studiose & antea tulerit, & semper laturus sit. Ad quod eum, quamquam currentem, vt dicitur, nostrâ ipsi quoque hortatione incitabimus. Ceterum, quòd commemoratis laboribus & molestiis tuis liberari

te ab onere Archiepiscopatus suppliciter admodum postulas, desiderio tuo satisfieri minimè expedire putamus: pro fraternâ quidem charitate dolemus, te istâ ætate tot laboribus fatigari, tot periculis obnoxium esse; sed memento, Frater, per multas tribulationes necesse esse in cælestem nos patriam peruenire. Non est deferenda statio, in quâ Domino nos constituere placuit. An non putas, in tot tantisque occupationibus, curis & molestiis, quibus pro suscepto hoc munere indefinenter fatigamur, nos quoque interdum tædere vitæ, & optabiliorem nobis videri illum pristinum statum nostrum? Sed iugum, quod Dominus ferre nos voluit, non excutiendum nobis, sed ferendum forti animo esse statuimus, quoad ei placuerit his nos vinculis corporis exsoluere ac liberare. Depone tu quoque cogitationem istam: & ad quod officium inuitus, vt scribis, vocatus fuisti; in eo obsequium & fidem tuam Domino probare perseuera, pro istis breuibus laboribus æternum tibi præmium reddituro. Quòd nos hortatus es, ad concedendum istarum partium Episcopis facultatem dispensandi cum his qui matrimonia inter se in gradibus à iure prohibitis contraxerunt, vel in posterum contrahere contigerit; Nos saluti animarum consulere volentes, & considerantes quàm difficile sit ac longum, ex tam remotis orbis terrarum partibus ab Apostolicâ Sede huiusmodi absolutiones & dispensationes petere,

facultatem eam duximus esse concedendam, sicut ex aliis nostris litteris intelliges. Potestatem etiam tibi, & Episcopis tuis, ac successoribus vestris, elargiendi Christi fidelibus quotannis, festis diebus quibusdam maximè solemnibus, Indulgentias quasdam dedimus. Cuius concessionis quoque litteras ad te, vnà cum his litteris, mitti iussimus. Antidotum illud, quod ad nos te misisse scribis, nondum acceperamus. Id gratum futurum est nobis, non quia opus eo nobis futurum esse putemus, sed quia tale tuæ erga nos charitatis indicium non potest nobis non esse vehementer gratum. Datum Romæ apud sanctum Petrum sub annulo Piscatoris, die VII. Octobris, M. D. LXVII. Pontificatus nostri anno secundo.

EPISTOLA XIX.

De litteris suis & Concilij Tridentini Decretis ad Archiepiscopum Mexicanum missis: de statu Indicæ illius Prouinciæ, certiores se fieri cupit: ad illarum Ecclesiarum regimen officium suum non desuturum pollicetur: Gentiles ad Christianam fidem conuersos à militum iniuriis defendi curat; vt l. III. c. V. Vitæ PII V. habetur.

Venerabili Fratri nostro Alphonso, Archiepiscopo Mexicano.

Venerabilis Frater, salutem & Apostolicam benedictionem. Credimus allatas esse ad te litte-

litteras nostras, quibus te, sicut reliquos quoque istarum partium Fratres, anno proximo præterito, de nostrâ ad Apostolicæ Sedis regimen assumptione fecimus certiores, & ad te, & illos officio fungentes, quod fraternæ charitati, & suscepto muneri, tali tempore conueniebat, misimus singulis singula sacri Oecumenici Concilij Tridentini, feliciter sub nostro prædecessore fel. record. Pio quarto peracti, volumina. Nuper autem litteras abs te accepimus, XII. Martij datas, gratulationes nobis de officio ad quod vocati sumus: cuius nos oneris magnitudinem sentientes, consolationem pariter & auxilium piarum precum à Fratribus nostris exposcimus potius, quàm gratulationem expectamus. Illud cuperemus, nobis de statu Prouinciæ, & an Sedis auxilio & auctoritate opus tibi & Suffraganeis tuis esset, significasses. Nos enim & tibi, & illis in iis quæ ad bonum vestrarum Ecclesiarum regimen, & ad propagationem diuini cultus ac Christianæ fidei pertinebunt, deesse nolumus, nec debemus. Illud Fraternitatem tuam, coram Deo & Domino nostro IESU CHRISTO obtestamur, vt Gentiles ad fidem Christianam conuersos à militum iniuriis quàm diligentissimè defendas ac protegas; & Suffraganeos tuos, nostro etiam nomine, vt idem faciant, sedulò admoneas & horteris. Verendum est enim, ne propter talia scandala nomen Dei in Gentibus blasphemetur, & minùs multi Christianam fidem

suscipiant, Christianorum peccatis offensi, iniuriis-
que deterriti. Datum Romæ apud sanctum Petrum
sub annulo Piscatoris, die VII. Octobris, M. D. LXVII.
Pontificatus nostri anno secundo.

EPISTOLA XX.

Felicem Marchionis in Nouam Hispaniam aduentum gratulans, inibi Catholica fidei propagationem à Deo benè precatus, sedulam rei Christianæ procurationem commendat, spiritualiaq; munera transmittit. Vide lib. III. cap. v. Vitæ PII V.

Dilecto Filio, nobili viro, Marchioni de Falces, Nouæ Hispaniæ Proregi.

Dilecte Fili, nobilis Vir, salutem & Apostolicam benedictionem. Te vnâ cum dilectâ in Christo Filiâ, nobili muliere, Marchionisâ, coniuge tuâ, prosperâ admodum nauigatione in commissam tibi prouinciam Nouam Hispaniam peruenisse, libenter admodum ex tuis litteris cognouimus. Deum autem precamur, vt qui te istuc adeò feliciter perduxit ad istos populos regendos, Nobilitati tuæ semper adsit, detque & concedat, vt sancta Ecclesia in istis partibus, sub tuo felici regimine, ad diuini sui nominis gloriam, & animarum salutem, propageretur & crescat. Cui rei non dubitamus Nobili-

bilitatem tuam toto animo intentam fore. Nullum certè tam Catholico Regi obsequium gratius præstare; nihil seipsâ dignius facere, nullâ re diuinæ gratiæ auxilium certiùs promereri poterit. Nihil autem aequè necessarium esse pro suâ prudentiâ intelligit, ac Christianos nonos diligenter à militum & aliorum Christianorum iniuriis tueri atque defendere, & Gentiles ita tractare, vt ne à fuscipiendâ Christi fide deterreantur; sed potiùs modis omnibus alliciantur. Quia verò, quàm grata tibi & aliis fuerint superiora spiritualia munera, significasti; mittenda ad te duximus alia, inter eos quos tibi visum fuerit, dispertienda; quibus debitâ deuotione gestatis aduersus pericula muniamini. Omnipotens Deus te, & nobilem mulierem vxorem Marchionissam, incolumes custodiat. Datum Romæ apud sanctum Petrum sub annulo Piscatoris, die VIII. Octobris, M.D.LXVII. Pontificatus nostri anno secundo.

EPISTOLA XXI.

Ecclesiæ sanctæ filios ex infidelium conuersione in Indiâ crescere letatur: inde Lusitaniæ Regum pietatem commendans, eorum administratos, vt ad Gentilium conuersionem, & conuersos benignè curandos incumbant, adhortatur.

Dile-

Dilectis Filiis, nobili viro, Vice-regi, & Consiliariis Portugalliæ & Algarbiorum Regis in partibus Indiæ Orientalis.

Dilecti Filij, salutem & Apostolicam benedictionem. Misericordiarum Patri & Deo totius consolationis gratias agere non desistimus, qui in maximis & multiplicibus curis, quas pro suscepto officio assiduè sustinemus, reficere nos & consolari dignatur iucundissimis nuntiis, qui ex istis Indiæ partibus afferuntur. Audimus enim, quantopere istic iam Ecclesia Catholica creuerit, quantusque Gentilium numerus quotannis ab idolorum cultu ad Christi fidem conuerti soleat. Ex quibus Ecclesiæ incrementis, & tot animarum salute, tantâ cor nostrum lætitiâ exultat, vt eam non facile explicare possimus. Quanta verò hoc nomine laus Serenissimis Portugalliæ Regibus debeat, cuncti Christiani populi nationesque nouerunt: eorum enim curâ, studio & admirabili animi magnitudine perfectum est (Deo pios illorum conatus & cœpta iuuante) vt vsque in vltimos orbis terræ fines sacrum Euangelium peruenerit, & ij qui in tenebris ambulabant, lucem veræ Religionis aspicere, ac Creatorem & Saluatorem suum agnoscere cœperint. Quia verò, tam iis qui longè, quàm iis qui propè sunt, debitores sumus; ardentissimè cupientes

tes negotium conuerſionis Gentilium quàm maximè vrgeri, & tot animas, quæ perituræ eſſent, augendâ diligentia ſeruari, deuotioni veſtræ tam ſanctum & pium opus duximus eſſe commendandum. Si ſola Domini noſtri I E S V C H R I S T I gloria ageretur, deceret, tam Catholicos viros pro eius honore etiam ſanguinem ſine vllâ dubitatione profundere, qui ſuum ipſe pro noſtrâ ſalute in arâ Crucis effudit; ſicuti veſtræ nationis plurimi ſummâ ſuâ cum gloriâ profuderunt, qui nunc meritorum ſuorum fructum percipiunt. Sed præter Dei honorem, præter animarum ſalutem, agitur quoque Chriſtianiffimi Filij noſtri Regis veſtri gloria, agitur veſtrum & veſtræ inclytæ nationis decus. Quò plures enim Gentiles Chriſti fidem ſuſceperint, eò Regis nomen glorioſum glorioſius reddetur, imperium eius in iſtis partibus firmiùs ſtabilietur, maiores acquirerentur vires, ad barbaras nationes diuino auxilio ſubigendas, & Regno Portugalliæ adiungendas; veſtra porrò & veſtræ nationis laus, & in Religionem Chriſtianam merita creſcent. Quæ vos diligenter attendentes, oportet quidquid poteſtis auxiliij, quidquid poteſtis ſtudij ac fauoris, operariis in vineâ Dominicâ laborantibus, Prælatiſ nimirum, & reliquis quorumcumque Ordinum Religioſis viris, promptiſſimo animo præſtare. Illud verò in primis neceſſarium eſſe pro veſtrâ prudentiâ intelligitis, ipſos Gentiles à militum iniuriis diligen-

ligerenter defendi ac protegi, impeditentaque & scandala omnia remoueri ac tolli, quibus eorum conuersio quocumque modo impediri aut retardari possit. Quæ etsi vos facere, & facturos esse confidimus; tamen, vt id acrius & diligentius faciatis, vos coram Deo Saluatore nostro obtestamur, atque in remissionem peccatorum vestrorum vobis iniungimus. Datum Romæ apud S. Petrum sub annulo Piscatoris, die XI. Octobris, M.D.LXVII. Pontificatus nostri anno secundo.

EPISTOLA XXII.

*Vt Gallie Regi contra hereticos & rebelles opem ferat,
Regem Hispaniarum hortatur. Vide lib. II. cap. VI.
Vitæ PII V.*

Charissimo in CHRISTO Filio nostro, Philippo Hispaniarum Regi Catholico.

Charissime in CHRISTO Fili noster, salutem & Apostolicam benedictionem. Ad Maiestatem tuam allatum fuisse minimè dubitamus de tumultu, qui in Regno Franciæ nuper excitatus fuit Religionis Catholicæ causâ, ac seditione potius rebellium Christianissimi Francorum Regis affinis tui. Non dubitamus autem, quin etiam sine hortatione nostrâ omni studio Maiestas tua illi Regi subuentura sit, vel propter commune periculum, vel
Religio-

Religionis, & vestræ necessitudinis causâ. Quare nos magnâ cum fiduciâ Venerabilibus Fratribus nostris S. R. E. Cardinalibus, & ceteris omnibus, id eam facturam esse confirmauimus; sicuti nos quoque, etiam supra vires nostras, ei opitulari decreuimus. Vt tamen, quod de Maiestatis tuæ voluntate & nos expectamus, & aliis polliciti fuimus, cumulatè & sine morâ vllâ præstare velit, eam quanto maximo possumus animi studio hortandam, rogandam & obtestandam duximus. Quâ de re cum Maiestate tuâ pluribus verbis aget dilectus hic Filius Annibal Auricellarius, qui Christianissimi Regis mandato, & nostro quoque, ad te venit. Datum Romæ apud sanctum Petrum sub annulo Piscatoris, die XIII. Octobris, M. D. LXVII. Pontificatus nostri anno secundo.

EPISTOLA XXIII.

Carolus Gallie Regem ex hæreticorum manibus euasisse gratulatur, eiq̃ue se pecuniarum vel militum auxilium præbiturum pollicetur. Vide lib. II. cap. VI. Vitæ PII V.

Dilecto Filio, nobili viro Ludouico Gonzagæ, Duci Niuernensi.

Dilecte Fili, nobilis vir, salutem & Apostolicam benedictionem. Euasisse Christianissimum

Regem impias hæreticorum manus maximoperè læ-
tatur, & Deo, qui in tanto eum periculo protexit,
gratias agimus. Te verò, quòd ad ferendum ei auxi-
lium adiungaris, maximâ laude prosequimur, &, vt
quantam maximam potes celeritatem adhibeas,
hortamur. Quòd hortatus es nos ad eum tam ne-
cessario tempore pecuniâ iuuandum; scito venisse
ad nos ab ipso Rege nuntium, cui eâdem de re no-
biscum agenti polliciti sumus, nos Regi minimè
defuturos, dummodò Religionis causâ seriò aga-
tur, non vt ante hoc tempus acta fuit. Sed cùm pe-
cuniæ facultatem in præsentia non habeamus, quia
quidquid habuimus, absumpsimus iuuando Impe-
ratorem electum illo grauissimo bello Turcarum,
& Scotiæ Reginam, & sancti Ioannis milites ad in-
sulam Melitam muniendam, multisque aliis præ-
tereà necessariis sumptibus; cogimur aliquod onus
populis nostræ & sanctæ Romanæ Ecclesiæ ditio-
nis imponere, omnino contra voluntatem & insti-
tutum nostrum: sed quod ob nostras ipsorum & do-
mus nostræ necessitates vt faceremus in animum in-
ducere non potuissimus, statuimus id Maiestatis
suæ causâ facere. Sed vt nostra pecunia hac viâ non
ita citò expediri potest; tamen rationem inibimus,
eius quàm celerrimè fieri poterit exigendæ: & ne-
cessitati Regis, vel pecuniæ vel militum auxilio,
prout magis expedire visum fuerit, etiam supra vi-
res nostras subueniemus. Superiores litteræ tuæ,
quas

quas dilectus Filius Adrianus Ballionus nobis red-
diderat, significationem magnam habuerunt tuæ
erga nos & hanc sanctam Sedem obseruantix: li-
benter ea quoque, quæ tuo ipse nomine exposuit,
audiuimus. Gratum nobis tale officium tuum fuit,
perinde ac debuit. Planè ostendis te in hac sanctâ
Sede colendâ imitatore[m] esse maiorum tuorum;
sicut semper de te sensimus. Nos quoque eâ erga te
voluntate sumus, quâ vt simus, & virtus, & pietas,
& nobilitas tua meretur: ipsum quoque Adrianum
tuâ causâ libentiùs vidimus. Datum Romæ apud
S. Petrum sub annulo Piscatoris, die xvi. Octobris,
M. D. LXVII. Pontificatus nostri anno secundo.

EPISTOLA XXIV.

Galliarum Regno contra hereticos auxilium postulat.

Vide lib. II. cap. VI. Vitæ PII V.

Dilecto Filio, nobili viro, Hieronymo
Priulo, Duci Venetiarum.

Dilecte Fili, nobilis vir, salutem & Apostoli-
cam benedictionem. Postquam cognoui-
mus, quanto in discrimine versetur salus charissimi
in CHRISTO Filij nostri Caroli Francorum Regis
Christianissimi, & illius inclyti Regni; statuimus
pro officio nostro ei ferre auxilium, quàm celerri-
mè poterimus, etiam supra vires nostras, aduersus

eius rebelles, diuinæ simul & Regiæ Maiestatis hostes sceleratissimos. Quia verò cum eius periculo coniunctum quoque est Italiæ periculum (etenim si, quod Deus auertat, hostes eius superiores essent, incendium illud in Italiam quoque traiecturum esset;) Nobilitatem tuam hortandam duximus, vt depellendi communis periculi causâ, Regem illum tam necessario tempore enixè iuuet. Non latet nos quidem, quantoperè de rebus suis ipsa sollicita sit in hoc tempore: sed adeò præsens, & ante oculos positum est hoc periculum, vt omnes qui Religionem Catholicam saluam volunt, & communi vtilitati consultum cupiunt, communi auxilio communibus hostibus sine morâ vllâ obsistere debeant. Id cum Deo gratissimum erit, tum isti inclytæ Reipublicæ, quæ veræ gloriæ semper appetens fuit, amplum & gloriosum, tanto Regi, & Religioni Catholicæ simul, tali tempore subuenisse. Datum Romæ apud sanctum Petrum sub annulo Piscatoris, die XVIII. Octobris, M.D. LXVII. Pontificatus nostri anno secundo.

EPISTOLA XXV.

Vt Galliarum Regi, Regnoque, contra hereticos rebelles succurrat, Ducem Sabaudie hortatur. Vide lib. II. cap. VI. Vitæ PII. V.

Dilecto

Dilecto Filio, nobili viro Emanueli Philiberto, Duci Sabaudiaë.

Dilecte Fili, nobilis vir, salutem & Apostolicam benedictionem. Quanto in discrimine versetur charissimus Francorum Rex, affinis tuus, & cum eo simul Catholica Religio, propter scelus & audaciam impiorum hominum, Dei & Regis sui rebellium, Nobilitas tua eò certius nouit, quò propior est tanto incendio. Omnino te hortatione cuiusquam non egere scimus, cum tot & tam graues causas habeas, quæ te ad eum tam necessario tempore enixè iuuandum excitent, vel affinitatis vestræ, vel Religionis Catholicæ, vel tui, & rerum tuarum periculi. Quia tamen, quod tuâ spontè facturum esses, certum habemus, pro tuâ in nos pietate & erga Sedem Apostolicam reuerentiâ, hortatu nostro te facturum esse; etiam studiosius & libentius Nobilitatem tuam hortamur & rogamus, vt in tantis illius Regni tenebris lumen ostendas animi, virtutis ac pietatis tuæ: quâ ex re maximam à Deo gratiam, & summam ab hominibus laudem consequeris. Nobis verò, qui ipsi quoque Regem iuuare etiam supra vires nostras statuimus, adeo gratum facies, vt non minùs nos tibi, quàm Regem ipsum tali officio obligaturus sis. Hac autem de re dilectus hic Filius, Annibal Auricellarius, pluribus verbis nostro nomine tecum aget. Datum Romæ apud sanctum Petrum

trum sub annulo Piscatoris, die XVIII. Octobris,
M.D.LXVII. Pontificatus nostri anno secundo.

EPISTOLA XXVI.

*Decem aureorum millia Galliae Regno contra hereticos
subsidio mittit; aliaque ad id se auxilia contulisse, &
ab aliis Principibus tum procurasse, tum procuratu-
rum se, ostendit. Vide lib. II. cap. VI. Vitæ PII V.*

Dilecto Filio, nobili viro, Emanueli Philiberto, Duci Sabaudiae.

Dilecte Fili, nobilis vir, salutem & Apostolicam benedictionem. Placuerunt nobis ea quæ Secretarius tuus mandato tuo nobis diligenter exposuit. Cardinali Lotharingo aliquantam pecuniam, sicut hortatus es, misimus. Ad tuam quoque Nobilitatem decem millia aureorum in præsentiam mittimus, ut eâ adiutus pecuniâ commodius ferre auxilium possis Regi Christianissimo, tam graui eius & Catholicæ Religionis tempore. Ad Lotharingiæ Ducem misimus litteras nuper & Nuntium, hortantes eum, ut sese opponat, si quæ è Germaniâ hæreticorum auxilia in Galliam transire conabuntur: Italiæ verò Principes per litteras & Nuntios hortari & excitare statuimus, ad mittenda Regi, quàm maxima quisque eorum poterit, equitum auxilia. Nullum planè officium tam necessario tem-
pore

pore Christianissimo Regi à nobis deerit, multò plura præstituris, si maiores opes & facultates haberemus, cùm pro paternâ erga eum charitate nostrâ, tum diuini obsequij causâ. Te quoque hortatione non egere videmus, vt & Deo, & Regi affini & consanguineo officium præstes. Tantùm hortamur, vt celeritatem, quantam maximam potes, adhibeas. Quod attinet ad oppida & loca quæ à Bernensibus tibi nuper reddita fuerunt, ex Secretario tuo cognosces ea quæ Nobilitati tuæ referenda mandauimus. Datum Romæ apud sanctum Petrum sub annulo Piscatoris, die XVI. Nouembris, M. D. LXVII. Pontificatus nostri anno secundo.

EPISTOLA XXVII.

Vt optatum Archiepiscopum eligant, Decanum & Capitulum Ecclesiæ Coloniensis hortatur.

Dilectis Filiis, Decano & Capitulo Ecclesiæ Coloniensis.

Dilecti Filij, salutem & Apostolicam benedictionem. Non parua animi molestia ac solitudine liberati fuimus, postquam ex litteris Nuntij nostri apud Maiestatem Cæsaream residentis cognouimus, eum, qui à vobis electus Archiepiscopus fuerat, suo tandem iure cessisse. Gaudemus admodum, & Deo gratias agimus, quòd iam

H

de

de integro potestas ad vos delata sit, nouum Archiepiscopum eligendi. Hortamur autem in Domino, & omni animi studio vos admonemus, vt officij vestri memores, maturâ deliberatione adhibitâ, & eo, quo decet, consensu, eiusmodi personam eligatis, vt electionis vestræ & Deo & hominibus rationem reddere possitis. Agitur, vt videtis, honor Dei, agitur animarum salus, agitur officium & existimatio vestra. Cogitate, quàm hæc turbulenta sint tempora: mementote, quanto in periculo aliàs ista Ecclesia versata sit; quanta damna & detrimenta acceperit quorundam Præfulum culpâ. Si vniquam Capitulum istud in eligendo Archiepiscopo curam & diligentiam adhibuit, nunc multò maiorem, quàm antea, adhibeat necesse est. Proinde Dei tantum obsequium, & animarum salutem, atque vtilitatem Ecclesiæ propositam ante oculos habete, & eligite seu postulate virum, cuius exploratum & planè compertum habeatis Catholicæ fidei zelum; qui præterea vitâ, & moribus, & rerum usu, atque prudentiâ, ad tantæ Ecclesiæ regimen, non solum in spiritualibus, sed etiam in temporalibus maximè aptus atque idoneus sit. Talem si, vt speramus, vestrâ fide, probitate prudentiâque confisi, elegeritis; electio vestra Deo grata, Ecclesiæ salutaris erit. Vos autem iudicij vestri non solum à nobis, & ab omnibus aliis magnam laudem, sed à Deo etiam præmium consequemini. Datum Ro-

mæ apud sanctum Petrum sub annulo Piscatoris,
die XXIX. Nouembris, M. D. LXVII. anno secundo
Pontificatus nostri.

EPISTOLA XXVIII.

Melita insula contra Turcam auxilium implorat.

Vide lib. II. cap. II. Vitæ PII V.

Charissimo in CHRISTO Filio, Philippo
Hispaniarum Regi Catholico.

Charissime in CHRISTO Fili noster, salutem
& Apostolicam benedictionem. Satis ex-
ploratum atque compertum est, potentissimum
hostem nostrum Turcarum Tyrannum ingentem
classem; quantam nemo unquam maiorum suo-
rum habuit, & naualem exercitum maximum, ac
ceteras res necessarias intentissimâ curâ comparare,
eo consilio, vt proximo vere traiciat in insulam
Melitam, ad Ordinem militum sancti Ioannis de-
lendum, sibi maximè inuisum, & ad insulam illam
subigendam: cuius potiundæ cupidissimus esse
dicitur, tum propter maximam eius opportunita-
tem, tum propter ignominiam superiore bello ac-
ceptam. Cuius viribus cum Ordo ipse nequaquam
resistere possit, cogitur dilectus Filius, Ioannes de
Valetta, eius Ordinis Magister, Christianorum
Principum aduersus communem Christiani nomi-

nis hostem auxilium implorare. Cuius rei causâ ad nos Oratorem misit, itemque alterum propriè ad Maiestatem tuam mittit, dilectum hunc Filium strenuum virum Petrum de Mendoza, eius Ordinis militem, & præceptorem de Geuennes. Quia verò & Ordo is, propter singularem virtutem suam, veteraque & recentia in Christianam rempublicam merita dignissimus est, quem opibus suis omnes Christiani Principes tanto imminente bello tueantur, & cum eius periculo totius Christiani populi periculum coniunctum futurum est; propensè nos quidem & pecuniam illi ad muniendam insulam suppeditauimus, quantam potuimus, & aliquantum etiam præsidium peditum mittere in animo habemus. Sed nequaquam ex nostræ facultates sunt, ut tantæ eius necessitati soli subuenire possimus. Proinde æquum est, cum alios Principes, tum in primis Maiestatem tuam, cui Deus tot Regna & tantas opes concessit, ut ipsa potissimum populum suum ac Religionem Christianam ab impio & immani hoste defendat, enixè eum Ordinem, tam necessario tempore, iuuare. Quod quidem etiam sine proprio rerum suarum periculo eam studiosè facturam esse, pro suâ virtute ac pietate, confidimus. Eò autem propensius ei auxilium missuram esse non dubitamus, quia ipsius maxime interest, insulam adeò Siciliae Italiæque finitimam in potestatem hostium non venire. Quod
verò

verò Maiestatem tuam suâ sponte facturam esse certum habemus; vt pro Sedis Apostolicæ reuerentiâ etiam promptiùs, proluxiùs, liberaliùs faciat, ipsum Ordinem, quanto possumus animi studio, Maiestatem tuam commendamus: confisi planè in Domino, si abs te, prout opus est, adiutus fuerit, fore, vt pari ac superiore bello fecit, virtute & gloriâ barbarorum impetum sustineat ac repellat. Cuius laudis & meriti magna pars ad Maiestatem tuam perueniet. Datum Romæ apud sanctum Petrum sub anulo Piscatoris, die VIII. Decembris, M. D. LXVII. Pontificatus nostri anno secundo.

EPISTOLA XXIX.

Vt Melitæ insule contra Turcas opem ferat, Francorum Regem hortatur. Vide lib. II. cap. II. Vitæ PII V.

Charissimo in CHRISTO Filio nostro, Carolo Francorum Regi Christianissimo.

Charissime in CHRISTO Fili noster, salutem & Apostolicam benedictionem. Dilectus Filius Ioannes de Valetta militum Ordinis sancti Ioannis Ierosolymitani Magister, cum satis compertum atque exploratum habeat, nouum Turcarum Tyrannum ingentem classem, quantam nemo maiorum suorum ad hoc tempus habuit, & copias maximas summâ diligentiam comparare, vt vere pro-

ximo Melitam insulam, priore bello frustra tentatam, maiore vi aggrediatur: & quia afflictis superiore bello eius Ordinis rebus, eas ipse non habet vires, ut tam potenti hosti possit resistere; idcirco aduersus communem Christiani nominis hostem implorandum sibi esse iure ac meritò duxit auxilium Christianorum Principum. Quod ad nos attinet, ei deesse nolumus, sicuti ad condendam quoque nouam urbem eum iuuimus. sed eas ipsi facultates nequaquam habemus, ut soli subuenire possimus. Cùm igitur, sicuti misit ad nos & ad alios, ita miserit ad tuam quoque Maiestatem auxilij petendi causâ strenuum virum, Petrum de Giou, eius Ordinis Mareschallum; præterire non potuimus, quin Ordinem ita de Christianâ republicâ omni tempore meritum, ac merentem, qui tantum pro Christianâ religione sanguinis fudit, ac fundere paratus est, nisi à Christianis Principibus destituatur, tam necessario tempore Maiestati tuæ & aliis Principibus commendaremus. Etsi enim vnus, plus quàm alterius, interesse videtur, illam insulam defendi; tamen res haud dubiè agitur omnium Principum Christianorum, & totius Christiani populi salus. Nimis iamdiu nimis auctæ fuerunt hostium nostrorum vires, superiorum Principum negligentia: non est committendum, ut magis etiam augeantur. Si (quod Deus auertat) insula tam opportuna in hostium potestatem veniret, maximum Christianæ reipubli-

reipublicæ præsidium amitteretur: serò postcà sentiremus, quantum detrimentum acceptum esset. Sed damnum non modò restitui ac reparari non posset, sed alia ex aliis deinceps damna, & grauiores in posterum calamitates populo Christiano essent inferendæ. Nouimus etiam, Christianissime Fili, tuas quoque ipsius necessitates; sed quibus rebus iuari abs te is Ordo possit, hoc suo tempore ipse Orator Maieitati tuæ exponet. Ex quo vbi desideria Magistri & Conuentus Melitensis cognoueris, vt præclarissimi cognominis tui memor eis satisfacere velis, sicuti pro tuâ virtute ac pietate te facturum esse confidunt, Maiestatem tuam in Domino hortamur & rogamus. Datum Romæ apud sanctum Petrum sub annulo Piscatoris, die XII. Decembris, M.D.LXVII. Pontificatus nostri anno secundo.

EPISTOLA XXX.

Melitenſibus à Duce Venetorum contra Turcas subsidia postulat. Vide lib. II. cap. II. Vita PII V.

Dilecto Filio, nobili viro, Petro Laure-
dano, Duci Venetiarum.

Dilecte Fili, nobilis vir, salutem & Apostolicam benedictionem. Quantoperè res militum Ordinis sancti Ioannis Ierosolymitani afflictæ fuerint, illo tempore quo Turcæ in insulâ Melitâ
terrâ

terrâ marique eos per multos menses pertinacissimè
summis viribus oppugnarunt, omnes nouisse cer-
tum habemus. Ad eos vere proximo iterùm & a-
criùs oppugnandos, atque illam insulam inuaden-
dam, multò maior quàm antea nauium omnis ge-
neris multitudo, multoque maiores terrestres naua-
lesque copiæ summâ diligentia à nouo Turcarum
Tyranno comparari dicuntur. Itaque tam necessa-
rio tempore ad opem & auxilium omnium Chri-
stianorum Principum confugere coguntur, cùm
animis magis quàm facultatibus parati sint ad tam
potentis & infesti hostis impetus excipiendos ac
sustinendos. Nemo est autem, qui non intelligat
ac cernat, commune hoc esse omnium Christiano-
rum periculum, cùm illa insula adeò Siciliae immi-
nens, Italiaeque finitima, & ad occupandas Infe-
ris maris insulas opportuna, tamquam arx quædam
sit habenda totius populi Christiani: quæ si (quod
Deus auertat) in hostium potestatem, Christianis
Principibus torpentibus, veniret; serò postea, nullo
pœnitentiæ loco relicto, omnes sensuri essent, quan-
tum Christiani nominis præsidium ac propugna-
culum amissum fuisset. Quia igitur omnium in-
terest, Ordinem adeò de Christianâ republicâ be-
nemeritum defendi, &, ne illa insula in potestatem
hostium redigatur, prouideri; æquum est ac necessa-
rium, vt nos, & omnes alij, quo quisque nostrum
potest, eum Ordinem auxilio iuuemus. Ei sanè nos
deesse

deesse nolumus, licet multos alios sumptus facere cogamur: sed eius necessitates soli subleuare non possumus; omnes oportet, qui has Christianæ reipublicæ reliquias saluas volunt, communis salutis ac Religionis periculum communi auxilio propulsare. Ad quod inter ceteros Principes Nobilitatem quoque tuam hortandam duximus, vt Principem valde Catholicum, & vt eius Reipublicæ Principem, quæ pro Religione Christianâ multa præclarissima gessit, ac de eâ benè mereri consuevit. Nouimus sanè te, & Senatum istum, vestris rebus non iniuriâ timere, ac maximas necessariò impensas facere: sed quid abs te hic Ordo desideret, ex dilecto Filio Petro Iustiniano Priore Prioratus Messanæ, ciue tuo, & ipsius Ordinis fortissimo milite, cognosces. Nos ne longiores simus, res eius Ordinis, cum pro nostrâ erga eum beneuolentiâ, tum reipublicæ Christianæ causâ, Nobilitati tuæ tanto studio commendamus, quantum, etiam tacentibus nobis, & virtus ac merita eorum militum postulant, & magnitudo periculi Christiano populo impendentis efflagitat. Datum Romæ apud sanctum Petrum sub anulo Piscatoris, die XIX. Decembris, M. D. LXVII. Pontificatus nostri anno secundo.

APOSTOLICARVM
 PII QVINTI
 PONT. MAX.
 EPISTOLARVM
 LIBER SECVNDVS,
 Continens Epistolas anni tertij
 eius PONTIFICATVS.
 EPISTOLA PRIMA.

ARGVMENTVM.

*Horrendum scelus in sacrosanctam Eucharistiam admis-
 sum, grauissimè puniendum esse admonet.*

Dilecto Filio, nobili viro, Carolo Austriae
 Archiduci, PIVS Papa V.



DILECTE Fili, nobilis vir, salutem &
 Apostolicam benedictionem. Non sine
 summo animi dolore atque horrore au-
 diuimus, nec absque gemitu referre No-
 bilitati tuae possumus facinus impium, horrendum

ac

ac infandum, quod nuper in loco ditionis tuæ perpetratum fuisse audiuius. Certiores facti fuimus ab hominibus, quibus fidem meritò habuimus; mortuo Plebano quodam loci qui Taruisa dicitur, in provinciâ Carinthiæ, eum, qui à populo in eius locum electus fuit, Andream nomine, quo primùm die Ecclesiam ingressus est, cùm in sacrario reperisset sanctissimum Eucharistiæ Sacramentum, id sacrilegâ manu correptum abiectum in terram, & pedibus conculcasse; conuersumque ad eos qui aderant, in verba impia ac nefaria prorupisse. Quis tantam Dei & Saluatoris nostri iniuriam satis dignè conqueri ac deplorare possit? Superat scandali magnitudo, ac facti impietas, cùm dicendi vim, tum puniendi etiam facultatem: nullum enim par tanto sceleri supplicium inueniri potest. Ac nos quidem, si is nefandus homo ditioni nostræ temporali subiectus esset, quàm grauissimum possemus, de eo supplicium sumeremus: sed cùm sub ditione tuâ sit, ad auertenda Dei flagella, qui in eos sæuiturus esset, quorum negligentia tantum nefas impunitum relinqueretur, indicandum id Nobilitati tuæ duximus; hortantes, & sub diuini iudicij obtestatione monentes, vt Phinees zelo accensus exurgas, sicut Catholico & religioso Principe dignum est, ad tantam Domini & Redemptoris nostri iniuriam vlciscendam, & hominem tam sacrilegum comprehendi sine morâ iubeas; ac veritate compertâ tali supplicio

plicio affici, per quod Dei ira, tum in habitatores loci, in quo tantum facinus admissum est, tum in omnes qui illud punire neglexerint, imminens, expietur. Eius autem, perinde ac si laicus esset, puniendi tibi & Magistratibus tuis tenore præsentium plenam concedimus facultatem. Datum Romæ apud S. Petrum sub annulo Piscatoris, die XXI. Ianuarij, M. D. LXVIII. Pontificatus nostri anno tertio.

EPISTOLA II.

Vltimum supplicium subituris, pridie quàm illo afficiantur, post confessionem Sacerdoti ritè factam, Domini Corporis viaticum administrari iubet. Vide lib. II. cap. III. Vitæ PII V.

Venerabili Fratri Ioanni Baptistæ, Archiepiscopo Rossanensi, nostro & Sedis Apostolicæ in Hispaniarum Regnis apud Regem Catholicum Nuntio.

Venerabilis Frater, salutem & Apostolicam benedictionem. Relatum est nobis, non per-mitti in istis Hispaniæ partibus, vt à Iudicibus temporalibus propter delictorum grauitatem capitis damnati, post confessionem Sacerdoti factam, sacrum Eucharistiæ Sacramentum accipiant. Id nos eis minimè denegandum esse censemus; cùm Chri-
stianæ

stianæ charitati magis conueniat, eos ad resistendum tali tempore fortius diabolicis tentationibus sacrâ Communione muniri; vt, perituro corpore, salutis animæ, quantum fieri potest, subueniatur. Itaque hunc abusum, qui sacris etiam Canonibus repugnat, tolli cupientes, Fraternitatem tuam de hac re cum charissimo in CHRISTO Filio nostro Rege Catholico agere volumus, eique significare, placere nobis, vt supplicium vltimum subituris, pridie quàm illo afficiantur, post confessionem Sacerdoti factam, Dominici Corporis viaticum concedatur. quod per totam Hispaniam, & alias Prouincias & loca ditionis suæ, hortaberis eum, vt, sicuti eius pietate dignum est, posthac iubeat obseruari. Datum Romæ apud sanctum Petrum sub annulo Piscatoris, die XXV. Ianuarij, M.D.LXVIII. Pontificatus nostri anno tertio.

EPISTOLA III.

Puerum in Episcopum eligentium postulationem reijcit, legitimam idonei viri electionem diutius non differri iubet; aliàs id suâ auctoritate faciendum denuntiat. Vide harum Epist. lib. I. Epist. XIV. & XV.

Dilectis Filiis, Decano & Capitulo Ecclesiæ Halberstadenfis.

Dilecti filij, salutem & Apostolicam benedictionem. Post acceptas litteras vestras, &

auditum benignè nuntium, qui eas attulerat, etsi considerauimus diligenter nobiscum ea quæ proposuistis; nullo tamen pacto inducere animum potuimus, puero quinque vel sex annorum administrationem istius Ecclesiæ committere, nimis repugnante conscientia nostrâ: nimisque graui scandalo totam Germaniam offensuri, neque eos modò qui nunc sunt, sed etiam posteros, si memoriæ prodideretur, puerum, in quo nulla per ætatem esse potest earum rerum quæ à sacris Canonibus requiruntur, designatum, nobis postulationem vestram admittentibus, esse Pastorem & Episcopum Ecclesiæ, contra omnes Canones, contra Decreta Conciliorum; quam possemus rationem huius rei reddere æterno illi Iudici in tremendo iudicij die? Scimus quidem auum pueri Principem esse Catholicum; scimus, quoad viueret, non defuturum ei Ecclesiæ, ad defendendum eius bona, illius auxilium ac patrocinium: sed quâ iam ætate sit, nostis. Is præterea puer, vnicus illi nepos est. Ne illius quidem domui expedit, nepotem suum vnicum temporalium Ecclesiæ illius bonorum causâ (cùm nec ipse intelligat quid agat, nec quisquam hominum diuinare possit quid acturus sit, si, Deo dante, ad annos adolescentiæ peruenerit) rebus Ecclesiasticis immisceri, non sine Dei Omnipotentis, vt verendum est, indignatione. Cùm autem iamdiu ipsa Ecclesia vacet, nec sine magno eius detrimento differri

differrī possit diutiùs electio noui Episcopi in locum demortui: etsi pro nostro iure, postquam vos prioribus nostris litteris moniti, tandiu cessastis eligere seu postulare personam idoneam, possēmus quem nobis placeret Episcopum & Pastorem illi præficere; tamen benigniùs vobiscum agere volentes, vos iterum hortandos duximus ac monendos, vt, diligenter attendentes periculum in quo Ecclesia versatur, officij vestri memores, omni excusatione omisâ, eâ quâ debetis concordia, Deum tantum præ oculis habentes, eligatis vel postuletis aliquem secundum sacros Canones ætatis legitimæ, vitâ & fide atque vsu rerum idoneum ad ipsius Ecclesiæ regimen. Ad quem eligendum vel postulandum vobis, postquam has litteras acceperitis, præfigimus spatium trium mensium, pro termino preëmptorio. Intra quod tempus si eligere vel postulare neglexeritis, nos iure nostro vtemur, ac, sicut Deus nobis inspirauerit, ipsi Ecclesiæ prouidebimus; & conscientiam nostram, quæ longiorem moram ferre non potest, exonerare curabimus. Proinde dum etiam nunc vobis permittitur, officio vestro fungimini; & de diuino cultu atque animarum salutē præcipuē solliciti, de temporalibus verò bonis solitudinem in Deum proijcientes, sperate etiam ad ipsa bona temporalia tuenda, non modò diuinam opem adfuturam, sed ne humanum quidem auxilium vobis defuturum. Datum Romæ apud S. Petrum

trum sub annulo Piscatoris, die III. Februarij,
M.D.LXVIII. Pontificatus nostri anno tertio.

EPISTOLA IV.

*Vt Episcopum hæreticum, qui indignè occupabat Eccle-
siam, dimitti curet, Regem Poloniae hortatur. Vide
lib. III. cap. X. Vitæ PII V.*

Charissimo in CHRISTO Filio nostro, Sigis-
mundo Augusto, Regi Poloniae Illustri.

Charissime in CHRISTO Fili noster, salutem &
Apostolicam benedictionem. Maiestatis tuæ
laudi gloriæque pro paternâ nostrâ beneuolentiâ fa-
uentes expectauimus, & futurum etiam sperauimus,
vt ipsa tantum illud scandalum de Chiouensis Eccle-
siæ Episcopo tolleretur, & ne tam infamis hæreticus
Ecclesiam illâ diutiùs detineret, & tamquam Episco-
pus & Regni Senator publicis conuentibus interes-
set, prouideret. Etsi autem intelleximus ex proximis
litteris Maiestatis tuæ, quantoperè periculosum pu-
tet, & hoc & alia Regni sui sanare mala, quæ quo-
rundam negligentia nimis creuisse, & corroborata
fuisse queritur: tamen, ne obijci vnquam nobis
possit, quod tua Maiestas nunc aliis forsitan inme-
rentibus obijcit, quòd negligenter officio nostro
functi simus; desistere nolumus, quin ad tantum
scandalum tollendum Maiestatem tuam iterùm
horte-

hortemur & excitemus. Fallitur enim, si huiusmodi scandala tolerando ac dissimulando, Regni sui quieti & tranquillitati sese consulere putat. Non posse hæreses simul cum Catholicæ Religionis cultu in eodem Regno tolerari, illud ipsum exemplum Regni Franciæ, quod Maiestas tua affert sui excusandi causâ, documento est. Si superiores Reges Franciæ, dissimulando & tolerando, id malum crescere passi non fuissent; facilè extirpare hæreses, & Regni sui paci & quieti consulere potuissent: neglectis prædecessorum nostrorum paternis hortationibus, dum istiusmodi carnis prudentiâ nituntur, sublatâ pace, quæ sine vnico rectæ veræque Religionis cultu manere non potest, Regnum illud olim adeò florens & tranquillum, miserandum in modum perturbarunt, & in extremum periculum adduxerunt.

Nam quòd Maiestas tua de zizaniis non euellendis, propter periculum euellendi simul tritici, Domini & Saluatoris nostri dictum, non ita, vt intelligit ipse, intelligendum affert; mallemus eius meminisset, quod idem Saluator noster de Regnorum in se diuisorum futurâ desolatione adeò aperte & perspicuè dixit. Quæ verò diuisio detestabilior, quæ perniciosior Regnis ac populis existere potest, quàm de Religione dissensiones atque dissidia? Si scandala adeò creuerunt, vt scribis, vt spes non sit, adeò facilè omnia simul tolli posse; at aliqua co-

rum, quæ tolli possunt, tollenda sunt: cuiusmodi hoc appellati Chiouensis Episcopi. Quo ab Ecclesiâ illâ auulso, nequaquam timendum est, ne conuellatur status Regni. Facile Maiestas tua illum, vt eam Ecclesiam dimittat, auctoritate suâ regiâ adducere poterit. Quod vt faciat, eam iterum paternè hortamur; & vehementer rogamus, consulat famæ suæ, consulat Dei Omnipotentis honori, & illius Ecclesiæ atque animarum saluti. Sed si facere diutius recusauerit, cogemur ipsi aduersus illum pseudo-Episcopum secundum sacros Canones agere, ex necessitate cum Maiestate tuâ; ne nostro ipsi quoque desinus officio, quod sine graui Dei & hominum offensione prætermittere non possumus. Datum Romæ apud S. Petrum sub annulo Piscatoris, die XXVI. Martij, M. D. LXVIII. Pontificatus nostri anno tertio.

EPISTOLA V.

*Lesam in Poloniâ Ecclesiasticam libertatem defendi curat.
Vide lib. III. cap. X. Vitæ PII V.*

Charissimo in CHRISTO Filio nostro, Sigismundo Augusto, Regi Poloniæ Illustri.

Charissime in CHRISTO Fili noster, salutem & Apostolicam benedictionem. Cum audiamus in Regno tuo Ecclesiasticam libertatem multis

tis modis lædi atque imminui, certum quidem habemus, id contra voluntatem tuæ Maiestatis admitti: sed, si diutiùs talia dissimulentur, hominum improborum licentiam indies longiùs progressuram esse videmus. Itaque Maiestatem tuam, pro commisso nobis officio, & paterno erga ipsam amore, hortandam in Domino, & excitandam ac rogandam duximus, ne patiatur talem temeritatem crescere; sed cùm animæ, tum existimationi suæ diligentius consulat. Omnibus quidem sua iura seruanda sunt; sed ab Ecclesiis præcipuè, Ecclesiasticisque personis, prohibendæ sunt iniuriæ ac propulsandæ, cùm eæ vel maximè ad Dei & Saluatoris nostri iniuriam contumeliamque redundent, ac furorem eius prouocent. Semper Catholici ac sapientes Reges ac Principes Clericis, propter diuini nominis gloriam, patrocinium suum præstare consueuerunt, & pro Ecclesiasticâ libertate se tamquam murum opponere. Qui verò eam opprimi patiuntur, serò, posteaquam id sibi & suis rebus perniciosum fuerit, sentiunt. Si non hæresum pestilentia per Regnum tuum diffusa esset, hæc hæresum origo, hoc violandæ Religionis initium futurum fuit. Potes etiam nunc, charissime Fili, potes reprimere tales audacias, & huiusmodi licentiam improbis eripere. Nondum adeò sectæ hæreticorum creuerunt, quin multò maior pars populorum Regni tui in officio maneat. Vtere modò potestate tibi à

Deo datâ, & Cleri ac Sponsæ eius Ecclesiæ causam audaciter suscipe ac tuere. Minus, quàm forsitan metuas, audebunt, vbi Regem pro Clero & Ecclesiis stare videbunt. Magna est Regis auctoritas, magna celsitudinis Regiæ obseruantia. Non contemnetur Rex, nisi mirâ patientiâ suâ se contemni ac despici sinat. Nec est ferè quisquam tam malus, qui non Regis gratiam malit cum securitate, quàm iram & offensionem eius cum periculo. Datum Romæ apud sanctum Petrum sub annulo Piscatoris, die VII. Maij, M. D. LXVIII. Pontificatus nostri anno tertio.

EPISTOLA VI.

*Ecclesiasticam libertatem defendit. Vide lib. VI.
cap. VIII. Vita PII V.*

Dilecto Filio, nobili viro, Emanueli Philiberto, Sabaudix Duci.

Dilecte Fili, nobilis vir, salutem & Apostolicam benedictionem. Cogit nos munus, nobis à Deo licet indignis iniunctum, id diligenter agere & curare, vt locis & hominibus Ecclesiasticæ libertatis ius & priuilegium habentibus sua immunitas inuiolata seruetur. Quod quidem tam debitum & necessarium officium si prætermitteremus, nec apud Deum nec apud homines nos excusare posse-

possemus. Solemus sanè, cùm quidpiam contra eam alicubi fieri audimus, non minùs eorum causâ qui culpam talem admittunt, aut admitti patiuntur, quàm eorum qui læduntur dolere. Qui enim in hoc genere alios lædunt, suam quoque ipsorum salutem (quod multò maius detrimentum est) lædunt, & in periculum adducunt. Ad aures nostras peruënit, incolas loci Verra vocati, & aliorum quorundam locorum iuris Astensis Ecclesiæ, à ministris & officialibus Nobilitatis tuæ grauib. & variis oneribus iniungendis compelli ad soluendam partem pecuniæ, quæ donatiui nomine à subditis tuis aliquot abhinc annis exigitur; cogi eos prætereà milites fieri, & pecuniâ suâ emere quædam armorum genera, multisque aliis rebus libertatem eorum imminui. Molestè quidem tulimus, si res ita se habet, eos huiusmodi incommodis affici; sed pro paterno amore, quo salutem & famam Nobilitatis tuæ diligimus, non minùs hæc nobis tuâ ipsius causâ displicuerunt, quem Deo per omnia placere, & cuius nomen vbique gloriosum esse cupimus. Cùm enim libertas Ecclesiastica violatur, non tam homines, quàm Deus ipse, qui Ecclesiæ suæ parci, & iura sua seruari vult, violatur & grauitè offenditur. Non paruâ labe eorum fama, qui talia admittunt, vel admissa dissimulant, maculatur. Quia igitur, cùm talia non facile credere possemus, nisi veritate priùs inquisitâ, loca illa ad Ecclesiam Astens-

sem pertinere comperimus, eamque ob causam non debere locorum illorum incolis huiusmodi onera imponi; Nobilitatem tuam paternè admonendam duximus, ut cum diuini honoris causâ, cuius zelum & curam te habere semper cognouimus, tum pro perpetuâ tuâ erga sanctam hanc Sedem reuerentiâ, prohibeas ac vetes, ne in posterum illorum locorum incolæ huiusmodi onera subire cogantur; & quidquid contra libertatem eorum ad hoc tempus gestum est, reuoces, suamque illis locis immunitatem, sicut æquum est, incolumem conserues. Quod si Nobilitas tua ius aliquod in illis locis se habere existimat, causam suam docendos nos curare poterit; ab eiusmodi interim oneribus abstinendo. Quod ut primo quoque tempore faciat, eam hortamur; ut auditis, quæ pro eius causâ dicta fuerint, statuere possimus, an illi homines iustam querendi causam habuerint. Datum Romæ apud S. Petrum sub annulo Piscatoris, die VIII. Maij, M.D.LXVIII. Pontificatus nostri anno tertio.

EPISTOLA VII.

Abbati Claræ-vallis Cardinalatum suscipere pro suâ modestiâ recusanti, ut electioni acquiescat, iterum præcipit in virtute sanctæ obedientiæ. Vide lib. VI. cap. IX. Vita PII V.

Dilecto

Dilecto Filio Hieronymo, Abbati Claræ-
vallis, electo S. R. E. Cardinali.

Dilecte Fili, salutem & Apostolicam benedi-
ctionem. Lectis litteris tuis, & cognitis ra-
tionibus, quas attulisti, cur tibi commodius esse exi-
stimes manere in Ordine tuo, quàm suscipere mu-
nus, ad quod te superioribus diebus de consensu
Fratrum nostrorum promouimus; modestiam qui-
dem & probitatem tuam amauius, sed excusa-
tionem non esse accipiendam duximus. Nam quòd
existimas promotionem hanc impedimento tibi fo-
re, ad agendam curam Monachorum tuo regimi-
ni commissorum, & Monasteria, quæ abs te visita-
ri, vt à Claræ-vallis Abbate, debent, visitanda; ea
res sese aliter habitura est, quàm censes. Cardina-
latus enim dignitas adiumento potius erit ad offi-
cium illis tuum maiore cum auctoritate præstan-
dum, & ea, quæ Monasteriorum necessitas exposcet,
agenda. De iis verò, quæ in eo esse debeant qui ad
hoc munus assumatur, quæ tibi deesse scribis; lau-
damus quidem istam humilitatem tuam, sed non
est tuum de te, quàm sis ei muneri idoneus, iudi-
care. Nostro acquiescere iudicio debes, & ita co-
gitare, per ministerium nostrum te à Deo vocatum
esse; quandoquidem te nec opinantem in curarum
& sollicitudinis nostræ partem non sine diligenti
delibe-

deliberatione assumpsimus, ad seruiendum nobiscum Dei honori, & sanctam eius Ecclesiam tam graui & turbulento tempore regendam, qui potens est & ea quæ dedit tibi dona augere, & quæ in te requiri forsitan possint, addere: pro cuius obsequio & honore nullos debes vel animæ vel corporis labores subterfugere; sed eius vocationi, confusus ipsius gratiæ & auxilio, humiliter obedire. Debes verò etiam, sicut charitatis officium postulat, vicem nostram dolere, qui hac ætate onus multò grauius sustinemus: ad quod ferendum tuâ, & tui similibus ope indigemus. Accepto igitur, quod ad te misimus, huius honoris insigni, omni excusatione omisâ, constitutis priùs quàm breuissimo tempore poteris Monasterij tui rebus, ad pileum rubrum, summum eiusdem dignitatis insigne, à nobis ipsis accipiendum, fac te ad nos primo quoque tempore conferas. Quod vt facias, in virtute sanctæ obedientiæ tibi mandamus. Ad nos autem cum, Deo iuuante, perueneris, tum non modò in vniuersum de Religione constituendâ tecum communicabimus, sed de eâ propriè in Cisterciensi Ordine, in quo penitus propè collapsa videtur, restituendâ. Datum Romæ apud S. Petrum sub annulo Piscatoris, die VIII. Maij, M.D.LXVIII. Pontificatus nostri anno tertio.

EPISTOLA VIII.

Cæsarem, vt Ecclesiæ Tridentinæ iura defendat, hortatur. Vide lib. III. cap. VII. Vitæ PII V. & infra huius libri Epist. XXIV. & XXV.

Charissimo in CHRISTO Filio nostro, Maximiliano II. Romanorum Imperatori.

Charissime in CHRISTO Fili noster, salutem & Apostolicam benedictionem. Exponi nobis curauit venerabilis Frater, Episcopus Tridentinus, Cardinalis Madrutius appellatus, magnâ sanè cum modestiâ, quantoperè cupiat dilecti Filij nobilis viri Ferdinandi, Archiducis Austriae, germani tui, gratiam & beneuolentiam obtinere, ac nullam cum eo controuersiam habere. Queritur autem, factum esse nonnullorum prauorum suorum impulsu, vt quædam tentari cœperint contra centum & amplius annorum consuetudinem, vt dicit, per quæ Ecclesiæ suæ iura maximâ ex parte minuantur. Sanè quò magis pium & Catholicum Principem, & maiorum vestrorum inclÿtæ memoriæ Principum similem, ipsum Archiducem nouimus; eò magis mirati sumus, ab eo talia tentari. Illud quoque cogitamus, rem hanc nimis mali exempli esse. Si enim tam Catholicus Princeps manus Ecclesiarum bonis admouebit; quid alios facturos
L esse

esse sperandum est? Sed cùm probitatem eius cognitam habeamus, hoc factum culpâ aliquorum esse persuasum habemus; qui gratiam eius aucupantes, Deum offendere non verentur, dum Principi suo placeant. Illud planè credimus, Maieitati tuæ non placere, isto modo agi, nec iure peti, quod legibus & iudicio obtineri possit. Si Archidux aliquod se ius habere existimat, leges habet, quibus agere potest: habet Maiestatem tuam, cuius arbitrio ea controuersia componi poterit. Quocircà Maiestatem tuam hortamur in Domino & rogamus, vt auctoritatem suam interponat, & fratrem suum ab ullâ vi adhibendâ, & pro Cæsareâ & pro fraternâ auctoritate, deducat; cùm nihil tam contrarium iuri sit, quàm vis: quâ qui vtuntur, non intelligunt, se ius suum in iniuriam conuertere. Consulat pro suâ pietate & sapientiâ, fratris sui existimationi, nec bonum eius nomen hac labe pollui patiatur. Det hoc etiam Maiestas tua sanctæ Sedis Apostolicæ reuerentiæ, vt ab huiusmodi factis eum dehortetur, quæ necessariam dignitatem ipsius Sedis essent violatura. Curæ quidem est nobis, sicut esse debet, vt Ecclesia illa in possessione bonorum suorum permaneat; sed pro paterno amore nostro erga ipsum Archiducem, existimationi quoque & famæ eius consultum cupimus. Hac autem eadem de re Nuntio nostro mandauimus, vt quàm diligentissimè tecum agat. Non minore nos molestiâ, quàm ipsum Episcopum,

scopum, tuæ Maiestatis maximum cultorem, liberabis, si auctoritate tuâ hæc controuersia sedata fuerit. Ad quam componendam vt incumbas, Maiestatem tuam, quanto possumus studio, iterum hortamur ac rogamus. Datum Romæ apud sanctum Petrum sub annulo Piscatoris, die xv. Maij, M.D.LXVIII. Pontificatus nostri anno tertio.

EPISTOLA IX.

De sacrosanctâ Communione sub vtrâque specie laicis nullo modo concedendâ. Vide lib. VI. cap. VIII. Vita PII V.

Vener. Fratri Urbano, Episcopo Patauiensi.

Venerabilis Frater, salutem & Apostolicam benedictionem. Certiores nos fecit Nuntius noster, qui apud Serenissimum Imperatorem electum residet, se abs te consultum fuisse super Communione sub vtrâque specie, vtrum eam Dilectis tuis efflagitantibus concedere deberes: misit etiam scriptum, in quo, quæ in concedendâ aut denegandâ eâ re commoda & incommoda essent, diligenter complexuses. Placuit nobis zelus, quem in hac re significasti: laudamus etiam prudentiam tuam, quòd de re tam graui nihil temerè agendum putasti: sed Apostolicæ Sedis Nuntium, hoc est, per eum Sedem ipsam Apostolicam consuluisti. Sed

nos, consideratis nobiscum attentius iis quæ abs te
proposita fuerunt, in eâdem sententiâ mansimus,
in quâ etiam tum, cùm à Prædecessore nostro ea
licentia efflagitata atque expressa fuit, fueramus;
non esse hac in re recedendum à tam vetere, & à tot
sanctis Patribus approbato & sanctissimè retento
Ecclesiæ Catholicæ instituto: nec deberè te, vel
quemquam alium, moueri leuium quorundam po-
stulationibus inconsultis: qui, si verè Catholici es-
sent, sanctam Matrem Ecclesiam magis reuereren-
tur, neque eius disciplinam & ritus tam temerè abij-
cerent; & verè Catholicos potius, quàm hæreticos
horum temporum, in vsu tam diuini ac venerabilis
Sacramenti sibi imitandos esse statuerent. Si sub
vnâ specie perinde Christum integrum ac sub vtrâ-
que sumi credunt, sicuti credere debent, cur vnâ
specie contenti non sunt? cur immutari ritum Ec-
clesiæ adeò antiquum, & ab omnibus Catholicis
nationibus per tot sæcula obseruatum, volunt? Si
non credunt, hoc ipso Catholicos se nomine tan-
tùm esse, re ipsâ autem cum hæreticis sentire osten-
dunt. Nam si verè Catholici essent, nullo pacto
sibi cum hæreticis, ne de cærimoniis quidem, con-
ueniendum esse putarent. Itaque metus ille, ne, de-
negato eis vsu sacri Calicis, ad hæreticos transeant,
te mouere non debet. Si enim id facturi sunt, iam
eos, certum habeas, non esse purâ nec sincerâ fide,
nec pro veris Catholicis habendos. Quamobrem
debes,

debes, Frater, primum illud eniti, vt populus tibi commissus retinendum sibi esse statuatur potius Ecclesiæ Catholicæ antiquissimum & sanctissimum ritum, quàm eum, quo hæretici vtuntur. Si hortando & monendo nihil profeceris; tu tuo te officio satisfecisse intelligere debebis. Quisquis recesserit, non tuâ, sed suâ culpâ recesserit. Atque in hac sententiâ adeò constanter & fortiter manere debes, vt nullius iacturæ aut periculi metu ex eâ te dimoueri patiari; etiamsi temporalia bona amittenda essent, etiamsi subeundum esset martyrium. Pluris talis constantiæ præmium æstimare debes, quàm quantasuis opes & temporalia bona: martyrium verò adeò non est subterfugiendum homini verè Christiano & Catholico, vt sit etiam expectandum, & in singularis beneficii loco à Deo accipiendum; & felix habendus sit, quicumque dignus habitus fuerit, qui pro Christo, & pro eius sanctissimis Sacramentis sanguinem effundat. Datum Romæ apud sanctum Petrum sub annulo Piscatoris, die xxvi. Maij, M. D. LXVIII. Pontificatus nostri anno tertio.

EPISTOLA X.

Ne laici, quauis dignitate sint, in Ecclesiarum Sacellis maioribus, vel in Choris, aut Presbyteriis, dum diuina celebrantur Officia, sedere seu stare permittantur. Neque mulieres, cuiusuis gradus sint, Virorum aut seminarum Monasteria ingredi audeant.

Dilecto Filio nostro Henrico, Tituli sancto-
rum quatuor Coronatorum Presbytero
Card. Portugalliæ Infanti, Apostolicæ Se-
dis Legato.

Dilecte Fili noster, salutem & Apostolicam
benedictionem. Inualuisse hunc in Ecclesiis
Regni Portugalliæ, tam cathedralibus quàm aliis,
secularibus & regularibus, abusum audiuius, vt
homines nobiles & alij laici, dum diuina Officia ce-
lebrantur, in ipsis Capellis maioribus & Choris
sedere & stare minimè vereantur, non parum impe-
dientes Ministros ipsarum Ecclesiarum in Officiis
celebrandis. Quod quidem licet vetitum fuerit de-
cretis Prouincialium Synodorum; tamen multi,
sicut accepimus, id sibi licere putantes propter li-
centias per importunitatem, aut forsan falsi sugge-
stionem, à Sede Apostolicâ impetratas, talia decreta
negligunt. Cùm igitur talis abusus, qui diuinum
cultum non parum turbat, tollendus, & debitus in
Ecclesiis decor, præsertim tempore diuinorum Offi-
ciorum, seruandus sit; Circumspectioni tuæ præsen-
tium tenore mandamus, vt, non obstantibus qui-
buscumque huiusmodi licentiis, sub grauibz pœnis
auctoritate Apostolicâ prohibeas & interdicas, ne
vlla secularis persona, quacumque dignitate præ-
fulgeat, dum diuina celebrantur Officia, in Capellis
maioribus & Choris dictarum Ecclesiarum sedere

aut

aut stare audeat: & quod de hac re statueris, diligenter cures & facias obseruari, etiam implorato, si opus fuerit, brachij sæcularis auxilio. Illud non parum mirati sumus, quod relatum fuit nobis, multas mulieres post confirmationem Decretorum sacri Concilij Tridentini, à Generalibus Ordinum sancti Dominici, sancti Augustini, sancti Francisci, Cisterciensis, beatæ Mariæ in monte Carmelo, & forsitan aliorum, expressisse licentias & facultates ingrediendi Monasteria Monialium eorundem Ordinum: alias verò concessis ab Apostolicâ Sede, ante confirmationem ipsius Concilij Tridentini, contra eius Decreta uti. Quæ res cum magnoperè impediatur obseruantiam regularem, & quietem ipsarum Monialium turbet; tolli hanc quoque nimiam licentiam volentes, & ea quæ Concilium Tridentinum salubriter statuit atque decreuit, ne mulieribus virorum, mulierumve viris ingredi Monasteria liceat, inuiolabiliter obseruari mandamus; & præcipimus, ut omnes huiusmodi licentias, etiam ab Apostolicâ Sede ante confirmationem Tridentini Concilij concessas, sub censuris & poenis, quibus tibi visum fuerit, eadem auctoritate reuoces; & quod Tridentinum Concilium super hac re statuit, diligenter facias; sicut de pio zelo tuo confidimus, obseruari. Datum Romæ apud S. Petrum sub annulo Piscatoris, die XXVII. Maij, M. D. LXVIII. Pontificatus nostri anno tertio.

EPISTOLA XI.

Regem Portugalliae post annum ætatis sue XIV. Regni gubernacula suscepisse gratulatur, atque ut in administratione optimis suorum consiliis acquiescens probe se gerat, in primisque pietatem in Deum, & augenda propagandæque Christianæ Religionis studium propositum habeat, hortatur.

Charissimo in CHRISTO Filio nostro, Sebastiano, Portugalliae & Algarbiorum Regi.

Charissime in CHRISTO Fili noster, salutem & Apostolicam benedictionem. Lætum admodum nuntium attulerunt nobis litteræ tuæ die tertiâ Martij datæ: ex quibus cognoscimus, Maiestatem tuam; cum iam ad annum XIV. ætatis suæ peruenisset, accepisse die festo sancti Sebastiani, & eodem natali suo, administrationem Regni ac Dominiorum suorum, à dilecto Filio nostro Henrico, Cardinali, patruo suo magno: cuius summâ fide, virtute, prudentiâ ac diligentâ ad id tempus feliciter administrata fuerunt. Egimus gratias Deo, qui te optimâ disciplinâ, & verè paternâ curâ ipsius Cardinalis imbutum & institutum ad eam ætatem perduxit, ut iam per te subiectos tibi populos & nationes regere possis. In quo munere te usurum, sicut semper facere debebis, Serenissimæ Reginae
avix,

auia, & eiusdem patru prudentissimis fidissimis-
que consiliis, planè confidimus; & auguramur, re-
sponsurum esse laudibus maiorum tuorum, inclytæ
memoriæ Regum. Quorum cùm alias præstantis-
simas virtutes, & gloriosa tibi ad imitandum pro-
posita habere debebis exempla, tum præcipuè pie-
tatem erga Deum, & studium augendæ & propa-
gandæ Christianæ Religionis. Ad quam propagan-
dam quantò vehementiùs incumbes, tantò magis
diuinum tibi semper aderit auxilium; & res om-
nes, quas ages aut aggredieris, feliciùs succedent.
De deuotione & obsequio, quæ nobis & huic san-
ctæ Sedi, maiorum tuorum exemplo, præstitu-
rum omni tempore profiteris, Maiestatem tuam in
Domino plurimùm laudantes: expectare te ipsum
quoque à nobis, & ab ipsâ sanctâ Sede, volumus
eximiam quamdam charitatem; & quantum ipsius
Sedis dignitas patietur, in tuis exaudiendis precibus
benignitatem. In communi illâ reuocatione iuris-
patronatum à fel. record. Pio Papa IV. prædeces-
sore nostro concessorum, non sine grauib. & iu-
stis causis à nobis factâ, quòd te æquo animo tulisse
scribis, gratiam tibi quoque à Deo factam fuisse; de-
uotionis erga Sedem Apostolicam tuæ magnum si-
gnum das, cùm eius iudicio, sicut filio ac moderato
Rege dignum est, humiliter acquiescis. De Mona-
steriis autem Regni tui, quorum regimen antea per-
petuum esse solebat, ad triennale regimen rectoris

M

admi-

administrationis causâ reductis, gratum nos fecisse
Maieitati tuæ, gaudemus. Datum Romæ apud san-
ctum Petrum sub annulo Piscatoris, die xxvi. Maij,
M. D. LXVIII. Pontificatus nostri anno tertio.

EPISTOLA XII.

*Adolescentem Regem optimis magni patruī Cardinalis,
& Regina Catharinæ eius auæ, consiliis in Regni ad-
ministratione adiutum iri confidens, id sedulo fieri
commendat.*

Dilecto Filio nostro in CHRISTO, Henrico
Cardinali Portugalliæ.

Dilecte Fili noster, salutem & Apostolicam
benedictionem. Charissimum in CHRISTO
Filium nostrum Regem ad eam ætatem peruenisse,
vt iam Regni, quod summâ fide, curâ & diligentia
tuâ ad hoc tempus administratum fuit, abs te ad-
ministrationem acceperit, libenter admodum cog-
nouimus, & Deo gratias agimus; quòd is spem affe-
rat, cùm reliquis virtutibus, tum pietate erga Deum,
& obseruantia erga sanctam Sedem, similem se fore
maiorum suorum inclytæ memoriæ Regum. Quod
eò magis de eo sperare possumus, quia non solum
quo genere ortus sit, sed etiam quali curâ & diligen-
tiâ educatus & institutus fuerit, nouimus. In his au-
tem Regni sui initiis, quòd ei vnâ cum charissimâ
in

in-CHRISTO Filiâ nostrâ Reginâ auiâ suâ tu adfuturus sis, id magnopere laudamus, & expedire putamus. Quibus enim melioribus consiliis tenera adhuc eius ætas niti potest, quàm vestris, quorum vtrique genere quidem nepos est, charitate autem filius? Ille verò plurimum Deo debet, quòd vos ambo eâ, quâ decet, concordia inter vos, communique consilio, actus eius sitis, donec ætas eius ita postulauerit, directuri. Quòd actiones quasdam nostras laudibus effers, eas quidem tibi probatas esse gaudemus: sed si quid agimus quod laudandum sit, totam Deo laudem tribui cupimus, à quo bona cuncta procedunt. Cuius auxilium, infirmitatis nostræ nobis conscij, & tuis & aliorum piis orationibus nobis implorare vehementer cupimus, vt tantum onus, quod vires nostras longè superat, sustinere possimus. Datum Romæ apud S. Petrum sub annulo Piscatoris, die XXVI. Maij, M.D.LXVIII. Pontificatus nostri anno tertio.

EPISTOLA XIII.

Simoniacam prauitatem omnino cauendam esse præcipit.

Eodem exemplo scripsit ad Archiepiscopos Mechliniensem, Cameracensem & Traiectensem; & ad Episcopos Buscoducensem, Iprensem, Middelburgensem, Harlemensem, Tornacensem, Atrebatensem, Audomarensem & Namurcensem.

Episcopis per Flandriam constitutis.

Venerabilis Frater, salutem & Apostolicam benedictionem. Quàm graue, quàm detestandum sit Simoniacæ labis crimen, quæ prima contra Ecclesiam hæresis prodiit; cùm Apostolorum Principis in eum, à quo & initium & nomen sumpsit, prolata sententia declarauit, tum illa Redemptoris nostri, qui mensas vendentium in templo columbas euertit, eosque reiecit, seueritas indicauit. In eo genere multa in istis partibus admitti, ad dignitates præcipuè & beneficia Ecclesiastica obtinenda, multis referentibus, non sine graui dolore audiui-mus. Quod si ita est, necesse est operam dare, vt tantum scandalum tollatur. Itaque pro commissi nobis officij sollicitudine Fraternitatem tuam hortamur, vt, quod ad eos qui sibi subiecti sunt attinet, diligenter ac sedulò huius rei inquirere studeat veritatem; & quos comperit quacumque huius criminis labe pollutos, Dei tantùm honorem ante oculos propositum habens, in eos animaduertat, secundùm canonicas sanctiones, & Decreta sacri Concilij Tridentini. Ad quod vitium refecandum, si, quantum speramus, zelus tuæ Fraternitatis exarserit, & Deo munus gratissimum offeres, & ad aliorum ædificationem, quantoperè domus Domini decorem diligas, apparebit. Datum Romæ apud S. Petrum sub

sub annulo Piscatoris, die v. Iulij, M. D. LXVIII.
Pontificatus nostri anno tercio.

EPISTOLA XIV.

Catholicos in officio Religionis continendos, lapsos ad fidem reuocandos, exequenda Decreta Concilij Tridentini, prouinciales & diocesanas Synodos habendas, Clericorum Seminarium instituendum, bonos tantum & idoneos sacris Ordinibus initiandos, Hussitas, nisi resipiscant, non promouendos, interdictos libros cauendos, quæ per se agere non possit, per adiutorem confici curet, Archiepiscopum Pragensem hortatur. Vide lib. II. cap. I. Vitæ PII V.

Venerabili Fratri N. Archiepiscopo Pragensi.

Venerabilis Frater, salutem & Apostolicam benedictionem. Commissi nobis officij curâ compellimur, & ipsius Domini præcepto iubemur, Fratres in sollicitudinis nostræ partem vocatos confirmare, & excitare ad ea, quæ ad Catholicam Religionem tuendam, & Dominicas oues conseruandas, opportuna ac potius valdè necessaria esse noscuntur. Quantis laboribus sacrum Tridentinum Concilium incubuerit ad ea remouenda, quæ grauia populis scandala pariebant, ac propterea nouarum rerum cupidis hominibus ansam disseminandi noua & ab orthodoxâ fide aliena dogmata præ-

bebant ; quamque salubribus Decretis idem multa statuerit , per quæ bono Ecclesiarum regimini, & salutis animarum consuleretur ; ipsius Concilij acta declarant. Verùm inanes tot labores euaderent, & nullum populo Christiano fructum afferrent, nisi quæ tam prouidè constituta fuerunt, in vsum & consuetudinem eorum operâ, quorum id officium est, adducerentur. Proinde, licet Fraternitatem tuam officio suo, quantum poterit, minimè defuturam esse putemus ; tamen, ne ipsi nostro desimus, cohortandum te in Domino duximus, vt ad Catholicorum reliquias in vrbe Pragâ & aliis Bohemiæ locis conseruandas, & eos qui à rectâ fide seducti fuerunt, ad orthodoxæ Religionis cultum reuocandos, quanto maximè potes studio, curâ & diligentia enitaris atque elabores. Ad hæc verò efficienda, necesse est exequi te primum id, quod ipsum Concilium decreuit, de Synodis celebrandis ; sicuti in aliis locis & prouinciis, ad Dei laudem, non sine euidenti Ecclesiarum vtilitate iam celebratæ fuerunt. Et quoniam in Bohemiâ maximam bonorum & idoneorum Sacerdotum penuriam esse constat, & Cleri inscitiam moresque corruptos plebem non immeritò offendisse ; necessarium est, abs te Seminarium in ciuitate Pragensi institui, ad alendam bonorum Sacerdotum, atque aliorum Ecclesiæ ministrorum sobolem : sicut venerabilis Frater Episcopus Olomucensis, celebratâ diocesanâ suâ Synodo,

odo, iam in Ecclesiâ suâ instituit, cuius in tam sancto opere meritò est laudanda industria. Sed & in aliis locis quàm plurimis huiusmodi Seminaria instituta fuerunt, & quotidie instituuntur. & res ipsa declarat nihil à Concilio Tridentino prouidentius & vtilius statutum fuisse. Oportet igitur, te & ipsam Synodum primo quoque tempore celebrare, & Seminarium instituere, nec vllam aliam temporis opportunitatem expectare: talia Dei opera non possunt sine Dei offensione negligenter fieri. Probat tuam in hac re piam sedulitatem maximè ipse pro suâ pietate Cæsar; si, priusquam Pragam veniat, hæc abs te perfecta fuisse cognouerit. Nec verò difficile factu erit, inire rationem aliquam, quâ redditus Seminario attribuantur, quanti ad vsus eius necessarios sufficiant.

Illud quoque vel maximè prouidendum est, vt ad sacros Ordines promoucantur homines, quos non modò constet esse Catholicos; sed qui diligenti examine adhibito, sicuti Concilium Tridentinum decreuit, probentur idonei: siqui autem minùs apti propter litterarum inscitiam fuerint, admonendi erunt, vt litteris operam dent, quoad tantum proficiant, vt promoueri possint. Quòd si in Catholicis tantam diligentiam adhibendam esse Concilium statuit; intelligis profectò quàm mali ac potius perniciosi exempli res sit, homines Hussitas, quamuis fore se Catholicos affirmant atque promittant, in cuius-

cuiusquam gratiam ad sacros Ordines promoueri. Quis enim confidere possit, id quod promiserint, præstituros? Si qui tamen eorum fidem fecerint, sincerè se agere, & errores respuere velle, atque ex animo ad Ecclesiam redire; ij non priùs ad vllum erunt Ordinem admittendi, quàm Hussitarum & alias omnes hæreses solemni more abiurauerint ac detestati fuerint; & per tantum tempus, quantum satis esse visum fuerit, Catholicè viuendo, omnem hæreticæ labis suspicionem à se depulerint.

Prætereà curare te oportet, vt in vrbe Pragâ aliis-
que Bohemiæ locis habeantur indices siue catalogi
eorum librorum, quorum lectio prohibita fuit, vt
Catholici noscant, à quibus libris abstinere debeant.
Danda quoque opera erit, vt Decretorum Concilij
exemplaria habeant, ex quibus salutarem Catholi-
cæ fidei doctrinam haurire possint.

Quia verò, sicut accepimus, tenui admodum va-
letudine vteris, & crebrò ægrotare soles, admone-
mus, vt aliquem spectatæ fidei, probitatis & indu-
striæ virum deligas, qui vicem tuam agat in eis re-
bus, quæ ad talium ministrorum munus pertinent;
cuique ea quæ ipse vel morbo præpeditus, vel aliis
occupationibus districtus, obire non poteris, fiden-
ter possis committere: per quem vel per aliam Ec-
clesiasticam personam debebis Parochos ciuitatis
diocesisque Pragensis, & reliquum Clerum tuum
diligenter visitare, & quæ in eis corrigenda ac refor-
manda

manda fuerint, Dei tantum honorem, & aliorum salutem, ac tuam ipsius ante oculos propositam habendo, corrigere ac reformare. Cogitans igitur, charissime Frater, de animabus pretiosissimo CHRISTI Sanguine redemptis, si culpâ vel negligentia nostrâ perierint, rationem à nobis acriter exacturum Redemptorem ipsum, æternumque Pastorem, tali sedulitate commissum tibi officium implere stude. Hæc, de quibus te admonuimus, & alia quæ salutis animarum vtilia cognoueris, exequendo, & à Parochis tuis ac aliis in Bohemiâ curæ animarum præpositis, hortando, monendo, obsecrando, arguendo etiam & increpando, si opus sit, suum cuiusque ministerium ita implendum curas, ut pro lucro animarum, quæ acquisitæ fuerint, laudem potius & præmium tu & illi consequi, quam pro iacturâ earum, quæ incuriâ vestrâ, quod absit, perditæ fuerint, grauiorem sententiam metuere debeatis. Datum Romæ apud S. Petrum sub annulo Piscatoris, die XXIII. Iulij, M. D. LXVIII. Pontificatus nostri anno tertio.

EPISTOLA XV.

Reportatam in Belgio de hæreticis victoriam Duci Albæ gratulatur; ipsumque ad eos bello profligandos, Catholicamque Religionem tuendam, hortatur. Vide lib. II. cap. II. Vita. PII V.

N

Dilecto

Dilecto Filio, nobili viro, Ferdinando
Toleto, Duci Albæ.

Dilecte Fili, nobilis vir, salutem & Apostolicam benedictionem. Ex litteris tuis die xxv. Iulij datis, & ex dilecto Filio viro Ioanne à Zuniga cognouimus, quàm prosperè rem iterum aduersus hæreticos, & eisdem Serenissimi Regis rebelles, gesseris. Benedictus Dominus, qui in tot curis & angoribus nostris, tam latis nuntiis nos consolari dignatur. Gaudemus Religionis Catholicæ causâ, tam luculentam tibi victoriam à Deo donatam fuisse: gaudemus charissimi in CHRISTO Filij nostri Regis Catholici causâ. Tibi verò non solum gratulamur, cui prælia Domini prælianti tam manifestò supernum adest auxilium; sed etiam totius Ecclesiæ nomine gratias agimus, quòd nullis defatigatus laboribus, nullis deterritis periculis, de eâ benè mereri non desistis. Perge, dilecte Fili, his tamquam gradibus tibi viam ad sempiternam gloriam munire; &, sicuti cœpisti, enitere, vt in prouinciis istis Religionem Catholicam in pristinum statum redigas: cuius rei gloria omnium Ducum & Imperatorum victorias superabit. Saluum te & incolumem diuina Maiestas conseruet. Datum Romæ apud sanctum Petrum sub annulo Piscatoris, die xxvi. Augusti, M.D.LXVIII. Pontificatus nostri anno tertio.

EPISTO-

EPISTOLA XVI.

Vt rem Christianam in Indiâ propagare recteque habere curet, Regem Hispaniarum hortatur. Vide lib. III. cap. v. Vitæ PII V.

Charissimo in CHRISTO Filio, Philippo
Hispaniarum Regi Catholico.

Charissime in CHRISTO Fili noster, salutem & Apostolicam benedictionem. Cùm oporteat nos pro officio pastoralis, quod nobis licet indignis commissum fuit, curam habere, non solum eorum qui fidem Christianam susceperunt, sed eorum etiam qui ad eam suscipiendam facile adduci possunt, veluti populorum Indiæ, qui ad Hispaniæ Regnum nostris temporibus adiuncti fuerunt; magnoperè in Domino lætamur, te, vti Regem verè Catholicum, sicuti à felic. record. prædecessoribus nostris optatum fuit, qui eam orbis terrarum partem maioribus tuis subigendam attribuerunt, eosque populos illorum fidei commiserunt, curasse, vt sacrum Euangelium in illis prouinciis prædicaretur, ac fides Catholica propagaretur. Quod etsi eo studio, atque eâ sedulitate actum fuit, vt Maiestas tua eo nomine magnoperè in Domino collaudari potiùs debeat, quàm hortationibus excitari; conuenire tamen officio nostro duximus (postquam certiores facti fuimus de rectoribus admodum idoneis earum prouinciarum regi-

mini nuper destinatis) Maieſtatem tuam rogare, vt populos illos ditionis ſuæ, hac occaſione oblatâ, eis quàm diligentiffimè commendare velit, ac præcipuè mandare, vt propagationi ſanctæ fidei, & animarum ſaluti intenti ſint. quarum rerum cauſâ ea orbis terrarum pars ab initio ipsis maioribus tuis conſeſſa fuit; vt, cùm ex laudabili eorum regimine qui illis præerunt, tum bonis exemplis eorum qui Chriſtianam illis doctrinam tradent, iugum CHRISTI ſuaue & leue eſſe ſentiant, neque ab illis ipsis opprimantur, qui eos tamquam teneras in vineâ Domini plantas alere ac fouere, & amorem in eis Chriſtianæ Religionis accendere atque augere debent; & ea omnia caueantur, quibus ipsis offendi, & Chriſtiana Religio detrimentum capere poſſet: qui autem nondum Chriſti fidem ſuſceperunt, ad eam ſuſcipiendam, charitate & dexteritate adhibetâ, alliciantur. Certum enim habeat Maieſtas tua, ex propagatione Religionis ſuum quoque in illis partibus Regnum Deo propitio ac fauente firmatum & auctum iri, & ſibi talium in eos populos & Religionem meritorum, non ſolùm in hac vitâ, ſed in alterâ etiam, præmium paratum fore. De his autem rebus mandauimus Venerabili Fratri Archiepiſcopo Roſſanenſi, vt cum tuâ ipſe quoque Maieſtate loquatur. Datum Romæ apud S. Petrum ſub annulo Piſcatoris, die xvii. Auguſti, M.D.LXVIII. Pontificatus noſtri anno tertio.

EPISTO.

EPISTOLA XVII.

Vt Christianam Religionem in Indiâ propagari apud Regem Catholicum procuret, Didacum Cardinalem hortatur. Vide lib. III. cap. v. Vitæ P I I V.

Didaco Cardinali Spinofæ.

Dilecte Fili noster, salutem & Apostolicam benedictionem. Quandoquidem Domino placuit, vt te in partem curarum & sollicitudinis nostræ vocaremus, communicandum tecum duximus de re ad commissum nobis licet indignis munus, & propterea ad tuum quoque vel maximè pertinenti. Quid enim æquè ad officium nostrum pertinet, ac curare, vt orthodoxa Religio quàm latissimè, diuini honoris & salutis animarum causâ, propagetur? vt qui eam pridem iam susceperunt, confirmentur; qui verò adhuc idolorum sunt cultui dediti, relictis errorum tenebris, lucem veritatis respiciant. Cuiusquidem quò maiore desiderio tenemur, eò libentiùs audiuius, charissimum in CHRISTO Filium nostrum, Regem Hispaniarum Catholicum, lectissimos quosdam & probatissimos viros ad regendas Indiæ ditionis suæ prouincias destinasse. Quâ in re planè declarauit dignam Rege verè Catholico voluntatem. Etsi autem Regem tantâ pietate & clementiâ præditum non egere hortatione nostrâ scimus;

mus; quippe quem audimus suâ ipsam sponte, & pro ingenitâ sibi clementiâ multis illos populos oneribus subleuasse; quibus antea vexari & opprimi miserandum in modum consueuerant; tamen volumus, vt eum, post laudem debitam nostris verbis hoc nomine tributam, dexteritate quâ decet, hortaris, ad perseuerandum in tam sancto proposito suo propagandæ Religionis orthodoxæ. quæ quidem vt propagetur, Maiestas eius pro suâ sapientiâ intelligit oportere, si quæ onera restant, quæ tollenda sint, tolli; eosque populos ita tractari, vt gaudere indies magis debeant, relictum à se idolorum cultum, & CHRISTI iugum suaue ac leue susceptum fuisse. Illud quoque, quantum fieri potest, curandum esse, vt Christianorum, qui ex his Occidentis partibus profecti in illas prouincias commigrarunt, vitâ & moribus illos populos ædificent. Ita enim & ipsi in fide Catholicâ confirmabuntur, & bonis eorum exemplis ceteri ad agnoscendam veritatem allicientur. Quibus de rebus Maiestatem suam nostris verbis hortaberis, vt pia mandata sua renouare dignetur: quæ quantò magis in hanc curam incumbet, tantò magis non solum Diuini honoris cultum, sed suum quoque Regnum, Deo fauente, stabiliet, atque etiam propagabit. Mandato autem nostro Venerabilis Frater Archiepiscopus Rossanensis desiderium hoc nostrum pluribus exponet: cuius orationi fidem habebis. Datum Romæ apud sanctum Petrum

Petrum sub annulo Piscatoris, die XVIII. Augusti,
M. D. LXVIII. Pontificatus nostri anno tertio.

EPISTOLA XVIII.

*Fidem Catholicam in Prouinciâ Peruanâ propagandam
curat. Vide lib. III. cap. v. Vitæ PII V.*

Dilecto Filio, nobili viro, Francisco Toletto,
Proregi Prouinciæ Peru in partibus Indiæ.

Dilecte Fili, nobilis vir, salutem & Apostolicam benedictionem. Magnoperè in Domino gauisi sumus, ac Deo gratias egimus, cuius instinctu factum non dubitamus, vt charissimus in CHRISTO Filius noster, Hispaniarum Rex Catholicus, te ad regendam prouinciâ Peru destinauerit: adeò præclara de tuâ virtute & in Catholicam Religionem studio testimonia habuimus. Non solum enim fideliter ac sedulò executurum te esse confidimus, quæcumque à tam pio Rege mandata habueris; sed facturum prætereà tuâ sponte quidquid præsens ipse expedire cognoueris, ad fidem orthodoxam in illis partibus propagandam, & quàm plurimas animas CHRISTO lucrandas. Vt verò, & qui adhuc infirmi sunt, in fide confirmentur, & qui idolorum cultores, CHRISTI fidem suscipiant; necesse est pro tuâ prudentiâ intelligas, illos ita regi atque tractari debere, vt ipsi quidem diuinæ erga se miseri-

• misericordiæ beneficium indies, magis agnoscant; infideles autem atque idololatræ eorum exemplo atque imitatione ad veritatem agnoscendam inuitentur. Illud quoque, quantū fieri potest, prouidendum est, ne eorum, qui ex his Occidentis partibus in eas prouincias commigrarunt, prauis moribus offendantur. Quibus in rebus exequendis & curandis, Nobilitas tua, etiam tacentibus nobis, intelligit, quantam habitura sit facultatem inseruiendi Dei Omnipotentis honori simul & Regis gloriæ; sibi autem ingentis ab hominibus laudis comparandæ, nec minoris à Deo gratiæ incundæ. Nostram autem paternam benedictionem tibi impertientes, Venerabili Fratri Archiepiscopo Rossanensi, nostro mandato tibi pluribus verbis desiderium nostrum exposituro, fidem vt habeas, abs te petimus. Datum Romæ apud sanctum Petrum sub annulo Piscatoris, die XVIII. Augusti, M. D. LXVIII. Pontificatus nostri anno tertio.

EPISTOLA XIX.

Cesarem collaudat, quòd Augustanam Confessionem non concesserit: ac terrena Regna Regumque studia ad celestis Regni adeptionem omnino conferenda esse demonstrat. Vide lib. III. cap. VI. Vitæ PII V.

Charissi-

Charissimo in CHRISTO Filio nostro, Maximiliano, Hungariæ ac Bohemiæ Regi Illustri, electo Romanorum Imperatori.

Charissime in CHRISTO Fili noster, salutem & Apostolicam benedictionem. Lectis tuis literis, quas in fidem Oratoris tui apud nos scripsisti, auditoque eius sermone quem nomine tuo nobiscum habuit; lectisque similiter his quas Legatus apud te noster ad nos dedit, quibus nos certiores facit, te non solum, quod ad Augustanam pertinet Confessionem, nihil noui concessurum esse; sed etiam prouinciales, qui ob eiusmodi Religionis causam frequentes iam conuenerant, omnes domum suam dimisisse, & aliis qui conuenturi erant significasse, ne amplius conuenirent; magnam pro nostrâ in te paternâ beneuolentiâ & charitate animi lætitiâ accepimus; eoque magis, quod & Nuntius apud te noster eodem tempore scripserat, te sibi pollicitum esse, quosdam hæreticos concionatores vicinis è villis expulsurum. Vt enim cum primùm ad nos allatum est eâ de re, eò sumus vehementiùs dolore ac molestiâ affecti, quam & Christianæ Reipublicæ charitas, & officij nostri ratio, & propensa in te ipsum voluntas nostra exposcere videbantur: sic nunc, postquam de te ac tuo in nos Apostolicamque Sedem studio atque animo audiuius, de quibus nunquam dubitauimus, atque audire cupiebamus,

O

magno-

magnoperè in Domino gauisi sumus. Quod quidem gaudium nostrum vt sit perpetuum, assiduis precibus ab Omnipotente Deo postulamus; speramusque fore, vt tu, cuius in tuendâ Ecclesiæ dignitate præcipuæ partes esse debent, pro eâ Imperij, quam obtines, Maiestate, quotidie magis satagas peragere, quæ ad Ecclesiæ dignitatem eam conseruandam pertinent, quam maiores tui nobilissimi, & Romanæ Ecclesiæ in primis amantissimi Imperatores, conseruare pro viribus suis semper conati sunt. Quâ in re, sicut ea non desideramus abs te, quæ sunt supra vires tuas, sic ea quæ fieri præstarique possunt, magnoperè semper requiremus. Quæ quidem si tu, sicuti pro comperto habemus, tibi facienda esse duxeris, multò maiorem firmioremque filiis tuis seruatæ fidei in IESVM CHRISTVM Dominum nostrum, quàm Regnorum hereditatem relinques. Nam terrena Regna, Fili charissime, perpetua non sunt, & sine animæ detrimento amitti recuperarique possunt: imò verò eo animo à Regibus & Principibus omnibus obtinenda sunt, vt pro salute animæ, Religionis amore, & veræ pietatis studio, si occasio ita tulerit, & amittere parati sint, potius quàm cælorum Regnum, quod & æternum est, & omnibus aliis Regnis, quantumuis magnis, præferendum. Hoc autem tantum abest, vt Imperiis & Principatibus conseruandis impedimentum aliquod afferre possit, vt nullâ meliori quàm hac ratione conserua-

ri possint. Quodque te tamen facturum non dubitamus, extremum illud sit, si tu (quod te valdè hortamur) facies id, quod & personâ tuâ, & fide iusiurandoque dignum sit; quodque expectatur ab eo, qui est præcipuus Ecclesiæ aduocatus; nos te tamquam charissimum Filium omni nostrâ beneuolentiâ, amore voluntateque complectemur, sicuti semper complexi sumus: nihilque prætermitemus earum rerum, quas ad dignitatem Maiestatemque tuam augendam amplificandamque pertinere putabimus. Datum Romæ apud S. Petrum sub annulo Piscatoris, die 1. Decembris, M. D. LXVIII. Pontificatus nostri anno tertio.

EPISTOLA XX.

Vt quamprimum ritè consecrari se procuret, bonique Pastoris munera strenuè præstans, mores Ecclesiasticamque disciplinam restituat, electum Episcopum hortatur. Vide lib. II. cap. I. Vitæ PII V.

Dilecto Filio, Melchiori, electo Episcopo.

QUO magis consecrationem Episcopo electo necessariam esse intelligimus, ad ea quæ ipsius ordinis & muneris maximè propria sunt, exequenda atque administranda; eò amplius mirati sumus, te ad hanc usque diem, rem tantoperè necessariam, tamque salutarem, distulisse. Quæ ex re pro nostro pastoralis officij munere, sollicitaque om-

nium Ecclesiarum curâ, non potuimus non magno-
perè dolere ac tristari. Et quamquam Venerabilis
Frater Marcus Suffraganeus tuus, nobiscum super
hac re accuratè sanè locutus, nonnullas causas ex-
cusationesque huius tui facti nobis attulerit, tamen
nulla earum nobis idonea visa est, & videtur, ob
quam hæc ipsa tua consecratio, quam quidem mul-
tò antè fieri à te oportebat, vllò modo aut præter-
mitti aut longiùs differri possit. quia tamen om-
nes Venerabiles Episcopos Fratres nostros, teque in-
ter eos, verè paternâ beneuolentiâ charitateque com-
plectimur; idcirco mansuetudinis indulgentiæque
nostræ non immemores, his nostris litteris te etiam
atque etiam monendum duximus, vt, quod hucus-
que non fecisti, tibi primo quoque tempore facien-
dum statuas. Hoc autem tempus sex mensium spa-
tium, à die quo hæc nostræ litteræ scriptæ sunt, com-
putandum, tibi eisdem nostris litteris præscribimus:
quibus quidem sex mensibus elapsis, nisi Episcopus
consecratus fueris; cogemur, de his remediis cogi-
tantes, quæ & ratio nostri officij & Ecclesiæ tuæ
cura à nobis exposcunt, ad depositionem tuam ab
Episcopatu deuenire. Ad illud quoque, Domini
vocis memores, eius quâ Petro ipsi Apostolorum
Principi (ad cuius nos ministerium licet meritis im-
pares Deus vocauit) Fratrum suorum animos con-
firmandos præcepit; hortamur, vt Pastoralis solici-
tudinis non oblitus, in cuius partem vocatus es, oues
fidei

fidei tuæ prouidentiaque commissas non solum ipse pascas, omnium exemplo virtutum, salutarique doctrinæ pabulo, per te, & per Catholicos & Religiosos viros præbendo; sed etiam Cleri deprauatos diuturnâ vitiorum consuetudine mores, & laicorum, quoad eius fieri potest, sine personarum exceptione, seuerè corrigendos cures: vt, relictis vitiis, quibus se ac sacerdotale nomen dedecorantes, in summam infamiam adduxerunt, atque hac maximè ratione laicos ipsos corruperunt, & à fide Catholicâ auerterunt, iuxta Apostoli sententiam sobriè, castè atque honestè viuant. Si enim Clerici & Sacerdotes, cogitantes vitam suam laicis ad imitandum maximè esse propositam, ita viuere eaque agere studebunt, quæ animarum saluti eorumque muneri fideliter administrando conueniunt; futurum est, Deo iuuante, qui bonis semper voluntatibus occurrit, vt hæretici, cum in Clericis ipsis ac Sacerdotibus nihil quod reprehendere possint, inueniant, aliquando resipiscant, atque ad cor redeant, & ad gremium sanctæ Matris Ecclesiæ reuertantur. Hoc igitur, Frater, præsta, hoc age, hæc noctes diesque meditare, hæc assiduis hortationibus & monitis enitere, vt, quantum in te erit, animabus tuæ curæ fideique creditis Pastoralem curam vigilantiamque tribuas. Quod quidem si feceris (quemadmodum te facturum esse speramus) vnicum tu quidem remedium ad sanandas hæreses, pietatemque ac Catholicam Religionem

reuocandam adhibebis; sed & dignitati officioque tuo potissimum hac ratione consulēs, & ab Omnipotenti Deo nobisque præcipuam gratiam inibis. Datum Romæ apud S. Petrum sub annulo Piscatoris, die xxviii. Decembris, M. D. LXVIII. Pontificatus nostri anno tertio.

EPISTOLA XXI.

Ducem Albæ in Belgio contra hæreticos bellum feliciter gerentem commendat, eumque ad rem Christianam strenuè protegendam cohortatur. Vide lib. II. cap. XI. Vitæ PII V.

Dilecto Filio, nobili viro, Ferdinando
Duci Albæ.

Non faciliè verbis consequi possumus, quanto perè in Domino delectati simus legendis litteris tuis, xxii. die Octobris datis: nam & ista tua variis in bellis, pro veritatis Catholicæ propugnatione, Sedisque Apostolicæ defensione gestis, meritorum tuorum commemoratio magnâ nos lætitiâ affecit, vt par est; & apud nos non narrationis modò fidem, sed planè testimonij vim obtinuit. Quæ quidem omnia quamquam magnâ ex parte nobis nota erant, propterea quòd & à te nobili viro, egregioque copiarum Duce, & in bellicis expeditionibus maximis, & propter iustissimas honestissimasque

masque Religionis tuendæ causas susceptis, gesta erant; sic vt earum rerum nullo modo obliuisci sine culpâ possemus: tamen gratissimum nobis fuit, & ipsa quæ nos aut omnia aut pleraque meminimus, ex tuis ad nos litteris recognoscere. Nihil enim aut ad Ecclesiæ dignitatem gloriosius, aut ad animi nostri verè paternum in omnes homines affectum iucundius nobis accidere potest, quàm cum intelligimus, militares homines fortissimosque Duces, qualem te esse & antea semper cognouimus, & in hoc periculosissimo bello experimur; non suæ utilitati, aut propriæ tantummodò gloriæ inservire, sed magis Omnipotenti illi Deo militare, qui suos milites pro se ac sui nominis gloriâ decertantes, non corruptibili quadam coronâ, sed sempiternâ atque immarcescibili coronare paratus est. Hoc est enim, dilecte Fili, verè inuisum, dexterè sinistram verte- re, cum militares terrenæque actiones, quæ pro sinistrâ intelliguntur, non aliquarum humanarum rerum causâ suscipiuntur, sed ad cælestem utilitatem reuocantur. Itaque Nobilitatem tuam his de rebus, quas non minùs piè quàm fortiter à se gestas: suis ad nos litteris commemorauit, & valdè amauimus antehac, & nunc non amamus solùm, sed vehementer laudamus; Deoque Omnipotenti gratias agimus, qui virtutem tuam, industriam, vigilantiam, fortitudinem ad hæc tam necessaria tempora reseruauit. Et quamuis sciamus, te tuâ sponte satis incita-

incitatum esse ad ea agenda, quibus Religionis sanctissimæ causâ adiuuetur; tamen pro nostro Pastoralis officij munere, & ut animi nostri studio satisfaciamus, te ad hæceadem hortandum esse duximus. Quod verò ad iuris tui patronatus confirmationem pertinet, quam à nobis eisdem tuis litteris postulasti, etsi eam rem faciliè Romani Pontifices concedere non solent, propterea quòd vsitata non sit; nos tamen libenter, dilecte Fili, precibus postulationique tuæ satisfacimus, & in ipso elogio ea tibi, pro tuâ singulari in Deum pietate, testimonia dedimus piæ deuotionis erga sanctam hanc Sedem, quæ & posteros tuos ad eiusdem deuotionis imitationem excitare possint, & tuo ardenti in Ecclesiam Dei studio debebantur. Quâ in re agendâ dupliciter latati sumus, & quòd tibi ea præstitimus quæ à nobis petiisti, quæque non mediocriter te desiderare significabas; & quòd nos in ornandâ dignitate tuâ id fecimus, quod magnoperè semper desiderauimus. Nihil enim est earum rerum quæ à beneuolo benignoque patre expectari debent, qualem nos in te esse semper experieris, quantum cum Deo liceat, quod tuæ isti in Deum pietati, religionis studio, atque in defendendâ Catholicæ veritatis fide laboribus deberi non existimemus: eandem voluntatis nostræ propensionem declaraturi cunctis in rebus, quæ vel ad honorem vel commodum tuum pertinebunt, cum se occasio obtulerit. Datum Ro-

mæ

ma apud sanctum Petrum sub annulo Piscatoris,
die XII. Decembris, M. D. LXVIII. Pontificatus
nostri anno tertio.

EPISTOLA XXII.

*Ad Catholicam Religionem retinendam & tuendam, Re-
gem Poloniae hortatur. Vide lib. III. cap. X. Vita
Pii V.*

Charissimo in CHRISTO Filio Sigismundo
Augusto, Regi Poloniae Illustri, dilectis Fi-
liis, nobilibus viris, Senatoribus Palatinis,
& Castellanis omnibus in Dieta Lubli-
nensi congregatis.

ET si non dubitamus te, charissime Fili, pro
tua in Deum pietate, & maiorum tuorum
clarissimorum Regum, ac tua in sanctam hanc Se-
dem reuerentiâ, vosque omnes, qui in isto Conuen-
tu congregati estis, nullam aliam ob causam simul
conuenisse, nisi ut ea consultetis inter vos ac decer-
natis, quæ & ad istius nobilissimi Regni vtilitatem,
& ad Dei Omnipotentis honorem pertinent; ta-
men pro nostrâ in vos paternâ beneuolentiâ præter-
ire noluimus, quin vobis hoc tempore simul con-
gregatis paternæ nostræ dilectionis officium præ-
staremus. quod quidem officium nullum aliud est,

nisi vt Maieſtatem tuam in primis, chariſſime Fili,
deinde ceteros omnes, qui tecum in iſto Conuentu
adſunt, nobiles viros hortaremur, ad ea conſultan-
da, decernenda atque exequenda, quibus non modò
non minuatur orthodoxæ fidei Religio, nec proba-
tiſſima ac ſalubria maiorum noſtrorum inſtituta,
Sediſque Apoſtolicæ ius atque auctoritas vllâ in re
detrimentum aliquod patiatur; ſed etiam quibus
maximè rebus fieri poteſt, adiuuetur, augeatur at-
que amplificetur. Quod quidem Maieſtati tuæ &
vobis ſingulis facile erit, ſi conſiderabunt terrena
Regna, quæ in manu Domini ſunt, nullâ aliâ re fa-
ciliùs quàm eiufdem Domini Religionis amore
atque obſervantiâ conſeruari: hanc autem Religio-
nem niſi vnâ in toto Chriſtiano orbe, neque
vinqvam antea fuiſſe, neque nunc eſſe poſſe; eam vi-
delicet, quæ ab Apoſtolorum Principis Petri cete-
rorumque Apoſtolorum temporibus doctrinâque
proſecta, per tot eius ſucceſſores, ad nos & noſtrum
vſque tempus, vna eademque ſemper atque inuiola-
ta permanſit. Et quamquam, ſuggerente diabolò
Chriſtiani nominis hoſte, variæ in multis prouin-
ciis hæreſes & antè ſemper exſtiterint, & nunc exi-
ſtant; tamen hæ neque antea vllam inter ſe vnita-
tem habere potuerunt, neque nunc habent, aut ha-
bere poſſunt. hoc ipſum nimirum diuinâ permit-
tente Prouidentiâ, vt, qui à ſanctæ Eccleſiæ doctrinâ
atque vnitatem propter ſuperbiam, ſeiſpoſ abſcide-
runt

runt ac diuiferunt, numquam in vnum aliquod corpus coalescere potuerint. Hæc est illa sanctissima, ac verè sola & vna Religio, quam Apostoli prædicauerunt, Martyres moriendo confessi sunt: quæ potuit quidem præteritis temporibus, & nunc etiam potest, hæreticorum dissentientibus inter se opinionibus impugnari, sed expugnari tamen non potest. Atque vtinam hanc eandem illi ipsi ab initio constanter tenuissent, quorum præcipuè perniciosâ operâ, pestiferisque consiliis, respublica Christiana, Deique Omnipotentis Ecclesia in tantam calamitatem ducta est: meliùs cum ipsis & cum hac ipsâ sanctâ Sede ageretur; neque tot vbique populorum aduersus suos Principes discordiis, ob hanc ipsam causam susceptis, Christiana respublica laboraret. Hanc maiores tui, nobilissimi Reges, charissimi Filij, Religionem semper coluerunt, hanc tenuerunt. Ad quam quidem te, vt ab initio diximus, tuorum exemplo maiorum, & ceteros qui adsunt in isto Conuentu, nobiles viros, hortamur. Et quamquam non dubitamus, Maiestatem tuam & ceteros omnes, aut plerosque eorum, suâ sponte ad hoc idem agendum incitados ac benè animatos esse; non alienum tamen à nostro Pastoralis officij munere putauimus, currentibus vobis Apostolicæ nostræ hortationis quasi calcar ad mouere. Quòd si qui tamen inter vos (quod Deus auertat) reperiantur, qui aliter sentiant; hos pro nostro in omnes homines pa-

terno animo ac sincerissimâ voluntate monitos volumus, vt errorem suum recognoscentes, ad eam Religionis Ecclesiæque vnitatem reuerti studeant, extra quam nullo modo salui fieri possunt. Hoc enim si fecerint, præterquam quòd melius animarum suarum saluti suæque fidei consulent; nos prætereà omni nostrâ benignitate ac charitate illos ad gremium sanctæ Matris Ecclesiæ redeuntis suscipiemus atque amplectemur. Deum autem Omnipotentem rogamus toto corde, totiusque animæ nostræ viribus, vt vobis (quod speramus) in eius nomine congregatis, Spiritum suæ charitatis ita infundat, vt & nunc & semper ea statuatis, quæ ad illius honorem quotidie magis augendum, & ad istius Regni tranquillitatem & pacem, atque ad huius omnium Christi fidelium Matris Ecclesiæ veterem auctoritatem restituendam, conseruandam propagandamque pertinebunt. Datum Romæ apud sanctum Petrum sub annulo Piscatoris, die xvii. Decembris, M. D. LXVIII. Pontificatus nostri anno tertio.

EPISTOLA XXIII.

Ad Catholicam Religionem, & ad Apostolicæ Sedis auctoritatem protegendam, Senatores Palatinos & Castellanos in Dietâ Lublinensi congregatos hortatur. Vide lib. III. cap. X. Vita PII V.

Dilectis

Dilectis Filiis, nobilibus viris, Senatoribus
Palatinis, & Castellanis omnibus in Diæ-
tâ Lublinensi congregatis.

Dilecti Filij, nobiles viri, salutem & Aposto-
licam benedictionem. Etsi exploratum ha-
bemus, omnes qui in isto Conuentu congregati
estis, pro vestrâ prudentiâ, & Christianæ Religionis
studio, ac pro vestro Religionis Catholicæ zelo, sin-
cerâque erga sanctam hanc Sedem reuerentiâ, de
nullis aliis rebus acturos, præterquam de his, quæ
ad Dei Omnipotentis honorem, istiusque nobilissi-
mi Regni vtilitatem pertinent; quarum rerum po-
tissimum causâ vos simul conuenisse pro comper-
to habemus; tamen nos, qui propter Apostolicæ
seruitutis onera, omnia omnibus facti sumus, cogi-
mur hoc tempore, impellente nos charitate, vobis
quoque officium nostræ paternæ dilectionis impen-
dere. Hoc autem nullum aliud est, dilecti Filij, nisi
vt vos, tamquam Catholicos, deuotos & sinceros
Ecclesiæ filios, purissimo sincerissimoque corde, &
quantò maiore possumus animi studio hortemur,
ad ea in isto vestro Conuentu consultanda, decer-
nenda atque exequenda, quibus non modò non mi-
nuatur orthodoxæ fidei Religio, nec probatissima
& salubria maiorum nostrorum instituta, atque
Sedis Apostolicæ vis atque auctoritas vllâ in re de-

trimentum aliquod patiat; sed etiam quibus maximè rebus fieri potest, adiuvetur, augeatur atque amplificetur. Quod quidem singulis vobis facile erit, si unusquisque vestrùm ante mentis oculos illius sibi Domini timorem proposuerit, cuius oculi sunt super iustos: qui scrutator est cordium, quiq; sicut eos punire solet, qui à normâ cultus eius, hoc est à sanctæ Ecclesiæ doctrinâ, diuisi sunt; sic eos, qui salutarem eius disciplinam custodiunt, æternis maximisq; præmiis paratus est remunerari. Quod quidem vtinam illi ipsi (magno hæc cum dolore dicimus) ab initio prospexissent, quorum præcipuè perniciosâ operâ, pestiferisq; consiliis, respublica Christiana, Deiq; Omnipotentis Ecclesia in hunc miserabilem statum adducta est. Non enim humani generis antiquus hostis tantam occasionem nactus esset in Dominicum gregem sæuiendi, neque tantoperè intestinis prauissimarum hæresum discordiis laboraret Ecclesia: quæ tamen, diuinâ nimirum operante Prouidentia, dum hæreticorum quæstionibus turbulentissimis oppugnatur, subtilius semper atque ardentius, tum in Dei charitate inflammatur, tum in suâ eruditione instruitur. Vos autem præter ceteros præcipuè decet, dilecti Filij, & semper, & hoc maximè tempore, in quo vos simul publicæ vtilitatis publica cauissa congregauit, dispicere diligenter atque attentius considerare, quid non modò vtilitas vestri Regni exposcat, sed etiam quid

quid Deus à vobis, quos istius Regni Primates constituit, pro vestro officio in illo districto Iudicij sui die requisiturus sit. Si enim in hanc cognitionem pro vestrà in Deum pietate veneritis, vt cogiteris, vestrorum consiliorum actionumque omnium aeterno illi Iudici reddendam esse rationem; non modò nihil vmquam vobis placere poterit, quod alienum sit à sanctissimis Ecclesiæ sanctionibus; sed etiam omni curâ, diligentia, labore, illius dignitatem ac maiestatem, quibus semper poteritis rationibus, vobis augendam amplificandamque esse putabitis. Ad quæ quidem, vt ab initio diximus, ita vos hortamur in Domino atque excitamus, vt, quamquam exploratum habeamus, vos ad hæc eadem agenda satis vestrà sponte incitatos, ac benè animatos esse; non alienum tamen à nostro Pastoralis officij munere putemus, currentibus vobis Apostolicæ nostræ hortationis quasi calcar adinouere. Cogitate, quantò vos potentiâ, nobilitate, dignitate, ceteris istius Regni Proceribus antecellitis, tantò in conseruandâ Ecclesiæ, atque huius sanctæ Sedis auctoritate, virtutis vestræ lumen clariùs ceteris ad exemplum elucere debere: vt non minora in vobis pietatis in Deum merita reperiri debeant, quàm illæ sint vires, quas idcirco Deus vobis concessit, vt illis ipsis viribus hæc vobis in eius sanctissimam Ecclesiam merita acquireretis. Considerate, quàm hæc ipsa, quæ hîc viuatur, vita brevis sit; quàm sint huiusmodi hono-

res fluxi ac momentanei: dumque potestis, enitimini, curate & elaborate, ut vestra consilia, vestras cogitationes, vestra decreta, ita ad Regni istius utilitatem referatis, ut non minorem in humanarum rerum gubernatione prudentiam, quam in diuinarum respectu pietatem deuotionemque declaretis. Nos autem Deum Omnipotentem rogamus toto corde, totiusque animæ nostræ viribus, ut vobis, dilecti Filij, quod iam speramus, in eius nomine congregatis, Spiritum suæ charitatis ita infundat, ut & nunc & semper ea statuatis, quæ ad illius honorem augendum, & ad animarum vestrarum salutem, atque ad huius omnium Christi fidelium Matris Ecclesiæ veterem auctoritatem restituendam, conseruandam propagandamque pertinebunt. Datum Romæ apud S. Petrum sub annulo Piscatoris, die XVI. Decembris, M. D. LXVIII. Pontificatus nostri anno tertio.

EPISTOLA XXIV.

Ecclesiæ fructus in stipendij militaris solutionem impendi non debere. Vide lib. III. cap. VII. Vitæ PII V. & suprâ huius libri Epist. VIII. & infrâ Epistolam XXV.

Dilecto Filio nostro Ludouico, Titulo sancti
Onuphrij Presbytero Cardinali Madrutio,
Episcopo Tridentino.

Nihil vtilius est, vel ad Sacerdotum existima-
tionem bonamque famam tuendam, vel ad
laicos in officio & reuerentiâ erga Sacerdotes conti-
nendos, quàm si Ecclesiarum bona in eos quos de-
cet sumptus erogentur. Quod quò verius esse cog-
noscimus, eò magis doluimus, cum nuper certiores
facti sumus, non sine magnâ animi nostri molestiâ,
velle te quibusdam militibus, quos dilectus noster in
CHRISTO Filius Ferdinandus, Archidux Austriæ,
idcirco isti ciuitati imperauit, vt eo præsidio tuti
sint ministri quidam ipsius, in eâdem ciuitate com-
morantes, stipendium ex redditibus istius Ecclesiæ
Tridentinæ persolvere. Hoc quia omnino æquum
non est, neque nos vlllo pacto fieri volumus, & tu
pro tui officij munere cognoscere debuisti, Ecclesia-
rum redditus & prouentus, non ad eiusmodi res im-
pendi decere, sed ad eas tantummodò, ad quas in-
stituti sunt: quæ quidem quales sint, quia te pro ra-
tione eius ordinis atque loci, quo te Deus Omni-
potens constituit, non ignorare arbitramur; idcirco
eas diligentius persequi supersedemus. Quare cir-
cumspectioni tuæ districtè præcipientes, manda-
mus, ne vel ipse aliquo pacto id facere aggrediaris,
neque rei tam indignæ, & ab vtilitate dignitateque

Q. eius

eius Ecclesiæ tantoperè alienæ, aliquâ ratione assentiariis. quin etiam circumspèctionem tuam nostro nomine eiusdem Ecclesiæ Capitulo similiter interdiciere volumus, ne eiusmodi stipendij militaris solutionem vllâ ex parte adiuuare, vel quidquam omnino eius rei nomine soluere velint. Id quamquam te, & pro tuo officio, & pro eâ in nos & Sedem Apostolicam reuerentiâ, quam semper ostendisti, hisce nostris litteris admonitum, facturum esse confidimus; tamen tibi mandamus. Datum Romæ apud S. Petrum sub annulo Piscatoris, die xxvii. Decembris, M. D. L X V I I I. Pontificatus nostri anno tertio.

EPISTOLA XXV.

Ecclesiæ Tridentinæ causâ Maximiliano Imperatori commendat. Vide lib. III. cap. VII. Vitæ PII V.

Charissimo in CHRISTO Filio nostro, Maximiliano, Hungariæ & Bohemiæ Regi Illustri, in Romanorum Imperatorem electo.

Charissime in CHRISTO Fili noster, salutem & Apostolicam benedictionem. Non facilè verbis consequi possumus, quantâ molestiâ animique dolore affecti simus, ex his quæ de dilecto nobis Filio, nobili viro, Ferdinando Archiduce Austriæ, fratre tuo, ad nos allata sunt. Cùm enim Maiestatem tuam, totamque Austriacam familiam, eximiam


miâ quadam beneuolentiâ singulariâque charitate
prosequimur, è quâ tot Catholici Principes & an-
teâ semper prodierint, & hoc tempore sint; tum in
ipsum Archiducem pro suâ ab initio vsque nostri
Pontificatus declaratâ erga nos sanctamque hanc
Sedem singulari obseruantîâ, eo animo sumus, vt
nec propensiore nec magis paterno esse possimus:
sed planè in his controuersiis, quas habet Ecclesiâ
Tridentinâ nomine cum dilecto nobis Filio Card.
Madrutio, & monitis nostris, & veteri suâ erga Se-
dem Apostolicâ obseruantîâ parum adhuc quidem
satisfecit. Cùm enim, etiamsi quid in eâ controuersiâ
iuris haberet, de eo nostrâ causâ sponte suâ decede-
re pro suâ in Ecclesiam Romanam obedientîâ, præ-
tensionesque suas iustitiâ decidendas permittere de-
buisse; tantum abest vt id fecerit, vt noua quoti-
die detrimenta ac præiudicia ei Ecclesiâ intulerit:
nam & militum manum pecuniâ eius Ecclesiâ con-
duci iussit; & iusiurandum, quod à Consulibus eius
ciuitatis semper Episcopis præstitum est, sibi præ-
stari iussit. Hæc quàm indigna, quamque grâvia
sint, Maiestatem tuam per se ipsam cognoscere ex-
ploratum habemus: quàm verò à nobis Pastoralis
officio fungentibus ferenda non sint, eandem Ma-
iestatem tuam videre arbitramur. Itaque eam hisce
nostris litteris hortamur ac rogamus, vt auctoritate
suâ apud fratrem interpositâ, pro Sedis Apostolicæ
reuerentiâ agat cum eo, vt eius Ecclesiæ possessio-
nem

nein eo modo, quo à centum annorum spatio ad hoc vsque tempus fuisse dicitur, liberam atque integram prædicto Cardinali Madrutio restituat; ea-
 que omnia remoueat, quæ ad hanc vsque diem attemptauit. Nisi enim id faciat, prætermittere amplius aut longiùs ea remedia differre non poterimus, quæ hucusque ob paternam erga prædictum Archiducem beneuolentiam indulgentiamque nostram, nec minùs propter Maiestatis tuæ respectum, prætermisimus ac distulimus. Quæ acriora remedia molestissima illa quidem futura sunt nobis, sed nulla nostra culpa erit in eâ re, quam sine culpâ nostrâ omittere non poterimus. Speramus tamen prædictum Archiducem, & nostris paternis hortationibus excitatum, & auctoritate tuâ impulsum, & ipsâ æquitate, & erga hanc Sedem deuotione & reuerentiâ adductum, ea præstiturum esse, quæ Catholicus Princeps & Ecclesiæ amicissimus præstare debet. Quod ut ab eo petas, vehementerque contendas, Maiestatem tuam eo animi studio rogamus, ut neque maiore neque acriore rogare possimus. Quod confidebamus quidem te, ut pium Principem, & huius sanctæ Ecclesiæ Aduocatam, facturum esse; sed nostris etiam paternis vocibus admonitum, non dubitamus te facturum esse propensius. Datum Romæ apud sanctum Petrum sub annulo Piscatoris, die ultimâ Decembris, M. D. LXVIII. Pontificatus nostri anno tertio.

APOSTO

APOSTOLICARVM
 PII QVINTI
 PONT. MAX.
 EPISTOLARVM
 LIBER TERTIVS,
 Continens Epistolas anni quarti
 eius PONTIFICATVS.
 EPISTOLA PRIMA.

ARGVMENTVM.

 *D Catholicæ fidei defensionem, Ecclesiasticæque
 disciplinæ ac morum correctionem, & ad sacri
 Concilij Tridentini Decretorum executionem hor-
 tatur. Eodem exemplo dedit alias quatuor Epistolas ad alios
 Poloniæ Episcopos. Vide lib. III. cap. X. Vitæ PII V.*

Venerabili Fratri, Philippo Episcopo
 Cracouiensi, PIVS Papa V.

Venerabilis Frater, salutem & Apostolicam be-
 nedictionem. Sollicitudo Pastoralis admo-
 net, & temporum conditio nos cogit, cum istius

Regni Comitia aut iam futura esse, aut non ita pridem incepisse intelligamus, vt Fraternitatem tuam, sicuti ceteros quoque Fratres iisdem Comitii interfuturos, hortemur ad officium suum Catholicæ fidei defensionem tam necessario tempore præstandum. Scimus enim hæreticorum atque Ecclesiastici Ordinis aduersariorum eam esse consuetudinem, vt, oblatâ sibi huiusmodi Conuentuum occasione, semper aliquid contra Religionem Catholicam, atque ad huius sanctæ Sedis, quæ omnium Ecclesiarum caput & magistra est, obedientiam subtrahendam moliantur. Quorum perniciosus conatus, quò tua maior est apud Regem auctoritas, & quò eruditione atque eloquentiâ ceteris tui Ordinis Prælati antecellis, eò constantius ac fortius obistere atque obuiam ire debebis. Id autem tibi ceterisque Fratribus nostris Episcopis eò faciendum est confidentius, quòd charissimi nobis in CHRISTO Filij Regis ea voluntas nobis significatur, & illud Catholicæ Religionis studium, vt in eius defensione à tot nobilissimis progenitoribus suis, Catholicis Regibus, nunquam degeneraturus esse credatur: vt si quid (quod Deus auertat) in istis Comitiiis acciderit, ex quo Religio Catholica & Apostolicæ Sedis auctoritas aliquâ ex parte læsa fuerit, id non Regi ipsi imputandum à nobis sit, sed aut timori aut negligentia vestræ assignandum. Quòd si quod etiam periculum vobis Ecclesiasticam libertatem aduersus impios hære-

hereticorum conatus defendentibus immineret, unanimiter obersistentes etiam monendo debetis ostendere, vos in communi Ecclesiæ Catholicæ damno vestrum specialiter aliquid non amare; ne à Patribus illis nostris degeneretis, qui sanguinem suum pro eiusmodi causis sæpè profuderunt. Audi enim, Frater, omnium Apostolorum Principem dicentem: Si quid patiemini propter iustitiam, beati eritis. Crede mihi, vitam, quam idcirco accepimus, ut eam pro Dei honore veræque Religionis cultu libenter Omnipotenti Deo offeramus, si necessitatis causa exigit, securius pro eodem Deo relinquimus quam retinemus. Præstabit autem vires Omnipotens Deus, Redemptor noster, Fraternitati tuæ, ceterisque Fratribus in eodem Conuentu affuturis, si modò vos dignum vobis, hoc est Catholicis Ecclesiarum Pastoribus, animum Sacerdotalemque vigorem capiat. Quam ad rem Fraternitatem tuam ita hortamur atque excitamus, ut nec maiore animi nostri studio, nec ardentiori desiderio hortari atque excitare possimus. Meminisse te quidem officij tui credimus, nec commissurum putamus, ut ullo aut metu aut ignavia Sacerdotalem dignitatem deferas; sed nostrum tamen ipsi officium prætermittere nolimus, scientes, ut tibi de tuo, sic nobis de nostro, æterno illi Iudici rationem reddendam fore. Et quia satis constat, malos Sacerdotes populorum esse ruinam, manifestissimaque res est, tot hæ-

resum

resum mala non aliunde quàm à prauis corruptis-
que Clericorum moribus originem habuisse, ideo
Fraternitatem tuam monemus, & per viscera mise-
ricordiæ Dei obtestamur, vt, sicuti dignum est offi-
cio suo, ad Cleri sui mores corrigendos, omni vigi-
lantiâ incumbat: sibi que persuadeat, ad reuocan-
dam veterem Ecclesiæ dignitatem, propter hanc ip-
sam morum in Clericis viris corruptionem, in sum-
mum ferè hominum omnium contemptum addu-
ctam, nullum aliud præter hoc remedium inueniri
posse. Verissima enim est illa B. Gregorij præde-
cessoris nostri sententia, in quâ Sacerdotalem or-
dinem, cùm intus ceciderit, foris quoque diu stare
non posse affirmavit. Cadunt enim intus Sacerdo-
tes, cùm iustitiâ, castitate, integritate honestateque
morum derelictâ, contraria suæ professioni instituta
moresque sectantur. Intus autem cadentes, foris sta-
re non possunt: propterea quòd populus, qui in his
qui sibi præfunt non tam doctrinam attendit, quàm
facta ac mores contemplatur & spectat, vbi eos,
quorum integritas sibi ad benè honesteque viuen-
dum exemplo esse debeat, deprauatis corruptisque
viuere moribus videt, facile illorum exemplo ad de-
teriora conuertitur. Corrigendi autem mores nulla
melior iniri potest à Fraternitate tuâ ratio, quàm si
omni tuâ industriâ elaborares, vt, quæ tam piè ac pro-
uidè in sanctâ generali Tridentinâ Synodo decreta
fuerunt, ea diligenter fideliterque in tuâ Ecclesiâ
seruari

seruari cures. Quam ad rem ita te hortamur atque incitamus, vt nihil æquè cupiamus, ac te hac in re, & Dei honori, & officio tuo & desiderio nostro satisfacere. Et quamuis sperabamus, pro eo quod fidei tuæ creditum est munere, te minimè prætermisurum esse, quin Ecclesiæ tuæ in re tam salutari prouideres; tamen quamuis currenti tibi fraternæ hortationis nostræ tamquam calcar admouendum duximus. Datum Romæ apud S. Petrum sub annulo Piscatoris, die XVII. Ianuarij, M.D.LXIX. Pontificatus nostri anno quarto.

EPISTOLA II.

Vt in Regni Comitibus Catholicam Religionem tueatur, Clerique disciplinam & mores restituat, & sacri Concilij Tridentini Decreta in usum induci curet, hortatur. Vide lib. III. cap. X. Vita PII V.

Venerabili Fratri Archiepiscopo Gnesnensi.

Venerabilis Frater, salutem & Apostolicam benedictionem. Commissi nobis officij sollicitudo & diuini zelus honoris cogit nos hoc tempore, quo istius Regni Comititia aut iam futura esse, aut non ita pridem incepisse intelligimus, Fraternitatem tuam in primis, & ceteros istius Regni Episcopos vehementer hortari, vt tam necessario tempore officium vestrum Deo pro Catholicæ Religionis

nis defensione præstetis. Ea enim est hæreticorum consuetudo, vt, oblatâ huiusmodi Conuentuum occasione, conentur aliquas semper actiones introducere, quibus ad confirmandam augendamque hæresum pestem, vel decretum aliquod extorqueant, vel aliquid aliud ad illud obedientiæ fundamentum subtrahendum moliantur, sine quo reliquum Ecclesiæ ædificium stare non potest. Horum perniciosi conatibus, si qui fortè (quod Deus auertat) fuerint, qui tantis Ecclesiæ Catholicæ persecutionibus adhuc non contenti, maiora etiam ei detrimenta inferre conentur, te & reliquos Fratres Episcopos nostros vnâ mente constanter & fortiter ire obuiam & obsistere oportebit; ne tamquam muti canes videamini, non valentes aduersus lupos latrare. Quâ in re præstandâ tuæ peculiare partes erunt, qui, vt istius Regni primus existis, ita hortator & dux eis, & reliquis Catholicis, ad resistendum hæreticorum audaciæ esse debes; vt quam huic & omnium Christi fidelium Matri Ecclesiæ pietatem debes, eandem ei, tamquam pius filius, hoc tam necessario tempore rependas atque retribuas. Id autem eò fidentiùs tibi reliquisque Fratribus faciendum est, quòd charissimus nobis in CHRISTO Filius, Rex egregius, Catholicæ Religionis studium, deuotamque atque propensam erga Sedem hanc Apostolicam voluntatem suam, nobilissimis Regibus progenitoribus suis dignam, quorum in fidei Catho-
licæ

licæ defensione singularis semper enituit virtus, non obscure significat. Et si quid in istis Comitibus acciderit, ex quo Catholica fides & hæc ipsa sancta Sedes detrimentum aliquod patiatur; huius rei culpa non Regis voluntati assignanda, sed tuæ & reliquorum Fratrum negligentia & socordia imputanda videatur. Speramus tamen, si inter vos, ut debetis, consentientes, omni humano respectu postposito, sacerdotali vigore ad defendendam Ecclesiasticam libertatem conspiraueritis; Deo fauente, eorum omnium consilia vos esse disturbaturos, qui eam oppugnare, aut minuere, aut aliâ quavis ratione lædere vellent. Turpe enim tibi & reliquis Fratribus, indignumque esset, si paratiores hæretici ad fidem Catholicam oppugnandam, quàm vos ad defendendam inueniremini. Quod si memineris, Omnipotenti Deo reddendam esse abs te officij tui rationem; certè nihil prætermittes hoc tempore earum rerum, quæ abs te in illo districto Iudicij sui die iustus ille Iudex requisiturus est; etiamsi tibi tanquam bono fidelique Pastori pro grege tibi commisso anima ipsa ponenda esset: quod ut gloriosum tibi esset, sic oblatâ occasione non modò non deuitandum, sed etiam ultrò appetendum est. Eandem rationem quia ipsi quoque de nostro reddituros esse officio meminimus, idcirco nec volumus nec debuimus vlllo modo prætermittere; quin te fraternâ charitate moneremus, quid tali tempo-

re facere debeas : vt quod te tuâ sponte pro tuo officio facturum esse confidebamus , nostro admonitu acrius tibi ac diligentius faciendum esse existimes. Et quoniam tot tamque multiplicium hæresum venenis causam & materiem maximè præbuerunt Pastorum negligentia , & Cleri mores deprauati atque corrupti, quâ ex re imminuta est laicorum deuotio, & adaucta viuendi licentia; proinde Fraternitatem tuam rogamus , & sub diuini obtestatione Iudicij monemus, vt ad auertenda diuinæ iræ flagella , quæ ob tot tantaque peccata (nisi obuiam per eos, qui possunt & debent, eatur) maximè timenda expectandaque sunt, ad Cleri sui mores corrigendos reformandosque omni vigilantia incumbat: vt, vitæ diligenter omnibus his, quæ laicorum animos atque oculos offendere possunt, Sacerdotes ipsi pristinam populorum erga se reuerentiam ac deuotionem aliquando recuperare valeant: hoc enim solum & vnicum remedium est, ad tot tantaque Ecclesiæ vulnera sananda. Ad hoc autem efficiendum, atque ita placandum Deum, nihil æquè valebit, ac Decretorum sanctæ generalis Synodi Tridentinæ fidelis ac diligens obseruatio. In quâ quæ adeò maturè, piè ac prouidè, Deo auctore, constituta decretaque sunt, & Apostolicæ Sedis auctoritate confirmata, & vbi que obseruari iussa; hæc, omni tuo studio enitere, vt ad effectum maximè adducantur. Nihil facere potest Fraternitas tua, neque Deo gratius, neque nobis

nobis acceptius, neque sibi ipsi gloriosius, neque animæ suæ salutaris. Hoc si fecerit, quemadmodum eam facturam speramus, cum ad æternum illum Pastorem venerit, non mercenariorum negligentiumq; Pastorum pœnam, sed bonorū ac fidelium seruorum laudes & præmia accipere merebitur. Hæc pluribus Fraternitatem tuam hortati sumus, non suę voluntati aut studio erga Ecclesiam fidei suæ creditam diffidentes, sed paterni animi nostri affectum & omnium Ecclesiarum sollicitudinem testificantes. Datum Romæ apud S. Petrum sub annulo Piscatoris, die xvii. Ianuar. M.D.LXIX. Pontificatus nostri anno quarto.

EPISTOLA III.

Ex proscriptis hereticorum bonis templa & alia publica ædificia, ab illis incensa vel diruta, rursus ædificari; ex usque bonis nihil omnino ipsis hereticis, vel eorum propinquis, quamuis bonis & Catholicis, donari iubet. Vide lib. II. cap. v. Vitæ PII V.

Dilecto Filio nostro Georgio, titulo S. Nicolai in Carcere Tulliano Presbytero Cardinali, de Armeniaco vocato, pro nobis & Sede Apostolicâ in ciuitate nostrâ Auenionensi commoranti.

Dilecte Fili noster, salutem & Apostolicam benedictionem. Magnâ cum animi nostri læ-

titiâ intelleximus, hæreticorum bonorum istius nostræ ditionis Auenionensis, Comitatusque Venaisini, descriptionem à te factam ordinatamque esse; non minorem quoque voluptatem accepturi ex eo, si eorum bonorum distributionem vtiliter, atque, vt decet, & vt speramus, factam esse intellexerimus. Quâ in re illud in primis circumspeditionem tuam curare volumus, vt ex his bonis templâ & publica ædificia, ab eisdem hæreticis incensa aut diruta, rursus ædificentur: deinde, ne bona hæc propinquis ipsorum, aut affinibus, quantumuis bonis & Catholicis, donentur, aut aliâ quauis ratione ad eos perueniant. Talem enim seueritatem ad reliquos ab hæreticâ prauitate hoc exemplo deterrendos vtilissimam esse iudicamus. Illud præterea officio tuo conueniet, vt diligentissimè cures, ne hæc hæreticorum publicata bona dissipentur, aut inutiliter expendantur; sed ad omnes casus necessitatesque istius ditionis conferuentur: quas pro temporum locorumque istorum conditione vides multas accidere posse, vt ad suppeditandos necessarios istic sumptus non semper pecuniam hinc mittere cogamur. Quod verò ad eorundem hæreticorum feuda pertinet, volumus, vt ea Legationi isti applicentur atque vniantur, eâ ratione, quæ his nostris sub plumbo litteris, super rebus feudalibus non alienandis editis, præscripta est: quarum exemplum ad te mittimus; easque diligenter atque inuiolabiliter, vt par est, seruari

uari mandamus. Datum Romæ apud S. Petrum sub annulo Piscatoris, die XVII. Ianuarij, M.D.LXIX. Pontificatus nostri anno quarto.

EPISTOLA IV.

Vt hereticos quamprimùm profligari curet, Carolum Cardinalem hortatur. Vide lib. II. cap. III. Vitæ PII V.

Dilecto Filio nostro Carolo, titulo S. Chrysoni Presbytero Cardinali, Borbonio vocato, Auenionensi de latere Legato.

Dilecte Fili noster, salutem & Apostolicam benedictionem. Facit prudentia tua spectata in maximarum rerum actione, & auctoritas magna, quam meritò apud charissimum in CHRISTO Filium nostrum, Regem Christianissimum, obtines in rebus istius Regni gubernandis, vt in hoc necessario bello propulsando, quod hæreticorum impiorum prudentissimi Duces Omnipotenti Deo, & Catholicæ fidei, & isti Christianissimo Regi indixerunt, omnium Catholicorum Principum, & nostri potissimùm paterni oculi, in te maximè sint intenti. Quæ res in causâ est, vt nos, qui pro solitudine nostrâ Pastoralis, paternæque rerum istius Regni curâ, nullum prætermittere apud te officium hoc tam necessario tempore cupimus, quod Religionis causam tantoperè in istis partibus periclitantem adiuvare

uare possit; pro quâ etiam, oblatâ occasione, libenter mori parati sumus; te per litteras nostras vehementer hortandum atque excitandum esse existimamus, omnem vt curam, operam auctoritatemque tuam conferas ad eam rem: vt quamprimum ea comparentur atque expediantur, quæ ad profligandos Dei Regisque infensissimos hostes necessaria sunt; sine quibus neque administrari celeriter bellum, neque confici potest. vt omnibus hominibus manifestè ostendas, neque voluntatem tibi neque facultatem defuisse, quâ & fidei Catholicæ in istis partibus tantoperè laboranti auxilium ferres, & imminenti istius Regni ruinæ occurreres atque obuiam ires. Nam si rei primo quoque tempore benè gerendæ occasio amittatur, spatiumque hostibus detur, ad maiores his, quas nunc habent, copias sibi comparandas; valdè timemus, ne, victoriâ ipsâ, quam neque multo labore & sine periculo obtinere difficile fortasse non fuisset, è manibus amissâ, res eò deducatur, vt Rex (quod Deus auertat) in vitæ suæ discrimen, Regni que amittendi periculum, veniat. Non enim aliud proficitur differendis de die in diem apparatibus, ceterisque rebus tardè expediendis, quæ ad celeritatem victoriæ conferunt; nisi quod & ærarium Regium magis magisque indies exhauritur, vt suppeditandis bellicis sumptibus postea sufficere non possit, & hostium vires quotidie magis augentur: & quod negotium adhibitâ celeritate facile at-

que

que expeditum foret, id periculosissimum atque impeditissimum tardando efficitur. Quam ob rem cum te ipsum hortamur atque excitamus, tum ut Christianissimum Regem & Reginam, ceterosque omnes, quos necesse esse existimaueris, & quorum illi operâ in hoc bello vtuntur, ipse quoque vehementer ad eandem rem horteris atque incendas, abs te vehementer petimus. Cuius quidem tui facti voluntatisque non minor futura est apud omnes homines laus, quam victoriæ gloria, tam pro quiete securitateque istius Regni stabilitâ, quam pro Religione Catholicâ in eodem Regno operâ tuâ constitutâ ac propagatâ. Quâ quidem re nihil accidere potest nobis gratius aut optatius, neque tibi gloriosius aut honestius. Magnitudo rei, & rerum istius Regni in extremum discrimen adductarum pericula longiorem orationem fortasse desiderant; sed tuum spectatissimum Catholicæ Religionis studium, & diuini honoris zelus, nobis non ignotus, non patitur, nos pluribus verbis hac de re tecum agere: & quamuis habebamus pro comperito, te tantâ in Deum pietate præditum, tuâ sponte satis paratum fore ad subueniendum tam necessario tempore istius Regni periculis; tamen non parum quoque apud te paternam nostram hortationem valituram esse putauimus. Datum Romæ apud S. Petrum sub annulo Piscatoris, die XVII. Ianuarij, M. D. LXIX. Pontificatus nostri anno quarto.

EPISTOLA V.

Vt bellum in hæreticos confici, eorumque bona proscribi diligenter curet, Carolum Cardinalem à Lotharingâ hortatur. Vide lib. II. cap. v. & VI. Vitæ PII V.

Dilecto Filio nostro Carolo, tituli S. Apollinaris Presbytero Cardinali, à Lotharingâ vocato, nostro & Apostolicæ Sedis de latere Legato.

Dilecte Fili noster, salutem & Apostolicam benedictionem. In hoc nefario bello, quod hæretici Omnipotentis Dei hostes, pacisque & tranquillitatis istius Regni inimici, contra fidem Catholicam, & Christianissimum istum Regem, insensissimis animis gerunt, cum omnium Catholicorum Principum, tum nostros potissimum paternos oculos in te actionesque tuas existimare debes esse conuersos. Hoc autem accidit, & propter spectatam prudentiam tuam in rerum maximarum tractatione, & propter eam auctoritatem, quam meritò maximam habes apud Regem in rebus istius Regni gubernandis. Quo fit, vt nos, qui pro Pastoralis sollicitudine, & paternâ rerum istius Regni curâ, summâque animi sollicitudine, vt par est, exitum istarum rerum atque euentum suspensissimo animo expectamus; nullum apud te officium hoc tempore nobis

nobis prætermittendum esse putemus, quo Religionis Catholicæ causâ, pro quâ libenter etiam sanguinem nostrum profunderemus, adiuuari posse videatur. Et quia intelligimus, id quod tu quoque pro tuâ prudentiâ intelligis, ad obtinendam huius periculossissimi belli victoriam maximum in eo momentum positum esse, vt ea, quæ necessaria sunt ad profligandos hostes, celeriter comparentur atque expediantur, vt rei benè gerendæ occasio non amittatur, neque detur hostibus tempus ad maiores his, quas nunc habent, vires colligendas; ideò circumspeditionem tuam his nostris litteris vehementer hortamur atque excitamus, vt adhibitâ omni celeritate ac diligentîâ in comparatione rerum expugnandis fugandisque hostibus necessariarum, cunctis hominibus ostendas, neque voluntatem tibi neque facultatem defuisse, quâ & Religioni Catholicæ, in isto Regno summum in discrimen adductæ, opitularetur, & istius Regni ruinæ occurreret atque obuiam iret. Magnam enim nobis interdum, ceterisque omnibus, admirationem affert, quòd nefarius ille vocatus Aurangix Princeps, vnâ cum suis copiis, tamquam si hostis non esset, sic in isto Regno versatur, vt, nullo impediante, prædationibus vastationibusque agrorum, direptioneque omnium rerum, exercitum ex omnium hæreticorum colluione conflatum alat. Illud etiam, quod ex edicto Regis iamdudum factum esse oportebat, vt scilicet

hæreticorum bona publicarentur, quodque valdè utile fuisset ad dubios in fide retinendos, ceterosque omnes ab huiusmodi nefariâ cum hæreticis societate coniunctioneque deterrendos; non sine dolore miramur, factum adhuc non fuisse. Hæc autem non ut tu ipse solùm pro parte tuâ diligenter præstes hortamur; sed illud quoque rogamus, ut & Regis ipsius, Reginae & omnium eorum quorum illi operâ in hoc bello vtuntur, animos incendere atque excitare velis, tum ad hæc quæ omiſſa sint diligenter exequenda, tum ad ea celeriter & sine morâ comparanda, quæ ad fugandos debellandosque hostes, finemque huic calamitosissimo bello aliquando imponendum, necessaria sunt. Nunc enim adhibitâ eâ, quæ adhiberi debet, celeritate ac diligentia, facilius fugari hostes poterunt: sed si diutius rerum victoriæ obtinendæ necessariorum comparatio protrahatur, præterquam quòd diuturnâ belli morâ ærarium Regium quotidie magis exhauritur, ut bellicis sumptibus suppeditandis postea sufficere non possit; periculum quoque futurum est, ne auctis magis magisque indies ex his rebus hostium animis atque viribus (quod Deus auertat) Rex in vitæ Regnique amittendi periculum extremum adducatur. Enitendum est igitur tibi & reliquis Catholicis, ut omnium animos inciteris, omnesque periculosas inutilesque moras abrumpatis; ne si hostes, dato illis ad colligendas maiores vires spatio, magis inualuerint,

luerint, multò postcà periculosior futura sit pugna. Hoc autem si feceris, quemadmodum pro tuâ in Deum pietate & Catholicæ Religionis deuotione facturum esse non dubitamus; pro stabilitâ istius Regni tranquillitate & securitate, proque Catholicâ Religione in eo constitutâ, maximos laudis fructus percipies: sic vt istius consilij voluntatisque tuæ laude gloriosior ipsa victoria futura non sit, quæ, adiuuante Deo, vobisque vestram Religionisque causam enixè fouentibus, sperari potest. Quâ quidem re nihil accidere potest nobis gratius aut optatius, neque tibi gloriosius aut honestius. Quamuis autem confidebamus, te tuâ sponte, & hoc & omnibus aliis officiis functurum esse, quæ & Religionis Catholicæ defensio exigit, & rerum istius Regni in extremum discrimen adductarum pericula exposcunt; tamen pro nostro officio, & rei magnitudine, paternam hortationem nostram prætermittendam nullo modo putauimus. Datum Romæ apud sanctum Petrum sub annulo Piscatoris, die XVII. Ianuarij, M. D. L X I X. Pontificatus nostri anno quarto.

EPISTOLA VI.

*Ad retinendam inter se & illius ciuitatis Magistratus
piarum mentium concordiam, ad se ipsos & patriam
ab hæreticorum commercio & fraude tutam conser-
uandam,*

*uandam, & ad vitam moresque piè conformandos,
Canonicos Ecclesiæ Bisuntinæ hortatur.*

Dilectis Filiis, Capitulo & Canonicis
Ecclesiæ Bisuntinæ.

M Agnâ in Domino lætitiâ affecti sumus, quòd de vestrâ sincerâ deuotione, & Catholicæ Religionis amore, ea ad nos afferuntur, quæ & vehementer desiderabamus, & hominum verè religiosorum pietate digna sunt. Et quamuis bonorum, quales vos estis, sincera deuotio filiorum, pro suâ ipsorum & omnium Christi fidelium Matris Ecclesiæ salute tuendâ, nullius hortationis stimulis indigere videatur: tamen, quia peccatis id facientibus in eam temporum calamitosam conditionem deuenimus, vt etiam his, qui sibi stare in Domino videntur, omnia & prudenter timenda & diligenter præcauenda sint; & quia præterea paterna, quâ vos omnes prosequimur, beneuolentia non patitur, nos de vobis hoc periculosissimo tempore sine sollicitudine esse; ideò, pro commisso nobis ab Omnipotenti Deo quamuis immeritis curæ Pastoralis officio, dilectiones vestras in Domino hortandas excitandasq; esse præuidimus, primùm quidem ad seruandam omni conatu inter vos ipsos concordiam, deinde etiam ad consentiendum cum dilectis Filiis nostris istius ciuitatis Gubernatoribus: eâ scilicet mente, vt, coniunctis

iunctis studiis & consiliis, vno animo facilius eam ab hæreticorum communium hostium insidiis conatibusque tutam atque immunem præstare possitis. Vt enim ad locum aduersariis vestris dandum nihil aptius esse potest, quam animorum vestrorum inter se dissidentium discordia; sic, ad intercludendos eis omnes aditus, nihil concordiam eorumdemque animorum consensione est efficacius: ad quam quidem cum vos, vt facimus, studiosissimè hortamur, ad vestram vos salutem, vestra comoda, vestramque dignitatem retinendam hortamur: nihil enim harum rerum sine eâ aut haberi à vobis aut conseruari potest. Illud præterea monemus, & quantò maiore animi studio possumus, hortamur, vt pro confirmandis bonorum Catholicorumque virorum vestro exemplo animis, proque his qui à Catholicâ fide aberrauerunt, ad eam reuocandis, vos ipsi in primis piam, sobriam, castamque, mandatisque Dominicis consentientem vitam viuatis; deinde alios etiam, ad idem faciendum præstandumque, & verbis & operibus excitetis: illud pro certo habentes, ad reuocandam veterem in horum qui nunc homines sunt animis erga Sacerdotes ac Clericos reuerentiam, nulla remedia excogitari posse meliora, quam si illi ipsi Sacerdotes & Clerici ita viuere studeant, vt reprehendendis eorum moribus nullam hæreticis ansam, ad reliquos ab eorum cultu respectuque remouendos, relinquant. Quapropter,

pter, dilecti Filij, Dominicorum memores salubriter mandatorum, sic viuite, itaque ad custodiendos vos ciuesque vestros ab hæreticorum insidiis inuigilate; vt ante æterni Iudicis tribunal constituti, bonarum vestrarum actionum fructum, qui ad mercedem vestram pertineat, & in quo lætari possitis, eidem Redemptori nostro exhibere cum gaudio valeatis. Datum Romæ apud sanctum Petrum sub annulo Piscatoris, die VII. Februarij, M. D.LXIX. Pontificatus nostri anno quarto.

EPISTOLA VII.

Gubernatores ciuitatis Bisuntinæ de pietatis studio commendat, & ad tuendam Catholicam Religionem, firmanque inter se & Ecclesiasticos viros retinendam concordiam, & ab hæreticis cauendum, hortatur.

Dilectis Filiis, Gubernatoribus ciuitatis Bisuntinæ.

Dilecti Filij, salutem & Apostolicam benedictionem. Vehementer in Domino gaudeamus, Omnipotentique Deo gratias agimus, quòd de vestro Catholicæ Religionis studio, deque vestris isti ciuitati patriæ vestræ salutaribus actionibus ea quotidie magis intelligimus atque audimus, quæ & valdè cupimus, & virorum Catholicorum pietate digna sunt. quæ cùm tantoperè Deo grata
accepta-

acceptaque sint; dubitare non debetis, quin eadem nobis quoque gratissima acceptissimaque sint. Proinde debitum paternæ erga vos charitati nostræ salutationis officium persoluentes, virtutem vestram pietatemque singularem, atque in ciuitate vestrâ ab hæreticorum insidiis diligenter tuendâ vigilantiam, meritis in Domino laudibus prosequimur. Et quamuis ad explenda omnia piarum actionum officia ipse vos vester diuini honoris zelus satis accendit: tamen, quia & horum calamitosa temporum conditio id exigere videtur, & ciuitas ipsa vestra quò magis vicinorum locorum periculis exposita est, eò cautiorem in illis vitandis diligentiam attentionemque & curam desiderat; ideò pro nostrâ Pastoralis sollicitudine paternaque in vos beneuolentiâ vehementer hortamur, vt nihil hoc tempore de vestro perpetuo studio vigilantiaque remittentes, sed, si fieri potest, aliquid etiam addentes, sollicitè ac diligenter ad vos ipsos vestramque ciuitatem à pestiferarum hæresum veneno custodiendam inuigiletis: eamque ob causam, cum dilectis Filiis, Capitulo & Canonicis istius Ecclesiæ consentiatis, vt coniunctis animis & consiliis, vno animo faciliùs Deo & Religionis Catholicæ causæ inferuire possitis. Quâ in re præstandâ illud valdè proderit, si & aduenas ipsos, qui ad incolendam urbem vestram aliunde veniunt, & eos quoque, qui commercij causâ ad eandem accedere & recedere consueuerunt, dili-

gentissimè cauebitis : sapè enim vnius improbi veneno sermonis multa in Christi corpore viuientia membra inficiuntur. Vos autem præcipuè decet, dilecti Filij, primùm quidem Omnipotenti Deo hanc operam præstare; deinde vobis ciuiumque vestrorum saluti consulere, quos in vicinitate tot tantorumque periculorum positos, eiusdem Dei erga vos benignitas ab hæreticorum peste immunes liberosque, ad hanc vsque diem conseruauit: vt quemadmodum, illius gubernante gratiâ, factum est, vt nulla vos vestrosque ciues hucusque hæresum exterius superueniens vnda conturbauerit, ita in vobis illisque diligentius etiam in posterum custodiendis maiorem Redemptoris nostri gratiam promereri possitis. Qui enim omnia, quæ potuit, fecit, is charitatis legem adimpleuit. Estote igitur cauti, noctesque ac dies ad commissum vestræ fidei populum utiliter regendum inuigilate: nihil prætermittite earum rerum, quibus & Catholicæ fidei cultus quotidie apud ciues vestros augeri, & hæreticorum insidiæ ac fraudes caueri possint. Ad hæc autem & cetera, quæ vtilia fore putaueritis, efficienda, si quâ vobis in re siue auctoritas siue auxilium nostrum vsui esse poterit; id à vobis admoniti (quantum cum Domino poterimus) numquam à vobis desiderari patiemur. Omnipotens autem Deus vos, in hoc in quo esse voluit loco, ciuesque vestros suâ defensione custodiat, & ad cælestia dona perducatur. Datum

Romæ.

Romæ apud sanctum Petrum sub annulo Piscatoris,
die VII. Februarij, M. D. LXIX. Pontificatus no-
stri anno quarto.

EPISTOLA VIII.

*Vacaturi Beneficij Ecclesiastici expectationem
facere recusat.*

Charissimo in CHRISTO Filio nostro, Sigis-
mundo Augusto, Regi Poloniae Illustri.

Charissime in CHRISTO Fili noster, salu-
tem & Apostolicam benedictionem. Quò
magis Maiestatem tuam inter Reges Catholicos
præcipuè diligimus, tuisque desideriis, quantum
cum Domino possumus, semper satisfacere cupi-
mus; eò magis nobis molestum est, si quando acci-
dit, ut ea postulet à nobis, quæ pro officij propositi-
que nostri ratione concedere nullo modo possumus.
Quòd igitur postulationi tuæ pro Metello
Venturello Canonico Vislicensi nunc non satisfacim-
us, quem tuis ad nos litteris die quintâ Decem-
bris scriptis diligenter nobis commendasti; sciat
Maiestas tua illam esse causam, quòd nos iustissi-
mis de causis adducti, quæ ad Dei honorem ani-
marumque salutem maximè pertinent, numquam
consueuimus de Beneficiis quæ vacatura sint, cuius-
quam rogatu alicui aliquid aut concedere, aut polli-
ceri, vel quauis aliâ ratione spem aut expectationem
facere.

facere. Sed tamen, si is, quem tua nobis Maiestas commendauit, & quem nos alioqui (maximè verò ob testimonium illi à te datum) virum bonum & Sacerdotem pium, & Ecclesiæ Dei, vt scribis, vtilem existimamus, operam dabit, vt in notitiam cognitionemque nostram perueniat; Maiestati tuæ indicamus nos in his, quæ pro tempore nobis oblata fuerint, occasionebus, eam illius rationem esse habituros, vt re ipsâ intellecturus sit commendationem sibi Maiestatis tuæ plurimum profuisse: cui pro singulari suo Catholicæ Religionis studio, paternaque nostrâ beneuolentiâ, parati erimus gratificari semper in omnibus aliis rebus, quibus sine Dei offensâ, & saluâ nostrâ conscientiâ, poterimus. Datum Romæ apud sanctum Petrum sub annulo Piscatoris, die x. Februarij, M. D. LXIX. Pontificatus nostri anno quarto.

EPISTOLA IX.

Auxiliares copias contra hereticos mittit in Galliam, Duce Sfortia, Comite sanctæ Floræ; & Catholicis victoriam à Deo supplex exposcit. Vide lib. II. cap. IX. Vitæ PII V.

Charissimo in CHRISTO Filio nostro, Carolo Francorum Regi Christianissimo.

Charissime in CHRISTO Fili noster, salutem & Apostolicam benedictionem. Pro
paternâ

paternâ nostrâ tui, Regniq̃ue tui in tanto discrimi-
ne positi curâ, postulatis tuis satisfacere volentes,
mittimus ad Maiestatem tuam, in nomine Omni-
potentis Dei, auxiliares copias peditum atque equi-
tum, quemadmodum à nobis petiuit. Mittimus au-
tem eo animo, vt & tuæ & Regni incolumitati auxi-
lio sint in isto bello, quod hæretici, Dei & Ecclesiæ
Catholicæ hostes, aduersus te Regnumq̃ue tuum in-
fensissimis animis gerunt: ob eamq̃ue causam dile-
cto Filio, nobili viro Sfortiæ, earum copiarum ge-
nerali Duci mandauimus, vt Maiestatis tuæ iussâ
faciat, & in omnibus his quæ sibi abs te imperata
fuerint, præstò sit, ac sine vllâ recusatione obediat.
Is igitur, & iussu nostro incitatus, & sponte suâ ob
egregiam militarem virtutem ad bene agendum in-
flammat, vnâ cum prædictis copiis, eo animo ad
te venit, vt in isto bello pro Dei honore, proq̃ue
istius Regni incolumitate, paratus sit vnâ cum exer-
citu omnibus se periculis ac morti exponere. quem
quidem & exercitum Maiestati tuæ eatenus com-
mendamus, quatenus suis sumptibus cominea-
tuum, aliarumq̃ue rerum ad victum vsumq̃ue suum
necessariarum, in tuo Regno eam copiam habeat,
sine quâ nec ipse ali posset, nec tibi eam quam cupi-
mus operam nauare: nam reliquis in rebus volu-
mus, vt Maiestas tua eo sine vllâ exceptione vta-
tur, ad omnia quæ sibi in isto bello necessaria atque
opportuna visa fuerint; prouisuri omnino, vt pro eo

tempore quo tibi illo vtendum fuerit, nullo modo ei ac militibus nostris stipendium à nobis desit. Quod quidem eo animi studio cāque alacritate fecimus, facturique sumus, quam & Religionis Catholicæ caussa, & tuum istiusque Regni periculum, & nostra in te paterna voluntas exposcunt. Omnipotentem autem Deum precamur, qui & Dominus est exercituum, & Rex Regum, & omnia suâ sapientiâ moderatur & regit, vt Maiestatî tuæ de communibus hostibus victoriam misericorditer concedens, pacem tranquillitatēque isti Regno aliquando afferat, eam quam & in Domino optamus, & assiduis precibus ab eo suppliciter exposcere non desistimus. Quam quidem victoriam, si, vt speramus, Deus tibi nobisque suâ benignitate concesserit, tuæ partes erunt, hæreticos eorumque Duces, vtpote Dei hostes, omni seueritatis animaduersione adhibita, punire, in eoque, vt æquum est, non solum tuas, sed Omnipotentis Dei iniurias iustè vlcisci: vt quas pro suis sceleribus pœnas meriti sunt, eas, te iustum Dei contra eos iudicium exequente, persoluant. Datum Romæ apud S. Petrum sub annulo Piscatoris, die VI. Martij, M. D. LXIX. Pontificatus nostri anno quarto.

EPISTOLA X.

*Hereticorum exercitu ad Iarnacium caeso, eorumque Duce
Condensi Principe interfecto, victoriam Regi gratula-
tur, eumque, vt reliquos hæreticos ad internecionem
persequatur, incendit. Vide lib. II. cap. VIII. Vitæ
P II V.*

Charissimo in CHRISTO Filio nostro, Carolo
Francorum Regi Christianissimo.

CHARISSIME IN CHRISTO Fili noster, salutem
& Apostolicam benedictionem. Cum opta-
tissimum nuntium accepissemus, dilectum Filium,
nobilem virum, Ducem Andegauensem, Maiestatis
tuæ fratrem, aduersus Dei & Ecclesiæ hostes, tuosque
rebelles, Deo adiuvante, rem prosperè gessisse; ip-
sumque omnium turbarum seditionumque caput,
& hæreticorum exercitus Ducem occidisse; sublatis
in cælum manibus, statim Omnipotenti Deo hu-
mili corde gratias egimus, qui hac tibi victoriâ con-
cessâ, tantas misericordiæ suæ diuitias in nos beni-
gnus effudit. Tale tantumque diuinæ clementiæ
munus pio & grato animo agnoscere debet Ma-
iestas tua, ei que totum acceptum referre, qui &
hostibus suis tuisque cladem cum voluit immi-
sit, & inimicum dexteræ suæ fortitudine percuf-
sit. Sed quantò benignius tecum nobiscumque egit
Deus,

Deus, tantò enixiùs ac diligentius huius occasione victoriæ enitendum est tibi, vt eorum qui restant hostium reliquias persequaris atque conficias; omnesque tanti tamque corroborati mali radices, atque etiam radicum fibras, funditus euellas: nisi enim penitus extirpatæ fuerint, futurum est vt rursus pullulent, atque vnde Maiestas tua minimè putat, quemadmodum antea toties euenisse vidimus, iterum renascantur. Quam quidem ad rem præstandam vtilissimum erit, si occupatis munitioribus Nauarræ locis, & in eis firmis Catholicorum ac fidelium tibi Præfectorum & militum præfidiis collocatis, providebis, ne qui ab eâ parte noui rursus belli tumultusque motus oriantur. quod vt facias, neque vllam ampliùs communibus hostibus aduersus Catholicos sese commouendi facultatem relinquas, ita te pro nostrâ paternâ tui Regni que istius verâ curâ hortamur, vt nec maiore animi studio, nec ardentiori tuæ incolumitatis desiderio, hortari possimus. Hoc autem facies, si nullarum personarum rerumque humanarum respectus te in eam mentem adducere poterit, vt Dei hostibus parcas, qui neque Deo neque tibi vniquam pepercerunt: non enim aliter Deum placare poteris, quàm si Dei iniurias sceleratissimorum hominum debitâ pœnâ seuerissimè vlciscaris. Proponat sibi ante oculos Maiestas tua Saulis Regis exemplum; qui cum à Deo per Samuelem Prophetam iussus esset Amale-

citas

citās infideles populos ita percutere, vt eis nullo modo quauis de causā parceret; quia Dei voluntati & voci non obediuit, Regemque ipsum Amalecitarum incolumem seruauit, eiusque rebus melioribus pepercit, paulò post per eundem à quo Rex vinctus fuerat Prophetam, seuerè admodum increpitus, & denique Regno ipso & vitā spoliatus est. Quo quidem exemplo Deus admonere voluit omnes Reges, ne, contemptā suarum iniuriarum ultione, eius in se ipsos iram atque indignationem prouocarent. Quòd si Maiestas tua, quemadmodum semper fecit, rectis sensibus, simplici que corde, Dei honorem, & Catholicæ Religionis causam apertè & liberè egerit; pro certo habeat, sibi Dei nunquam defuturum auxilium, donec, dissipatis eius inimicis, pristinus in isto Regno Religionis Catholicæ cultus, ad diuini sui nominis gloriam, & animarum salutem, per Maiestatem tuam reuocetur. Quod vt tibi nobisque misericorditer dignetur concedere, quotidianis ab eo precibus humiliter rogamus. Datum Romæ apud sanctum Petrum sub annulo Piscatoris, die XXVIII. Martij, M.D.LXIX. Pontificatus nostri anno quarto.

EPISTOLA XI.

Eiusdem est, cuius superior Epistola, argumenti.

Vide lib. II. cap. VIII. Vitæ PII V.

Charissimæ in CHRISTO Filia nostræ Catharinæ, Francorum Regina Christianissimæ.

Charissima in CHRISTO Filia nostra, salutem & Apostolicam benedictionem. Ut primum optatissimum latissimumque nuntium accepimus, dilectum Filium, nobilem virum, Ducem Andegavensem, natum tuum, prælio cum Dei & Ecclesiæ hostibus commisso, rem prosperè gessisse; illicò sublatis in cælum manibus Omnipotenti Deo gratias humiliter egimus, qui, hac Maiestati tuæ nobisque victoriâ concessâ, eoque homine de medio sublato, qui omnium auctor seditionum, nefarijque belli concitator & princeps extiterat, tantas misericordiæ suæ diuitias in nos effundere dignatus est. Habet Maiestas tua à Redemptore nostro singulare beneficium; pro quo pio & grato animo ei semper gratias agat. sed quò tecum & cum charissimo nobis in CHRISTO Filio, Rege Christianissimo, nato tuo, benigniùs egit; eò studiosiùs ac diligentius Maiestas tua operam nauare debet, vt non solùm hostium reliquias persequatur & conficiat, sed etiam vt omnes tantæ tamque corroboratæ pestis radices penitus tollat atque euellat: nisi enim funditus extirpen-

tirpentur, timendum est, ne, quemadmodum reipsâ antehac experti sumus, rursus pullulent; atque unde Maiestas tua minimè expectat, iterùm renascantur. Occupanda sunt munitiora loca prouinciæ Nauarræ, firmissimisque Catholicorum fidelium Præfectorum ac militum præsidiis munienda, in tutoque collocanda, ne quis ab eâ parte nouus seditionum bellorumque motus existere possit. Nullo modo, nullisque de causis, hostibus Dei parcendum est, sed seuerè cum illis agendum, qui neque Deo neque filiis tuis vnquam pepercerunt: neque enim aliter Deus placari potest, nisi ipsius iniurias iustâ ultione vindicaueris. Quòd si Maiestas tua, quemadmodum hucusque fecit, recto animi sui sensu, simplici que corde, honorem Omnipotentis Dei quæsiuerit, & Catholicæ Religionis hostes apertè ac liberè ad internecionem vsque oppugnauerit; pro certo habeat, numquam sibi diuinum defuturum esse auxilium, maioresque etiam sibi, Regique nato suo, à Deo victorias paratas fore; donec, deletis omnibus, exinde nobilissimo isti Regno pristinus Catholicæ Religionis cultus, ad sui nominis gloriam, tuamque perpetuam laudem, restituatur. Quod vt aliquando nobis concedere dignetur, summis quotidie precibus est orandus. Datum Romæ apud sanctum Petrum sub annulo Piscatoris, die XXVIII. Martij, M. D. LXIX. Pontificatus nostri anno quarto.

EPISTOLA XII.

Eiusdem, cuius priores duæ, argumenti.

Charissimæ in CHRISTO Filia Catharinæ,
Francorum Regina Christianissimæ.

Charissima in CHRISTO Filia, salutem & Apostolicam benedictionem. Cùm ex litteris Venerabilis Fratris Episcopi Caiacensis, Nuntij nostri, & Sedis Apostolicæ, apud charissimum in CHRISTO Filium, Regem Christianissimum natum tuum, certiùs atque exploratiùs iam cognouissemus, felicissimam atque exoptatissimam victoriam, quam Deus pro suâ misericordiâ, tam opportuno Reipublicæ Christianæ tempore, tibi Regique Christianissimo filio tuo concedere dignatus est; sublatis ad eundem Deum, omnium victoriarum auctorem, manibus atque oculis, & in humilitate cordis nostri, pro tanto tamque singulari beneficio gratias egimus. Et quamquam ex tantæ victoriæ nuntio magnam, vt par est, lætitiâ accepimus; credat tamen Maiestas tua, non minùs quàm ipsam victoriam, placuisse nobis pium illum ac verè religiosum animi affectum, quem Christianissimus Rex, natus tuus, declarauit, cùm, allatis ad se rei prosperè gestæ nuntiis, totum se ad gratias Deo agendas, laudesque ei dicendas, conuertit: vidit enim verè Christianissimus Rex, nullâ re magis

Regna

Regnâ ipsa retineri conseruarique posse, quàm sum-
mâ erga eum pietate, cuius munere Reges ipsi re-
gnant. Te autem, charissima Filia, bono fidenti-
que in Deum animo esse decet, neque vllorum pericu-
lorum metu terreri, sed magnâ fiduciâ, omnibus vi-
ribus, vnâ cum Christianissimo Rege filio tuo, ad
vindicandas Omnipotentis Dei seruorumque eius
iniurias, iustâ in rebelles animaduersione adhibitâ,
incumbere; vt debitâ illis pro eorum scelere pœnâ
perfolutâ, & Deus noster placari possit, & ex hoc
Maiestas tua diuinam sibi gratiam conciliet, & ce-
teris, vt ab eiusmodi nefario scelere se abstineant,
memorable atque vtile in posterum prodat exem-
plum. Quâ de re eò studiosius diligentiusque cum
Maiestate tuâ agendum esse existimauimus; quod
dari operam istic ab aliquibus audimus, vt ex eo-
rum hæreticorum qui capti sunt numero quidam
liberentur, inulti-que abeant: quod ne fiat, vtque
homines sceleratissimi iustis afficiantur suppliciis,
curare te omni studio atque industriâ oportet. nisi
enim hoc factum fuerit, paruum omnino momen-
tum hæc victoria habitura est, ad istius Regni tran-
quillitatem constituendam: quin potius, hac tam
necessariâ ad Deum placandum animaduersione
omissâ, timendum est, ne, quemadmodum aduer-
sus Saulem Regem, pro simili Amalecitarum vltio-
ne prætermisâ, sic aduersus te filiumque tuum, eò
gravius Dei ira exardeat, quò benignius ac miseri-

cordiùs vobiscum hucusque egit. Quâ in re Maie-
statem tuam rogamus, vt nobis fidem habeat: qui,
quoniam nullis priuatis rationibus, sed solo Dei ho-
nore ad hoc mouemur; quid faciendum sit, rectè iu-
dicamus: &, quia Christianissimum Regem, natum
tuum, teque ipsam paterno amore prosequimur;
optimum & fidelissimum, Regnoque isti vtilissi-
mum, vtrique consilium damus. De nostro autem
in te Regemque Christianissimum filium tuum
animo, paternâque Regni istius curâ, Maiestatem
tuam sic existimare volumus; quidquid viribus at-
que auctoritate poterimus, id totum vtrique sem-
per paratum fore. Quòd si cetera nobis quandoque
defuerint, illud certè non deerit, quin, quemadmo-
dum hucusque fecimus, fusis ad Deum Omnipoten-
tem precibus, cum pro vtriusque vestrûm salute,
istiusque Regni incolumitate ac tranquillitate, assi-
duè atque instanter rogemus. Tibi autem charissi-
mæ Filiæ debitum salutationis nostræ officium per-
soluentes, benedictionem nostram impartimur, at-
que ab Omnipotenti Deo gratiam ac custodiam
præcamur. Datum Romæ apud S. Petrum sub an-
nulo Piscatoris, die XIII. Aprilis, M.D.LXIX. Pon-
tificatus nostri anno quarto.

EPISTOLA XIII.

Eiusdem, cuius priores, argumenti.

Dilecto Filio, nobili viro, Henrico Duci Andegauensi, Regis Christianissimi fratri.

Dilecte Fili, nobilis vir, salutem & Apostolicam benedictionem. Nobilitatis tuæ litteras XIV. Martij die datas, magnâ cum animi nostri lætitiâ accepimus; quibus nos certiores fecit de felicissimâ victoriâ, quam Omnipotenti Deo placuit pro suâ misericordiâ tibi nobisque concedere: dilectum autem Filium Marchionem Rangonium, Regij Ordinis Equitem, à Nobilitate tuâ ad nos tantæ victoriæ nuntium missum, eâ quâ decuit humanitate acceptum, libentissimè vidimus atque audiuius, ex eiusque accurato prudentique sermone rerum istarum statum cognouimus. Tibi pro isto in nos officio, quas debemus, gratias agimus, qui tantum ac tale Dei Omnipotentis beneficium quamprimùm nobis notum esse voluisti: pro quo nos, sublatis illicò ad Redemptorem nostrum oculis ac manibus, humiliter ei gratias egimus. Nec verò ignoramus, quantum, post Deum, virtuti ac fortitudini tuæ debeat, cùm ipse Christianissimus Rex frater tuus, tum vniuersa Gallia ac Religio Catholica. Nam & ille hac victoriâ Regnum in extremum

tremum ferè discrimen adductum, per te sibi quasi restitutum recepit, & Gallia in maximam spem erecta est pristinae suae tranquillitatis recuperandae, & Catholici magno imminentium sibi periculorum metu liberati sunt. Quae quò plura maioraque tibi, supra ætatem tuam, data sunt à Deo; eò te magis decet pio & religioso animo, & hæc & alia munera, diuinæ suae bonitati accepta referre. Est enim omnium victoriarum triumphis præstabilius, ipsum victoriarum auctorem Deum agnoscere, eique fideli ac sincero animo seruire. Nobilitatem tuam, quamquam satis suâ sponte ad omnia egregia opera incitatum, tamen ad testificandum nostrum paternum erga ipsam animum hortamur, vt forti fidentique in Deum animo victoriam ipsam, Dei beneficio præeuntem, sequatur; communibus hostibus spatium se colligendi non tribuat, suos in timore Dei Omnipotentis, atque erga eum obsequio, continere studiosè conetur. Illud etiam Nobilitatem tuam rogamus, vt charissimum in CHRISTO Filium, Regem Christianissimum, fratrem tuum, tuis fraternis adhortationibus incitare non desinas, ad rebelles suos seuerissimè puniendos: qui, quoniam publicam istius Regni tranquillitatem perturbauerunt, Religionem Catholicam, quantum in ipsis fuit, subuerterunt, templa incenderunt, Sacerdotes Omnipotentis Dei crudelissimè interfecerunt, aliaque innumera scelera commiserunt; digni sunt, qui his
suppli-

suppliciis afficiantur, quæ legibus statuta sunt. Quòd si quis eorum, tuæ Nobilitatis intercessione, apud Regem fratrem tuum, debitas sibi pœnas effugere tentarit; debes pro tuâ in Deum pietate, diuini-que honoris zelo, omnium pro illis rogantium preces repudiare, & æquè omnibus inexorabilem te præbere: si enim aliter faceres, & Deum offenderes, & malè tuæ Regis-que fratris tui salutis, Regni-que istius securitati consuleres. Hæc autem si feceris, speramus eum, qui Dominus est exercituum, maiorem indies hostibus suis tuis-que cladem allaturum; donec, profligatis eorum viribus, pristina isti Regno pax & securitas virtute tuâ restituatur. quod assiduis precibus Deum precari non desistimus: tibi autem, dilectissime Fili, benedictionem nostram impartimur. Datum Romæ apud sanctum Petrum sub annulo Piscatoris, die XIII. Aprilis, M.D.LXIX. Pontificatus nostri anno quarto.

EPISTOLA XIV.

Eiusdem argumenti.

Dilecto Filio nostro Carolo, tituli S. Apollinaris Presbytero Cardinali, à Lotharingiâ vocato, nostro & Apostolicæ Sedis Legato.

Dilecte Fili noster, salutem & Apostolicam benedictionem. Si quis est omnium Catholi-
X
corum

eorum Principumque virorum, quos Dei benignitate multos esse in isto Regno compertum habemus, cui de tam opportunâ victoriâ gratulandum esse putemus; certè tu vnus ille es, cui nos præcipuâ quadam animi nostri paterni significatione gratulari velimus; non solum ob eam causam, quod eâ præditus es singulari in Deum pietate, & Catholicæ Religionis studio ita incensus, vt nemo hoc nomine maiorem ex eâ re lætitiâ accepisse videri possit; sed etiam quia, adiuuante Deo, tuis sapientissimis consiliis, prudentissimisque monitis, magnâ ex parte factum esse intelligimus, vt tam prospero rerum successu in isto Regno Respublica Christiana vti potuerit. quarum nos rerum prosperè gestarum causâ, sublati illicò oculis ac manibus ad Omnipotentem Deum, omnium bonorum auctorem, ei pro tanto suo in nos beneficio humili corde gratias suppliciter egimus: Tibi tamen pro tuâ spectatissimâ prudentiâ minimè latère existimamus, nos aut nihil, aut certè parum, hac victoriâ momenti ad ipsam rerum summam consecuturos esse; nisi tu primum, dilecte Fili, & ceteri qui apud Regem gratiâ atque auctoritate plurimum valent, in eam curam cogitationemque incumbant, hocque ipsum omni diligentia & studio efficere conentur, vt in toto isto Regno vna Religio Catholica ab omnibus, vno oris cordisque consensu, teneatur atque custodiat. Quam ad rem efficiendam nihil æquè valere

puta-

putamus, ac si communibus hostibus spatium ad se colligendum non detur; & illi, qui tantarum seditionum perturbationumque causa fuerunt, seuerissimè his quæ legibus statuta sunt suppliciis ac pœnis afficiantur. Vt enim ab eis Regni pacem tranquillitatemque perturbatam, Regemque ipsum toties insidiis ac ferro petitem taceamus; Deus ipse certè, cuius sanctissima templa partim incensa, partim diruta, partim profanata sunt, cuius Sacerdotes crudeliter occisi, cuius fides Catholica acriter oppugnata est, aliter placari non potest, nisi iustis sceleratissimorum hominum illorum pœnis, qui hæc & alia multò atrociora facinora commiserunt. Itaque circumspeditionem tuam debito nostræ paternæ salutationis officio impartientes, magnoperè hortamur ac rogamus, vt charissimi nobis in CHRISTO Filij, Christianissimi Regis, animum ad Dei Omnipotentis suosque hostes iustè vlciscendos incitare ne desistat; ei que, id quod verissimum est, persuadere conetur, Maiestatem suam nullâ aliâ ratione Redemptori nostro, legibusque eius satisfacere, atque vtilitati istius Regni consulere posse, quàm si omnibus his, qui pro sceleratissimis hominibus rogare audebunt, se inexorabilem præbeat. Quæ quidem etsi putabamus circumspeditionem tuam, pro suo diuini honoris zelo, diligentissimè facturam esse; nos tamen, pro nostrâ Pastoralis sollicitudine, officio commissi nobis muneris

fungi volentes, scientesque nobis de eo æterno illi Pastori rationem reddendam esse, præterire noluimus, quin de his, quæ tantoperè ad obsequium Dei pertinent, te paternè moneremus. In quo tamen compertum habemus, circumspeditionem tuam, eo subleuandæ Dei Omnipotentis causæ, Religionisquæ Catholicæ in isto Regno constituendæ studio, facturam esse; vt, quemadmodum hucusque fecit, nullum neque paternis nostris neque cuiusquam hortationibus ac monitis locum relictura sit. Omnipotens Deus tibi in hoc sæculo, dilecte Fili, pro tot laboribus tuis quotidie gratiam suam magis augeat; teque & in futuro ad beatitudinis æternæ præmia peruenire concedat. Datum Romæ apud S. Petrum sub annulo Piscatoris, die XIII. Aprilis, M. D. LXIX. Pontificatus nostri anno quarto.

EPISTOLA XVI.

Eiusdem argumenti.

Charissimo in CHRISTO Filio Carolo, Francorum Regi Christianissimo.

Charissime in CHRISTO Fili, salutem & Apostolicam benedictionem. Posteaquam ex literis Venerabilis Fratris Episcopi Caiacensis, nostri & Sedis Apostolicæ apud Maiestatem tuam Nuntij, exploratiùs iam certiores facti fuimus de felicissimâ victoriâ, quam Omnipotenti Deo placuit, pro
suâ

suâ benignitate, nobis ac tibi, totiâque Catholico populo concedere; sublatis manibus ad eundem Deum, omnium bonorum auctorem, illi pro tanto suo in nos beneficio, toto corde gratias suppliciter egimus; qui non solum magnitudine, sed etiam opportunitate tantæ victoriæ, verè se misericordiarum Patrem esse declarauit. Et quidem decebat Maiestatem tuam, charissime Fili, quemadmodum fecisse eam accipimus, tantum diuinæ bonitatis munus pio ac religioso animo Redemptori nostro totum acceptum referre, eiâque gratias quas retulit referre: in quo singularem Maiestatis tuæ pietatem deuotionemque vehementer in Domino commendauimus. Et quoniam Dei perfecta sunt opera, speramus eum, qui hucusque salutis tuæ custos fuit, causamque suam aduersus suos tuosque hostes tueri dignatus est, tibi in posterum quoque misericorditer adfuturum; daturumque vires, quibus & pristinam Regno isti pacem & tranquillitatem restituas, illudque cum eâdem potestate atque ad eundem modum possideas, quo superiores clarissimi Reges, maiores tui, possederunt. Hoc tamen pro comperito habeat Maiestas tua, nullo alio id fieri posse, nisi si totum Regnum vnâ eandemque Catholicam Religionem vno animo vnâque mente teneat atque custodiat. Quod vt adiuuante Deo ad effectum adduci possit, necesse est, Maiestatem tuam in hostes Dei, rebellesque suos, iustis pœnis iustisque

stisq̃ue suppliciis, quæ legibus statuta sunt, seuerè animaduertere: non ob eam quidem causam quòd tibi priuatim fuerint infensi, tuamq̃ue potentiam & salutem oppugnaverint; sed quòd publicam Regni tranquillitatem perturbauerint, Catholicam Religionem, quantum in eis fuit, subuerterint, templa sanctissimo Dei cultui dicata incenderint, diruerint, profanauerint, Dei Omnipotentis Sacerdotes crudeliter interfecerint, innocentium sanguinem effuderint, diuinæq̃ue Maiestatis oculos, innumeris in Deum atque homines sceleribus perpetratis, vehementissimè ac grauissimè offenderint. Nam si qualibet inductus causâ (quod non putamus) ea de quibus Deus offenditur insectari atque vlcisci distuleris, certè ad irascendum eius patientiam prouocabis: qui quò tecum egit benigniùs, eò debes acriùs illius iniurias vindicare. quâ in re, nullius preces admittere, nihil cuiusquam sanguini & propinquitati concedere, sed omnibus, qui pro sceleratissimis hominibus rogare audent, inexorabilem te præbere oportet. Quam quidem ad rem, pro Pastoralis officio, paternoque amore nostro, ita te hortamur; vt, quamquam hoc tuâ sponte facturum esse confidamus, tamen Maiestatem tuam, quamuis currentem, paternis nostris vocibus duxerimus incitandam: cui debitum nostræ salutationis officium persoluentes, benedictionem nostram amantissimè impartimur; eiq̃; ab Omnipotenti Deo & in hoc sæculo

culo securitatem & pacem, & in alio pro huius tam
 pij belli laboribus præmium æternæ remunerationis
 precamur. Datum Romæ apud S. Petrum sub
 annulo Piscatoris, die XIII. Aprilis, M. D. LXIX.
 Pontificatus nostri anno quarto.

EPISTOLA XVII.

*Signa militaria de hæreticis acie victis capta, ex Galliâ
 ad se missa accipit; atque ut reliquos Dei Ecclesiæ ho-
 stes bello conterat, Ducem Andegauensem hortatur.
 Vide lib. II. cap. VIII. Vitæ PII V.*

Dilecto Filio, nobili viro, Henrico Duci An-
 degauensi, Francorum Regis fratri.

Dilecte Fili, nobilis vir, salutem & Apostoli-
 cam benedictionem. Signa militaria de
 comminibus hostibus, adiuvante Deo, capta, & à
 charissimo fratre tuo ad nos missa, eo quo debuimus
 grato paternoque animo accepimus. Cùm scire-
 mus virtute tuâ maiori ex parte parta fuisse, præter-
 ire non debuimus, quin Nobilitati quoque tuæ, eâ
 de re animi nostri lætitiâ paternè significaremus.
 In eis mittendis fecit Rex frater tuus id quod Chri-
 stianissimo Rege dignum fuit, & à vetere charissi-
 morum Regum maiorum suorum erga Deum pie-
 tate, Sedemque hanc Apostolicam deuotione, non
 discessit. Cuius rei nomine Nobilitati tuæ etiam
 gratias

gratias agimus, cuius post Deum Omnipotentem operâ factum est, vt hæc de Catholicæ Religionis hostibus spolia caperentur. Te verò, dilectissime in CHRISTO Fili, quod & aliis nostris ad te litteris scripsimus, hortamur, vt, quantum per te fieri poterit, operam sedulò des, ne Dei hostes, istius Regni rebelles, inulti abeant; sed vt pro grauissimis eorum in Deum Regemque fratrem tuum sceleribus admissis, meritis pœnis, his quæ legibus statutz sunt, afficiantur. In quo illæ tuæ partes erunt, non solum omnibus modis adiuuare, vt iustitiæ ac legibus locus sit, nihilque in eâ re indulgentiâ peccetur, sed etiam his, qui tibi pro scelestissimis hominibus supplicare audebunt, inexorabilem te præbere. Nam si in tot tantisque Dei Omnipotentis offensis inultis omitterendis, aliquid aut indulgendo, aut conniuendo vel negligendo peccaretur; periculum esset, ne, quemadmodum aduersus Saulem, pro simili Amalecitarum iustâ animaduersione ab eo omisâ, sic aduersus Christianissimum Regem fratrem tuum, teque ipsum etiam, eò grauius ira Dei exardesceret, quò benignius atque clementius ad hanc vsque diem cum vtrisque vestrum diuina sua bonitas egisset: quos ex tot tantisque periculis, impiorumque hominum nefariis coniurationibus, ereptos, ideò conseruauit, vt essent qui suas iniurias iustè vlcisci possent. Regi autem Christianissimo fratri tuo, eas quas potuimus peditum equitumque copias,

pias, auxilio misimus: in eis mittendis nullas nostras priuatas rationes propositas habentes, sed tantummodò obsequium Dei, atque istius Regis conseruationem spectantes. Dolemus certè ex animo, eum esse Ecclesiæ statum, nostrasque ita exiguas esse vires, vt, quantas vellemus mittere, non potuerimus; & tamen nostras spes in Domino collocatas habemus, qui potens est, quantumuis exiguas copias, dexteræ suæ fortitudine potentissimas efficere. Omnipotens Deus Nobilitatem tuam ab omnibus insidiis inimicorum suorum custodiat. Datum Romæ apud sanctum Petrum sub annulo Piscatoris, die XXVI. Aprilis, M. D. LXIX. Pontificatus nostri anno quarto.

EPISTOLA XVIII.

Consiliis suis de Christianâ disciplinâ vbique restituendâ cum Legato communicatis, eum, vt id in Auenionensi Venaisinaque ditone, per idoneos ministros diligenter præstet, hortatur. Vide lib. II. cap. V. Vitæ PII V.

Dilecto Filio nostro Carolo, tituli S. Chrysgoni Presbytero Cardinali, Borbonio vocato, ciuitatis nostræ Auenionensis de latere Legato.

Dilecte Fili noster, salutem & Apostolicam benedictionem. Facit singularis tua in Deum

Y

Omni-

Omnipotentem pietas, eximiusque & perspectissimus nobis in te diuini honoris zelus, vt nostras cogitationes, nostraque consilia, tecum libenter communicemus: præcipuè ea quæ ad obsequium Dei, ad Religionis Catholicæ pristinam integritatem reuocandam ac conseruandam, atque ad ipsius sanctæ Ecclesiæ, cuius honorabile membrum es, dignitatem constituendam & retinendam, magnoperè pertinent. Quas quidem ad res, vt optamus, consequendas, nihil iam inde à principio nostri Pontificatus accommodatius efficaciusque esse iudicauimus, quàm si à nobis primùm, deinde etiam ab his, qui in huius sollicitudinis partem à Deo vocati sunt, qui que aliâ quauis ratione hoc nostrum studium adiuuare possunt, diligentissimè opera daretur, vt vbi que ferè corrupti populorum Christianorum mores emendarentur; ac si qui apud eos abusus irrepissent, si quæ vitia, vt fit, dissolutis hominum antiquis moribus confirmata essent, hæc omnia, quantum fieri posset, tollerentur ac corrigerentur. Quia verò omnem morum correctionem, quæ à nobis primùm, atque ab eis locis, quæ ad Ecclesiasticam ditionem proximè pertinent, non incepisset, suspectam ac mancam fore videbamus; propterea, quantum in tanto perturbati orbis Christiani rerum negotiorumque concursu nobis hucusque licuit, sedulò studuimus, vt quæ diuinæ Maiestatis oculos offendere videbantur, in hac vrbe primùm tollerentur:

tur:

tur: quam, quia nos, licet indigni, in eâ præside-
 mus, videbamus ceteris ciuitatibus religionis san-
 ctitatisque specimen atque exemplum dare oportere.
 deinde etiam aliis in locis atque oppidis, quæ
 nostrâ Ecclesiasticâ ditione continentur: inter ea
 Auenionensis ciuitas, Comitatusque noster Venai-
 sinus, quæque oppida in eâ Prouinciâ tuæ Legatio-
 nis curæ commissa sunt, quamuis magno locorum
 spatio à nobis disiuncta, nobiscum tamen, & cum
 Sede Apostolicâ eodem quo ceteræ ditiones nostræ
 ciuitatis iure coniuncta, duabus de causis præci-
 puè, nobis ante oculos obuersantur. Primum, quòd
 ea vrbs vndique multis hæresum pestiferarum
 periculis cincta, eò magis paternam nostram tuam-
 que curam, pastoraleque auxilium implorare
 videtur, quò ab imminentium luporum insidiis
 propiùs abest. Deinde, quòd si in eâ incorruptæ
 Religionis pietas constituatur, antiquorum mo-
 rum integritas restituatur, veterisque disciplinæ san-
 ctitas reuocetur; perspicimus, finitimis eam popu-
 lis, vicinisque nationibus, quasi exemplar quod-
 dam, in quod intueantur, ad imitandum proposi-
 tam fore: quodque B. Hieronymus de Ierosolymâ
 vrbe scribit, eam idcirco à Deo in medio Gentium
 positam fuisse, vt omnes in circuitu nationes eius
 exemplum sequerentur; hoc idem Auenionensi ci-
 uitati, adiuuante Deo, nisi per nos steterit, accidere
 posse. Itaque iam inde à nostri Pontificatus initio ve-

hementer optauimus, vt quod animo iam & mente conceperamus, de corrigendis atque emendandis eius ciuitatis moribus, id nobis aliquando, Dei beneficio, re ipsâ consequi liceret. Quod quia, seu temporum iniuriâ, siue aliis de causis, ad hoc vsque tempus fieri non potuit, visum nobis est, non esse amplius differendum; ne cui Regno terrenis temporalibusque armis præsidium ferre conamur, eius partem, ad nostram ditionem pertinentem, spiritalibus remediis destitutam esse patiamur. Ad hoc opus, Omnipotenti Deo tam acceptum, eorumque populorum animabus tam salutare, efficiendum, intelligimus circumspeditionem tuam pro suâ pietate, & flagrantissimo iuuandæ Religionis studio, nullis nostris hortationibus indigere: vt enim cetera, quæ tibi Dei gratiâ abundè suppetunt, omittantur, Legationis officium, quod à nobis Sedeque Apostolicâ in eâ obtines ciuitate, idoneum esse videtur incitamentum: quo, si vllis modò stimulis indigeret virtus tua, ad hoc ipsum quod cupimus adiuuandum, incitari posses. Itaque sicuti circumspeditionem tuam ad id, ad quod sponte suâ satis incitata est, hortari noluimus; ita ei hunc animi nostri sensum significare, deque hoc nostro consilio certiore facere voluimus. Cui etiam totum hoc emendationis correctionisque morum negotium, tamquam nostro & Sedis Apostolicæ de latere Legato, commissemus, nisi tuam operam in rebus istius

istius Regni gubernandis, multò nobis ac Reipublicæ Christianæ vtiliorem esse perspiceremus; neque te à consiliis Christianissimo Regi dandis, sine magno rerum istius Regni detrimento, auocari posse intelligeremus: quantoperè enim præsentia, prudentia fidesque tua istic, tum ipsi Regi, tum nobis Sedi que Apostolicæ, vtilis necessariaque sit, non ignoramus. Itaque circumspeditionem tuam rogamus, vt eos quos oportet Legationis tuæ ministros, litteris moneas, vt his, quibus hæc à nobis cura commissa fuerit, omni studio, sinceræque erga sanctam hanc Sedem deuotionis affectu, adsint; eosque omnibus viribus, fauore, auctoritate ac potestate iuuent. quod quidem tuum ipsorumque officium, præterquàm (quod caput est) Omnipotenti Deo acceptissimum erit, prætereà nobis gratissimum, populis verò ipsis vtilissimum est futurum. Datum Romæ apud sanctum Petrum sub annulo Piscatoris, die XXVII. Aprilis, M.D.LXIX. Pontificatus nostri anno quarto.

EPISTOLA XIX.

Corficam, post rebellionem, in Genuensium potestatem rediisse letatur; eiusque insulae populos, Christianis legibus & disciplinis in officio continendos, pieque moderandos esse ostendit.

Dilectis Filiis, nobili viro, Duci & Gubernatoribus Reipublicæ Genuensis.

Dilecti Filij, salutem & Apostolicam benedictionem. Corsicam insulam, quemadmodum per multos antè annos fuit, totam in vestram redactam esse potestatem, Deumque Omnipotentem, pro suâ in genus humanum misericordiâ, finem diuturno luctuosoque bello imposuisse, vehementer in Domino gauisi sumus, litteras vestras VII. Aprilis die datas legentes; eâque de re, sicut par fuit, Redemptori nostro gratias egimus: qui, ut eos populos ob peccata eorum ac nostra iustè affligere voluit, sic eisdem iam resipiscientibus, atque ad veterem imperij vestri obedientiam reuertentibus, pacem suam misericorditer negari noluit. Restat nunc, ut, quibus tamquam parum obedientibus filiis, ad vestram clementiam sic quasi ad patrem confugientibus, Deus pro suâ benignitate vos placatos esse atque ignoscere voluit; eos tamquam boni patres, non solum (quemadmodum fecistis) saluos & incolumes esse velitis; sed etiam per idoneos homines, eâ quâ decet paternâ charitate, Dei in primis cultu, Religionis Catholicę studio, Christianisq; moribus diligentissimè imbuendos curetis. Hoc facientes, non modò vobis apud homines gloriam & apud Omnipotentem Deum præmia mercedis ac-

quiretis; sed eis ipsis populis multò vobis obsequentioribus, vestrumque amantioribus studiosioribusque vtemini. Nam si timorem Domini per vos edocti, voluntatem illius esse didicerint, ut sublimioribus potestatibus, quæ à Deo omnes sunt, homines subiecti sint; Principum suorum imperio fideliter sibi parendum esse statuent: cui qui resistunt, eos ordinationi Dei resistere intelligent. Si verò à peccatis abstinere, sectarique iustitiam admoniti incepterint (quod ut faciant, non dubitamus vos pro vestrà parte curaturos esse) nulla vobis eorum amplius defectio, nullæ contra vos coniurationes erunt ab eis timendæ: qui enim iustitiam diligunt, hæc & eiusmodi omnia odio habent. Date igitur operam, ut quò eius insulæ populi, propter belli diuturnitatem, negligentiores ac remissiores in diuino cultu, atque à diuinorum præceptorum obseruantia alieniores fuerunt, quoque magis animarum suarum salutaris pabulo caruerunt, eò diligentius ac studiosius longi temporis iacturam assiduitate ac magnitudine vestrorum in eos paternorum officiorum compensetis. Quod quidem vestrum studium, pro Pastoralis sollicitudine, proque eius officij munere, quod nos, licet indignos, Deus Omnipotens suscipere atque administrare voluit, ipsi quoque, quantum fieri poterit, adiuuabimus; Venerabilesque Fratres nostros, illius insulæ Episcopos, diligenter ad sui quemque gregis custodiam,

in tempore hortabimur. Illud prætereà vos, tamquam dilectos nostros in CHRISTO Filios moneamus, vt populos illos, tot belli calamitatibus afflictos, tot tantaque mala perpeffos, magis beneuolentiâ beneficentiâque vestrâ alliciendos, quàm vi aut armis in officio retinendos esse statuatis. Nam præterquam quòd hæc regendi populos ratio re ipsâ tutior est atque firmior, prætereà (quod caput est) Omnipotentis Dei præceptis magis congruit, quibus tanto studiosius parère debetis, quantò ille vos ad recuperandam eius insulæ possessionem diuinâ suâ ope adiuuit; vt non solum erga illos populos benefici, sed etiam in Deum ipsum grati reperiâmini. Quod non dubitabamus quidem, vos, pro vestrâ pietate, sponte vestrâ esse acturos; sed tamen admonitu nostro idem diligentius, acrius ac studiosius facturos putauimus. Datum Romæ apud sanctum Petrum sub annulo Piscatoris, die XXIV. Aprilis, M.D.LXIX. Pontificatus nostri anno quarto.

EPISTOLA XX.

*Ad Episcopalis cura munera diligenter obeunda,
Episcopum Adiaciensem cohortatur.*

Venerabili Fratri Ioanni Episcopo Adiaciensi in Corsicâ.

Venerabilis Frater, salutem & Apostolicam benedictionem. Commissi nobis officij sollicitudo,

tudo, diuiniq̃ue honoris zelus, coëgit nos, hoc tempore, quo datâ à dilectis nobis Filiis, Duce & Gubernatoribus Reipublicæ Genuensis, populis istius insulæ pace, Omnipotentis Dei misericordia diuturno luctuosoq̃ue bello finem imposuit; Fraternitatem tuam, & ceteros eiusdem insulæ Episcopos, Fratres nostros, singulos ad officium suum Ecclesiæ propriæ præstandum, suiq̃ue gregis custodiam, hortari atque excitare. id autem eò etiam studiosius, tibi ceterisque Fratribus, Episcopis nostris, faciendum esse iudicamus; quò, propter diuturni belli mala, & creuisse populorum istorum peccata, & eorum licentiam magis auctam, non dubitamus: vt apud quos, peccatis eorum ac nostris id facientibus, tot animarum vulnera morbiq̃ue inualuerunt, hi spiritualium medicorum Pastorumq̃ue propriorum curâ magnoperè indigere videantur. Hoc itaque considerans Fraternitas tua, officij sibi à Deo commissi memor, omni studio, curâ atque industriâ ad gregem fidei suæ creditum pascendum inuigilet: corruptos deprauatosq̃; Cleri sui, ceterorumq̃ue hominum, in suâ diœcesi mores, tum lenitate, tum seueritate, prout res ipsa postulare videbitur, adhibitâ, corrigere atque emendare conetur: Tridentini Concilij Decreta, quantum in se est, in vsu adducere curet: peccata publica, si qua fortè, vt fit, dissolutis nimîâ licentiâ moribus corroborata sunt, extirpare conetur. Illud prætereà omnibus viribus ac dili-

gentiâ eniti debes, vt instituendorum in tuâ diœ-
cesi puerorum, atque etiam natu grandiorum, pa-
ternam bonoq̃ue Pastore dignam, quàm maximam
curam suscipias. Ad eam rem vtilissimum erit, vt
per eos quos oportet, quiq̃ue idonei sunt, doctri-
nam Christianam edoceantur; Catechismus, vul-
gari sermone editus, legendus illis proponatur; po-
pulus ipse, ad audiendum Dei verbum, præcipuè
diebus Festis, ad aliaq̃ue Christianæ pietatis opera,
hortationibus paternis incitetur. Hæc, & si quæ
alia tibi, pascendo gregi tuo, vtiliora videbuntur,
sedulò age, diesq̃ue ac noctes meditare; sciens æter-
num illum Iudicem, cuncta quæ egeris, quæq̃ue
omiseris, in illo vltimi Iudicij die diligentissimè
ac subtilissimè requisiturum; atque vnumquemque
nostrum, non ex sublimioris gradus prærogatiuâ,
sed ex operum meritis approbaturum. Obsecra-
mus ergo te, Frater, & per viscera Dei nōstri etiam
atque etiam obtestamur, vt, quoniam Pastor con-
stitutus es, Dominusq̃ue ab his, quos Pastores con-
stituit, fructum multiplicati gregis expectat, de cre-
ditorum tibi populorum animabus sollicitus sis; hor-
tationibus, monitis, prædicatione, futuri Iudicij
terrore prætenso, relictis peccatis, ad Deum con-
uerti suadeas: vt ad æterni Iudicis tribunal consti-
tutus, suauissimam illam vocem audire merearis:
Euge Pastor bone & fidelis, intra in gaudium Do-
mini tui. Hæc pluribus Fraternitatem tuam hortati
sumus,

sumus, non voluntati aut studio erga Ecclesiam sibi creditam diffidentes; sed paterni animi nostri affectum, omniumque Ecclesiarum sollicitudinem, quæ in nobis esse debet, testificantes. Datum Romæ apud sanctum Petrum sub annulo Piscatoris, die IV. Maij, M. D. LXIX. Pontificatus nostri anno quarto.

EPISTOLA XXI.

Ad mores piè conformandos, Ecclesiasticamque disciplinam ritè ordinandam, Episcopum Vasonensem adhortatur. Vide lib. II. cap. v. Vitæ PII V.

Venerabili Fratri Iacobo, Episcopo Vasonensi,
Patriarchæ Alexandrino.

Venerabilis Frater, salutem & Apostolicam benedictionem. De correctione atque emendatione morum ciuitatis Auenionensis, Comitatusque nostri Venaïni, ceterorumque oppidorum ac locorum, Legationis istius ditioni subiectorum, sollicito animo cogitantes; vtile esse duximus, primum dilectis in Christo Filiis, Carolo Cardinali Borbonio, ciuitatis nostræ Auenionensis de latere Legato, & Georgio Cardinali Armeniaco eius collegæ, pro nobis ac Sede Apostolicâ in eâdem ciuitate commoranti, consilium nostrum consilijque simul rationem significare: quod litteris nostris, ad

vt rumque eorum accuratè admodum scriptis, proximè fecimus. Sed quia ad id quod cogitamus, permagni interest, vt eorum quibus hæc salutaris animarum medicina adhibenda est, animi eodem tempore præparentur, & ad eam rem, Venerabilium Fratrum nostrorum istius Legationis Episcoporum operam valdè nobis vtilem atque accommodatam fore videbamus; idcirco singulos eorum hortandos excitandosque esse existimauimus, vt, si vnumquam antea, nunc maximè ad officium suum, Ecclesiæ propriæ præstandum, incumbant. Quocirca Fraternitatem tuam necesse est memorem esse Pastoralis curæ, sibi à Deo commissæ, eiusque quod de vniuersali Ecclesiâ dictum est, Panem otiosa non comedit: hinc sollicito animo in eam curam cogitationemque incumbere, vt cuius fructus Ecclesiæ percepit ac percipit, ei studeat operam ac vigilantiam suam sedulò impendere. Et quoniam tot tantarumque hæresum pestis in istâ prouinciâ, sicut in aliis eadem labe infectis, non aliam ob causam magis inualuit, quàm ob corruptos ac deprauatos Clericorum laicorumque mores; idcirco quid in sermone, quid in actione Episcopum deceat, diligenter attendens, vitamque tuam benè sancteque viuendi normam ceteris ad imitandum proponens, Clericos in primis, qui sunt in tuâ diocesi, officij sui diligenter admone, eosque ad piè, sobriè casteque viuendum hortare. Si qui verò ex illis sunt,

qui

qui disciplinam detrectantes, monitis tuis obtemperare recusent, eos adhibitâ etiam animaduersionis Canonicae seueritate coercere; laicos & reliquum populum fidei tuæ creditum, frequentibus hortationibus, per te, perque idoneos verbi prædicatores, excitare stude: vt ad audiendum Dei verbum, præsertim Festis diebus, frequens conueniat: catechismum ei per religiosos Sacerdotes declarandum propone; Decreta sanctæ Generalis Tridentinæ Synodi vt fideliter diligenterque seruentur, omni studio conare. Hæc, & si quæ alia sunt horum similia, meditare, atque exequere; diem tuæ vocationis considera; quas rationes de Episcopatus onere Redemptori nostro redditurus es, subtiliter perpende; de grege tibi credito, sollicito animo semper esto; ne quid, hæreticorum fraude, tibi de eo subtrahatur, vigila; & si subtractum fuerit, ad gregem Dominicum Pastoralis voce reuocare contende. Denique in commissæ tibi plebis curâ, nihil quod animarum salutis vtile fore putaueris, prætermitte: vt qui Pastor pastorum est, vigilasse te in gregis sui custodiâ, diuino suo Iudicio comprobare dignetur. Datum Romæ apud sanctum Petrum sub annulo Piscatoris, die XVIII. Maij, M. D. LXIX. Pontificatus nostri anno quarto.

EPISTOLA XXII.

*Nobilem Scotum Religionis causâ ab hæreticis patriâ
pulsam omni charitatis officio suscipiendum commen-
dat. Vide lib. III. cap. VIII. & IX. Vitæ PII V.*

Dilecto Filio Petro de Monte, Magistro Ho-
spitalis S. Ioannis Ierosolymitani.

Dilecte Fili, salutem & Apostolicam benedi-
ctionem. Commune humanitatis vincu-
lum, & diuinæ legis præcepta nos admonent, vt
omnibus nos quidem proximis nostris debita chari-
tatis officia libenter præstemus; sed multò magis
his, qui propterea quòd à fide Catholicâ ad hæreti-
cos Omnipotentis Dei hostes deficere noluerunt,
patrimoniis suis spoliati, patriâ carentes, in multâ
rerum necessariorum egestate constituti, volunta-
rium potiùs exilium perferre, quàm in patriâ cru-
delissimorum hæreticorum impiæ voluntati parère
voluerunt: tales enim homines verè sunt hi, qui
propter iustitiam persecutionem patiuntur. Ex ho-
rum numero vnus est, dilectus hic Filius Iacobus
Scotus, qui tibi has nostras litteras reddet, natus ex
illustri & antiquâ admodum apud Scotorum gen-
tem familiâ: de cuius viri pietate, orthodoxæ Reli-
gionis studio, fortitudine in aduersis rebus, con-
stantiâ in fide Catholicâ, grauissimorum virorum
fideque

fideque dignissimorum habemus testimonia; ut eis adducti, illum tibi his nostris litteris accuratissimè commendandum esse duxerimus: deuotionem tuam hortantes in Domino, & quò maiore possumus animi nostri studio rogantes, ut hominem hunc, domi suæ nobilissimum, pium, Catholicum, domesticorum perfidiâ è patriâ expulsum, patrimonio spoliatum, ad tuam fidem Religionemque istam confugientem, benignè excipias, liberaliter tractes; tuisque officiis omnibus sic complectaris, ut re ipsâ experiatur, nostram illi apud te commendationem, quemadmodum æquum est, plurimum profuisse. Illud autem in primis à te petimus, ut, cum primum aliquam in Regno Scotiæ præceptoriam vacare contigerit, eam illi potissimum conferas: eâ enim est apud gentem suam nobilitate, ut, si hoc per te facultatum subsidio adiutus, apud suos commorari potuerit; speremus eum, adiuuante Deo, in eo Regno ad fidei Catholicæ veritatem, Sedisque Apostolicæ obedientiam, reuocando, & in bonis istius Ordinis, ab hæreticis occupatis, recuperandis, non paruum rerum omnium momentum præsidiumque esse allaturum. Quidquid autem in eo beneficii, quidquid auxilij contuleris; id erit nobis perinde gratum, ac si alicui ex nostris necessariis atque affinibus contulisses. facies prætereà rem summoperè Deo gratam: qui enim fratrem suorum solatio destitutum recipit, afflictum erigit, incoerentem consolatur;

solatur; is dubitare nullo modo debet, quin eius sibi gratiam conciliet, qui quod vni ex minimis suis factum sit, tamquam sibi factum, remuneraturum sese pollicitus est. Hæc ideò pluribus ad te verbis scripsimus, non quia tuus erga viros fortes animus, voluntasque obscura nobis aut ignota sit; sed vt hanc commendationem nostram minimè vulgarem esse intelligeres. Datum Romæ apud S. Petrum sub annulo Piscatoris, die XII. Iunij, M. D. LXIX. Pontificatus nostri anno quarto.

EPISTOLA XXIII.

Concilij Tridentini Decreta in Auenionensi ditione obseruari curat. Vide lib. II. cap. v. Vitæ PII V.

Dilecto Filio Carolo Cardinali, Borbonio nuncupato, ciuitatis nostræ Auenionensis, nostro & Sedis Apostolicæ de latere Legato.

Dilecte Fili noster, salutem & Apostolicam benedictionem. Allatum est ad nos, in Legatione istâ nostrâ Auenionensi, quæ tuæ fidei vigilantiaque regenda à nobis commissâ est, sacrum Generale Tridentinum Concilium, neque antea obseruatum esse, & hoc tempore minimè obseruari: quâ de re, tum pro commissio nobis Apostolicæ seruitutis officio, tum pro nostro erga te amore, existimatio-

stimationisq̃ tuæ paternæ curâ solliciti, non potuimus non magnoperè commoueri. Quamuis autem nobis eximium tuum diuini honoris zelum recordantibus, prorsus incredibile videatur, te, in re Omnipotenti Deo tam acceptâ, tamq̃ue animarum saluti necessariâ, vlllo modo negligentem fuisse; tamen nostro ipsi Pastoralis sollicitudinis muneri deesse nolentes, circumsp̃ctionem tuam, quo maiori possumus animi studio, in Domino hortamur, vt, si ad hanc vsque diem Tridentini Concilij Decreta in istâ Legatione non obseruantur, des operam, vt ea in posterum fidelissimè ac diligentissimè, quemadmodum æquum est, & officij tui ratio postulat, obseruentur. Non modò tibi, cui Legationis istius gubernandæ munus præcipuè incumbit, sed etiam nobis, qui iam inde à Pontificatus nostri principio, omnes Christianos Catholicosq̃ue Principes, omnes item Venerabiles Fratres Episcopos nostros, accuratissimè per litteras ad id cohortati sumus, turpe esset, si in locis ditioni nostræ Ecclesiæ immediatè subiectis, Concilium non obseruaretur: quod tantis laboribus, tanto Catholicorum omnium Principum consensu celebratum est, quodq̃ue nos ab omnibus obseruari custodiriq̃ue iussimus. Proinde circumsp̃ctio tua, si quid in hac re hucusque aut negligentia cessatum, aut indulgentia peccatum est, corrigere festinet; ac si qui monitis tuis parere neglexerint, in eos sine vllâ personarum exceptione

animaduertas. Denique quæ Concilium ipsum decreuit, ea sic ad effectum perducere, atque etiam in vsum adducere studeas, vt tuam in hac re, sicut in ceteris quæ ad officium tuum pertinent, operam ac diligentiam, quemadmodum hucusque fecimus, laudare debeamus. Datum Romæ apud S. Petrum sub annulo Piscatoris, die xxv. Iunii, M.D.LXIX. Pontificatus nostri anno quarto.

EPISTOLA XXIV.

Ad rem Christianam in Brasiliâ benè curandam, Petrum Episcopum adhortatur. Vide lib. III. cap. v. Vitæ PII V.

Venerabili Fratri, Petro Episcopo sancti Saluatoris in prouinciâ Brasiliâ.

Venerabilis Frater, salutem & Apostolicam benedictionem. Etsi Fraternitatem tuam, in gubernando grege fidei suæ commisso, eam adhibere prudentiam ac vigilantiam existimamus, vt ad explendas officij sui partes, hortationibus admonitionibusque nostris non indigeat: tamen, quia & Ecclesiarum omnium curam ac sollicitudinem nobis ab Omnipotenti Deo commissam gerimus, & eos etiam qui in perfectæ virtutis stadio currunt, paternis nostris vocibus adiuuari posse credimus; idcirco te, quem tanto marium terrarumque spatio disiu-

disiunctum Christianæ charitatis vinculum & Pastoralis officij societas nobiscum coniungit, paterno primum debitæ salutationis officio prosequentes, studiosè in Domino hortamur, vt Neophytorum, qui recenter ad fidem nostram Catholicam, eorum cæcitatibus miserente Domino, conuersi sunt, paternam curam gerere velis: sic vt eos, & boni prudentisq̃ue Rectoris officio gubernatos, & fidelis sapientisq̃ue Doctoris disciplinâ institutos, ad cælestem patriam perducere possis. Illud quoque te curare volumus; vt, quantum in te est, gentem istam, & præcipuè eos, qui in fidem Christianam adiuuante Domino recepti sunt, à ferino victu atque cultu ad mitiores mores ciuilemque vitæ rationem reuocare contendas; eisq̃ue persuadere studeas, vt, relictâ eâ, cui assueri esse dicuntur, corporis turpi nuditate, conuenientem Christiano pudori, ciuiliq̃ue cultui, vestitum assumant. quod vt obtinere possis, nullum prætermittes eorum officiorum, quæ vel apud istius Prouinciæ Rectorem, vel apud alios quoscumque vtilia fore iudicaueris. Et quoniam te Deus Omnipotens in illis regionibus animarum Pastorem constituit, vnde multum asferre fructum possis; ideo diuini in hoc beneficiij gratiam recognoscens, iam munere tibi commissio diligenter vigila, terrenisq̃ue negotiis relictis, congregandarum in æterna ouilia animarum cælesti negotio incumbere. Sit in linguâ tuâ sermo, qui quasi gladius acutus vel

durissimos gentis istius ad Religionem Christianam animos perrumpere possit. Sit charitatis ardor in animo, ut in eorum numero esse merearis, supra quos igneas confedissee linguas legimus: verè enim supra nos igneæ resident linguæ, cum aut in Fratribus nostris, ab infidelitatis tenebris ad veritatis lucem traducendis, aut his qui traducti iam sunt, magis magisque indies instruendis, & in fide Catholicâ retinendis, laborantes, diuini Spiritus ardore incendimur. Creditum tibi Dominicum agrum, dum licet, fortiter exerce: semen tuum, dum tempus est, semina; certò sciens, te eorum quæ seminaueris fructum tempore suo esse percepturum: ut cum operæ tuæ beneficio, pestiferæ cæcitatæ caligine depulsâ, vera istic fides serenitatis suæ radios aperuerit, illud te ante Rēdemptoris nostri oculos cæleste præmium expectet, quod omnibus bonis fidelibusque Pastoribus in cælo repositum esse scimus. Datum Romæ apud sanctum Petrum sub annulo Piscatoris, die VI. Iulij, M. D. LXIX. Pontificatus nostri anno quarto.

EPISTOLA XXV.

Christianæ Religionis propagationem & cultum Gubernatori Brasiliæ commendat. Vide lib. III. cap. V. Vitæ PII V.

Dilecto

Dilecto Filio, nobili viro, Fernandez de Vasconcellos, prouinciæ Brasiliæ in partibus Indiarum pro Rege Portugalliæ Gubernatori.

Dilecte Fili, nobilis vir, salutem & Apostolicam benedictionem. Qui terrenis Regnis gubernandis, aut Prouinciis regendis, præpositi sunt, tantò propensiores esse debent, ad benè de Omnipotentis Dei cultu Religioneque Christianâ merendum, quantò maiorem præ ceteris hominibus hoc faciendi facultatem à Deo acceperunt; vt bonorum operum fructu, non solùm eorum, quibus seruiunt, Principum gratiam promereri, sed cælestis etiam Regni præmium accipere possint. Hanc benè de fide Catholicâ merendi voluntatem, quamuis Nobilitati tuæ, Deo adiuuante, minimè deesse arbitremur; ac propterea te sponte tuâ, ad omnia quæ inuandæ Religioni vtilia sunt exequenda, paratum esse putemus: tamen, quia paternæ vocis hortatio bonis mentibus semper aliquid adijcere solet; omnes eos, qui nuper istic ad Christi fidem conuersi sunt, & cuncta, quæ ad fidem Christianam siue propagandam siue retinendam; in istâ cui præes Prouinciâ pertinent, tibi vniuersè; eo quo maiore possumus animi nostri studio, diligenter agenda commendamus; hortantes Nobilitatem tuam, vt,

quotiescumque opportunum iuuandæ Religionis tempus adfuerit, id quod pro Dei laude, animarumque salute, istis locis exequendum erit, exequi ne differat. Illud autem in primis efficere stude; vt homines istius Prouinciæ, ac præcipuè illi, qui, abdicato à se cæcitatæ errore, Christianam veritatem, Deo miserante, cognouerunt, ferinum vitæ cultum deferentes, ad mansuetiorem viuendi modum, ciuilemque morum rationem, quantum fieri potest, per te traducantur; vtque, relictâ corporis hominibus Christianis indecorâ nuditate, conuenientem pudori Christiano victum vestitumque assument. In quo non solum, si quid huius rei causâ agendum fuerit, ne id prætermittere velis hortamur; sed etiam vt Venerabili Fratri nostro, istius Prouinciæ Episcopo, auxilium tuum impertias, ad hoc & cetera omnia exequenda, quæ officio suo istic exercendo vtilia fore iudicauerit, vehementer rogamus: vt & ipse in his rebus, quas pro animarum salute agendas suscepit, paratum sibi esse auxilium tuum, re ipsa intelligat; & tu boni operis fructum, æternæ vitæ præmium à Redemptore nostro merearis accipere. Datum Romæ apud S. Petrum sub annulo Piscatoris, die VI. Iulij, M. D. LXIX. Pontificatus nostri anno quarto.

EPISTOLA XXVI.

*Episcopi Verdunensis virtutem commendans, Pastoralis-
que muneris sui pondus ostendens, eius piis se preci-
bus apud Deum cupit subleuari, eiusque iudicium in
confirmatione collationis certæ Præbendæ comprobat.*

Venerab. Fratri nostro Episcopo Verdunensi.

Venerabilis Frater, salutem & Apostolicam be-
nedictionem. Opinionem quam de tuâ erga
Deum Omnipotentem singulari pietate, & in grege
fidei tuæ credito custodiendo vigilantia, non sine
causâ iam pridem animo conceptam habemus,
Epistola tua Kal. Iulij proximè ad nos scripta com-
probavit. in quâ mentis tuæ altitudinem humili-
tas sermonis declarat: quòd enim te nullius nomi-
nis & meriti hominem appellas, in eo illud Sapien-
tis verum esse ostendis (quod B. Gregorius Præ-
decessor noster ad Episcopum non tui dissimilem
cùm scriberet, ipse quoque vsurpauit) iustum vide-
licet priorem sui esse accusatorem. Quòd verò Pon-
tificatum nostrum laudatissimum atque integerri-
mum appellas, id ex eodem humilitatis tuæ fonte
manauit. Nos enim de illorum numero esse non re-
cusamus, qui, dum alleuarentur, deiectos esse se cog-
nouerunt; sed tamen perturbatissimis Reipublicæ
Christianæ temporibus, in hac, cui indigni præsi-
demus,

demus, omnium Ecclesiarum Principe ac magistrâ Ecclesiâ gubernandâ, quantulamcumque fortitudinem nostram ad Deum custodire conamur, tuisque & ceterorum Venerabilium Fratrum Episcoporum nostrorum, tui præsertim similium, orationibus adiuuari cupimus. Confirmationem verò eius collationis, quâ Ecclesiæ tuæ Præbendam dilecto Filio Magistro Ioanni, Doctori & Theologo Parisiensi, te contulisse scribis, quam à nobis postulas, non solum libenter concedimus, sed etiam in eâ re iudicium tuum vehementer probamus: scimus enim bono viro non nisi bonum placere potuisse; confirmaturi semper, quidquid à Fraternitate tuâ factum erit: quam nihil non iustè & sanctè facturam semper esse, pro comperto habemus. Omnipotens Deus te, charissime, pro nobis orantem custodiat. Datum Romæ apud sanctum Petrum sub annulo Piscatoris, die xv. Iulij, M.D.LXIX. Pontificatus nostri anno quarto.

EPISTOLA XXVII.

Episcopum Egitanensem, quod Clericorum Seminarium in Ecclesiâ suâ nondum instituerit, obiurgat, ad idque primo quoque tempore instituendum hortatur.

Venera-

Venerabili Fratri, Episcopo Egitanensi.

Venerabilis Frater, salutem & Apostolicam benedictionem. Eiusmodi est Decretum, quod à sacrosancto Tridentino Concilio de instituendis in vnaquaque Ecclesiâ Seminariis factum est, tantaque eius est tamque manifesta utilitas; ut Episcopi ipsi, si, quod eis à Concilio iussum est, ante Concilium sponte suâ fecissent, magnam sibi ab hominibus laudem, & ab Omnipotenti Deo tam boni operis mercedem promeriti fuissent. Cum verò idem Decretum, tanto postea, non solum Principum Catholicorum, quorum Legati Concilio illi adfuerunt, sed etiam Venerabilium Fratrum Coepiscoporum nostrorum, qui etiam interfuerunt, consensu factum sit; tantò magis ei ab Episcopis obtemperandum est, quantò grauior culpa est, rebus à Generali Synodo iussis eos non obtemperauisse, quàm quæ nondum decreta sunt, quamuis vtilia, omisisse. Id, quò verius esse cognoscimus, eò magis mirati sumus, te ad hanc vsque diem, quemadmodum audiuius, in Ecclesiâ tuâ Seminarium non instituisse. Quod si verum est; dolemus certè, eos à quibus obedientiæ exemplum ceteris tradi debuerat, tam segnes tamque negligentes ad obtemperandum tam salutari instituto fuisse. Itaque Fraternitatem tuam hortamur, ei que districtè etiam mandamus; ut memor officij sui, eiusque utilitatis,

quæ inde ad Ecclesiam suam peruentura est, eius executionem Decreti longiùs ne differat, cui eam iam pridem obtemperauisse oportebat. Caue ne exigui cuiusdam emolumentì cupiditas te impediat, quò minùs agas ea, quæ boni fidelisque Pastoris opera sunt: illud considerans, nos, quemadmodum nihil in hunc, in quem suscepti sumus, mundum intulimus, ita ex eo nihil esse exportaturos, præter ea sola, quæ benè aut malè in vitâ nostrâ gesserimus. Cogita Ecclesiastica bona tibi non ad dominium tradita, sed ad dispensationem esse commissa; tibi quæ, sicut & nobis, de illis rationem æterno illi Iudici reddendam esse; ante cuius oculos nihil absconditum esse potest. Putamus nos quidem, fraternis te nostris vocibus admonitum, præteriti temporis negligentiam, adhibitâ in instituendo tuæ Ecclesiæ Seminario celeritate, emendaturum: sed si à te in eâ re ampliùs cessaretur, prætermittere pro officij nostri ratione ea remedia non possemus, quæ tibi, ceterisque Fratribus Coepiscopis nostris in eâdem re negligentibus, fortasse displicerent; nobis tamen, quibus omnium Ecclesiarum sollicitudo incumbit, magis necessaria essent, quàm iucunda. Id ne nobis necesse sit facere, potes tu, Frater, obedientiæ celeritate prouidere: quod vt facias, te vehementer in Domino rogamus. Dátum Romæ apud S. Petrum sub annulo Piscatoris, die xxvi. Iulij, M.D. LXIX. Pontificatus nostri anno quarto.

EPISTO-

EPISTOLA XXVIII.

Cardinalem Borbonium, vt per fideles administros bellum contra hæreticos geri procuret, hortatur. Vide lib. II. cap. v. Vita PII V.

Dilecto Filio nostro Carolo Cardinali, Borbonio nuncupato, Auenionensi, nostro & Sedis Apostolicæ de latere Legato.

Dilecte Fili noster, salutem & Apostolicam benedictionem. Inter alia multa curarum onera, quibus in hoc Apostolicæ seruitutis fastigio constituti quotidie premimur, maximè nos solictos habet, istius à Christianissimo Rege pro Religione Catholicâ suscepti aduersus hæreticos belli cogitatio. quod quidem bellum ita administrari cupimus, vt quamprimum ex Christianissimi Regis nostræque sententiâ confectum, eo quo optamus exitu concludatur. Ad hoc obtinendum maximo te adiumento esse posse intelligimus; neque vt id facias rogandum esse, pro comperto habemus. Nota est enim nobis tua in Deum Omnipotentem pietas, & Religionis Catholicæ studium, & in Christianissimum ipsum Regem fides, quam in tantâ temporum varietate eandem ei semper præstitisti: sed tamen cum eiusdem belli exitus maiore nunc quàm adhuc fuit in expectatione esse videatur, no-

stra quoque de eo sollicitudo magis augetur, sicut nullas officij nostri partes à nobis prætermittas esse velimus. Quocircà, etsi eâ te prudentiâ præditum esse scimus, vt quæ cauenda sunt optimè dispicias; tamen animo ipsi nostro satisfacere volentes, circumspeditionem tuam paternè monemus, & in Domino hortamur; vt, si ex his, quibus Rex Christianissimus in administratione istius belli adiutoribus ac ministris vitur, aliquos esse senseris, qui suas priuatas rationes sequentes, de Religionis Catholicæ causâ adiuuandâ, Regisq̃ue Regniq̃ue incolumitate tuendâ, vnâ & mente & voce cum ceteris non consentiant, eis, vt à tam prauo incepto desistant; persuadere coneris; resistentes autem, & monitis tuis parère recusantes, pœnis etiam deterrendos cures. Vna est enim quæ omnibus rebus rectè administrandis maximè aduersetur, ministrorum ipsorum inter se discordia: quæ ne rebus istius Regni perniciem afferre possit, tuæ in primis partes sunt diligenter attendere, cuius consiliis & belli administratio, & Regnum istud maximâ ex parte gubernatur. Quod honoris quoque tui causâ facere debes: ad te enim istius Regni Religionisq̃ue Catholicæ conseruatae laus præcipuè est peruentura. Hoc idem etiam Omnipotenti Deo debes, cuius violatae Religionis agitur causa: hoc eius Ecclesiæ, cuius honorabile membrum es: hoc vniuersæ Reipublicæ Christianæ, cuius in vno istius belli exitu, prospero
vel

vel aduerso, salus vel exitium continetur. Quocir-
cà dare te operam maximè conuenit, vt communi
saluti, Deiſque Omnipotentis Religioni, ſummo-
perè periclitanti, concordibus omnium regionum
miniſtrorum animis ſubueniatur. Quod vt facias,
noſtramque de rerum iſtarum proſpero ſucceſſu
animo conceptam iam pridem ſpem, ne deſtitui pa-
tiaris, vehementer rogamus. Datum Romæ apud
S. Petrum ſub annulo Piſcatoris, die primo Au-
guſti, M.D.LXIX. Pontificatus noſtri anno quarto.

EPISTOLA XXIX.

*Bellum in hæreticos per concordēs fidelesque viros pro-
bè adminiſtrandum procurat.*

Dilecto Filio noſtro Carolo, tituli S. Apolli-
naris Preſbytero Cardinali, à Lotharin-
giâ vocato, noſtro & Sedis Apoſtolicæ
Legato.

Dilecte Fili noſter, ſalutem & Apoſtolicam
benedictionem. Quantoperè cupiamus bel-
lum iſtud, quod chariſſimus in CHRISTO Filius
noſter Rex Chriſtianiſſimus, pro ſalute ſuâ & inco-
lumitate Regni, & pro Religione Catholicâ, ad-
uerſus hæreticos Regni ſui rebelles, non minùs piè
pro Omnipotenti Deo, quàm pro ſe ſuiſque vtiliter
ſuſceptum gerit, ſic adminiſtrari, vt aliquando, ad-

iuuante Deo, ex sententiâ nostrâ conficiatur; vel ex eo intelligere potuisti, quòd, quantum vires nostræ suffecerunt, nihil prætermisimus earum rerum, quibus id facilius celeriusque obtineri possit. hoc autem tempore, quo eiusdem belli exitus maiore videtur esse in expectatione, ita animum nostrum rerum istarum paterna cura sollicitauit, vt nullas officij nostri partes sine magnâ culpâ videamur posse relinquere. Itaque etsi te, non minùs quàm nos, de rebus istius Regni sollicitum, omnia & diligenter circumspicere, & prudenter cauere, putabamus; tamen ipsi animo nostro satisfacere volentes, circumspeditionem tuam vehementer in Domino hortandam esse præuidimus: vt, si qui fortè (quod absit) sint eorum, quibus in isto bello administrando Rex Christianissimus adiutoribus ac ministris vtitur, qui priuatas quascumque ob causas, de Religionis Catholicæ defensione, Regisque salute cum eâ coniunctâ, vnâ & mente & voce cum ceteris benè de eisdem rebus sentientibus non consentiant; his tu primum quidem, ne à ceterorum sententiâ discrepare, aut priuatas suas rationes publicæ vtilitati anteponeere velint, persuadere coneris: deinde resistentes, & monitis tuis obtemperare recusantes, coërcendos puniendosque cures. nihil enim rebus istis benè atque vtiliter administrandis magis obesse potest, quàm ministrorum ipsorum inter se discordia; quæ rebus facilibus & expeditis moram & impedimen-

tum,

tum, difficilibus atque impeditis, cuiusmodi istæ sunt, detrimentum ac perniciem asferre solet. In hoc fungendo officio, nullius quàm tuas potiores esse partes videmus; cuius consiliis & Rex ipse Christianissimus potissimum nititur, & istius Regni res maximâ ex parte gubernantur. Debes hoc prætereà Religionis Catholicæ causâ, debes Ecclesiæ, debes nobis atque huic Sedi Apostolicæ, cuius honorabile membrum es: debes denique tibi; nemo est enim omnium, ad quem seruati istius Regni Religionis-que Catholicæ, maior quàm ad te, laus peruentura sit. Vides prætereà pro tuâ prudentiâ, istius belli exitu, vel prospero vel aduerso, non solum istius Regni, sed etiam totius Reipublicæ Christianæ, salutem vel exitium contineri. Proinde dare te operam oportet, vt concordibus omnium Christianissimi Regis ministrorum animis, salutis publicæ, Deique Omnipotentis honori, tantoperè periclitanti subueniatur. Quod te quidem neque antea vquam prætermisisse, neque in posterum prætermisurum esse, pro comperto habemus; sed tamen circumspeditionem tuam rogamus, vt quam de rerum istarum prospero successu spem bonam concepimus, eam, quantum in se est, conseruare atque etiam augere ne desistat. Datum Romæ apud sanctum Petrum sub annulo Piscatoris, die primo Augusti, M. D. LXIX. Pontificatus nostri anno quarto.

EPISTOLA XXX.

Clericorum Seminarium ex Tridentini Concilij Decreto ritè institui præcipit : idque ad Christianæ Reipublicæ salutem, Ecclesiæ utilitatem pertinere ostendit.

Dilectis Filiis, Decano & Capitulo Ecclesiæ Elborensis.

Dilecti Filij, salutem & Apostolicam benedictionem. Cùm Venerabilem Fratrem nostrum, istius Ecclesiæ Archiepiscopum, de instituendo in suâ Ecclesiâ Seminario, nuper per litteras nostras hortaremur (quod quidem Seminarium, ex sacri Tridentini Concilij Decreto, iam pridem institutum esse oportebat,) faciendum esse existimauimus, vt eodem tempore, vos quoque de tam utili, tamque Deo Omnipotenti accepto opere adiuuando moneremus. Scitis enim instituendorum Seminariorum eam esse rationem, vt, nisi qui in Capitulo Diœcesi que sunt, vnà cùm Archiepiscopo vel Episcopo suo eâ de re consentiant, difficilis admodum sit eorum institutio : Episcopum autem eosque qui sub illius regimine continentur, cùm semper conuenit beneuolentiâ se mutuâque charitate complecti, tum præcipuè de his quæ ad Ecclesiæ utilitatem pertinent, decet esse concordēs : vt communi consensu, quæ in rem Ecclesiæ sunt, sedulò prouidean-

uideantur; quæ autem nocitura sunt, prudenter caueantur. Quid enim aliud est, vos necessariam ad instituendum Seminarium impensam recusare, quàm priuatim cupiditati vestræ seruire, ipsius autem Ecclesiæ vtilitatis nullam rationem habere velle? Quòd si hoc vobis placet, placeat etiam nullam esse apud vos, qualem Tridentinum Concilium esse voluit, puerorum sanctam religiosamque institutionem; placeat, vestros Clericos, reliquosque Sacerdotes indoctos atque illiteratos esse: quod quantoperè Ordini Sacerdotali turpe sit, neminem esse vestrùm qui ignoret existimamus. Itaque vos, pro officij nobis ab Omnipotenti Deo commissi ratione, monemus, hortamur, &, quatenus opus sit, vobis mandamus, vt ad instituendum in Ecclesiâ istâ Seminarium, Archiepiscopo vestro opem auxiliumque vestrum præstetis; detisque operam, vt tam sanctum tamque vtile opus pro parte vestrâ quamprimùm perficiatur. In quo si officio ipsi vestro vobisque satisfacere velitis, illud curare debebitis, vt præteriti temporis negligentiam executionis celeritate corrigatis. Datum Romæ apud S. Petrum sub annulo Piscatoris, die IX. Augusti, M.D.LXIX. Pontificatus nostri anno quarto.

EPISTOLA XXXI.

Catholicæ religionis studium Episcopo Zagabriæ gratulatur; atque ut Pastoralis curæ munera diligenter obeat, hortatur.

Venerab. Fratri, Georgio Episcopo Zagabriæ.

Venerabilis Frater, salutem & Apostolicam benedictionem. Christianæ charitatis affectus, Pastoralisque seruitutis commune nobis cum Venerabilibus Fratribus & Episcopis nostris vinculum, non finit nos expertes esse eius lætitiæ, quam de illorum virtute conceptam, animo percepimus. Itaque cum de tuâ eximiâ in Deum Omnipotentem pietate, Religionisque Catholicæ studio, ac diuini honoris zelo, multa constanti plurimorum famâ ad nos allata essent; faciendum esse existimauimus, vt non solum quantoperè hæc nobis grata accidissent, tibi significaremus, sed tibi quoque de eis gratulareretur. Vera autem gratulatio est, quam non præsentis temporis aut necessitas temporalis extorquet, aut terrena commendat vtilitas; sed quæ de sanctis bonisque operibus suscepta, cælestis mercedis gloriam sibi propositam habet. Quòd enim in gubernando custodiendoque grege, fidei tuæ ab Omnipotenti Deo commissio, eam prudentiam vigilantiamque adhibes, vt bonorum operum tuorum fama,

ma, istis Pannonici Regni finibus non contenta, huc ad nos vsque perferatur, hoc gaudendum esse in Domino cognoscimus. Itaque gratias agimus Redemptori nostro, qui inter cetera pietatis suæ dona, ita Fraternitatem tuam Catholicæ Religionis amore incendit; vt quidquid ad eius conseruationem propagationemque pertinere cognoscit, id & diligenter & alacriter exequi non desistat. Quamuis autem eum, qui, adiuuante Deo, ita sit animatus, superuacuum videatur esse magis hortari: tamen, quia te, inter ceteras tuas virtutes, fraternæ quoque hortationis verba libenter suscipere existimamus; idcirco hortamur, vt quam ingressus es ad cælum ferentem viam, ab eâ ne iter tuum deflectas, donec eò quò contendis peruenias. Sit Clero populoque tibi commissio, vitæ tuæ sanctitas, regula atque norma, ad quam actiones moresque suos vterque studeat conformare. Mali vitiorum pœnam, boni virtutum præmium, sibi à te expectandum esse intelligant. Hæreticorum venena ne gregem tuum inficiant, quantâ potes diligentiam contende. Quominus ea semper agas, quæ Deo beneplacita sunt, nullius te hominis metus deterreat. Nemo mercedem tuam euacuet. A nobis autem omnia fraternæ charitatis indicia semper expectato. de quâ nostrâ erga te propensione, cum hoc dilecto Filio, Francisco Dietaleuio, copiosius egimus; qui tibi has nostras litteras reddet, cui fidem habebis. Datum Romæ

apud sanctum Petrum sub annulo Piscatoris, die
 XI. Augusti, M. D. LXIX. Pontificatus nostri an-
 no quarto.

EPISTOLA XXXII.

*Nitriæ Episcopi in Pastoralis munere strenuè obeundo di-
 ligentiam collaudat; ipsumque, ut in ea quod cœpit,
 sedulo perseveret, graviter hortatur.*

Venerabili Fratri, Paulo Nitriæ Episcopo.

Venerabilis Frater, salutem & Apostolicam be-
 nedictionem. Redemptori nostro gratias
 agere debemus, quòd de tuo diuini honoris zelo, de
 tuâ in custodiendo grege tibi credito vigilantia, sin-
 gularique in Deum Omnipotentem pietate, magis
 magisque indies ad nos perferuntur, quæ animum
 nostrum multis curarum oneribus laborantem ma-
 gnâ ex parte recreare valeant. Quâ in re verum esse
 illud experti sumus, bonorum opinionem, quasi vn-
 guenti odorem, ad longinquos etiam populos ma-
 nare: neque enim sacerdotalis tuæ virtutis laus istis
 Pannonici Regni finibus contineri potuit; sed ad
 remotiores populos, atque ad nos quoque peruenit:
 quos procul ab istis terris positos, non tamen à te,
 locorum longinquitas disiunxit. Quòd verò in ip-
 so propè infidelium conspectu positus, atque inter
 hæreticorum multiplices laqueos collocatus, Eccle-
 siæ

sic tuæ officium, quod debes, præstas, gregemque tuum, quantum potes, à luporum insidiis custodis, hoc perfectæ virtutis signum est: quamvis enim nullibi malos inueniri, sed vbiq̃ue bonos esse expectandum sit; tamen boni ipsi, si sine malis fuerint, perfectè boni esse non possunt: ipsa enim malorum admistio, quid aliud quàm purgatio bonorum est? Quocircà debitum tibi fraternæ nostræ salutationis officium persoluentes, Fraternitatemque tuam debitis in Domino laudibus prosequentes, hortamur, vt eum, quem cœpit, pietatis cursum constanter teneat, & vsque ad perfectum diem crescere non desistat; vt, quamdiu Dei voluntate in hoc cælestis exilio patriæ detinetur, tandiu bonorum operum agere merita non desinat: sic enim in remunerationis die, tantò insignius erit gloriæ præmium, quantò hîc maius laboris studium fuerit. Clerum populumque tuum, quemadmodum in Dei timore viuere debeat, tuorum morum tuæque vitæ in primis exemplum instituat. Totâ mentis contentione lucrum animarum Omnipotenti Deo facere festina. Malorum prauitatem compesce, bonorum operum studiosos confirma: incipientes hortationibus paternisque monitis excita. Denique, quod de vniuersali Ecclesiâ dictum est, panem otiosus non comede. De nobis autem volumus, te omnia tibi fraternæ charitatis indicia polliceri, quemadmodum dilectus hic Filius Franciscus Dietaleuius, qui tibi

has nostras litteras reddet, copiosius explicabit, cui fidem habebis. Omnipotens Deus te, charissime Frater, pro nobis orantem custodiat, & ad cælestia regna perducatur. Datum Romæ apud S. Petrum sub annulo Piscatoris, die XI. Augusti, M. D. LXIX. Pontificatus nostri anno quarto.

EPISTOLA XXXIII.

Sedulam Episcopi Agriæ operam in Pastoralis officio egregiè præstando commendat; atque, ut benè cœpit, pietatis cursum teneat, animarumque sibi commissarum saluti diligenter consulat, hortatur.

Venerabili Fratri, Antonio Episcopo Agriæ.

Venerabilis Frater, salutem & Apostolicam benedictionem. Impulit nos singularis tua in Deum Omnipotentem pietas, & eximius Catholice fidei zelus, atque in custodiendo grege tibi credito vigilantia, quæ multorum fide dignorum sermonibus ad nos perferuntur, ut has ad te litteras, fraterni erga te amoris nostri indices, dandas esse existimarem: quibus non modò hæc, quæ agis, gratissima nobis esse intelligeres, sed etiam de tot tantisque donis, in te à Redemptore nostro collatis, tibi gratularemur. Magnum est Dei beneficium, si Episcopus quocumque loco positus, Ecclesiæ suæ, ad Dei gloriam, animarumque sibi creditarum salutem,

lutem, præesse sciuerit: qui verò in ipso propè infidelium conspectu, atque inter hæreticorum insidias quasi scorpiones locatus, Ecclesiam suam ita moderatur & regit, vt, quantum fieri potest, eam & à luporum fraudibus defendat, & bonorum operum exemplis doctrinâque salutari pascere studeat; hunc virum perfectâ quadam cælestique virtute præditum esse oportet. Quò magis te, quem & hæc & alia multa, quæ in rem Ecclesiæ tuæ sunt, præstare accepimus, magnis debitisque in Domino laudibus prosequendum esse cognoscimus, atque prosequimur; hortantes Fraternitatem tuam, vt, quod à Sapiente de iustorum semitâ dictum est, eam videlicet quasi lucem splendentem procedere, id tu virtutis tuæ perseuerantiâ comprobes, teque præsentibus non contentum meritis, semper ad vltiora extendas. Sit vita tua Clero populoque fidei tuæ commisso, tamquam exemplar quoddam sanctitatis, ad imitandum proposita: te non minùs mali timeant, quàm boni diligant: alteri te mansuetum, alteri seuerum cognoscant. Nullius te hominis aut metus aut auctoritas, ab eo quod bonum honestumque est, detertere valeat. Esto de animarum lucro sollicitus: pietatem, hospitalitatem, misericordiam sectare: terrena mundanaque contemne, vt ad cælestia atque æterna peruenire merearis. De nobis autem fac ista existimes, nullum esse tam eximium nostræ erga te fraternæ charitatis testimonium, quod
virtu-

virtuti isti tuæ deberi non existinemus; quemadmodum dilectus hic Filius, Franciscus Dietaleuius, copiosius exponet, qui tibi has etiam litteras nostras reddet: quem & libenter vidimus, & ea quæ nobiscum locutus est, eâ quâ decuit benignitate cognouimus; ei que fidem habebis. Datum Romæ apud sanctum Petrum sub annulo Piscatoris, die XII. Augusti, M.D.LXIX. Pontificatus nostri anno quarto.

EPISTOLA XXXIV.

Palatino Siradiæ ad Catholicæ Religionis cultum conuersionem gratulatur; atque vt in suscepto veræ pietatis consilio persistat, & alios ab erroribus ad rectam salutis viam reuocare studeat, hortatur. Vide lib. III. cap. XII. & lib. IV. cap. XIII. Vitæ PII V.

Dilecto Filio, nobili viro, Alberto Palatino Siradiæ.

Dilecte Fili, nobilis vir, salutem & Apostolicam benedictionem. Certiores facti ex litteris dilecti Filij Vincentij Portici, nostri & Sedis Apostolicæ apud Serenissimum Poloniæ Regem Nuntij, te, adiuuante Deo, relictis publiceque abiuratis hæreticæ prauitatis erroribus, Catholicæ Fidei veritatem agnouisse, ab eodemque Nuntio, vnitati fidelium, Sacramentisque Ecclesiæ, restitutum esse; præterire nullo modo potuimus, quin has ad te litteras nostras daremus,

remus, quibus & tibi de tanto diuinæ misericordiæ munere gratularemur, & nostram eâ de re conceptam in Domino animi lætitiâ significaremus. Et quidem si verè in Domino gaudere lætarique volumus, iis maximè de rebus gaudendum lætandumque nobis esse, de quibus in cælo (in quo perfectum gaudium habitat) vel ipsius Redemptoris nostri testimonio gaudere solent Angeli, compertum habemus. Quis enim aut fidelis Pastor, inuentâ quæ perierat oue, amicis vicinisque suis conuocatis, non summopere gaudeat; aut bonus Pater, redeunte domum filio, qui peregrè profectus erat, peccasseque se in cælum & coram eo confitente, adducto vitulo saginato splendide & magnifice non epuletur, gaudiumque suum symphonîâ chorisque non testetur? Nec verò dubitare debes, dilecte Fili, Romanam hanc omnium Ecclesiarum Magistrain Ecclesiam, cui nos indigni præsidemus, tuam & omnium Christi fidelium Matrem, tanto de tuâ ad se reuersione gaudio exultare, quanto ob tuum à se olim discessum in ærore affecta fuerat. Quocirca te, qui illi ac nobis tantæ auctor es lætitiæ, quibus satis dignis laudibus prosequamur, non facile reperire possumus: non enim te ipsum solum animamque tuam saluam fecisti; sed aliis quoque nobilibus illustribusque in isto Regno viris, quid faciendum sit, exemplo tuo ostendisti. Quis enim, Alberto Laschio, Si-

radia Palatino, viro non minùs nobilitate, quàm

virtute insigni, omnibus animi corporisque bonis ornatissimo, publicè, vt par fuit, Dominum Redemptoremque nostrum confitente, hæreticamque prauitatem detestante, id facere erubescat; quod ipse fecit, qui tantam sibi tamque insolitam laudem ab omnibus Christi fidelibus est consecutus? Quamuis autem pro certo habeamus, Omnipotentem Deum, quo adiuuante resipuisti, tibi in fidei Catholicæ confessione constanter perseueranti, eâdem quâ cœpit misericordiâ semper affuturum: tamen, vt ipsi nostram de salute tuâ sollicitudinem paternam tibi significemus, & commissõ nobis ab Omnipotenti Deo officio fungamur; te non solùm ad eandem Catholicam fidem, quam nuper tantâ cum tuâ laude professus es, firmiter retinendam, perpetuoque amplectendam hortamur; sed ad alios quoque, qui ab eâ errauerunt, ad eam, quantum facere potes, verbis & bonorum operum exemplis reuocandos, excitamus: vt quam à Deo misericordiam consecutus es, eandem proximis tuis in eodem, quo tu aliquando fuisti, cæcitatibus errore versantibus, impendas. quod quidem te facturum esse non dubitauimus; sed hac nostrâ paternâ adhortatione, eius rei desiderium nostrum testificari volumus. Omnipotens Deus te, dilecte Fili, custodiat, tibi que quotidie magis gratiam suam augeat. Datum Romæ apud S. Petrum sub annulo Piscatoris, die xx. Augusti, M.D.LXIX. Pontificatus nostri anno quarto.

EPISTO.

EPISTOLA XXXV.

Beneficiorum vacaturorum reservationes, & plura Beneficia cum animarum curâ obtinendi ac non residenti facultatem dari non licere. Vide lib. III. cap. X. Vita PII V.

Charissimo in CHRISTO Filio nostro, Sigismundo Augusto, Regi Poloniæ Illustri.

Charissime in CHRISTO Fili noster, salutem & Apostolicam benedictionem. Pluribus Maiestatis tuæ litteris, quas non vnis neque diebus neque mensibus datas, eodem ferè tempore accepimus, rerum ipsarum potius quàm litterarum suarum ordine seruato, respondebimus. Et primùm, quod de Beneficiorum animarum curam non habentium reservatione dilecto Filio Simoni Præposito Miechouiensi concedendâ ad nos scribit; Maiestati tuæ persuasum esse volumus, nos & nostræ erga illam paternæ beneuolentiæ, & suæ maiorumque suorum inclytæ memoriæ Regum erga nos sanctamque hanc Sedem obseruantia, tantum tribuere, vt in Beneficiis quæ vacare contigerit conferendis, magnam semper suæ non solum commendationis, sed etiam voluntatis rationem simus habituri: Beneficiorum verò vacaturorum reservationes, toto Pontificatus nostri tempore, neque cuiquam

concessimus, neque concedendas esse arbitramur; quòd eas, saluâ conscientiâ, concedi non posse pro comperto habemus. Quod verò aliis litteris Maiestas sua à nobis petit, & quod semel de pluribus Beneficiis obtinendis, & de non residendo, à felic. record. Pio I V. Prædecessore nostro, & à nobis ipsis, Gnesnensi Prouinciæ, ad certum finitumque tempus (quod præteriisse dicitur) indultum est, id vt iterum prorogare atque indulgere velimus; hoc postulatum eiusmodi est, vt in eo Maiestati tuæ, saluâ conscientiæ nostræ securitate, satisfacere nullo modo amplius possimus. Nam præterquam quòd his rebus, quæ temporis causâ indulgentur, adhiberi modum æquum est; illud prætereà nobis videntum est, ne quid contra animarum nobis ab Omnipotenti Deo commissarum salutem cuiusquam rogatu indulgeamus. Quomodo enim animarum saluti à nobis consulitur, si eos quos Deus Pastores curatoresque earum constituit, à proprii gregis curâ longè abesse non modò patimur, sed etiam concedimus? nam plurium obtinendorum Beneficiorum facultatis concedendæ eadem ratio esse videtur, vt nec sine animarum perniciæ, nec sine Ecclesiarum seruitutis detrimento, concedi possit: aut enim curam animarum habent, quæ, pluribus vni eademque homini Beneficiis mandandis, proptereà negligitur, quia vnus pluribus rectè fideliterque regendis Beneficiis par esse non potest; aut residen-

tiam

tiain seruitutemque exposcunt, quæ pluribus adhiberi locis eodem tempore non potest. In Beneficiis autem simplicibus, quæ neque curam animarum gerunt, neque residentiam exposcunt, Maiestati tuæ satisfacere volumus: cui etiam de reuocando suo beneplacito circa Decanatum Plocensis Ecclesiæ gratificamur; nostramque ad Maiestatis tuæ voluntatem, vt scribit, benignè accommodamus; sperantes eum iuuenem, cui Maiestas tua prædictum contulit Decanatum, adiuuante Deo, talem perpetuò fore, qualem esse ad nos scripsit. Sequitur nunc, vt Maiestati tuæ de Æmilio Maluetio respondeamus; cuius nobis causam, quam aduersus Fucaros habet; diligentissimè commendauit. quæ quidem Maluetiorum familia apud nos quoque eo loco eaque estimatione est, quâ esse debet, & quâ illam apud multos Principes esse scimus; cuius etiam nonnullorum operâ vsi sumus, atque vtinur in his copiis, quas ad charissimum nobis in CHRISTO Filium Francorum Regem Christianissimum auxilio misimus, in bello, quod aduersus hæreticos Regniq̃ue sui rebelles gerit. Sed quod de ipsius Æmilij causâ speciatim ad nos scribit, pro certo habeat Maiestas tua, nos, vt par est, iustitiam tantoperè ab Omnipotenti Deo his qui iudicant commendatam, sic diligere, vt ea apud nos nullius egeat commendatione. Quod reliquum & extremum est, dilectum Filium Stanislaum Canonicum Cracouiensem, quem

à secretis suis Maiestas tua Neapolim ad res suas agendas misit, cum ad nos venisset, & libenter vidimus, & quæ nobis suo nomine retulit, eâ quâ decuit benignitate cognouimus; pro nostro erga Maiestatem tuam amore paterno daturi semper operam, ut quibus rebus cum Domino poterimus, Maiestatis tuæ desideriis semper satisfaciamus. Datum Romæ apud S. Petrum sub annulo Piscatoris, die III. Septembris, M. D. L X I X. Pontificatus nostri anno quarto.

EPISTOLA XXXVI.

Super pluribus Ecclesiasticis Beneficiis obtinendis & residentia dispensare recusat; & ut terrena despicientes, ad celestia & æterna bona respiciant & aspirent, Poloniae Episcopus hortatur. Vide lib. III. cap. X. Vitæ PII V.

Venerabilibus Fratribus, Iacobo Archiepiscopo Gnesnensi, Legato nato, Regni Poloniae Primati, & reliquis eiusdem Regni Episcopis Lublini in Comitibus congregatis.

Venerabiles Fratres, salutem & Apostolicam benedictionem. Litteras vestras XVI. Iunii Lublini datas accepimus; quibus à nobis postulavistis, ut cum Ecclesiarum vestrarum Clero super pluribus

pluribus Beneficiis non obtinendis, & super residentia (quæ duo nuper sacrosancti generalis Tridentini Concilij Decretis sancita sunt) Apostolicâ auctoritate vel dispensare, vel eorundem Decretorum executionem in longius tempus differre velimus. Quibus quidem vestris postulatis, saluâ conscientiam nostrâ, satisfacere non possumus, ob eas causas, quas ad Serenissimum quoque Regem vestrum scripsimus; qui eadem de re diligentissimè nobiscum per litteras egit. Earum autem causarum summa hæc est, quod & in his, quæ temporis causâ semel ad certum finitumque tempus indulta sunt, adhiberi modum decet, ne res in infinitum serpat: & nos pro commissâ nobis ab Omnipotenti Deo animarum omnium sollicitudine, diligenter attendere debemus, ne quid contra earum salutem atque utilitatem concedamus: cuius nos rei culpam certè non effugeremus, si hæc, quæ à nobis petitis, vobis concedenda esse iudicaretur. Quocirca Fraternitates vestras vehementer in Domino hortamur, vt sui officij memores, rerumque terrenarum curam remittentes, ad cælestia & æterna respiciant atque aspirent. Considerate, hominibus Sacerdotibus, quorum vita ceteris ad benè viuendum tamquam exemplar quoddam proposita esse debet, nihil minùs quàm rerum fragilium & caducarum cupiditatem conuenire. Si enim animus vester ibi est vbi esse debet; non humana, neque ea quæ hîc apud nos sunt,

sunt, sed cælestia, & quæ sursum sunt, sapere debetis. nam, si quæ vobis laborum præmia in cælis reposita sunt, diligenter attendetis, omnia ea quæ in terris quæritis, præ illis vilia existimabitis. Inardescat ergo animus vester ad ea quærenda quæ verè bona sunt: ne, dum bonorum vmbra sectamini, solida & sincera bona amittatis. Estote potius de vestris animabus, quàm de terrenis commodis, Fratres, solliciti, & commisso fidei vestræ gregi vigilantiam quam debetis impendite: cupiditati & ceteris occultis aduersarij nostri fraudibus & suggestionibus resistite: Omnipotenti Deo populum, cui præestis, resignate; vt commissum vobis Sacerdotale officium, ante Iudicis æterni conspectum, non ad pœnam, sed ad coronam proficiat. Hæc vobis scripsimus, non solum animarum vestrarum saluti pro commisso nobis munere prouidentes, sed etiam nobis ipsis, Omnipotentis Dei iudicium pertimescentes; vt vno eodemque tempore, hoc nostro erga vos fraterno officio, vestræ nostræque saluti, sicut decet, consuleremus. Datum Romæ apud S. Petrum sub annulo Piscatoris, die III. Septembr. M. D. LXIX. Pontificatus nostri anno quarto.

EPISTOLA XXXVII.

Antonium Posseuinum Iesuitam à calumniis vindicat.

Venerabili Fratri nostro, Fabio Episcopo Calatino, nostro & Sedis Apostolicæ in Galliâ apud Regem Christianissimum Nuntio.

Venerabilis Frater, salutem & Apostolicam benedictionem. Quidam peruersitatis filij, suggerente diabolo Christiani nominis hoste, superioribus diebus improbissimum rumorem Auenione fusè dissipauerunt, Antonium Posseuinum Iesuitam, sermonibus, quos, dum hîc esset, variis de rebus ad Religionem pertinentibus nobiscum habuisset, duo nobis persuadere conatum fuisse: primum, vt in Auenionensi ciuitate noua Inquisitionis hæreticæ prauitatis ratio ad Hispaniæ modum introduceretur; alterum, vt Sodalitates illius ciuitatis, quas vocant Disciplinantium, abolerentur. Tertium adiecerunt, eundem nobis multos de hæresi suspectos indicasse. Quæ omnia falsa, & ad perniciosissimam hominum libidinem, ad excitandos tumultus conficta, non satis habuerunt Auenione in vulgus proferre, sed & eadem per totam ferè Galliam, & aulam quoque Regiam, vt accepimus, sparserunt; hominemque pium, nec minùs vitæ sanctitate quàm doctrinâ præstantem, eò redegerunt,

E c

vt

vt aliquibus istius Regni ciuitatibus satis tutò se committere non possit. Quo quidem nos & hominis incommodo, & rei indignitate permoti, non solum, vt quantum in nobis est, ab huiusmodi illum infamiâ liberaremus, sed etiam vt veritati testimonium pro nostro Pastoralis officio perhiberemus, has ad te nostras litteras dandas existimauimus: quibus Fraternitati tuæ significaremus, tantum abesse, vt prædictus Antonius Posseuinus quidquam carum rerum, quæ sibi ab hominibus, vel hæreticis, vel inuidiosis, vel seditiosis, certè improbis, obijciuntur, nobis persuadere conatus sit; vt pro certo habeamus, illum de his rebus ne cogitasse quidem, nedum nobiscum aliquid egisse. quod non solum ad dilectum Filium nostrum Georgium Cardinalem Armeniacum, Cardinalis Borbonij in Legatione Auenionensi collegam, scripsimus; sed etiam ad ipsos Auenionenses Consules, cum eorum litteris, eadem de re ad nos scriptis, responderemus, eosque & ipsum Cardinalem ad inquirendos eiusdem falsi rumoris auctores puniendosque hortati sumus. Hæc ad te scribere volumus, vt, cum à nobis id quod verum est didicisses, calumniatorum falsitatem tutius redarguere, hominemque pium, & in vineâ Domini diligenter pro suâ parte laborantem, ab inuidiâ falsi criminis vindicare nostrarum litterarum testimonio possis. Quod te, quantum in te est, facere volumus. Datum Romæ apud S. Petrum sub annulo

nulo Piscatoris, die XI. Septembris, M. D. LXIX.
Pontificatus nostri anno quarto.

EPISTOLA XXXVIII.

Ecclesiæ Mediolanensis iurisdictionem, & Carolum Cardinalem Borromeum, eius Ecclesiæ Archiepiscopum, defendit. Vide lib. III. cap. XIV. Vitæ PII V.

Dilecto Filio, nobili viro, Gabrieli à Cueua,
Duci de Albuquerque, Status Mediolanensis Gubernatori.

Dilecte Fili, nobilis vir, salutem & Apostolicam benedictionem. Grauitur, nec minùs quàm rei magnitudo postulat, affecti sumus, ex eo quod de exitu controuersiae inter dilectum Filium Carolum Cardinalem Borromeum & Canonicos sanctæ Mariæ à Scala, antea quoque ad nos allatum, ex litteris Nobilitatis tuæ primâ die Septembris datis, etiam cognouimus, quibus de eâ re diligenter atque accuratè admodum ad nos scripsit. Id autem multas ob causas; primùm quidem, quia Cardinalatus dignitatem, nobis atque huic Apostolicæ Sedi coniunctissimam, ab hominibus Ecclesiasticis (qui eam ab aliis oppugnatam defendere ac reuereri debuerunt) contemptam dolemus. Deinde quia improborum hominum audacia (apud quos

hæ inter Ecclesiasticos homines discordiæ, præcipuè adiunctis vtrunque excommunicationibus, valdè secundis auribus accipiuntur) ex huiusmodi rerum euentu magis confirmatur, sic vt ad maiora quotidie audenda eis animus addatur; præsertim si summorum Principum vel gratiâ vel auctoritate tutos futuros esse sperare posse videantur. Vt interim illud taceamus, nullum tam honorabili Ecclesiæ membro contemptus detrimentum inferri potuisse, quod non eodem tempore ad nos sanctamque hanc Sedem redundaret. Oportebat quidem Canonicos, si quid pro Ecclesiæ suæ iure tuendo aduersus Cardinalem iuris habeant, cum eo non vi aut armis, sed aut iudicio, aut his quæ legibus constituta sunt remediis experiri: neque enim vel protestandi, vel aliæ iuris viæ illis deesse poterant. Quod eò magis facere debuerunt, quia, vt accepimus, Cardinalis visitandæ illius Ecclesiæ possessionem obtinet. Sed quoniam illi, Christiani nominis aduersario id ipsum ad perturbandam Ordinis Ecclesiastici concordiam suggerente, eò progressi sunt, quò, saluâ eorum modestiâ, ipsiusque Cardinalis dignitate, progredi non debebant; nos, pro commisso nobis ab Omnipotenti Deo officio, improbitatem hominum reprimere volentes, prætermittere sine culpâ non possumus, quin eosdem Canonicos, perinde ac meruisse videntur, iustâ correctione afficiendos curemus. quam quidem ad rem Nobilitatis tuæ auxilium,

lium, si opus fuerit, nobis defuturum non esse existimamus; tantum abest, ut eam alienæ culpæ à debitâ poenâ vindicandæ indulgere velle arbitremur. Quod autem ad ea pertinet, quæ inter Nobilitatem tuam, eundemque Cardinalem, controuersa sunt, breuî Nuntium nostrum istuc missuri sumus, qui nostram mentem, animique nostri sensum copiosius ei exponat; quæque istius Prouinciæ regimini non minus quam Iuri Ecclesiastico tuendo vtilia sunt, ad Nobilitatem tuam nostro nomine deferat. Quod verò ad eam litterarum tuarum partem pertinet, in quâ Cardinalem quasi pertinacem, & in consiliis suis præcipitem videri Nobilitas tua vult: quamquam verbis tuis eam, quam par est, fidem habeamus; tamen cum illius actiones atque consilia eius temporis recordamur, quo, viuentis felicitatis recordationis Pio IV. prædecessore nostro auunculo eius, Reipublicæ Christianæ atque Ecclesiæ negotia tractabat; nihil tale de illo nunc aut ipsi existimare possumus, aut tunc ab aliis existimatum esse intelleximus: si enim talis esset, fieri non potuisset, quin tam diuturni temporis spatio, quo rem Ecclesiasticam gubernauit, aliquod eius naturæ specimen dedisset. Illud quidem nobis durum videtur, cum Deus isti ciuitati Pastorem eâ quâ est morum integritate sanctitateque præditum dederit, qui nihil aliud quam animarum fidei suæ commissarum salutem quærit, qui vitia tollere, & mores deprauatos, quan-

tum in se est, corrigere conatur; ei tamen ab his qui ipsum diligere & magnificare debuerant, vitio illa dari, quæ tantum ab illo absunt, quantum ipse ab omni non modò vitio, sed vitij suspitione abest. Sed profectò illud verum est, quod ipsa Veritas Apostoli voce docuit, his omnibus, qui piè ac sanctè in Christo Domino nostro viuere volunt, paratas esse persecutiones: quarum tamen fructus dulcis est, & finis gloriosus, illis quidem, qui eas libenter pro eius nomine patiantur. Datum Romæ apud S. Petrum sub annulo Piscatoris, die x. Septembris, M.D.LXIX. Pontificatus nostri anno quarto.

EPISTOLA XXXIX.

Eundem Carolum Borromeum Cardinalem, Mediolanensem Archiepiscopum, in causâ Ecclesiasticæ iurisdictionis defendit; Ducemque, ut Ecclesiam illesam esse velit, hortatur. Vide lib. III. cap. XIV. Vitæ PII V.

Dilecto Filio, nobili viro, Gabrieli à Cueua,
Duci de Albuquerque, in Statu Mediolani
Locum-tenenti Regio.

Dilecte Fili, nobilis vir, salutem & Apostolicam benedictionem, & salubriora in Domino consilia. Ad ea, quæ duabus epistolis tuis die xxviii. Septembris datis ad nos scripsisti, ita respondimus,

debimus, vt Apostolicæ vocis nostræque personæ simul memores, posthabitâ omni contentione, necessaria tantum attingamus: reliqua enim in eisdem epistolis eiusmodi sunt, vt non tam diligenter excutienda, quàm paternâ quadam dissimulatione prætermittenda esse videantur. Nos enim quemadmodum Nobilitatem tuam verè & ex animo diligimus; sic quæ ad eam scripturi sumus, hæc non minus pro animæ suæ salute, quàm pro veritate iustitiæque tuendâ scripta esse volumus, atque vt talia Nobilitati tuæ probari vehementer cupimus; Deumque Omnipotentem oramus, vt cordi tuo aperiat, quanto hæc ad te paternæ charitatis ardore scripserimus. Et primum quidem ab eâ parte litterarum tuarum, in quâ de ipsius Cardinalis moribus & institutis tam multa scripsisti, responsionis nostræ initium ducentes, tibi verè constanterque affirmamus, nos, nisi illius vitam, mores, consilia, consiliorumque vias penitus cognitas haberemus; ex his quæ scribis, animo valdè suspensio atque incerto futuros fuisse: sed quoniam quò illius cogitationes actionesque omnes spectent, & quibus ad eas ministris adiutoribusque vratur, exploratissimum nobis est; in eam sententiam venire cogimur, vt hæc omnia antiquo illo Christiani nominis hoste callidè moliente excitata esse existimemus: cuius proprium est, concordiam oppugnare, cohiuncta dissociare, recta deprauare: qui cum, te mutuâ cum

Cardi-

Cardinali concordia coniuncto, quàm multa præclara egregiaque opera effici possent, iam inde ab initio prospexisset; inueteratæ malitiæ suæ non oblitus, omnia turbare ac miscere cœpit: tantò enim ille fraudis fallaciarumque vias subtiliùs exquirat, quantò Dei seruos cælesti patriæ inhiare ardentius cognoscit. sic Iudæos ipsos inuidiâ inductos in Domini Redemptorisque nostri athletas, per homines fallacibus insidiis deceptos, ad multiplicia tormenta nefariasque neces adduxit. Sed quemadmodum omnes impios illos conatus admirabilis quædam diuini consilij sapientia in ipsius consultoris caput vertit, suoque eum gladio iugulauit; sic cauere te oportet, qui inter homines viuus, ne per homines à callidissimo hoste tenteris, néve, quod Regiæ iurisdictionis tuendæ causâ rectè te facere nunc existimas, id occulto quodam diuinæ prouidentia consilio in eius potiùs exitium redundet. De causâ autem contra Canonicos Scalenses instituendâ & cognoscendâ, quod à nobis tantoperè contendis, dolemus rem esse huiusmodi, in quâ neque precibus, neque postulatis tuis, saluâ Sedis Apostolicæ vetere consuetudine, morem gerere possimus: apud quam ut causæ maiores cognoscerentur, semper obseruatum est; maior autem causa esse non potest quàm illa, in quâ Sanctæ Romanæ Ecclesiæ Cardinalis res agitur: quo Ordine nullus nobis & Sedi Apostolicæ coniunctior esse ab omnibus intelligitur. Nam quòd dilectus Fi-

lius

lius charissimi in CHRISTO Filij Regis Catholici apud nos Orator nobis litteras Apostolicas sub plumbo obiecit, quibus à felicis recordationis Leone X. prædecessore nostro decretum esse vult, ne istius Mediolanensis Prouinciæ causæ extra istam ditionem cognoscantur; id tamen, ut ille dicit, omnino ita esset, tamen cum rerum à Pontificibus prædecessoribus nostris pro temporum varietate concessarum moderatio ad nos pertineat; nihil nouum aut iniquum faceremus, si eisdem concessionibus (rerum præsentium conditione ita postulante) derogaremus. sed nullâ tamen derogatione in hac causâ opus est; eisdem enim Apostolicis litteris, non solum Cardinalium causâ, qualis hæc est, sed etiam beneficiales liquidissimè excipiuntur. Quod verò eisdem litteris Nobilitas tua minatur, se iurisdictionis Regiæ tuendæ causâ, Cardinalem ipsum non modò e ciuitate, sed etiam ex istâ Mediolanensi ditione esse eiecturam: quamquam ad hoc ipsum quid iustè & pro æquitate respondeamus, nobis deesse non possit; tamen, ceteris omissis, pro nostrâ paternâ in te beneuolentiâ illud te tantummodò monemus, ut etiam atque etiam videas quid agas, nè sciens ac prudens eò progrediaris, vnde tibi postea nullus aut difficilis admodum reditus pateat. Caue ne, quod tuendæ Regiæ iurisdictionis causâ tibi faciendum putas, cuius nomen tantoperè amplecteris, id tibi in contrarium cadat, quemadmodum

aliis multis cecidit. Illud etiam considera, ne tibi idem accadat, quod non ita multis antea annis alteri contigisse vidimus: qui cum eiusmodi istius ciuitatis Archiepiscopum factum eiecisset, in censuras Ecclesiasticas incidit: cui non multo post, Oratore ad felicitis recordationis Paulum IV. prædecessorem nostrum misso, cum in itinere esset, eiusdem Pontificis verbis denuntiaturum est, ne Romam veniret; si venisset, eum capi atque in carcerem conijci iussurum: cumque is postea, suffragante quodam Sanctæ Romanæ Ecclesiæ Cardinali, placato Pontifice, una cum absolutione ad Urbem veniendi, legationeque suâ fungendi, potestatem accepisset, antequam aut de impetratâ veniâ certior fieri, aut Pontificis conspectum intueri posset, mortem occubuit; diuinâ nimirum hac prouidentiâ operante, ut tali exemplo ceteros ab huiusmodi rebus audendis deterreret. Nam ipsi quidem Cardinali nihil gloriosius accidere potest, exilio ob Ecclesiæ suæ libertatem iuraque tuenda per vim irrogato: cui si etiam pro eadem causâ sanguinem fundere contingeret, præclare secum Deum Omnipotentem egisse existimaturus est. Tuâ verò interest, ne per indignationem aliquam rem eò deducas, ut quod Cardinali à te passum esse salutare & gloriosum apud Deum Omnipotentem Rempublicamque Christianam futurum est, id te in eum fecisse tibi apud Deum atque homines perniciosum turpeque sit; quippe quod in
annali-

annalibus istius ciuitatis ad perpetuam tui nominis ignominiam mandabitur. Hæc non minùs pro amore in te nostro, quàm pro commisso nobis ab Omnipotenti Deo Pastoralis officio, tibi scribenda esse iudicauimus. Speramus autem Nobilitatem tuam in hac ipsâ re, & in ceteris quæ ad Ecclesiasticam libertatem dignitatemque augendam & conseruandam pertinent, id esse facturam, quod eximiæ suæ pietati Religionisque Catholicæ zelo consentaneum fuerit. Datum Romæ apud S. Petrum sub annulo Piscatoris, die VIII. Octobris, M. D. LXIX. Pontificatus nostri anno quarto.

EPISTOLA XL.

Patriarcham Antiochenum Episcopalis curæ onus deponere cogitantem à consilio reuocat, ad illudque strenuè sustinendum hortatur.

Ven. Fratri, Ioanni Patriarchæ Antiocheno.

Litteras tuas XVI. Kalend. Augusti scriptas accepimus; ex quibus consilium tuum de onere Episcopalis curæ deponendo cognouimus. Quâ in re conceptum à te ipso quidem ob præsentium temporum calamitates, Episcoporumque ignauiam, animi dolorem, utpote à diuini honoris zelo profectum, & amauius vehementer, & in Domino commendauimus. Est enim Apostolicæ sollicitudinis

signum haud obscurum, si quis pro parte suâ popu-
lorum peccatis ingemiscit, si Præpositorum desi-
diam dolet, si denique scandalis, quæ vbiq̃ue cer-
nit, vritur; consilium tamen tuum probare nullo
modo potuimus, quia omnibus in eâ vocatione ma-
nendum esse ab Apostolo didicimus, in quâ vocati
sunt. Te verò ad Episcopatum, Deo vocante, contra
voluntatem etiam tuam peruenisse, & tu ipse in tuis
litteris fateris, & nos pro comperto habemus: cuius
onere deposito, vide ne non tam illud deposuisse
quàm abiecisse, neque tam Ecclesiæ tuæ consuluisse
quàm officium tuum prodidisse, munusque ab Om-
nipotenti Deo tibi assignatum deseruisse videaris:
præsertim cùm causæ, quas ipse tui consilij affers,
non ad recedendum, sed ad permanendum in eâ,
in quâ à Deo positus es Ecclesiæ tuæ custodiâ, potiùs
te impellere debeant. Quid enim? si multa impe-
dimenta Episcopali muneri rectè administrando
obijciuntur, idcircone deficere animo ac viribus,
an non potiùs fortiter resistere debes? Sed fac non
impedimenta solùm & moras ad benè agendum
afferri, sed etiam terrorem, minas, mortem denique
intentari; illicône tamquam miles ignauus armis
abiectis stationem tibi creditam desereres? quin po-
tiùs sacerdotali vigore assumpto, stare in fortitu-
dine, potestatibus mundi ex aduerso ascendere, &
pro domo Domini murum opponere debes, ne vi-
uus, hoc est sciens, in infernum descendas. Illud
etiam

etiam Frater considera, cuiuslibet esse hominis ad nauis gubernacula sedentis, tranquillo mari, secundis flatibus cursum dirigere: efferuescentibus autem vndis, aduersantibusque ventis, sic clauum moderari, vt cursum teneas, & in portum venias, id verò specimen est spectatæ virtutis. Quòd si in isto cui præpositus es munere administrando, aut parum tibi proficere, aut non tantum quantum velles gregi tibi credito prodesse videris; noli ob eam causam diutius tristari, neque id, quod te fecisse decet, prætermittere. nostrum enim est currere; diuinæ autem potestatis est, nos, vbi ei placuerit, ad victoriæ palmam perducere: etsi enim agri Dominici cultores sumus, tamen neque qui plantat, est aliquid, neque qui rigat, sed qui incrementum dat Deus. Nam quod ad alterâ Epistolæ tuæ partem attingit, in quâ ad hoc, quo fungeris, munus obeundum te ineptum infirmumque esse scribis, primùm hæc tua prædicatio magnum virtutis iustitiæque tuæ signum est: iustus enim in principio sermonis accusator est sui. Deinde, vt hoc tibi concedamus, non idcirco tamen sequitur, vt tuum de Episcopatu deponendo consilium probare debeamus. Quamuis enim tu infirmus, Deus tamen, qui te ad illud munus vocauit, omnipotens est: in eo sperare fiduciamque tuam reponere debes: qui enim Abraham contra spem filium dedit, is potens est tibi pro istâ Ecclesiâ laboranti spiritualium frugum incrementa

donare, & earundem vberrimos fructus multiplicare. Quocircà Fraternitatem tuam, vt bono fidentique in Deum animo sit, fraternè monemus; eamque ad sui gregis curam, ad Cleri populi que sibi commissi deprauatos mores corrigendos, ad tollendos abusus, ad veterem piè sancteque viuendi disciplinam reuocandam hortamur. Ob hæc autem si quid aut aduersi pateris, aut hominum vel gratiâ impedis vel terrore turbaris; hæc omnia patienter & æquo animo tibi sustinenda esse scito: qui enim cordis tui inspector est Deus, laborum tuorum iustam tibi mercedem reddet. A nobis autem omnia, ad exequendum istud tibi ab Omnipotenti Deo iniunctum munus, paternæ nostræ beneuolentiæ, potestatisque à Domino nobis concessæ auxilia semper expectato. Datum Romæ apud S. Petrum sub annulo Piscatoris, die XXI. Septembris, M.D.LXIX. Pontificatus nostri anno quarto.

EPISTOLA XLI.

Regem Christianissimum, quòd Gasparem Colignium, hæreticorum ducem, omnibus, quos vsurpabat, honoribus ac titulis spoliatum condemnauerit, aliumque in eius locum, virum Catholicum, Regni Admiralium constituerit, valdè commendat; atque vt reliquos hæreticos à Galliâ profliget aut tollat, hortatur.

Chariffi-

Charissimo in CHRISTO Filio nostro, Carolo
Francorum Regi Christianissimo.

Charissime in CHRISTO Fili noster, salutem & Apostolicam benedictionem. In hoc graui periculoſoque bello, quod Maieſtas tua aduerſus nefarios Catholicæ Religionis hoſtes Regniſque ſui rebelles non minùs piè ab initio ſuſcepit, quàm conſtanter poſteà geſſit, tam diuſque gerit, multa & egregia eximiæ ſuæ in Deum Omnipotentem pietatis & fidei Catholicæ ſtudij ſigna oſtendit; pro quibus & antea Redemptori noſtro gratias ſemper egimus, & nunc quoque agere non deſiſtimus: ſed tamen, inter tot præclara ſuæ bonitatis deuotioniſque indicia, illud certè minimum non ob-
tinet locum, quòd execrandum illum ac detestabilem hominem, ſi modò homo appellandus eſt, qui ſe pro iſtius Regni Admirante gerit, diabolicæ fraudis miniſtrum, hæreticorum omnium ducem & ſigniferum, diſſenſionis inteſtiniſque belli concitato-
rem, iuſtiſſimâ Concilij Pariſienſis ſententiâ publicè condemnandum, honoribus omnibus ſpoliandum, debitiſque ei iam diu ignominiaſque inſignibus notandum afficiendumque curauit; in eiſque locum virum maximè Catholicum, multisque, vt audiuiſmus, virtutibus inſignem ſuffecit. Quo quidem facto non ſolùm (quod omnium rerum ca-
put

put est) diuinam gloriam, quemadmodum decuit, omnibus rebus prætulisti, acerrimūque Catholicæ Religionis hostem infectando, Deum ipsum coram toto Christiano orbe confessus es; sed etiam ceteris Catholicis Principibus ad idem contra sui quoque Regni hæreticos exemplo tuo audendum auctor fuisti: bonis & veræ Religionis studiosis animos addidisti; improbis & hæreticis dolorem simul & timorem incussisti: omnibus denique hominibus ostendisti apertè, te, vt par est, in Dei causam descendisse. Quæres, quoniam & Redemptoris nostri gloriam primū quærimus, & Maiestatem tuam ex animo diligimus, eiusque laudibus vehementer fauemus, nobis adeò grata accidit, vt huius rei testes has ad te nostras litteras dandas esse existimauerimus: quibus tam egregium factum debitis in Domino laudibus prosequentes, Maiestatem tuam, quamuis suâ sponte ad omnia præclara opera satis incitatam, ad testificandam tamen nostram erga illam paternam beneuolentiam, hortamur, vt quo animo contra nefarios hæreticos Catholicam Religionem in suo Regno defendendam suscepit, eodem aduersus eosdem pium iustissimūque bellum gerere perseveret: cuius quidem belli ab Omnipotentis Dei misericordiâ celerem gloriosamque Maiestati tuæ victoriam precamur. Datum Romæ apud S. Petrum sub annulo Piscatoris, die XII. Octobris, M. D. LXIX. Pontificatus nostri anno quarto.

EPISTO-

EPISTOLA XLII.

Hereses, & iræ diuinæ flagella unde maximè prouidentur, ostendit. Clericos, vt vitam quisque suam ad pristinam morum sanctitatem reuocent, diuinorumque Sacramentorum Usus piè frequentent, ac bono exemplo sint, hortatur.

Dilectis Filiis, Capitulo & Canonicis Ecclesiæ Valentini in Galliâ.

Dilecti Filij, salutem & Apostolicam benedictionem. Reipublicæ Christianæ miseras multiplicesque calamitates, tot prauissimarum hæresum schismata, tot populorum aduersus proprios Principes bella, fames, pestilentias, & cetera diuinæ iræ flagella, vbique in populum Christianum intenta cernentes; in eam mentem sententiamque venire cogimur, vt hæc omnia mala non solum propter populi Christiani, sed multò etiam magis propter Clericorum & Ecclesiasticorum hominum peccata, nobis meritò euenire existimemus. Scriptum est enim: Si dereliquerint filij eius legem meam, & in iudiciis meis non ambulauerint, si iustitias meas profanauerint, & mandata mea non custodierint; visitabo in virgâ iniquitates eorum, & in verberibus peccata eorum. Atque vtinam, quemadmodum vbique peccatis crescentibus, & abundante

Gg malitiâ,

malitiâ, perspicuum est legem Domini derelictam, eius mandata minimè fuisse custodita; sic ijdem illi qui peccauerunt aliquando resipiscant, seque toto corde ad Deum conuertant, peccatorumque pœnitentiam agant: ne, quod grauissimum est, in flagellis positi, flagellis digna committere perseuerent. Nos certè, qui ad hoc Apostolicæ seruitutis onus, quamuis imparibus viribus, subeundum à Deo vocati sumus, nullum pro Pastoralis nostræ sollicitudine prætermittere officium debemus, quod Clericos, qui vbique Ecclesiarum sunt, ad veterem viuendi regulam pristinamque morum sanctitatem reuocare, diuinarumque rerum studio atque amore inflammare posse videatur. Quia verò inter cetera Christianæ pietatis incitamenta Sacramentorum frequentiam, quæ quibuscumque Ecclesiasticis hominibus à sacro generali Tridentino Concilio tantoperè commendatur, parum adhuc quidem apud istam Ecclesiam vsitatam esse accepimus; idcirco eiusdem sacri Tridentini Concilij Decretis inhærentes, simplices Clericos atque inferiorum Ordinum gradibus initiatos hortamur, vt singulis mensibus semel saltem confessori ab eorum Ordinario approbato peccata sua confiteantur, & communionem laicalem eâ, quæ tantum decet Sacramentum, reuerentiâ suscipiant. Quod idem vt bis singulis mensibus faciant, Diaconos & Subdiaconos hortandos, paternisque nostris vocibus inuitandos esse existi-

existimauimus. Presbyteros autem monemus, & per viscera misericordiæ Domini nostri IESV CHRISTI vehementer in Domino obtestamur, vt qui animarum curæ præpositi non sunt (hi namque frequenter, vt suo muneri satisfaciant, celebrare debent) saltem semel in hebdomadâ salutare Missæ sacrificium faciant. Meminerint autem qui in Missarum solemnibus celebrandis negligentes sunt, & fideles viuos, & in CHRISTO defunctos, qui nondum plenè purgati sunt, salutaribus ab se suffragiis fraudari. Nec verò quisquam, qui ad Presbyteratus Ordinem peruenerit, minùs frequenter celebrandi culpam vanis & plerumque commentitiis impedimentis prætexat; sed viuorum mortuorumque animarum saluti inserviat, omnia quæ obstant sedulò remouere conetur. Qui verò Canonicatus Præbendas siue alias Ecclesiasticas obtinent dignitates, hos paternè monitos volumus, vt suæ vocationis memores, sanctè, piè ac religiosè viuere studeant; & quò frequentius peccata sua confiteri, & sacrosanctum Eucharistiæ Sacramentum sumere assueuerint, cò se Omnipotenti Deo acceptiùs famulatu- ros esse sciant. Non enim fructuosissimarum possessionum redditus ad licentiam voluptatumque illecebras sectandas acceperunt; sed vt pro peccatis populorum humiles assiduasque preces ad Deum & Redemptorem nostrum funderent, & pro temporalibus spiritualia bona tribuerent. Quid enim aliud

qui Ecclesiasticis bonis fruuntur, quàm populorum peccata manducant? Vniuersè autem omnes in quocumque Ecclesiastico Ordine constitutos admonemus & hortamur, & per Omnipotentem Deum obtestamur, vt meminerint sibi potissimum onus hoc esse impositum, vt Sacrificiis, ieiuniis bonisque operibus Deum populorum peccatis meritò irascentem placabilem efficiant, sacerdotaliumque virtutum ardentem in manibus lucernas habentes, laicis ad benè, piè iusteque viuendum lumen præferant: hoc enim facientes, & ipsi suo officio fungentur, & eius rei nomine à nobis non mediocrem gratiam inibunt. Datum Romæ apud S. Petrum sub annulo Piscatoris, die XIV. Octobris, M. D. LIX. Pontificatus nostri anno quarto.

EPISTOLA XLIII.

Gasparem de Coligny, hæreticorum ducem, iustè damnatum gratulatur; idque Galliæ rebus salutare fore ostendens, Reginae pietatem commendat.

Charissimæ in CHRISTO Filia nostræ Catharinæ, Francorum Reginae Christianissimæ.

Charissima in CHRISTO Filia nostra, salutem & Apostolicam benedictionem. Non facile verbis consequi possumus, quantâ animi latitiâ affecti sumus, ex eo quòd charissimus in CHRISTO
Filius

Filius noster Rex Christianissimus, natus tuus, hominem vnum omnium fallacissimum, execrandæque memoriæ, Gasparem de Coligny, qui se pro istius Regni Admirante gerit (quo potissimum consiliario, scelerumque omnium architecto tota ista pestilentissimi belli flamma est excitata) iustissimâ Parisiensis Senatus sententiâ condemnandum, honoribus omnibus priuandum, debitisque iam diu turpitudini suæ ignominiaë notis, vnâ cum totâ familiâ, afficiendum curauit; in eiusque locum virum maximè Catholicum, nec minùs pietate quàm fortitudine nobilitateque insignem, suffecit. In eâ re Maiestas sua iustitiæ satisfecit; reliquos eiusdem sceleris socios, improbissimos homines, nefariosque hæreticos, ab improbitate suâ hoc exemplo deterruit; bonis Catholicisque viris animos addidit: ceteris autem Principibus, quid in similibus rebus agendum sit, ostendit. Quia verò & hoc & cetera omnia, quæ ab eo non minùs piè quàm constanter quotidie geruntur, tuo potissimum consilio administrari compertum habemus; idcirco faciendum nobis esse existimauius, vt quantoperè ea res nobis grata acciderit, his deditâ operâ ad te scriptis litteris significaremus. Caue autem putes, charissima in CHRISTO Filia, quidquam Deo gratius acceptiusque fieri posse, quàm cum illius hostes apertè pio Catholicæ Religionis studio oppugnantur: tunc enim Omnipotentem Deum coram hominibus confitemur,

tunc illius gloriam quærimus, cùm, posthabitis omnibus humanarum rerum rationibus, apertè in eius causam descendimus. Quod quoniam, adiuuante Deo, Maiestas tua, & in hac ipsâ re, & in ceteris omnibus, vt par est, Christianissimamque Reginam decet, sibi faciendum esse iudicauit; sperare debet, Omnipotentem Deum hanc suam erga se pietatem egregiâ tam diuturni belli victoriâ aliquando remuneraturum. Quod nos, diuinâ freti misericordiâ, sic speramus, vt pro eâ tamen impetrandâ assiduas ad Redemptorem nostrum preces fundere non desistamus. Datum Romæ apud S. Petrum sub annulo Piscatoris, die XVII. Octobris, M. D. LXIX. Pontificatus nostri anno quarto.

EPISTOLA XLIV.

Marchioni de Villars delatum honorem gratulatur; atque, vt susceptis pro Catholicâ Religione laboribus ac periculis, ad celestia premia semper aspires, hortatur.

Dilecto Filio, nobili viro, N. Marchioni de Villars, Regni Franciæ Admiranti.

Dilecte Fili, nobilis vir, salutem & Apostolicam benedictionem. Cùm non sine magnâ animi nostri lætitiâ accepissemus, charissimum in CHRISTO Filium nostrum Regem Christianissimum, pro suâ singulari erga Deum Omnipotentem

tem pietate, Catholicæque Religionis zelo, Gaspare de Coligny (qui se pro istius Regni Admirante gerit) perditionis filio, iustissimâ Parisiensis Senatus sententiâ condemnato, honoribusque omnibus spoliato, te in eius locum totius Regni Admirantem suffecisse; duplici ex eâ re in Domino gaudio affecti sumus: tum quòd Catholicæ Religionis acerrimum hostem, perturbatorem publicæ tranquillitatis, qui omnia sua consilia hæreticus cum hæreticis semper sibi consocianda esse putauit, prodicionis hæreseosque crimine atque omni dedecore infamem, iustâ perpetuæ ignominia animaduersione notatum, omni que honore priuatum gaudemus: tum quòd te virum Catholicæ fidei studiosissimum, nec minùs, vt audiuius, pietate quàm fortitudine nobilitateque insignem, in eius locum suffectum esse lætamur. cuius quidem lætitiæ nostræ testes has ad te litteras dandas esse existimauimus; quibus & de isto amplissimi honoris gradu non magis Nobilitati tuæ gratulamur quàm nobis gaudemus: & te pro nostrâ paternâ beneuolentiâ hortamur, vt officij tui memor, quoscumque labores, quæcumque pro Catholicâ Religione pericula subieris, eorum tibi mercedem maximam in cælis repositam esse intelligas; semperque ita existimes, qui pro tuendo sanctissimæ Fidei cultu mortem occumbunt, eos non de vitâ ad mortem, sed de morte ad vitam transire. Sonet semper illa Saluatoris nostri vox in auribus tuis, quâ
&

& eos qui animam suam ament, illam perdituros; & qui perdiderint, illam inuenturos esse nos admonuit. Quæ omnia quamquam pro tuo eximio Catholicæ Religionis studio tibi nota esse, teque ad omnia egregia opera paratum, pro comperto habeamus; tamen ad testificandam tibi paternam erga te voluntatem nostram, Nobilitati tuæ scribenda esse iudicauimus. Datum Romæ apud sanctum Petrum sub annulo Piscatoris, die XVII. Octobris, M.D.LXIX. Pontificatus nostri anno quarto.

EPISTOLA XLV.

Partam ad Monconturium de hæreticis victoriam gratulatur; Regemque, vt bellum strenuè prosequatur, hæreticisque inexorabilem se præbeat, incitat. Vide lib. II. cap. IX. Vitæ PII V.

Charissimo in CHRISTO Filio nostro, Carolo Francorum Regi Christianissimo.

Charissime in CHRISTO Fili noster, salutem & Apostolicam benedictionem. Certiores facti primum ex litteris Venerabilis Fratris nostri Episcopi Carcassonensis, deinde Episcopi quoque Caiacensis, nostri & Sedis Apostolicæ apud Maiestatem tuam Nuntij, de optatissimâ victoriâ, quam ineffabilis Omnipotentis Dei misericordia tibi tam necessario Reipublicæ Christianæ tempore concessit,

fit, sublatis ad cælum manibus Redemptori nostro gratias egimus: qui quos iustè castigare peccantes tot tantorumque malorum peste voluit, eos misericorditer proculdubio tamquam bonus Pastor parcendo, occidere noluit; vt, quò nos tam diuturni belli calamitas iustiùs afflixisset, eò misericordiùs diuinæ suæ bonitatis indulgentia victoriâ nobis donatâ recrearet. Auxit autem magnoperè voluptatem nostram huius Urbis publica lætitia; quæ ad primum & adhuc dubium tantæ victoriæ nuntium, sic vt domesticâ quadam clade intestinoque bello crepta, gaudio exultauit & exultat. Restat nunc, vt Maiestas tua tam secundis rebus nihil de pristinâ suâ diligentia, studio perseverantiâque remittat; nec communibus hostibus spatium det ad confirmandos animos viresque iterum colligendas; sed victoriâ vtatur, & luctuosissimo bello aliquando tandem finem imponat. Quam quidem ad rem Maiestatem tuam sic hortamur, vt maiori studio maioriq̃ animi contentione hortari non possimus. Quia verò scimus non defuturos esse, qui vel amicitia vel propinquitatis vel etiam pietatis nomine, Maiestatem tuam pro multis tuorum Dei que Omnipotentis hostium deprecentur; illud pro paternâ rerum tuarum curâ, & pro officio nostro monemus, ne illorum te precibus flecti sinas, quo minùs de illis iusta supplicia sumas, quæ legibus statuta sunt: ne, si priuatis quibusuis rationibus adductus plus carni

aut sanguini quàm iustæ vltioni tribueris, Saulis exemplo aduersus te ira Dei eò grauius exardescat, quò maiora tibi suæ bonitatis beneficia indulserit. Quid enim hoc aliud esset, quàm Dei beneficium, victoriam scilicet ipsam irritam facere: cuius quidem victoriæ fructus in eo positus est, vt per iustam animaduersionem nefariis hæreticis, communibus hostibus de medio sublatis, pristina isti Regno pax tranquillitasque restituatur. Nec verò, vano pictatis nomine obiecto, te eò vsque decipi sinas, vt condonandis diuinis iniuriis falsam tibi misericordiæ laudem quæras: nihil est enim eâ pietate misericordiæque crudelius, quæ in impios & vltima supplicia meritos confertur. Quòd si Maiestas tua veterem isti Regno gloriam, potentiam dignitatemque restituere vult, illud in primis studere debet, vt ab omnibus populis ditioni suæ subiectis vna fidei Catholicæ professio teneatur, ea quæ à primo ferè Christianæ Religionis exordio ad hæc vsque tempora integra permansit: quàm diu enim in his quæ fidei Catholicæ sunt, in duas partes claudicatum fuerit, tam diu dissensionibus intestinisque discordiis & Maiestas tua afflictabitur, & Regnum non conquiescet. Huius autem rei tam salutaris obtinendæ causâ, & de his qui contra Deum Omnipotentem & Maiestatem tuam scelerata arma sumpserunt, supplicium sumere, & hæreticæ prauitatis Inquisitores per singulas ciuitates constituere, & reliqua

qua omnia facere debet, quibus tam afflictæ istius Regni res, adiuuante Deo, tandem aliquando recreari, & in pristinum statum restitui possint. Datum Romæ apud S. Petrum sub annulo Piscatoris, die XX. Octobris, M.D.LXIX. Pontificatus nostri anno quarto.

EPISTOLA XLVI.

Cosmo Florentiæ Duci victoriam de hæreticis in Galliâ partam piè gratulanti gratias agit; indeque perceptam letitiam suam, quòd ad eam victoriam Ducis auxilia non mediocriter contulissent, auctam esse ostendit. Vide lib. II. cap. IX. Vitæ PII V.

Dilecto Filio, nobili viro, Cosmo Duci
Florentiæ & Senarum.

Dilecte Fili, salutem & Apostolicam benedictionem. Quòd victoriam charissimo in CHRISTO Filio nostro Regi Francorum Christianissimo magnâ Omnipotentis Dei misericordiâ de communibus hostibus concessam, Nobilitas tua nobis, imò veriùs toti Reipublicæ Christianæ, proximis suis litteris gratulatur; in eâ re Principis officio functa est, non minùs erga nos officiosi, quàm pij: de quo, quas debemus, Nobilitati tuæ gratias agimus; quæ tali gratulatione non modò suam erga nos sanctamque hanc Sedem Apostoli-

cam obseruantiam amanter declarauit ; sed quibus potissimum de rebus Principi Catholico diuinæque gloriæ cupido lætandum sit , prudenter iudicauit. Nobis certè ad illud gaudium, quod de tantâ victoriâ cepimus , non parua accessio facta est ex eâ lætitiâ, quam te accepisse ex tuis ad nos litteris significas; multis illam quidem iustissimisque de causis susceptam; non parum tamen ex eo quòd propter auxilia Regi Christianissimo missa non parua eius ad te lætitiæ pars meritò peruenit. Quod verò tantum diuinæ misericordiæ munus nostris potissimum orationibus acceptum refers; quæ sint officij nostri partes, pro eo loco, quo nos, licet indignos, Deus esse voluit, præclare intelligere videris: cui quidem officio, vt pro virium nostrarum imbecillitate satisfaciamus, nullos vnquam labores, nulla pericula deuotare parati sumus. Datum Romæ apud S. Petrum sub annulo Piscatoris, die XIX. Octobris, M.D.LXIX. Pontificatus nostri anno quarto.

EPISTOLA XLVII.

Cardinali Borbonio relatum de hereticis victoriam gratulanti respondet, atque vt belli reliquias eas suafu Rex prosequatur, contendit. Vide lib. II. cap. IX. Vitæ PII V.

Carolo Cardinali Borbonio, Legato
Apostolico.

Dilecte Fili noster, salutem & Apostolicam benedictionem. Gratissimæ nobis fuerunt litteræ tuæ quinto Octobris die ad nos datæ, quibus de opatissimâ victoriâ tam necessario Reipublicæ Christianæ tempore de communibus hostibus ab Omnipotenti Deo non magis nobis quàm toti populo Christiano concessâ gratularis. Quod quidem tuum erga nos officium non solum eo nomine acceptissimum nobis fuit, quòd tuæ erga nos sanctamque hanc Sedem Apostolicam obseruantia nobis exploratissimè testimonium attulit, non necessarium sed iucundum; verùm etiam quia, coimpertum habemus, te, vt tam egregia de Omnipotentis Dei hostibus Christianissimique Regis rebellibus victoria obtineri posset, consilio & auctoritate pro parte tuâ non mediocriter semper adiuuissè: Quorum quidem tuorum pro Catholica Fidei defensione susceptorum laborum, atque etiam pro eo quòd omnibus tuis priuatis necessitudinibus; quemadmodum æquum fuit, Religionis causam anteposuisti; ea circumspectionem tuam æterna manent præmia, quæ ab Redemptore nostro omnibus his parata sunt, qui pro eius gloriâ nullum discrimen, nullas contentiones, ac ne mor-

tem quidem sibi defugiendam esse existimauerunt. Victoriā verò ipsam quòd nostris potissimùm orationibus acceptam refert, quamquam in assiduâ pro populo Christiano deprecatione nostras præcipuas esse debere partes non ignoramus; non tamen precibus nostris tantum tribuimus, vt illis ab Omnipotenti Deo afflictis & propè desperatis istius Regni rebus misericordiam nos impetrasse putemus: in quâ impetrandâ aliorum quoque Dei seruatorum deprecationes maximè apud eundem Deum valuisse pro certo habemus. Illud restat, quod Christianissimum Regem studiosissimè facturum esse in tuis litteris scribis, vt scilicet belli reliquias persequatur, suasque & Dei iniurias, quemadmodum æquum est, vlciscatur; id vt quamprimùm fiat, circumspèctio tua pro suâ parte contendat. Quâ de re, quia & aliàs circumspèctioni tuæ & proximis litteris ad Regem Reginamque Christianissimam diligenter scripsimus, plura in præsentia non scribemus. Datum Romæ apud S. Petrum sub annulo Piscatoris, die III. Nouembris, M.D.LXIX. Pontificatus nostri anno quarto.

EPISTOLA XLVIII.

Regis victoriā de hæreticis reportatam gratulantis pietatem commendat. Matrimonij inter ipsum Regem & Isabellam Cesaris filiam contrahendi potestatem se fecisse ostendit. Vide lib. II. cap. IX. Vitæ PII V.

Charissi-

Charissimo in CHRISTO Filio nostro Carolo,
Francorum Regi Christianissimo.

Charissime in CHRISTO Fili noster, salutem & Apostolicam benedictionem. Rectè iudicauit Maiestas tua in suis litteris septimò die Octobris datis, quibus de optatissimâ victoriâ non magis sibi quàm toti populo Christiano magno Omnipotentis Dei beneficio concessâ nobis gratulatur, gratulandi causas sibi non solum nobiscum, sed etiam cum Republicâ totâ Christianâ esse communes. In eo officio pristinam Maiestatis tuæ erga nos sanctamque hanc Sedem Apostolicam obseruantiam, nobis antea quoque spectatissimam, recognouimus; eique de tam illustri suæ erga nos voluntatis significatione gratias agimus, quas debemus: quodque eam ipsam victoriam totam diuinæ bonitati refert acceptam, in eâ re eximiam suam erga Redemptorem nostrum pietatem vehementer in Domino commendamus. Quæ verò Venerabilis Frater Episcopus Cenomannensis, Maiestatis tuæ apud nos Orator, ad eandem victoriam pertinentia suo nomine exposuit, quæque de re ipsâ gesta narrauit, ea nobis perinde ac debuerunt gratissima fuerunt. Dispensationem autem Apostolicam, quam ad minorem natu filiam charissimi in CHRISTO Filij Maximiliani Romani Imperatoris electi

in

in matrimonium ducendam sibi necessariam alteris litteris secundâ die Octobris datis, Maiestas tua à nobis postulauit, de quâ etiam idem suus Orator diligentissimè suo nomine nobiscum egit; Maiestati tuæ libenter admodum concessimus, talem inter duos longè nobilissimos potentissimosque orbis Christiani Principes affinitatem Reipublicæ Christianæ tranquillitati, hæresibusque extirpandis, utilissimam fore putantes : Deum autem Omnipotentem oramus, vt misericorditer nobiscum agens, eas ex hoc matrimonio ad populum Christianum utilitates peruenire velit, quas nos in ipsius concessione dispensationis potissimùm spectauimus. Datum Romæ apud sanctum Petrum sub annulo Piscatoris, die VI. Nouembris, M.D.LXIX. Pontificatus nostri anno quarto.

EPISTOLA XLIX.

Æthiopes ad sanctæ Sedis Apostolicæ obedientiam redire cupientes, Regisque Lusitanorum auxilia contra Turcas postulantes, Regis copijs iuuari postulat. Vide lib. III. cap. v. Vitæ PII V.

Charissimo in CHRISTO Filio nostro, Sebastiano Regi Portugalliæ Illustri.

Charissime in CHRISTO Fili noster, salutem & Apostolicam benedictionem. Cùm ex Venerabi-

nerabilis Fratris nostri Æthiopiæ Patriarchæ Catholicici, tum ex aliorum quoque fide dignorum litteris cognouimus, gentem illam, posteaquam Patriarcham à se postulatum, sibi que, annitente in primis Serenissimo Rege Ioanne auo tuo, à Sede Apostolicâ datum recipere noluit; multis variisque calamitatibus, Omnipotentis que Dei flagellis eruditam, magnâ animorum mutatione factâ, non pauca interdum neque obscura pœnitentiæ, atque ad Apostolicæ Sedis vnionem reuertendi voluntatis signa ostendere: nec solùm Catholicos ipsos, sed etiam ex Primatibus schismaticis nonnullos præ se ferre, valdè se ad eam rem Maiestatis tuæ populorumque Regno tuo subiectorum, quo, postquam ad vnitatem Ecclesiæ redierint, à Turcarum Mauro-rumque incursionibus tuti esse possint, opem auxiliumque desiderare; vt sperandum sit, Maiestate tuâ illuc Duces suos cum copiis mittente, gentem illam sanctæ Sedis Apostolicæ mandata facturam. Quæ res, sicuti magnum in Domino gaudium nobis attulit, bona hæc consentientium in eandem sententiam Primatum populorumque signa cernentibus; sic etiam non mediocrem animo nostro curam iniecit, ne vllum erga eos, quantumuis longè à nobis positos, populos voluntatis nostræ paternæ officium prætermittamus. mater enim & custos bonorum omnium charitas, absentes non existimat eos quos oculis mentis habet præsentem: nam si ille

Paterfamilias filium suum, qui in regionem abierat longinquam, quamvis à longè venientem, tamen conspexit, eiq̃ue ad se reuertenti magnâ cum animi lætitiâ occurrit; quantò magis nos communis omnium Christianorum populorum Patris personam sustinentes, tot filios ad Ecclesiasticam vnionem redire volentes, respicere debemus? Quam ob rem Maiestatem tuam ad suscipiendam hanc Æthiopicam expeditionem vehementer in Domino hortamur: sicut enim eius gentis conuersio & conseruatio, quemadmodum intelligimus, rebus tuis Indicis magnam afferre potest vtilitatem; sic eiusdem ad alias infideles nationes, Maiestate tuâ negligente, defectio iis valdè nocere potest. Expeditio ipsa præterea eximiâ Maiestatis tuæ in Deum Omnipotentem pietate, singulariq̃ue propagandæ Catholicæ Religionis studio digna est: quæ si potissimum à Maiestate tuâ honoris diuini totq̃ue animarum salutis causâ suscipiatur, sperandum est, Redemptorem nostrum non solum his quæ præcipuè ad sui nominis gloriam diriguntur, sed reliquis etiam tuis inceptis bonos prosperosq̃ue successus pro suâ misericordiâ daturum. Denique, si hoc fecerit, idipsum præstabit, cuius causâ Serenissimis Regibus inclytæ memoriæ progenitoribus suis, earum nationum, quotiescumque Euangelij prædicationi restiterint, subigendarum ius concessum est. In primis autem ab Omnipotenti Deo, nobisq̃ue ipsis, qui hoc popu-

polorum

pulōrum salutis causâ ardenti animo desideramus,
 maximam gratiam inibit. Datum Romæ apud
 S. Petrum sub annulo Piscatoris, die XVII. Decem-
 bris, M.D.LXIX. Pontificatus nostri anno quarto.

EPISTOLA L.

*Ut Regem ad Æthiopicam expeditionem pro gloriâ Dei,
 Christianæque Reipublicæ salute, suscipiendam adiunnet,
 Henricum Cardinalem Portugalliæ hortatur.*

Henrico S. R. E. Cardinali, Portugal-
 liæ nuncupato.

Dilecte Fili noster, salutem & Apostolicam
 benedictionem. Nuper ex Venerabilis Fra-
 tris nostri Æthiopiæ Patriarchæ Catholici litteris,
 aliorumque fide dignorum relatione cognoscentes,
 Æthiopum gentem, post multas variasque calami-
 tates, quibus nostris suisque peccatis facientibus iam
 inde maximè ab eo tempore afflicta est, quo Pa-
 triarcham superioribus annis à se postulatum, & à
 Sede Apostolicâ concessum, recipere noluit; magnâ
 animorum mutatione factâ, multa neque dubia pœ-
 nitentiæ signa ostendere; sic ut sperandum sit, cha-
 rissimo nobis in CHRISTO Filio, Rege nepote
 tuo, Duces illuc cum copiis mittente, populos illos
 ad vnitatem Ecclesiæ reuersuros, Sedisque Aposto-
 licæ mandata facturos; Maiestatem suam litteris

proximè ad eam scriptis ad suscipiendam Æthiopicam hanc expeditionem hortati sumus : quia verò inceptum adeò sanctum, Deoque Omnipotenti acceptum, te potissimum pro tuâ in Redemptorem nostrum pietate, & pro eo quo istic fungeris Apostolicæ Legationis munere, decet adiuuare; idcirco te quoque nostris litteris vehementer in Domino hortandum esse existimauimus: vt ad eandem rem Serenissimi Regis animum, propositâ illi propriâ communiq̃ue Christianæ Reipublicæ vtilitate, & (quod his omnibus rebus maius est) æternæ remunerationis præmio incitare velis. Intelligimus enim ab hominibus rerum illarum peritis, expeditionem hanc susceptam, & ad eum quem speramus exitum Deo adiuuante perductam, magnam Serenissimi Regis nepotis tui rebus Indicis vtilitatem, omissam verò atque neglectam eisdem magnum detrimentum afferre posse. Res ipsa est præterea, non solum Reipublicæ Christianæ ipso recuperandæ talis tantæque prouinciæ titulo gloriosa, sed etiam tot animarum pretioso Christi Domini nostri sanguine redemptarum ad vnionem Ecclesiæ reuocandarum nomine fructuosa : vt circumspectio tua, eiusmodi suadendâ expeditione, nullam neque vtiliorem Serenissimo Regi, neque Deo Omnipotenti acceptiorem operam nauare possit. Nisi eximium tuum propagandæ Catholicæ Religionis studium exploratum nobis esset, circumpectionem tuam
pluri-

pluribus verbis ad eandem rem consilio auctoritateque suâ apud Regem adiuuandam hortaremur: sed quia compertum habemus, eam in rebus ad Omnipotentis Dei cultum gloriamque pertinentibus nullius hortatione indigere; idcirco plura in eam sententiam scribere supersedentes, Deum Omnipotentem humiliter rogamus, vt his, quæ ad sui nominis gloriam diriguntur, prosperos successus largiri pro suâ misericordiâ dignetur. Datum Romæ apud S. Petrum sub annulo Piscatoris, die XVII. Decembris, M. D. LXIX. Pontificatus nostri anno quarto.

EPISTOLA LI.

Coniugium inter Regem Portugallie & Margaritam Valesiam quamprimum iungi procurat; ac Regis consilium de subigendâ Africâ, Regniq̃ue militaribus Ordinibus restituendis, commendat. Vide lib. IV. cap. III. & IX. Vitæ PII V.

Charissimo in CHRISTO Filio nostro, Sebastiano Regi Portugallie Illustri.

CHARissime in CHRISTO Fili noster, salutem & Apostolicam benedictionem. Quo in statu sit matrimonij tui cum charissimi nobis in CHRISTO Filij Francorum Regis Christianissimi sorore negotium; non solum intelleximus ex litte-

ris tuis XXIV. Octobris die ad nos datis, sed etiam ex dilecti Filij Oratoris apud nos tui, Maiestatis tuæ nomine, super eâdem re nobiscum habito sermone cognouimus: quia verò, quemadmodum & eidem Oratori tuo diximus, & aliàs Maiestati tuæ scripsisse meminimus, ex tali inter te & Christianissimum Regem affinitatis coniunctione magnam ad Rempublicam Christianam vtilitatem peruenturam esse speramus; idcirco totum hoc negotium quamprimùm ex sententiâ confici vehementer in Domino desideramus. Quam ob causam ad id & antea Maiestatem tuam semper hortati sumus, & nunc quoque magnoperè hortamur. Certè, quod magni Reges in primis spectare solent, neque clariori genere ortam vxorem ducere posse vidèris, neque probitate, morum sanctitate, pietatisque studio præstantiorem; præsertim charissimo nobis in CHRISTO Filio Rege Catholico hanc ipsam affinitatis coniunctionem conciliante; quo neque aptiorem vllum conciliatorem, neque potentio rem, neque tibi ipsi coniunctiorem habere potes. quem quidem speramus in tractando hoc negotio, tuorum quoque commodorum, rerumque istius Regni, eam, quam par est, rationem esse habiturum. Quæ cum ita sint, cumque in tali matrimonio ea quæ potissimum spectantur, omnia insint; decet te, charissime in CHRISTO Fili, etiamsi nonnihil aliarum non ita magni momenti rerum in conditione tibi propo-

propositâ deesset, id nequaquam tanti æstimare, vt propterea aut à tali contrahendo matrimonio absistas, aut totam huius ipsius negotij conclusionem minùs vrgeas; sed potius, communis Reipublicæ Christianæ vtilitatis causâ, aliquid de iure desiderioque tuo in rebus non magni ponderis remittas: quod te, pro tuâ singulari in Deum Omnipotentem pietate, facturum esse non dubitamus. Quæ verò aliis tuis litteris XII. Octobris datis de tuo Catholicæ Religionis adiuuandæ propagandæque studio testificatus es, similiter quæ de subigendâ Africâ ad nos scripsisti, ea perinde nobis ac debuerunt gratissima fuere: nec solum eximium tuum diuini honoris zelum, vt par est, debitis in Domino laudibus commendamus; sed etiam Africæ subigendæ consilium tuum valdè probamus, tibi que eius rei nomine benedictionem nostram impertimur, Deum Omnipotentem nunc rogantes, & in posterum humiliter rogaturi, vt earum rerum, quæ ad sui nominis gloriam à te diriguntur, prosperos tibi successus pro suâ misericordiâ largiri dignetur. De reformatendis autem tribus istius Regni militaribus Ordinibus, quod à nobis Maiestas tua fieri vult, in re tam iustâ, quemadmodum decet, voluntati postulatifque tuis satisfacere parati, totum hoc reformationis negotium vt ex tuâ sententiâ quamprimùm conficiatur, studiosè curabimus; pro nostrâ erga te paternâ beneuolentiâ, tuâque in nos & erga hanc sanctam

sanctam Sedem Apostolicam obseruantia, sedulò operam daturi, vt, quantum cum Domino poterimus, tuis semper honestis desideriis satisfaciamus. Datum Romæ apud S. Petrum sub annulo Piscatoris, die XXVIII. Decembris, M.D.LXIX. Pontificatus nostri anno quarto.

EPISTOLA LII.

Prouincialis Concilij Goani decreta examinanda, & quatenus opus fuerit approbanda, librumque ad se missum libenter accepisse nuntiat: Archiepiscopum, vt Pastorali officio suo strenuè fungi pergat, hortatur: Fratres Dominicanos, Franciscanosque, & Iesuitas in infidelium conuersione laborantes confirmat. Vide librum III. cap. v. Vitæ PII V.

Ven. Fratri, Gaspari Archiepiscopo Goano.

Venerabilis Frater, salutem & Apostolicam benedictionem. Prouinciale Concilium in istâ ciuitate à Fraternitate tuâ celebratum, eiusque librum ad nos missum libenter accepimus: teque hoc tam pio Ecclesiasticæ disciplinæ vel corrigendæ vel conseruandæ, tamque necessario functum esse officio, vehementer in Domino gauisi sumus: studium tuum, operam, diligentiam, Religionisque Catholicæ zelum, tum in conuertendis ad verum Omnipotentis Dei cultum infidelibus, tum in his
qui

qui conuersi sunt, sanâ fidelique doctrinâ instituen-
dis, debitis in Domino laudibus commendantes,
Fraternitatem tuam ad hæc & similia Pastoralis so-
licitudinis munera constanter exercenda, & in cu-
stodiâ tibi creditâ perseuerandum vehementer hor-
tamur: nihil enim nobis gratius accidere potest,
quàm cum intelligimus, tuo ceterorumque Fratrum
Coëpiscoporum nostrorum labore ac vigilantia no-
uos quotidie animarum fructus in æterna horrea
afferri, nouosque Ecclesiæ Catholicæ palmites cre-
scere. Quorum quidem tuorum laborum quamuis
amplissimum æternæ beatitudinis præmium in cæ-
lo tibi repositum sit, illud quod etiam omnibus bo-
nis fidelibusque Omnipotentis Dei ministris para-
tum est; tamen nos ipsi quoque tuis honestis desi-
deriis satisfacere, tibi que quæcumque cum Domi-
no poterimus, fraternæ nostræ beneuolentiæ atque
amoris officia præstare parati sumus. Quia verò
ex charissimi nobis in CHRISTO Filij Portugalliæ
Regis litteris intelligimus, Fratres quoque S. Do-
minici, & S. Francisci, similiterque Iesuitas, in eâ-
dem infidelium conuersione pro suâ parte sedulò
laborare; idcirco Fraternitatem tuam illis benedi-
ctionem nostram impertiri, simulque eis significare
volumus, hos quos pro animarum salute diuinæque
gloriâ labores suscipiunt, præterquam quòd copio-
sam in cælo mercedem sunt habituri, nobis quoque
gratissimos esse. Quod autem ad ipsum Concilij

tui Prouincialis librum ad nos missum pertinet, nos cum congregationi Fratrum nostrorum sanctæ Romanæ Ecclesiæ Cardinalium, quos eiusmodi Conciliorum examini præposuimus, legendum dedimus; vt, si quid in eo corrigendum sit, diligenter considerent. Quod cum illi fecerint, tum Fraternitatem tuam de omnibus rebus certiolem fieri curabimus. Omnipotens Deus te, Venerabilis in CHRISTO Frater, pro nobis orantem custodiat. Datum Romæ apud sanctum Petrum sub annulo Piscatoris, die primâ Ianuarij, M. D. LXX. Pontificatus nostri anno quarto.

EPISTOLA LIII.

Regem Portugallie hortatur, vt quæ pro Religione iustitiæque tuendâ præstare instituerat, prosequatur; ciuitatemque Olisiponem à pestilentia liberatam esse gratulans, inde maximas Deo gratias agit. Vide lib. IV. cap. IX. Vita PII V.

Charissimo in CHRISTO Filio nostro, Sebastiano Regi Portugalliæ Illustri.

EXplicare verbis, charissime in CHRISTO Fili, non possumus, quantoperè litteris tuis XXI^o. Octobris die datis in Domino delectati simus, quibus de commendatâ à Maiestate tuâ Venerabilibus Fratribus nostris istius Regni Episcopis morum

corre-

correctione, de edictis pro libertate Ecclesiasticâ non impediendâ propositis, de tuo in iustitiâ erga infimos tenuioresque homines seruandâ studio ac diligentia, deque aliis rebus tuis non minùs amanter quàm copiosè ad nos scripsisti: in quo non solum rerum ipsarum, de quibus nos fecisti certiores, commemoratio magnam nobis, vt par fuit, lætitiâ attulit; sed etiam tuæ erga nos sanctamque hanc Sedem Apostolicam obseruantia significatio gratissima fuit. Harum rerum nomine singularem tuam in Deum Omnipotentem pietatem debitis in Domino laudibus commendantes, Redemptori nostro gratias agere non desistimus, qui in tot Reipublicæ Christianæ procellis tantum in tuâ virtute ardentissimoque honoris diuini zelo præsidium solatiumque nobis reseruauit. Quòd enim, vt scribis, primus inter tot Christianos Catholicosque Reges esse voluisti, qui Episcopis ceterisque Ecclesiasticis ministris iurisdictionis sibi à sacro Tridentino Concilio concessæ liberè exercendæ facultatem in Regno tuo permitteres, eaque ipsâ re reliquis Christianis Principibus ostenderes, quantam aduersus Ecclesiastica decreta mandataque Apostolica reuerentiam adhibere debeant; in eo, quæ sint optimi atque ex Deo regnantis Regis partes, præclarè videris intelligere: cuius maximè proprium esse debet, reddere quæ Dei sunt Deo, quæ autem Cæsaris, hoc est temporalis Potestatis sunt, ea sibi tantummodò retine-

re. Qui enim inter Deum atque homines medius à Patre constitutus est Christus Dominus noster, is vtriusque Potestatis officia propriis cuiusque muneribus & dignitatibus ita distinxit, vt & Christiani Principes ad æternam vitam consequendam Sacerdotibus indigerent, & Sacerdotes ad ea quæ iuris sui sunt exequenda Principum ministerio vterentur. Felices proculdubio tam Sacerdotes quàm Principes futuri, si vtrique in officio sibi commisso Omnipotenti Deo constanter inseruierint. Quod quoniam diuinæ præceptum constitutionis Maiestas tua tam fideliter custodit; non est quòd propterea ullam aut iurisdictionis imminutionem, aut Regiæ suæ potestatis detrimentum pertimescat: quin potius sperare debet, Omnipotentem Deum, in Sacerdotibus suis à Maiestate tuâ se, vt æquum est, coli honorariquæ cernentem, Regni tui fines magis magisque indies propagaturum, nouasque nationes Imperio tuo adiecturum. Hoc magnus ille Imperator Constantinus, quem Maiestas tua egregiè imitatur, intellexit: qui cum ad firmanda Imperia & Regna nihil tam valere cognosceret, quàm verum illius cultum per quem Reges regnant; magnâ semper erga Dei Sacerdotes, quæ Maiestati tuæ benè cognita esse putamus, singularisque cuiusdam obseruantia reuerentiæque signa ostendit. Docente enim Domino didicerat, qui Sacerdotes audirent, eos Deum audire: qui eos spernerent, Deum ipsum

ipsum spernere. Apostolum etiam, cum Domino ipso consentientem, dicentem audierat: Quapropter qui hæc spernit, non hominem spernit, sed Deum, qui dedit Spiritum suum sanctum in nobis. Eadem pietatis virtus in Theodosio Imperatore fuit, qui tantum beato Ambrosio Mediolanensi Episcopo tribuit, ut cuiusdam à se admissi facinoris gratiâ cum Ecclesiam ingredi prohiberetur, non solum hoc ipsum patienter atque humiliter pertulerit, sed indictum sibi ab eodem Episcopo pœnitentiæ modum deuotus exceperit. Quæ quidem nos exempla non idcirco collegimus, ut ad eorundem rectè factorum imitationem Maiestatem tuam hortaremur; quam omnium Christianarum virtutum studio sponte suâ satis incensam hortationibus nostris non indigere compertum habemus; sed ut ea quæ Christianæ pietatis studio in Dei Sacerdotes benignè fecit, & ut speramus, Deo adiuuante, factura est, hæc ipsa auctoribus etiam magnis piisque Principibus se fecisse in Domino gauderet. Reliqua quæ iustitiæ æqualiter omnibus ditioni tuæ subiectis populis conseruandæ causâ à te partim instituta, partim perfecta, partim perficienda scribis; magna illa quidem sunt, & perinde nobis esse debent grata, eorumque nomine tibi quam postulas benedictionem nostram impertimur; sed maiora tamen æternæ beatitudinis præmia tibi à Redemptore nostro proposita habes: quæ enim Deus iusti-

tiæ cultoribus in cælo præparauit, hæc neque oculus vidit, neque auris humana audiuit, neque in cor hominis ascenderunt. quæ quidem Maiestatem tuam oculis fidei intuentem, in conseruandâ iustitiâ, prohibendis vindicandisque maleficiis, bonis sanctisque viris beneficio complectendis, defatigari non oportet. Pestilentiam verò è ciuitate Olisiponensi iam abiisse, & quamdiu fuit Maiestatem tuam non attigisse; eis autem quos mori contigit, nihil ad animarum salutem defuisse, in eâque re singularem quamdam Dei seruorum quos nominas charitatem extitisse, magnoperè in Domino gauisi sumus; eiusque rei causâ Omnipotenti Deo gratias, quas debemus, egimus, atque agimus: qui quoniam, quos diligit, corripit, agendæ illi sunt gratiæ; quia quos castigare peccantes, tot tantorumque morborum, vt scribis, peste voluit, hos proculdubio tamquam bonus Pastor occidere noluit. De rebus autem suis Indicis, quòd nos Maiestas tua certiores fecit, eâ re pristinam suam erga nos sanctamque hanc Sedem Apostolicam obseruantiam deuotionemque recognouimus, speramusque Deum Omnipotentem pro suâ misericordiâ, eximiâque Maiestatis tuæ in se pietate, feliciores quotidie rerum in eis regionibus successus illi daturum: quod nos assiduis precibus ab eo precari non desistemus. Omnipotens Deus te, charissime in CHRISTO Fili, incolumem in hac vitâ diu custodiat, & in alterâ ad

ad æternæ beatitudinis præmium peruenire concedat. Datum Romæ apud S. Petrum sub annulo Piscatoris, die primâ Ianuarij, M. D. LXX. Pontificatus nostri anno quarto.

EPISTOLA LIV.

Reginam Scotiæ in custodiâ ab Elisabethâ in Angliâ detentam & afflictam consolatur. Vide lib. III. cap. VIII. & IX. Vita PII V.

Charissimæ in CHRISTO Filiæ nostræ, Mariæ Reginæ Scotiæ Illustri.

Charissima in CHRISTO Filia nostra, salutem & Apostolicam benedictionem. Lectis literis Maiestatis tuæ xv. Octobris die datis, quibus de toto statu calamitateque tuâ nos certiores fecisti, non secus ac debuimus animo commoti, vehementer tuis ærumnis doloribusque condoluimus: sed quia compertum habemus, Maiestatem tuam Religionis Catholicæ tuendæ conseruandæque causâ in eas quas commemorat miseras incidisse; non mediocriter dolorem nostrum ea consolatio leuauit, quod te, quam Redemptor noster beatam appellat, nos miseram agnoscere aut nominare non possumus. Quomodo enim misera es, quæ propter iustitiam tot persecutiones pertulisti? quæ pro vero Omnipotentis Dei cultu retinendo tot labores perferre,

perferre, tot adire pericula non dubitasti? quæ denique, ob Fidei Catholicæ singulare studium proprio Regno profuga, custodias & carcerem non horruisti? quæ quamquam perpeſſu difficilia, dura atque aspera ſenſus ipſe noſter humanus experiatur; tamen hæc omnia diuinæ bonitatis amor, qui ſupra omnia dulcis eſt, dulcia reddere poteſt. Quamuis igitur Maieſtatem tuam, chariſſima in CHRISTO Filia, procul à patriâ in alterius poteſtate poſitam, rerum amiſſarum dolor proprijque Regni cura conturbet: tamen quia non honor, non Regna, non temporales diuitiæ quærendæ ſunt, quæ relinquuntur; ſed ſi bona quærimus, illa diligenda ſunt, quæ perpetuò ſumus habituri; ſi autem mala pertimeſcimus, ea ſunt timenda, quæ à reprobis ſine ullo malorum ſine tolerantur; idcirco neque deſatigari malis debes, neque de bonis deſperare: potens enim Deus, qui & Dauidem de manu Saulis & Apoſtolum Paulum de ore leonis liberauit, te quoque ex tot calamitatibus ereptam in proprium Regnum reſtituere. Quod ut fiat, nos pro parte noſtrâ quibuſcumque rebus poterimus, quemadmodum antea quoque fecimus, parati ſumus adiuuare. Quâ de re cum vtriſque quos ſcribis Regibus agendum noſtro nomine diligenter curabimus; eiſque ſalutem tuam, Regniſque tui incolumitatem, ut debemus, vehementer commendabimus; parati ea omnia tibi paternæ noſtræ voluntatis officia ſemper præſtare, quæ
tuo

tuo isto forti inuictoꝥque animo, Catholicaꝥque fidei
flagrantissimo studio digna sunt : Omnipotentem-
que Deum precibus in humilitate nostri cordis ro-
gaturi, vt tibi tot calamitatibus laboranti succurre-
re, fortitudinemque in aduersis rebus perseueran-
tiamque misericorditer largiri dignetur. Datum
Romæ apud sanctum Petrum sub annulo Piscatoris,
die IX. Ianuarij, M. D. LXX. Pontificatus nostri
anno quarto.



APOSTOLICARVM
 PII QVINTI
 PONT. MAX.
 EPISTOLARVM
 LIBER QVARTVS,
 Continens Epistolas anni quinti
 eius PONTIFICATVS.
 EPISTOLA PRIMA.

ARGVMENTVM.

*Pacem cum hæreticis & rebellibus componere dissuadet,
 eosque armis compescendos esse ostendit. Vide lib. II.
 cap. VI. Vitæ PII V.*

Charissimo in CHRISTO Filio, Carolo
 Francorum Regi Christianissimo,
 PIVS Papa V.



Harissime in CHRISTO Fili noster, salutem & Apostolicam benedictionem. Etsi Maiestatem tuam nihil non piè considerare, ac prudenter facturam esse putabamus, in eâ præfertim

sertim re, quæ non minùs ad suam Regniq̃ue sui salutem, quàm ad totius Reipublicæ Christianæ vtilitatem pertineret: tamen hominum famâ constantiq̃ue rumore pernoti, quo de pace inter Maiestatem tuam & hæreticos, communes omnium Catholicorum hostes, suosq̃ue rebelles, propediem conuenturâ ad nos afferebatur; pro officio nostro, & paternâ rerum suarum curâ, prætermittere non potuimus, quin eam his nostris litteris moneremus, vt etiam atque etiam consideret, diligenterq̃ue attendat, quid agatur. Nam si vllam inter ipsam atque aduersarios suos componi posse pacem videremus, quæ vel Religionis Catholicæ causam subleuatura, vel istius Regni diuturno bello vexati tranquillitati vllò modo esset consultura; non vsque adeò aut personam nobis ab Omnipotenti Deo impostam obliuisceremur, aut officij nostri immemores essemus, vt non ad eam quamprimùm conficiendam omnem nostram operam auctoritatemq̃ue interponeremus. Sed quia nullam luci cum tenebris communionem, nullamq̃ue Catholicis cum hæreticis nisi fictam insidiisq̃ue plenam compositionem esse posse, & nos ipsi intelligimus, & Maiestas tua multoties experta est; idcirco tum de tuâ, tum de communi Reipublicæ Christianæ incolumitate fideiq̃ue Catholicæ conseruatione sollicito animo esse cogimur. Quibus etiam adducti causis Maiestatem tuam hortamur, vt potius animum

suum ipsum per se excelsum & ad omnia præclarâ paratum erigat, industriamque acuat ad istius intestini belli reliquias conficiendas, ad suas Omnipotentisque Dei iniurias iustissimis armis vlciscendas, ad Regnum denique istud nefariorum hæreticorum sceleratissimâ conspiratione labefactatum, sibi posterisque suis firmandum & stabiliendum. Cuius rei eò maiorem habere debes spem, quòd dubitare non potes, Deum ipsum nostrum, qui te suâ misericordiâ ex tot tantarumque insidiarum periculis tam sæpè eripuit, qui geminatam victoriam de tuis communibusque hostibus concessit, tibi rectis sensibus eunti, & pro Religionis Catholicæ causâ pugnanti affuturum esse. Quòd si ille pro nobis, quis contra nos? In quo oportet Maiestatem tuam nihil nouum aut inusitatum agere; sed quod hucusque fecit, id etiam in posterum facere: hoc est, relictis omnibus terrenarum rerum siue cogitationibus siue voluptatibus, quibus à rebus agendis auocari posset, in hanc vnâ curam incumbere, neque aures suas quorumuis hominum alia suadentium sermonibus præbere; sed nostris paternis consiliis acquiescere, charissimæque nobis in CHRISTO Filiae Reginae Christianissimæ matris suæ, ceterorumque qui Maiestati tuæ ex animo consultum volunt, verba audire: multa enim ac varia, isti quâ Maiestas tua est ætati, à pessimis consultoribus pericula impendent: quæ non aliter, quàm Dei Omnipotentis

nipo-

nipotentis ope, fidelissimisq; illorum consiliis, vitare poterit. Hæc abundantia quadam nostri erga eam paterni amoris ad Maiestatem tuam scripsimus: quæ quoniam ab optimo animo, salutis dignitatisque tuæ cupidissimo, profecta sunt, Maiestati tuæ non iniucunda fore sperauimus; cui ab Omnipotenti Deo perfectam, cumulatissimamque de communibus hostibus victoriam precamur. Datum Romæ apud S. Petrum sub annulo Piscatoris, die XXIX. Ianuarij, M. D. LXX. Pontificatus nostri anno quinto.

EPISTOLA II.

Eiusdem Argumenti.

Charissimæ Catharinæ, Francorum Reginæ Christianissimæ.

Charissima in CHRISTO Filia nostra, salutem & Apostolicam benedictionem. Quamuis eximia tua in Deum Omnipotentem pietas, nobis in tantâ rerum istius Regni perturbatione ac varietate perspectissima, dubitare nos vetet, quidquam isthic iudicio nisi maturo religiosoque consilio actum iri: tamen constanti hominum famâ nuntiisque permoti, quibus de pace inter charissimum natum tuum, & hæreticos Dei hostes, istiusque Regni rebelles, propediem conuenturâ huc afferebatur; pro officio nostro paternâque rerum istarum sollicitudine prætermittere non potuimus, quin

Ll 3 super

super eâ re sententiam nostram apertè, vt solemus & debemus, ad Maiestatem suam scriberemus. quod cùm fecissemus, visum est nobis eâdem de re ad Maiestatem quoque tuam scribere. Nos si aliquam inter Christianissimum Regem, & nefarios hæreticos, communes hominum Catholicorum hostes, pacem esse posse cognosceremus, quæ & Catholicæ Fidei causam in meliore statu collocatura, & istius Regni tranquillitati consultura esset; non ita pacis nomen horremus, quam ab Omnipotenti Deo tantoperè nobis commendatam esse meminimus, vt non ipsi ante alios omnes illius auctores fieri vellemus. Sed, sicut compertum nobis est nullam esse satanæ cum filiis lucis communionem; ita inter Catholicos quidem & hæreticos nullam compositionem, nisi fictam fallaciisque plenissimam, fieri posse, pro certo habemus. Quâ de re ne Maiestas tua quidem dubitare debet, quæ idipsa multoties in istâ improbissimorum hominum hæreticorum nefariâ coniuratione experienciâ didicisse potuit. Quæ cùm ita sint, Maiestatem tuam, cuius de Religionis Catholicæ causâ sensus nobis probatissimus est, cuiusque, post Deum, virtuti, prudentiæ, diuiniqûe honoris zelo omnes prosperos rerum istarum successus acceptos referimus; superuacaneum quodam modo videtur esse, quidquam vel monere vel hortari: sed tamen, quia vehementer nos nobilissimi istius Regni cura sollicitos

habet,

habet, & Maieſtati tuæ hæc paternæ noſtræ voluntatis officia pro ſuâ erga nos ſanctamque Sedem reuerentiâ gratiſſima eſſe compertum habemus; idcirco eam hortamur, vt, quemadmodum hucusque fecit, bono fortiq̃ue animo ſit, neu curis laboribꝫq̃ue pro Fidei Catholicæ conſeruatiōe Regniq̃ue iſtius incolumitate ſuſcipiendis defatigetur; Regemq̃ue ipſum Chriſtianiſſimum natum ſuum, ad conſiciendas inteſtini belli reliquias, ad iuſtiſſimas de communibus hoſtibus pœnas ſumendas, ad firmandum ſibi poſterisq̃ue ſuis Regnum nefariorum hæreticorum impio bello labefactatum, incendat atque hortetur: &, quoniam illi, quâ nunc Chriſtianiſſimus Rex eſt, ætati multa à peſſimis conſultoribus pericula imminent, maternâ ſolicitudine prouideat, ne illius animus, aut cuiuſquam peruerſis ſuaſionibus à rerum gerendarum curâ ad voluptatis illecebras traducatur, aut aliorum potiùs quàm tua conſilia audiat. Speramus enim, ſi hæc fecerit, tuiſq̃ue fideliffimis monitis obtemperauerit, Omnipotentem Deum, qui illum è tot inſidiarum periculis ereptum incolumem ſeruauit, pleniffimam illi Maieſtatiq̃ue tuæ, vtriuſque pietate, de communibus hoſtibus victoriam pro ſuâ miſericordiâ daturum. Quod vt faciat, nos certè aſſiduis precibus ab eo pètere non deſiſtemus. Datum Romæ apud S. Petrum ſub annulo Piſcatoris, die XXIX. Ianuarij, M. D. LXX. Pontificatus noſtri anno quinto.

EPISTO-

EPISTOLA III.

Eiusdem Argumenti.

Henrico Duci Andegauensi.

Dilecte Fili, nobilis vir, salutem & Apostolicam benedictionem. Cogit nos hominum fama, quæ de pace inter charissimum in CHRISTO Filium nostrum Regem Christianissimum fratrem tuum, & hæreticos ipsius rebelles, communesque omnium Catholicorum hostes, propediem conuenturâ constanti rumore huc affertur; pro commissio nobis, quamvis indignis, Apostolicæ seruitutis officio providere, ne quod in tantâ re, quæ non minùs ad istius Regni, quàm ad totius Reipublicæ Christianæ rationes pertinet, debitum paternæ nostræ solitudinis munus prætermittamus. Hæc nos compulit caussa, vt ad Nobilitatem tuam has litteras scriberemus, quibus idem illi, quod Regi Christianissimo fratri suo, significamus, nos quia exploratum habemus nullam Catholicis cum hæreticis esse communionem, idcirco illud etiam intelligere, nullam inter Maiestatem suam Christianissimam & hæreticos pacem nisi simulatam insidiisque plenissimam esse posse. Id ipsum Nobilitatem quoque tuam pro suâ pietate cognoscere non dubitamus; quæ eorundem hæreticorum perfidiam in isto bello

lo

lo administrando experta, quid de illis iudicandum sit, facile statuere potest. Quia verò te potissimum decet Religionis Catholicæ causam Regniq̃ue istius incolumitatem adiuuare, qui vtramque aduersus improbissimorum hæreticorum nefarium bellum iustissimis armis magnâ cum tuâ laude tutatus es; idcirco Nobilitatem tuam hortamur, vt ne quid ipsa de suâ in persequendis istius intestini belli reliquiis diligentia remittat, Regemq̃ue ipsum Christianissimum fratrem suum ad idem excitare atque hortari ne desinat. Nihil certè facere potest, quo erga Deum Omnipotentem gratior iudicari possis; qui ideò Nobilitatis tuæ gloriam geminis victoriis illustrauit, vt esset, qui suas suorumq̃ue iniurias non minùs piis aduersus hæreticos, quàm iustis aduersus rebelles armis vlcisceretur. Quòd siqui tibi aliud persuadere conantur, hos pro comperto habebas, non modò tuæ Regisq̃ue Christianissimi fratris tui salutis hostes esse, sed etiam gloriæ tuæ inuidere, Regnumq̃ue istud in seruitutem redigere conari. Quod ne fiat, debes, quantum in te est, operam dare, quemadmodum te semper facturum esse pro certo habemus. Datum Romæ apud sanctum Petrum sub annulo Piscatoris, diē xxix. Ianuarij, M.D.LXX. Pontificatus nostri anno quinto.

EPISTOLA IV.

Eiusdem Argumenti.

Carolo Francorum Regi Christianissimo.

Charissime in CHRISTO Fili noster, salutem & Apostolicam benedictionem. Pro Apostolicæ seruitutis officio ab Omnipotenti Deo nobis, quamuis indignis, commissio, animi nostri conscientiaæ eâ quâ possumus ratione satisfacere cupientes, prætermittere nullo modo debemus, quin Maiestatem tuam his nostris litteris paternè moneamus, vt in eâ pace, quæ inter te atque hæreticos Dei hostes, tuosque rebelles, vel iam conuenisse vel propediem conuentura esse dicitur, conficiendâ etiam atque etiam diligenter videat, quid agat. Nos enim ab omnibus priuatarum rerum nostrarum rationibus liberi, solum Dei causam, tuamque & istius Regni salutem, præ oculis habentes, exploratâ re, id quod certissimum simul ac verissimum est monemus, talem pacem, non pacem, sed maiorum istius Regni malorum causam fore. Hoc si qui sunt qui aliter credant, quique Maiestati tuæ secus persuadere conentur, hi, credat nobis, aut ipsi se decipiunt, aut Maiestatem tuam assentatione corrupti decipiunt: qui tametsi falso vtilitatis nomine obiecto, Religionis Catholicæ Maiestatisque tuæ insuper

per existimationis obliti, neque Deum neque Maieſtatem tuam reuerentur; tamen illud ſaltem conſiderare deberent, cuiusmodi pace conficiendâ Maieſtatem tuam infeſtiſſimos ſibi hoſtes ex aperto latrocinio in domum ſuam non ſine maximo inſidiarum periculo eſſe accepturam. quibus etiamſi, (quod non ſpectamus) ad inſidiandum Maieſtati tuæ voluntas deeſſet; tamen Deus, iuſto diuinæ ſuæ prouidentię iudicio, eam illis mentem immittet, vt hac maximè ratione Religionis ſuæ præ utilitate propriâ neglectæ pœnas expoſcat. Quantum autem, quamque horribile ſit in Dei viuentis manus incidere, qui non ſolum corruptos hominum mores bellis emendare, ſed propter Regum populorumque peccata Regna conterere, eaque ab antiquis Dominis ad alios transferre ſolet, id maniſteſtius eſt, quàm vt hoc exemplis docere neceſſe ſit. Quæ, vt cetera deeſſent omnia, tamen ad faciendam huius rei fidem, vel ipſa ſola temporibus noſtris Græcia ſufficeret; quæ propter Religionis Catholicæ contemptum, amiſſo veteris nobilitatis ſplendore, in duriffimam infidelium ſeruitutem eſt redacta. Itaque Maieſtatem tuam hortamur, & per Omnipotentem Deum obteſtamur, vt ceterorum exemplis edocta, diligenter cauere velit, ne aduerſus ſe Regnumque ſuum diuinæ animaduerſionis furorem exſciſcitet. Hæc nos Maieſtatem tuam, pro officio noſtro, proque illâ quâ ipſam in Domino

prosequimur paternâ charitate, monere volumus: quæ si paternis nostris monitis acquieuerit, erit id cùm Maiestati tuæ vtilissimum, tum nobis gratissimum: sin minùs, nos tamen in malis dolorem nostrum, communionis Reipublicæ Christianæ causâ susceptum, hoc ipso saltem consolabimur, quòd nullum eorum officiorum prætermiserimus, quæ pro susceptâ communis omnium patris personâ Maiestati tuæ in eiusmodi re præstare debebamus; cetera quæ à nobis prouideri non possunt, diuinæ misericordiæ gubernanda relicturi, Deumque Omnipotentem pro Maiestatis tuæ Regniq̃ue istius incolumitate, quod vnum nobis superest, humiliter rogaturi. Datum Romæ apud S. Petrum sub annulo Piscatoris, die XXIII. Aprilis, M.D.LXX. Pontificatus nostri anno quinto.

EPISTOLA V.

Eiusdem Argumenti.

Carolo Cardinali à Lotharingiâ.

Dilecte Fili noster, salutem & Apostolicam benedictionem. Quamuis de pace, quæ inter charissimum in CHRISTO Filium nostrum Francorum Regem Christianissimum & hæreticos Dei hostes, Maiestatisque suæ rebelles, cùm sæpè aliàs, tum quàm maximè hoc tempore conuentura

esse

esse existimatur, quid sentiamus, liberè ad Maiestatem suam, & ad circumsp̄ctionem quoque tuam antea scripserimus; tamen, cum intelligamus nihilominus eam in præsentiâ conuenturam esse existimari, prætermittere noluius, quin circumsp̄ctionem tuam, cuius & consilio & prudentiâ omnia istius Regni negotia administrari compertum habemus, moneamus, ut etiam atque etiam videat, & diligenter consideret, quid agatur. Nos enim ab omnibus, aut rerum nostrarum, aut cuiusquam alterius priuatis rationibus liberi, solamque Religionis Catholicæ causam, cum Regis Christianissimi salute atque vtilitate istius Regni coniunctam, præ oculis habentes, re exploratâ iudicamus, nullam Catholicis cum hæreticis pacem nisi fictam aut simulatam esse posse; sed sub nomine specioso pacis insidiosissimum proditiōis fraudisque maleficiū latere: quo illi Christianissimum Regem nihil tale metuentem, aut de improviso adoriri, aut dolis ac fallaciis circumuenire, Regnoque & vitâ spoliare cupiunt. Hoc autem si qui sunt qui aliter credant, eos nos aut præteritarum istius Regni rerum parum memores ipsos falli, aut Maiestatem suam fallere velle arbitramur. Regem illum Christianissimum opprimere, & perfidiosè circumuenire, non pacem habere volunt. Quod ex eo Maiestas sua cognoscere poterit, quòd quotiescumque auxilia externa habere poterunt, ipsi primi pacis fœdera rupturi sint.

sint. Quâ quidem pace quid Christianissimo Regi, totique isti Regno perniciosius aut periculosius accidere potest? quâ confectâ, primum quidem Religioni Catholicæ, quod maximum accipere potest, vulnus infligitur: deinde eiusdem Regis dignitati & existimationi turpissima ignominia labes aspergitur: postremò infestissimis hostibus ad occultas insidias & coniurationes aditus aperitur. Quibus quidem audendis rebus, etiamsi illis voluntas deesset; tamen Deus iusto providentiæ suæ iudicio eam illis mentem immittet, ut hac maximè ratione neglectæ suæ Religionis pœnas, ab his qui eam neglexerunt, exposcat. Quocircâ circumspectionem tuam hortamur, & per Deum Omnipotentem obsecramus, ut memor pietatis, quam Omnipotenti Deo Religioniq̃ue Catholicæ debes, memor fidei quam turbulentissimis istius Regni temporibus egregiam præstitisti semper, memor eius quam sustines personæ, eiusmodi de pace consilia atque actiones disturbare ac disijcere coneris, nec vlllo modo aut Catholicam Fidem, talem tantamq̃ue in isto Regno plagam accipere, aut Christianissimi Regis salutem, istiusq̃ue Regni incolumitatem in tale tantumq̃ue discrimen adduci patiaris. Erit hoc circumspectionis tuæ officium tali tempore Omnipotenti Deo acceptissimum, fideiq̃ue tuæ constantia dignissimum; nobis autem ipsis, qui de istius successu pacis pro Pastoralis nostræ sollicitudine maximè labo-

laboramus, gratissimum. Ad quod pluribus te quoque verbis hortaremur, nisi pro comperto habemus, te in eo quod ad Religionis Catholicæ defensionem, Regisque Christianissimi salutem tantoperè pertinet, nullas officij tui partes esse prætermisurum. Datum Romæ apud S. Petrum sub annulo Piscatoris, die XIV. Augusti, M.D. LXX. Pontificatus nostri anno quinto.

EPISTOLA VI.

Ineunda cum hæreticis perniciose pacificationis consilia reprobat; Cardinalemque Borbonium, ut id, quoad eius fieri possit, impediat, Catholicamque Religionem strenuè pro munere suo protegat, hortatur.

Carolo Cardinali Borbonio.

Dilecte Fili noster, salutem & Apostolicam benedictionem. Quod pro Pastoralis officio nobis, quamvis indignis, ab Omnipotenti Deo commisso, sedulò fecimus, ut, quotiescunque de pace inter charissimum in CHRISTO Filium nostrum Francorum Regem Christianissimum & hæreticos Dei hostes Maiestatisque suæ rebelles conuenturâ ad nos allatum est, de eâ ipsâ quid sentiremus, liberè ad Maiestatem suam, & circumspeditionem quoque tuam, scriberemus; id etiam hoc tempore, quo eandem pacem conuenturam esse intelligi-

telligimus, prætermittere nullo modo potuimus: nam si quis est, qui aliquam inter Christianissimum Regem & nefarios hæreticos, communes omnium Catholicorum hostes, pacem veram ac stabilem conuenire posse existimet; is aut rerum istius Regni præteritarum immemor seipsum imprudenter decipit, aut earum memor Maiestatem suam Christianissimam perfidiosè decipit. Vt enim nulla potest esse satanæ cum filiis lucis communio; ita nec inter Catholicos quidem & hæreticos vlla pacis compositio, nisi ficta fallaciarumque plenissima, fieri potest. Quâ de re nemo sanæ mentis est qui dubitare possit, qui modò improbissimorum hæreticorum nefarias coniurationes contra Regis Christianissimi caput Regniq̃ue incolumitatem antea sæpè initas recorderetur. Opprimere illum Regem sub falso speciosoque pacis nomine, eumque Regno ac vitâ spoliare, non pacem habere volunt. Quod ex eo Maiestas sua cognoscere poterit, quòd quotiescumque illi auxilia externa habere poterunt, primi pacis fœdera rupturi sunt: quibus audendis rebus, etiamsi illis, quod non putamus, voluntas deesset; tamen Deus iusto prouidentiaæ suæ iudicio eam illis mentem immittet, cùm viderit in huiusmodi pace, quâ Religioni Catholicæ, maximum quod accipere potest, vulnus infligitur, nullam diuini sui honoris ab his qui debebant habitam esse rationem. Quid enim aliud in tali pace, præterquam

quam Religionis Catholicæ in isto Regno interitus, Regis Christianissimi dignitatis & existimationis labes, eiusdemque salutis manifestum discrimen continetur? Quæ cum ita sint, circumspeditionem tuam hortamur, & quo maiore animi nostri studio possumus requirimus, ut pacis tam ignominiosæ, tamque perniciosæ consilia & actionem totam impedire ac disturbare velit; & his qui illam Regi Christianissimo persuadere conantur, fortiter se opponere studeat: hoc enim officium primò quidem Omnipotenti Deo debet, de cuius Religione sanctissimâ vel retinendâ vel amittendâ in isto Regno agitur; deinde Christianissimo Regi, cuius Maiestas in rerum suarum gubernatione tuo potissimum consilio tuâque fide nititur; postremò etiam personæ, quam sustinet. Quam quidem ad rem pluribus quoque te verbis hortaremur, nisi hæc ipsa satis esse putaremus, nisi que firmiter speraremus, te in his rebus, quæ ad Fidei Catholicæ Regisque Christianissimi salutem ac dignitatem tantoperè pertinent, nullas officij tui partes esse prætermittarum. Datum Romæ apud sanctum Petrum sub annulo Piscatoris, die XIV. Augusti, M.D. LXX. Pontificatus nostri anno quinto.

EPISTOLA VII.

Factam inter Regem & rebelles hæreticos pacem, et Regi Regnoque, & Catholicæ Religioni infausam & perniciosam improbat; Cardinalemque ad munus suum in ipsius Religionis tutelâ strenuè præstandum cohortatur.

Carolo Cardinali Borbonio.

Dilecte Fili noster, salutem & Apostolicam benedictionem. Non tam facilè verbis explicare circumspectioni tuæ animi nostri dolorem possumus, quem ex istius inter Christianissimum Regem & hæreticos pacificationis nuntio accepimus, quàm tu, pro tuâ prudentiâ, id existimare potes: quantum enim nobis & bonis omnibus dolenda, quàm periculosa, quamque Maiestati suæ Christianissimæ pœnitenda sit ea pacificatio, in quâ victi hæretici victori Regi tam nefarias tamque exitiales Catholicæ Religioni leges imposuerunt, sine lacrymis exequi non possumus. Qui quidem Rex, utinam, id quod verissimum manifestissimumque simul est, intelligere potuisset, maiora sibi confectâ hac pace ab hæreticorum occultis insidiis atque fallaciis, quàm, durante bello, ab eorundem aperto latrocinio pericula imminere; numquam in eam sententiam adductus esset, ut vllam cum perfidissimis

fissimis hominibus, infensissimisque hostibus, pac-
tionem sibi tutam esse existimaret. Quò magis
verendum est, ne & ipsum Regem, & eos qui hu-
iusmodi pacificationi sunt assensi, dederit Deus in
reprobum sensum, vt videntes non viderent, & au-
dientes non audirent, ea quæ & videnda & audien-
da fuerunt. Quæ quamuis ita sint, & peccatis no-
stris facientibus, eas quas numquam putaueramus,
in Christianissimo Regno Religionis Catholicæ la-
bes videre cogamur; non tamen animo deficimus,
sed, fortitudinem nostram ad Deum custodimus,
memores eius nos vices in terris, quamuis indignos,
gerere, qui custodit veritatem in sæculum, neq; con-
fundit sperantes in se. Quò autem peiore loco istius
Regni res sunt, quàm quo adhuc fuerunt, eò magis
te & reliquos, qui in eo sunt, principes viros, & or-
thodoxæ Fidei studiosos excitandos, officijque sui
admonendos esse putamus. Ex quorum numero
cùm circumspeditionem tuam nemini pietate diui-
niq; honoris zelo concedere pro comperto habea-
mus; faciendum nobis esse existimauius, vt eam
turbulentissimo istius Regni tempore ad fidem ser-
uandam, ad resistendum hæreticis, ad bonum con-
tra eos certamen certandum, his litteris hortare-
mur. Meminisse autem debes, te vnum esse ex nu-
mero Venerabilium Fratrum nostrorum, qui è no-
stro gremio, & huius sanctæ Catholicæ ac Roma-
næ Ecclesiæ sinu prodieris, qui te sanctissimo iure-

iurando adhibito ad profundendum pro eius defensione sanguinem obstrinxeris: idcirco enim purpuream vestem indueris, ut vel hoc ipso signo eius charitatis admonearis, quam in defendendâ orthodoxâ Religione Redemptori nostro, atque eius sanctissimæ Ecclesiæ, cuius honorabile membrum factus es, præstare debes. Hæc igitur cogitans, & in eo fiduciam tuam reponens, cuius dextera inuenitur super omnes qui illum oderunt, fac in illo virtutem, vocationem tuam firmiter tene, Catholicam Religionem quouis periculo proposito defende, hæreticorum conatibus, quantum potes, obsiste; Omnipotentis Dei causam sustine, & quibus potes auxiliis iacentem in isto Regno Religionis Catholicæ statum erigere stude. Quod si feceris, non solum laboris tui fructum, æternæ præmii remunerationis, à Redemptore nostro accipies; sed etiam apud homines gloriam & laudem consequeris: si verò (quod absit) officium tuum, tam necessario tempore, quavis de causâ prætermiseris; non ideo tamen deerunt Omnipotenti Deo viæ, quibus causam suam defendat, præsertim multorum, qui in isto Regno reliqui sunt, hominum populorumque Catholicorum precibus adiuuantibus. Tu verò, nisi hoc tempore Deo ac Religioni, personæque tuæ, atque huic sanctæ Sedi Apostolicæ, quod debes persolveris; frustra ad hoc agendum aliud tempus requisitus es. Datum Romæ apud S. Petrum sub an-

nulo

nulo Piscatoris, die XXIII. Septembris, M.D.LXX.
Pontificatus nostri anno quinto.

EPISTOLA VIII.

Eiusdem Argumenti.

Carolo Cardinali à Lotharingâ.

Dilecte Fili noster, salutem & Apostolicam benedictionem. Certiores facti de pacificatione inter charissimum in CHRISTO Filium nostrum Francorum Regem Christianissimum & hæreticos initâ (si modò pacificatio appellanda est ea, in quâ tam nefariæ tamque exitiales Religioni Catholicæ leges ab hominibus improbissimis Maiestati suæ Christianissimæ sunt impositæ) magnum cepimus animo dolorem ; talem scilicet, qualem par fuit, nos ex tantâ Regni istius antea non minùs rei militaris, quàm Religionis laude florentissimi calamitate accipere. Nos enim ita existimamus, maiorem ex tali pacificatione Regnum istud plagam accepisse, quàm quantam superioribus annis acceperit, ex quo tempore intestinis hæreticorum seditionibus laborare incepit. Regi autem ipsi Christianissimo maiora nunc ab hostium fraude atque insidiis, manente tali pace, imminere pericula arbitramur, quàm ea fuerunt, in quibus, durante bello, versari visus est. Quamuis autem, peccatis

nostris facientibus, in eum locum adducta res sit, ut eas, quas numquam putaueramus, in Regno Christianissimo Religionis Catholicæ labes videre cogamur; non tamen idcirco animo deficimus, memores nos in eo spes nostras omnes collocatas habere, cuius vices in terris quamuis indigni gerimus: in quo quī sperant, non confunduntur ab expectatione suā. Sed quò peiore loco res istius Regni sunt, quàm quo hucusque fuerunt, eò te & reliquos, qui in eo sunt, principes viros, Religionis Catholicæ studiosos, excitandos monendosque arbitramur, ut orthodoxam Fidem, hæreticorum malitiā & Catholicorum segnitie quotidie in deterius labentem, quantum est in vobis, sustentetis, fidem seruetis, bonum certamen aduersus nostri Redemptoris hostes certetis. Quod officium si quis vnumquam Omnipotenti Deo atque huic sanctæ Sedi Apostolicæ præstare debuit, tu certè is es; propterea quòd à Deo tot spiritualibus temporalibusque bonis ornatus, à sanctâ autem hac Sede Apostolicâ tot honoribus beneficiisque sis affectus, ut æquum sit, eam his turbulentissimis temporibus potissimum à tuâ virtute atque constantiâ sibi præsidium ac solatium expectare. Meminisse debes, te vnum esse è numero Fratrum nostrorum, qui è gremio nostro, & Romanæ Ecclesiæ omnium Ecclesiarum magistræ sinu prodieris: qui idcirco purpuream istam vestem indueris, ut ab eâ illius iurisiurandi admonearis, quod

quod sanctæ huic Romanæ Ecclesiæ, eiusque Maximis Pontificibus præstitisti; quo scilicet te ad profundendum pro eâ sanguinem, si opus fuerit, obstrinxisti. Hoc igitur cogitans, & in eo spem tuam repositam habens, qui super timentes se misericordiam suam corroboravit, sustine Dominum: honorificum ministerium tuum & vocationem tuam ne deseras: Catholicam fidem, quouis proposito periculo, constanter defende: hæreticorum conatibus, quantum potes, resiste. Quod si feceris, quemadmodum te facturum esse pro certo habemus, non solum ab Omnipotenti Deo laboris tui fructum, æternæ remunerationis mercedem, accipies, sed etiam apud homines tam præclaræ actionis nomine laudem maximam consequeris: si verò, quod absit, aliter feceris, illud cogita, res istius Regni quamquam pessimo loco sint, non adeò tamen desperatas esse, ut eas iacentes ac ferè oppressas, misericors & miserator Dominus, multorum qui adhuc in eodem Regno reliqui sunt, fidelium Catholicorumque hominum ac populorum precibus exoratus, excitare atque erigere non possit: cuius te coadiutorem non fuisse, tam tibi ignominiosum in posterum, quàm omni quo vixeris tempore ærumnosum est futurum. Nam Deo quidem, cuius inuestigabiles viæ sunt, non deerit facultas vel ex ipsis lapidibus filios Abrahæ suscitandi. Tu, si hoc tempore officium vocationemque tuam deserueris, nec
aliud

aliud tempus habere poteris, in quo Religioni Catholicæ, personæ tuæ, nobis atque huic Sedi Apostolicæ, quod debes, persolvere possis. Hæc ideo pluribus verbis ad circumspeditionem tuam scripsimus, quia id & rei ipsius magnitudo postulare nobis visa est, & quia nullas officij nostri partes ipsi prætermittere voluimus, qui te ad id faciendum hortabamur. Datum Romæ apud S. Petrum sub annulo Piscatoris, die XXIII. Septembris, M. D. LXX. Pontificatus nostri anno quinto.

EPISTOLA IX.

Episcopum Herbipolensem hortatur, ne quempiam à Catholicâ Religione alienum, aut hæresis suspectum, in illius Ecclesiæ Sacerdotum Collegium recipi permittat.

Ven. Fratri N. Episcopo Herbipolensi.

Venerabilis Frater, salutem & Apostolicam benedictionem. Quia nuper ad nos allatum fuit, quosdam à fidei Catholicæ professione alienos, conatos esse ad Ecclesiæ tuæ Capitulum Collegiumque per factionem obrepentes aspirare; idcirco tum præsentis indignitate rei, tum futuri quoque periculi magnitudine commoti, dilectis Filiis Capitulo eiusdem Ecclesiæ litteras dedimus, quibus eis districtè præcipientes mandauimus, ne quem à Religione Catholicâ alienum, siue alioquin hæresis suspectum, quantumuis illustrem aut potentem,

in Capitulum Collegiumque istius Ecclesiæ vllō modo recipiant; eā de re vīsum nobis est ad Fraternitatem quoque tuam scribere, eamque, vt facimus, in Domino hortari, vt pro Pastoralī sollicitudine quam debet Ecclesiæ suæ, hoc nostrum mandatum obseruari custodiriq̃ue curet. Contra quod si quid factum fuisset secūs, fieriue contigerit, id omne irritum atque inane esse decernimus. Facile omnino est, ad hæreticorum prauitatem præcauendam, malorum initiis subsistere; sed si patefacto semel ipsorum improbitati aditu corroborata fuerint, difficillimum tot tantarumque hæresum nascentibus malis occurrere; quibus dein confirmatis medicinam inuenire non possumus. Hoc igitur & exemplo admonitus, & fraternis nostris hortationibus excitatus, in eam curam sedulò incumbere, vt inimico homini ad superseminanda zizania omnes vias omnesque aditus intercludas: à quo quidem officio Ecclesiæ tuæ præstando nullius te aut periculi denuntiatio deterreat, aut quorumuis potentum vel offensio reuocet, vel gratia illiciat: memor, si quid secūs feceris, aut quod faciendum fuit omiseris, de eo æterno illi Iudici reddendam esse rationem; qui non secundum faciem iudicaturus est, sed ex singulorum merito vnumquemque nostrum æternā vel pœnā vel præmio remuneraturus. Datum Romæ apud S. Petrum sub annulo Piscatoris, die XXIII. Februarij, M.D.LXX. Pontificatus nostri anno quinto.

EPISTOLA X.

*Comites Catholicam Religionem contra Elisabetham in Angliâ vindicare conantes benignè consolatur, eorum-
que pios conatus & studia valdè commendat. Vide
lib. III. cap. IX. Vitæ PII V.*

Dilectis Filiis, Thomæ Comiti Northumbriæ, & Carolo Comiti VVestemerlandiæ in Angliâ.

Dilecti Filij, nobiles viri, salutem & Apostolicam benedictionem. Ex litteris vestris VIII. Nouembris die ad nos datis, quibus XVI. Februarij ad nos allatis subitò rescripsimus, istius florētissimi Regni misérias & calamitates, ne antea quidem nobis incognitas, certius subtiliusque cognoscentes, eo animi dolore affecti sumus, quem & eorum malorum quæ in vobis patimur indignitas, & paternus noster erga vos ceterosque Catholicos in isto Regno viros animus nobis afferre debuit. Nam præter illud commune Pastoralis charitatis officium, quo in omnium Christi fidelium, singularumque Prouinciæ in quibus nomen colitur Christianum, salute vel calamitate lætari aut dolere debemus; præcipuâ quadam amoris beneuolentiæque prærogatiuâ erga istud Regnum afficimur, quod beatissimi Gregorij Romani Pontificis

cis prædecessoris nostri post Deum Omnipotentem operâ atque industriâ à cultu lignorum ac lapidum aliquando ad Christianam Fidem conuersum, moribus doctrinâque Catholicâ per idoneos viros isthuc ab eo missos institutum esse meminimus; quodque egregiam fidem deuotionisque sinceritatem Apostolicæ Sedi præstare consueuerat. Itaque quantoperè vestris Regniq̃ue istius malis his, quæ eisdem litteris non minùs verè quàm miserabiliter deplorauiſtis, doleamus ac conturbemur, non facile verbis consequi possemus. Dolemus tot tantaq̃ue nefariarum hæresum venena, tamq̃ue mortifera Reipublicæ Christianæ vulnera, in nostri Pontificatus tempora potissimùm incidisse: conturbamur, quia de vestro ceterorumq̃ue Catholicorum periculo solliciti esse cogimur. sed tamen cùm eius orationis efficaciam recordamur, qui pro B. Petro, ne eius deficeret fides, rogauit, quiq̃ue Ecclesiam suam in tribulatione dilatans, eò admirabiliùs occulti sui consilij prouidentiâ gubernat, quò magis eam perturbationum fluctibus cernit agitari; non desperamus, quin quod aliis temporibus factum esse accepimus, idem nostris quoque, adiuuante Domino, fieri possit: vt quæ hæreticorum inualeſcente persecutione sæpè visa fuerit conculcari, hæc eadem, Domino cum eâ signum in bonum faciente, in antiquæ felicitatis statum redeat; & in eo incrementum accipiat, in quo visa sit detrimentum pertulisse. Ecce

enim nunc, qui ex veteribus noua, & ex nouis vetera facit, Dominus noster IESVS CHRISTVS, per vos charissimos viros non minùs generis nobilitate quàm Catholicæ pietatis studio insignes, veterem Ecclesiæ Romanæ Regniq̃ue istius coniunctionem renouare & confirmare fortasse constituit; ac propterea mentem istam vestræ Fidei Catholicæ zelo dignissimam vobis iniecit, vt vos, Regnumq̃ue istud ex turpissimâ muliebris libidinis seruitute ereptum, ad pristinam huius sanctæ Romanæ Sedis obedientiam reuocare tentaretis. Quem quidem pium ac religiosum animi vestri conatum, sicut æquum est, debitis in Domino laudibus commendantes, & eâ, quam petitis, benedictione nostrâ prosequentes, Nobilitates vestras ad nostram huiusq̃ue sacrosanctæ Sedis, cuius se auctoritati subijciunt, potestatem tutelamq̃ue confugientes, eâ quâ decet benignitate recipimus atque excipimus: hortantes vos in Domino, & quo maiore possumus animi nostri studio rogantes, vt in hac tam egregiâ voluntate laudabiliq̃ue instituto vestro constanter perseueretis: pro comperto habentes, Omnipotentem Deum, cuius perfecta sunt opera, quiq̃ue vos ad benè de Religione Catholicâ in isto Regno merendum excitauit, vobis auxilio suo affuturum. Quòd si etiam in asserendâ Catholicâ Fide, huiusq̃ue sanctæ Sedis auctoritate, mors esset vobis optetenda, profundendusq̃ue sanguis; multò præstat

stat pro Dei confessione gloriosæ mortis compendio ad æternam vitam conuolare, quàm turpiter & ignominiosè viuentes impotentis feminæ cupiditati cum animæ vestræ detrimento seruire. Nolite enim putare, dilecti Filij in CHRISTO, malè cum illis vel Episcopis vel Principibus istius Regni Catholicis, quos nominatis, actum esse: qui, quoniam à Fidei Catholicæ confessione deficere noluerunt, aut in carceres coniecti aut aliis suppliciis immerentes affecti sunt: horum enim constantiam, etiam nunc recenti, vt arbitramur, beati Thomæ Archiepiscopi Cantuariensis exemplo confirmatam, nemo satis pro dignitate laudare potest. Hanc eandem vos quoque imitati, forti constantique animo estote, nec vllorum periculorum denuntiatione aut minis ab incepto desistite: potens est enim Deus, in quo spem vestram repositam habere debetis, qui Pharaonis currum & exercitum eius proiecit in mare, aduersariorum suorum vires potentiamque frangere, sic vt per vos pristina Religio & antiqua dignitas isti Regno restituantur. Quod quidem vt fiat, nos non solum his quæ postulatis apud eos quos vultis Christianos Principes fungendis officiis adiuuabimus; sed etiam eâ pecuniæ summâ in præsentia conferendâ, quam pro nostris viribus petentibus vobis suppeditare poterimus; quemadmodum à dilecto Filio Roberto Rodulfo clariùs & copiosius intelligetis; daturi quoque operam, vt aliquantò etiam

maiolem, quàm quantum virium nostrarum imbecillitas ferre potest, conferamus, piumque conatum vestrum omnibus, quibus cum Domino poterimus rebus facultatibusque nostris, prompto atque alacri animo adiuuemus. Datum Romæ apud sanctum Petrum sub annulo Piscatoris, die xx. Februarij, M.D.LXX. Pontificatus nostri anno quinto.

EPISTOLA XI.

Regem Francorum ad sociale fœdus contra Turcas ineundum cohortatur. Vide lib. IV. Vitæ PII V.

Carolo Francorum Regi Christianissimo.

Charissime in CHRISTO Fili noster, salutem & Apostolicam benedictionem. Præsentium temporum calamitates, perturbatissimumque Reipublicæ Christianæ statum, & tot mortifera Religionis Catholicæ vulnera intuentes, tanto animi dolore afficimur, ut vitam ipsam, quam ducimus, acerbam nobis & grauem experiamur: quippe iam inde à principio suscepti à nobis summi Apostolatus officij, Respublica Christiana, peccatis nostris id facientibus, tot ubique bellorum incendiis exarsit, tot crudelissimorum hæreticorum aduersus proprios Principes nefariis coniurationibus vexata est, & adhuc vexatur, ut Catholica ipsa Fides, & Christiana Religio in extremum discrimen adducta,

cta, numquam conquietura esse videatur. Impletum temporibus nostris Regij Prophetæ videmus oraculum, atque aduersus Omnipotentem Deum, & Christum Redemptorem nostrum, sanctissimamque illius Ecclesiam, omnes qui sunt hæreticos, schismaticos atque infideles conuenisse cernimus. Quem diuini honoris zelo vel mediocriter accensum, quem communis Christianorum populorum salutis parum etiam studiosum, tot tantorumque malorum obiecta mentis oculis facies non commoueret? Quali igitur quantoque animi mœrore nos affici putas, ad quos, propter totius orbis Christiani salutem animarum ab Omnipotenti Deo nobis commissam, talium tantorumque malorum dolor & cura præcipuè pertinere dignoscitur? quis enim infirmatur, & nos non infirmamur? quis scandalizatur, & nos non vrимur? Ne quis autem veteribus malis nouæ calamitatis cumulus deesset, ecce nunc immanissimus Turcarum Tyrannus, classe maximâ instructâ, magnis equestribus pedestribusque copiis collectis, bellum ingenti conatu aduersus Christianos molitur; ruptoque fœdere, quod ipsi ad hanc diem cum Venetis fuit, Christianis Regibus atque Regnis exitium, agris vastitatem, vrbibus minatur incendium. Nos autem quid agimus, charissime in CHRISTO Fili? An vicinorum populorum & Principum tectis mox Turcico bello arsuris, donec ad nos flamina perueniat, expectamus? Præterit illud

illud tempus, causæ etiam ipsæ ampliùs non sunt, ob quas cum communi Christiani nominis hoste maiores tui amicitiam sibi potiùs habendam quàm bellum gerendum esse existimarunt: quæ si etiam adhuc eadem manerent; tamen esset Christianissimi Regis Maiestatis, communis Reipublicæ Christianæ salutis quàm Regni proprii incolumitatis maiorem habere rationem, neque his qui Dominum oderunt amicitia coniungi, ne propter impiorum amicitiam diuinam in te ipsum iram prouocares. Nunc verò eò deducta res est, vt, nisi communi Christianorum Principum consilio atque ope, communi totius orbis Christiani periculo subueniatur, cadendum sit in miserrimam turpissimamque crudelissimi Tyranni seruitutem. Quod ne eueniat, Maiestatem tuam pro suâ in Deum pietate, & honestissimo Christianissimi Regis suscepto à se cognomine, præcipuè decet adiuuare; cumque charissimo nobis in CHRISTO Filio Hispaniarum Rege Catholico, ad quem de hac ipsâ re diligentissimè scribimus, ac Venetorum Republicâ, ceterisque Christianis Principibus, aduersus communes hostes fœdus inire. à quo ineundo, ne istius quidem intestini hæreticorum belli, quo Regnum suum vexatur, cura detertere Maiestatem tuam debet. Quamuis enim domestico impedita tumultu, haud ita magnas vires ad propulsandum commune periculum afferre potuerit; tamen ineundo fœdere ma-

• gniam

gnam Reipublicæ Christianæ afferet vtilitatem. Audita enim modò tot Christianorum Principum contra communem hostem belli societas, ad retardandum ferocissimæ gentis impetum, illiusque impium conatum frangendum, maximè valebit. Quæ cum ita sint, Maiestatem tuam hortamur, & per Omnipotentem Deum obsecramus, vt nostris paternis vocibus auditis, totius Christiani populi salutem cum tuâ quoque incolumitate coniunctam, in extremum discrimen adductam, pro tuâ parte subleuare contendas, ineundoque cum reliquis Christianis Principibus fœdere, & quibuscumque poteris rebus communi incendio obuiam eundo, nullisque rebus prætermittendis, quæ ad Turcicum bellum à Christianorum finibus propulsandum vtilis sint; suam erga Deum Omnipotentem pietatem, diuiniq; honoris zelum, toti orbi Christiano ostendat: quod eam pro suâ erga nos sanctamque hanc Sedem Apostolicam reuerentiâ facturam esse magnoperè in Domino confidimus. Datum Romæ apud sanctum Petrum sub annulo Piscatoris, die XIII. Martij, M. D. LXX. Pontificatus nostri anno quinto.

EPISTOLA XII.

Regem Francorum à Turcicâ amicitia reuocat, & ad sociale bellum contra Turcas suscipiendum adhortatur. Vide lib. II. cap. IV. & lib. IV. cap. X. Vitæ PII V.

Carolo Francorum Regi Christianissimo.

Charissime in CHRISTO Fili noster, salutem & Apostolicam benedictionem. Accepimus litteras tuæ Maiestatis proximè ad nos scriptas super fœdere nobiscum & cum reliquis Christianis Principibus aduersus communes omnium Christiani fidelium hostes Turcas incundo, ad quod eam superioribus diebus in Domino vehementer hortati fueramus. In quibus quod Maiestas tua scribit, facile credimus, illam scilicet, tum publico Christianæ, tum etiam priuato Reipublicæ Venetæ nomine magno dolore affectam esse, ob ea quæ de belli Turcici aduersus eandem Rempublicam apparatu ex nostris litteris cognouerat: dolor enim ex communi populi Christiani calamitate periculoque conceptus, ex omnibus Regibus Christianissimis ad neminem magis quàm ad eum pertinere videtur, qui Christianissimi cognomen, maiorum suorum præclarissimis rebus contra infideles gestis partum, per manus traditum accepit. In eisdem tamen litteris aliquid fuit, quod nec sine parua admiratione, nec
sine

sine magno dolore legimus; & de quo cum Maiestate tuâ liberè, vt personam nostram decet, expos-
tulandum esse iudicauimus. Sic enim Maiestas
tua sæuissimum & crudelissimum Tyrannum, eum-
demque acerrimum hostem Christianæ Religionis,
Turcarum Imperatorem appellat; quasi aut ille ve-
ri Dei expers omnino Imperator esse possit, aut ipsa
præclarissimi sui cognominis oblita sit. Nihil aliud
est, charissime in CHRISTO Fili, Tyrannum &
infidelem Imperatorem appellare, quàm malum
bonum, & bonum malum dicere. An nesciat Ma-
iestas tua, se eiusmodi nomine Omnipotentis Dei
hostem appellantem, omnibus Christifidelibus, qui
audiuerint, offendiculum & scandalum obijcere?
cuius amicitiam cum clarissimis Regibus inclytæ
memoriæ maioribus suis inchoatam, quòd se quo-
que publicæ Christianorum vtilitatis causâ retine-
re scribit, valdè nos Maiestatem tuam in eâ re falli
putamus: non enim facienda mala sunt, vt inde eue-
niant bona. Quâ quidem culpâ carere non poterit
Maiestas tua, si vel sui vel alterius cuiusquam emo-
lumentum causâ cum infidelibus habendam sibi esse
amicitiam putauerit. Cur enim his qui Dominum
oderunt, amicitia iungitur? cur maiorem in homi-
ne, & illo quidem infideli, quàm in Redemptoris
nostri prouidentia fiduciam ponit? Non enim Tur-
cæ minùs nunc Dei hostes sunt, quàm olim Bena-
dad Syriæ Rex fuerit; cum quo Asa Rex Iuda quo-

niam amicitia & foedere coniunctus fuit, idcirco eiusdem Omnipotentis Dei contra se irâ prouocata, multis aduersus eum bellis insurgentibus meruit affligi. Regnum ipsum tuum, charissime Fili, quot quantisque bellorum intestinorum incendiis multos iam annos vexatum sit, & adhuc vexetur, ipse experiris: quibus quidem bellis si eiusmodi Turcarum amicitiam causam dedisse dixerimus, non longè à vero abibimus: solet Deus talium peccatorum poenas, patribus debitas, à filiis etiam quandoque eiusmodi delictorum expertibus reposcere; quantò magis reposcet ab his, qui ipsi quoque facta parentum sibi duxerint esse imitanda? Frustrà contra hæreticos bellum gerimus, si eodem tempore cum Turcis, non solum pacem, sed etiam amicitiam habemus. Quocirca Maiestatem tuam, pro nostrâ erga eam paternâ beneuolentiâ, etiam atque etiam monemus, & per Omnipotentem Deum obtestamur, ut talem amicitiam quasi quamdam pestem fugiat. Fallitur enim, si existimat, eum, qui omnium Christianorum Principum communis hostis est, tibi soli esse amicum: simulat ille amicitiam, & iisdem artibus, quibus tot opulentissimos in Europâ atque Asiâ Reges deleuit, Maiestatem tuam Regno spoliare cupit. Nullum illi Tyranno insuprandum, nulla foedera sancta sunt: cuius rei documenta multa afferre possemus, nisi hoc belli Venetorum Reipublicæ nullâ de causâ nuper indicti

dicti recentissimum exemplum haberemus: quo, nisi penitus cæci sint, admoneri possunt ceteri Principes, nullam apud gentem perfidiæ crudelitatisque plenissimam amicitiam tutam esse. Illa pars litterarum suarum gratissima nobis fuit, in quâ & de coniungendis mutuo inter se fœdere aduersus communem hostem Christianis Principibus consilium nostrum Maiestas tua magnoperè laudat, & ad rem tam præclaram ac Reipublicæ Christianæ tam salutarem conficiendam, omnes sibi à Deo concessas vires liberalissimè nobis pollicetur ac defert; daturamque se diligenter operam esse profitetur, ut omnes agnoscant, Maiestatem suam Principem esse non minùs re quàm nomine Christianissimum. Quod quidem quomodo præstare possit, si cum infidelibus amicitiam habere voluerit, non videmus. Probauimus maiorem in modum maximum hoc suum erga Religionem studium, animumque ad iuuandum Christianam Reipublicam propensum debitis in Domino laudibus vehementer commendauimus, & commendamus; Maiestatem tuam hortantes, ut quemadmodum Christianissimo Rege dignum est, eorum maiorum suorum inclytæ memoriæ Regum pietatem militaremque virtutem sibi imitandam proponat, qui pro Dei honore, pro fide ac Religione Christianâ tuendâ ac propagandâ, tantas res in Europâ atque Asiâ tamque præclaras gesserunt: ut sciant omnes gentes, propriam hanc

esse laudem Galliæ Regum, bella gerere cum infidelibus, eiusque rei causâ nullum certamen subterfugere, nullum periculum recusare. quod Maiestatem tuam, pro animi sui magnitudine, diuiniq̃ue honoris zelo, facturam esse pro certo habemus. Super his autem & aliis quibusdam rebus Venerabili Fratri Fabio Episcopo Caiacensi, nostro & Sedis Apostolicæ apud Maiestatem tuam Nuntio, quædam Maiestati tuæ nostro nomine exponenda mandauimus: cuius orationi vt perinde fidem habeat, ac si nos ipsos præsentem secumq̃ue loquentes audiret, Maiestatem tuam rogamus. Datum Romæ apud sanctum Petrum sub annulo Piscatoris, die XVIII. Iunij, M.D.LXX. Pontificatus nostri anno quinto.

EPISTOLA XIII.

Afflictæ Christianæ Reipublicæ statum deplorat, vt Regem Hispaniarum ad opem Ecclesiæ ferendam, ac fœderis societatem contra Turcas ineundam permoueat; idq̃ue ab eo etiam atque etiam petit. Vide lib.IV.cap.I. & lib.II.cap.VII. Vitæ PII V.

Philippo II. Hispaniarum Regi Catholico.

CHarissime in CHRISTO Fili noster, salutem & Apostolicam benedictionem. Cùm præsentem Reipublicæ Christianæ statum intentis in eum nostræ mentis oculis intuemur, ita multa
vbique

vbique miseraabilia calamitosaque nobis obijciuntur, vt sæpè lacrymis animi nostri dolorem, ob tot tantasque populi Christiani miseras calamitatesque susceptum, testificantes, atque vnà cum Apostolo dissolui cupientes, illud Eliæ Prophetæ usurpare cogamur: Sufficit mihi, Domine, tolle animam meam: neque enim melior sum quàm patres mei. Quippe in eiusmodi tempora Pontificatus noster incidit, vt in his viuere nos non solum pigeat, sed etiam quodammodò pudeat: etenim quocumque oculos vertimus, omnem vbique ferè Catholicæ Fidei integritatem corruptam, omnem veteris Ecclesiæ speciem decoloratam, & quasi sublatam cernimus: ancillam videmus, quæ fuit libera, & Domina gentium. Atque, vt veteres populi Christiani clades omittamus, nōne ipsi nos, vixdum suscepto Apostolicæ seruitutis officio, Turcarum Tyrannum maximis copiis ad occupandas Hungarici Regni reliquias profectum, charissimi in CHRISTO Filij nostri Maximiliani in Imperatorem electi ceruicibus totiusque Germaniæ exitio imminentem, tantum-non oculis nostris aspeximus? Quòd nisi illam periculosissimi belli flammam Redemptor noster, seruorum suorum precibus exoratus, ipsius immanissimi Turcarum Imperatoris morte misericorditer extinxisset, facilè eodem incendio tota Germania conflagrasset; patefactoque ab eâ parte semel in Italiam aditu, communes Christianorum hostes eamdem

dem prouinciam ferro ac flammis vastantes vidissemus. Sed numquid ea quæ postea consecuta sunt tempora, pacatiora tranquillioraque fuerunt? minime omnium: imò verò paulò post Inferior Germania tuæ ditionis prouincia turbulentissimorum hæreticorum nefariâ conspiratione petita, ex manibus tuis Regiis panè est extorta. Horret animus memoriâ recolere, nedum oratione persequi, ea quæ toto illo impiæ seditionis tempore in Deum & in feruos ipsius in eâ prouinciâ facinora sunt admissa. Sacrosanctæ Dei Redemptoris nostri IESV CHRISTI Ecclesiæ vel igni succensæ vel dirutæ vel pollutæ sunt: Altaria disiecta atque prostrata: Sanctorum imagines aut deletæ aut fœdatæ: Sacerdotes vexati aut interfecti: sanguis innocentium effusus: infandi mulierum virorumque cœtus passim habiti, nullo libidinis genere prætermisso: denique omni conatu ab impiis hæreticis actum est, vt ex animis omnium Catholica Religio radicitus extraheretur. Eodem ferè tempore in Galliâ haud dissimilis hæreticorum furor & audacia, quas ibi turbas, quas seditionum flammæ non excitauit? Charissimum in CHRISTO Filium nostrum Carolum Francorum Regem Christianissimum, arreptis de improuiso armis, vnus vix horæ anticipatione ex sceleratis eorum manibus fugâ elapsus abscondere se coëgerunt: vrbes hæreses suas profiteri nolentes diripuerunt: Catholicorum domos spoliauerunt: armis, cruore & luctu omnia reple-

repleuerunt. Eadem rursus ibi scelerum flagitiorum-
que dedecora sunt iterata: conculcatum Euangelium:
abiecta sacra: Episcopi sacris vestibus induti, per lu-
dibrium in publicum acti, in puteos præcipitati:
carnes Sanctorum bestiis terræ ad deuorandum ob-
iectæ: ipsi Sacerdotes summi Dei variis suppliciis
excarnificati: Rex ipse denique etiam insidiis sæpè
petitus, diuino potius miraculo quàm humano con-
silio adhuc stat, & in medio domesticorum hostium
positus, Regnum incolumitatemque obtinet preca-
riò. Quid de florentissimo olim Angliæ Regno di-
cemus? in quod, feminâ, quæ se pro Angliæ Reginâ
gerit, sæuissimam tyrannidem exercente, quasi in
quamdam sentinam omnium quæ vbique sunt hæ-
resum sordes confluerunt: quæ, sublato sanctissimæ
Missæ sacrificio, Episcopis Catholicis in carcerem
inclusis, nobilibus & honestis viris à consiliis exclu-
sis, ipsa se (quod dictu miserabile, quodque horribi-
le est) Anglicanæ Ecclesiæ caput appellauit. Hæc
eadem fallacissima mulier, siue potius Reipublicæ
Christianæ labes, charissimam in CHRISTO Fi-
liam nostram Scotiæ Reginam, Regno fortunisque
omnibus spoliata, captiuam detinet: superbi que
edictis Catholicos ad profitendam hæresim, ve-
ramque Fidem abnegandam, cogit; vnum illud præ-
cipue studens, vt nullum in eo Regno Catholicæ
Religionis vestigium relinquatur. Ecce autem nunc,
ne qua hisce temporibus, peccatis nostris id facien-
tibus,

ribus, noua semper desit calamitas, sæuissimus Turcarum Imperator, classe maximâ institutâ, magnis equestribus pedestribusque copiis contractis, bellum ingenti conatu aduersus Christianos molitur, & rupto palàm fœdere, quod ei ad hanc diem cum Venetis fuit, Christianis Regibus atque Regnis exitium, agris vastitatem, vrbibus minatur incendium. Nos autem tot tantarumque ærumnarum futuri spectatores, quid adhuc viuimus, nisi aliquod labenti Reipublicæ Christianæ præsidium afferre valeamus? Sed quid agere possumus soli, non sunt eiusmodi nostræ Sedisque Apostolicæ vires, quæ tantæ communium hostium potentiae resistere queant. Socordiâ nostrâ vsque adeò auctum est Turcarum Imperium, vt nonnisi magno Christianorum Principum conatu, magnisque classibus & exercitibus eorum impetus sustineri possit. Quid igitur restat, nisi vt officij nostri, cuius à Prophetâ admonemur, inemores, venientem gladium, speculatores à Domino constituti, populis ac Regibus annuntiemus, ne animarum quæ perierint sanguis de manu nostrâ requiratur? Futuram igitur calamitatem in tempore nuntiamus, exaltamus quasi tuba vocem nostram. Omnium nos quidem Christianorum Principum, in primis autem tuam, charissime in CHRISTO Fili, opem auxiliumque imploramus; Maiestatemque tuam, ad fœdus societatemque belli aduersus potentissimum immanissimumque hostem cum
reli-

reliquis Christianis Regibus Principibusque inuendā, hortamur atque excitamus. Non patitur periculi ante oculos positi magnitudo diutius differri communis salutis auxilia: in orbis angulum redacti sumus; &, nisi per eos qui possunt communi consilio Reipublicæ Christianæ tam necessario tempore subueniatur, periculum est, ne quæ adhuc remanent Christianorum populorum miseræ reliquæ, omnes in extremum discrimen adducantur. Et quoniam res ipsa iam antea docuit, nullius Christianorum Principum vires seorsum ab aliis Turcarum potentia pares esse posse, omnium verò simul collectas ad eorum impetum frangendum sufficere; idcirco necesse est, communibus hostibus communi omnium Principum Christianorum consensu atque ope resistere. Quod ut fiat, Maiestatem tuam, quæ inter ceteros orbis Christiani Principes non minus erga Deum Omnipotentem pietate quàm virium potentiâ excellit, potissimum decet adiuuare. Vides, ferocissimam gentem, tot tantisque nationibus in suam potestatem redactis non contentam, inexplibili quadam dominandi cupiditate omnium Europæ Regum & Principum Regna ditionesque spe & auaritiâ deuorasse. Si quid factura sit, scire volumus, quid fecerit consideremus. Asiam omnem, & Libyam, & Græciam breuissimo temporis spatio occupauit: occupatâ Græciâ, in Hungariam, hoc est, in viscera nostra, gladium adegit; eamque

ferè totam sibi subegit : hac verò subactâ, quæ ante hoc tempus Germaniæ atque Italiæ propugnaculum fuit, facillimus illi ad Italiam aditus est patefactus ; per Istros & Forum Iulij terrestribus copiis aperta est via: classis ex Velonâ breuiori quàm vnius noctis nauigatione Brundisium peruenire potest. Errat, si quis putat bellicosissimam nationem pecuniâ abundantem, & dominandi cupiditate inflammata, nunquam esse quieturam : proximâ quaque victoriâ gradum semper sibi ad aliam faciet, donec Occidentalibus Regibus sublatis, deleto CHRISTI Euangelio, Mahumetis nefariam sectam vbique terrarum constituat. Tu igitur, charissime in CHRISTO Fili, quem Omnipotens Deus tot egregiis virtutibus ornauit, tot opulentissimis Regibus ditauit, primus Christianos Principes ad fœdus contra communes hostes ineundum hortare. sequentur auctoritatem tuam ceteri Reges : nemo erit, qui commune periculum proprium non existimet. Nos ipsi, quantum vires nostræ ferre poterunt, pium tuum ceterorumque Principum conatum, quibus poterimus rebus, prompto atque alacri animo adiuuabimus. His omnibus rebus assiduas CHRISTO Domino nostro preces addimus : miserebitur nostri, vti speramus, qui misericordiæ fons est, nec populum suum in Turcarum manus venire permittet. Erit nobiscum Deus, qui neque nos neque causam suam deferet. In eo faciemus virtutem, & ipse inimicos

nicos nostros ad nihilum deducet. Non est abbreviata Domini manus; & quamvis ob nostra peccata illius à nobis misericordia sit elongata, tamen propitiabilis est Deus noster, & multus ad ignoscendum. Facile eum obedientiâ placabimus, quem contumaciâ irritauimus: qui vt primùm viderit nos humili corde pro eius gloriâ fortiter pugnuros, hostibus nostris terrorem & fugam immitteret. Interea verò, dum Principes ad sanctissimum aduersus communes hostes pro communi omnium Christianorum defensione fœdus ineundum excitantur, dum arma, dum cetera ad bellum gerendum necessaria comparantur; Maiestatem tuam rogamus, & per viscera misericordiæ Dei nostri obsecramus, vt primo quoque tempore classem quàm maximam comparare potest, in Siciliam mittat. Siue enim Turcæ Melitensem expeditionem susceperint, classis ipsa (quod alterius eiusdem insulæ obsidionis tempore factum est) in loco erit valdè ad deterrendos hostes nostrosque confirmandos opportuno: siue Tunetum profecti, Guletam oppugnare maluerint; magnam eadem classis ad subueniendum in tempore Christianis, castellum illud defendentibus, vtilitatem opportunitatemque habebit. Quòd si Cyprum, Venetorum insulam (quemadmodum existimatur) petentes, classe oppositâ, Christianorum auxiliis aditum maris claudere conentur; eadem Maiestatis tuæ classis cum Venetorum classe

coniuncta, hostibus nostris aut maris aditum eripere, aut aliquâ fortasse meliore conditione cum eis nauali prælio configere, victoriamque, Deo iuuante, obtinere poterit. Hoc verò à Maiestate tuâ sic postulamus, vt maiori animi nostri studio postulare non possimus: quippe qui, classe tuâ stationem in Sicilia habente, aduersariorum nostrorum quemcumque conatum non mediocriter reprimi posse intelligimus; eamque rem in omnem partem vtilissimam esse cernimus. Moueat Maiestatem tuam commune Reipublicæ Christianæ, & proprium tuæ salutis dignitatisque periculum. Memento tuæ professionis, cui te in Baptismate adidixisti: quantum Omnipotenti Deo eiusque Ecclesiæ debeas, cogita; non solum propterea quòd à Deo creatus, eiusque vnigeniti Filij pretiosissimo Sanguine redemptus es, & ab eodem tot Regnis auctus; sed etiam, quia à sanctâ hac Apostolicâ Sede, communi omnium Christifidelium matre ac magistrâ, maiores tui inclytæ memoriæ Reges magnis sæpè beneficiis & gloriosissimo Catholici cognomine sunt ornati. Stat sancta Mater Ecclesia dolens ac gemens, tuamque præcipuè opem auxiliumque implorans. Matris voces nisi filius audiuerit, quis eas præterea auditurus est? Stamus & nos, quibus Deus, licet indignis, animarum Ecclesiarumque omnium curam & sollicitudinem commisit; atque in his tot hæresum tenebris, tot Turcarum procel-

procellis, obscurissimæ noctis vigilias super Dominicum gregem custodientes, Christianis Principibus, tibiq̃ue in primis, aduentantium luporum clamorem lacrymis & gemitu significamus. & sicut ipsi pro commissio fidei nostræ grege ab immanissimis hostibus defendendo omnia subire pericula, nullos labores subterfugere parati sumus; sic Maiestatem tuam hortamur, & per Omnipotentem Deum obtestamur, vt & classe suâ in Siciliam mittendâ, & fœdere cum reliquis Christianis Principibus ineundo, & nullis rebus prætermittendis, quæ ad Turcicum bellum à Christianorum finibus propulsandum utiles esse possint, pristinam suam erga Deum Omnipotentem pietatē diuinique honoris zelum toti orbi Christiano ostendat. Quod quamuis eam sponte suâ facturam non dubitamus; tamen, vt & ipsi officio nostro satisfaciamus, hoc paternæ nostræ sollicitudinis officium prætermittere non debuimus. Cetera verò ad hoc idem negotium pertinentia, quoniam omnia litteris mandari commodè non possunt, Maiestati tuæ exponenda mandauimus dilecto huic Filio Magistro Ludouico de Torres, nostræ Cameræ Apostolicæ Clerico, viro ob eximiam probitatem & egregiam erga nos sanctamq̃ue hanc Sedem Apostolicam fidem nobis probatissimo, eiusdemq̃ue tuæ Maiestatis obsequentissimo addictissimoq̃ue vasallo: quem huius ipsius negotij causâ, deditâ operâ ad ipsam

ipsam mittimus. Eius autem orationi super his rebus, quas illi nostro nomine exponet, vt parem fidem habeat, ac si nos ipsos præsentes secumque loquentes audiret, Maiestatem tuam rogamus. Datum Romæ apud S. Petrum sub annulo Piscatoris, die VIII. Martij, M. D. LXX. Pontificatus nostri anno quinto.

EPISTOLA XIV.

PHILIPPI II. Hispaniarum Regis Catholici ad PIVM V.

Pontificis consilium approbat de fœdere contra Turcas; & ad hoc ipse conspirans, per quos Romæ id tractari ac confici mandauerit, ostendit. Vide lib. IV. cap. I. & IV. Vitæ PII V.

Beatissime Pater, Ludonicus de Torres, Sanctitatis tuæ Camerae Clericus, litteras tuas mihi reddit, satisque fusè ac sigillatim, quid cupias, & quàm gratum tibi accideret, si cum Venetâ Republicâ belli societas iniretur, coràm explicauit. Quam ad rem dum Beatitudo tua me cohortatur, eximium planè Religionis studium, quo ardet vtiturque iis rebus procurandis, quæ ad Dei Optimi Maximi cultum, & ad propagandam Catholicam fidem Christianæque Reipublicæ salutem pertinent, apertè declarat. Quod quidem vel maximè proprium eius muneris est atque personæ, quam tua sustinet

Beati-

Beatitudo: quæ iure optima Christianorum Principum sensus ac vires sanctissimo fœdere consociandas esse arbitratur. Enimverò Turcæ, Christianæ Reipublicæ hostis acerrimi, ceterarumque infidelium gentium potentiâ ac insolentiâ, ambitioneque in dies magis insurgente, nisi Catholicorum Principum animi & opes coniungantur, agrè admodum poterit aut illis obsisti, aut ea detrimenta malaque vitari, quæ continenter inferunt Christianis. Quocircâ eum, quem semper apud me habebit, locum habuit amplissimum, mentemque meam in idipsum valdè propensam ac paratam inueniet Sanctitatis tuæ cohortatio. Equidem quæ partes in eo sunt meæ, vel ob eximia in me diuinitus collata beneficia, non ignoro. Et quamquam ob graues motus ac bella, quæ in Regnis ditionibusque meis nuper exarserunt (quibus vel sedandis vel auertendis cum antea diu, tum nunc maximè sum vehementer implicatus) ad nouas expeditiones aut res gerendas, si minùs ingredi possim, iure videor excusandus, cum præsertim rebus meis modum aliquem & quietem afferre sit omnino necessarium: nihilominùs, cum plenè perspiciam optimum propositum, sanctumque consilium, quo adducitur Beatitudo tua, & honestam cohortationem ac petitionem, quæ mihi tuo nomine facta est; pro summo quo teneor Sanctitati tuæ in his quæ mihi proponit obsequendi desiderio, ad id conspire, atque hisce rebus omnibus, quæ ad fœdus ipsam pertinent, quantum in me erit, nullo modo deesse constitui. Quâ de re quoque in eandem sententiam respondi cum ipsi Ludouico, tum etiam Viris ad

hoc ipsum agendum à me delectis : quorum ego consilio iudicioque prorsus acquiescam. Et verò quoniam felicem huius explicationem consilij vehementer cupio ; ut etiam ea quæ nobis aliam eius rei tractanda rationem ac viam ineuntibus suboriri prorogatio posset, diligenter caueatur ; Et potissimum, quia propositum mihi est, omnia Beatitudinis tuæ suam ipsius præsentis auctoritatem interponentis operâ pertractari, admodum reuerendis in CHRISTO Patribus Granuellano Et Paceco Cardinalibus, Et Ioanni Stunica meo Et Senatori Et apud Sanctitatem tuam Oratori, potestatem feci, mandauique, ut cum viris tum à Venetâ Republicâ delectis, tum iis quos ipse decernere volueris, sese coniungant, omninoque hoc ipsum negotium ad præscriptam à me sibi rationem conficiendum procurent. Faxit Deus Optimus Maximus, ut id consilij exitum illum consequatur Et fructum, quem Et ad eius nominis gloriam, Et ad Christianæ Reipublicæ salutem augendam valdè pertinere, Beatitudinique tuæ propositum esse non dubitamus. Ceterum illud scribere non præmittam, eiusdem Ludouici præsentiam mihi pergratam fuisse; placuisseque vehementer, Sanctitatem tuam in hac ipsâ decernendâ legatione usam esse illius operâ, quem eiusmodi munere dignum esse cognouimus. Deus Dominus Beatitudinem tuam tueatur incolumem, illique dies vitæ, Et prosperam Catholicæ Ecclesiæ administrationem adaugeat atque fortunet. Hispali, XVII. Kalend. Iunij, M. D. LXX.

EPISTOLA XV.

*Studia Regis Catholici & officia de ineundo
fœdere commendat.*

Philippo Hispaniarum Regi Catholico.

CHarissime in CHRISTO Fili noster, salutem & Apostolicam benedictionem. Non facile verbis consequi possumus, quantâ in Domino lætitiâ affecti fuerimus ex litteris Maiestatis tuæ XVI. die Maij ad nos datis: quibus cognouimus, Maiestatem tuam non solum aduersus communes omnium Christianorum hostes Turcas cum Venerorum Republicâ fœdus inire paratam esse, sed etiam, quantum in se est, idipsum exequi iam cœpisse, datâ potestate dilectis Filiis nostris, Antonio tituli sanctæ Anastasiæ Cardinali Granuellano, & Francisco tituli sanctæ Crucis in Ierusalem Cardinali Paceco, suo apud nos Oratori, vt & cum illis, qui à Venetorum Republicâ delegati fuerant, & cum eis, quos nos pro parte nostrâ delegandos esse iudicauerimus, de eo ipso fœdere ineundo apud nos agant. Quâ in re licet eximiam Maiestatis tuæ erga Deum Omnipotentem pietatem, dignumque Catholico Rege Christianæ Religionis zelum, ne antea quidem nobis incognitum, recognouerimus: tamen animum istum tuum ad Rempublicam Christianam ab imminentibus periculis de-

fendendam promptum atque alacrem perspexisse, gratissimum nobis fuit; eiusque rei nomine eas quas debemus primùm quidem Omnipotenti Deo, deinde Maiestati quoque tuæ, gratias agimus: quæ quòd (vt par fuit) potissimùm auctoritate interuentuque nostro agi de hoc fœdere voluerit, in eâ quoque re pristinam Maiestatis tuæ erga nos sanctamque hanc Sedem obseruantiam ac reuerentiam agnouimus. quam quidem nos, pro Apostolicæ seruitutis officio, ad tam egregiam voluntatem suam constanter retinendam hortaremur, nisi ex eisdem litteris suis perspexissemus, Maiestatem tuam paternas hortationes nostras eo animi studio eâque alacritate accepisse, vt nullis aliis prætereà hortationibus locum reliquerit. Omnipotens Deus, charissime in CHRISTO Fili, det Maiestati tuæ in suo timore semper proficere; eamque ad nominis sui gloriam, vniuersæque Reipublicæ Christianæ utilitatem diu, sicut cupit, fospitem incolumemque custodiat atque conferuet. Datum Romæ apud sanctum Petrum sub annulo Piscatoris, die XIII. Iunij, M. D. LXX. Pontificatus nostri anno quinto.

EPISTOLA XVI.

Vt Regiam classẽ contra Turcas Venetis auxilio mittat, Hispaniarum Regem hortatur. Vide lib. IV. cap. I. Vitæ PII V.

Philippo

Philippo Hispaniarum Regi Catholico.

Charissime in CHRISTO Fili noster, salutem & Apostolicam benedictionem. Cùm certiores facti simus, immanissimum Turcarum Tyrannum, totâ classe iam eductâ, cum vnâ illius parte Cypro imminere, cum alterâ verò orâ illi maritimæ præsidio esse; communis Reipublicæ Christianæ periculo, rei que magnitudine commoti, has ad Maiestatem tuam litteras per tabellarium deditâ operâ ad eam missum scribendas esse iudicauimus; quibus illam in Domino vehementer hortamur, & quo maiore animi nostri studio possumus, requirimus, vt illicò atque has nostras litteras acceperit, dilecto Filio, nobili viro, Ioanni Andreæ Auriæ mandare velit, vt sine vllâ exceptione, quamprimùm facere potuerit, se cum eâ classe, cui Maiestatis tuæ nomine præest, ad Venetorum classem adiungat, quò facilius, coniunctis omnibus copiis, impium communium hostium conatum reprimere possimus. Quâ de re dilecto Filio Magistro Ludouico de Torres, Camerae nostræ Apostolicæ Clerico, mandauimus, vt cum Maiestate tuâ agat studiosissimè atque instantissimè nostris verbis: cuius orationi non modò vt fidem habeat, sed etiam vt imminenti Christianorum periculo pro suâ erga Deum Omnipotentem pietate quàm celerrimè occurrat, Maiestatem tuam rogamus. Datum Romæ apud san-

Ætūm Petrum sub annulo Piscatoris, die XXVIII. Iunij, M. D. LXX. Pontificatus nostri anno quinto.

EPISTOLA XVII.

PHILIPPI II. Regis Catholici ad Gabrielem à Cueua, Ducem Albuquerqueium, ditionis Mediolanensis Gubernatorem.

Quid de præbendo Venetis auxilio, ac de fœdere faciundo statuerit, ostendit; iubetque, vt fœdus ipsum aliaque Regia negotia curet diligenter. Vide lib. IV. cap. I. Vitæ PII V.

COrdubâ in hanc urbem cogitanti mihi præstò fuit Ludouicus de Torres, Apostolica Camerae Clericus, à Summo Pontifice legatus ad negotium sacri fœderis cum Venetis contra Turcas faciendi, qui eius nomine mecum egit, orauitque, vti primo quoque tempore in ditione nostrâ Siciliensi quàm plurimas possem triremes, & item ex iis quæ stipendia nostra faciunt, cogendas curarem, paratas ad id quod accidere facillè posset, Turcicâ classè hac æstate (vt certò creditur) in expeditionem prodeunte. & quamquam per id tempus plurimis rebus aliis eram vehementer implicatus; tamen pro summo quo teneor Pontificiæ Maiestati obsequendi desiderio, atque in omnibus Christianæ Reipublicæ difficultatibus, vt antea semper facere consueui, opem ei promptè ferendi, pergratum mihi

mibi accidit & ipsi Ludouico aures præbere, & præstare id quod de triremibus colligendis Pontifex Summus exposuit : ac propterea statim Ioanni Andrea mandandum decreui, vt cum nostris omnibus ibi subsistentibus atque aliis ære nostro merentibus triremibus in Regno Siciliensi atque in illis oris præsto sit, rebus omnibus ineunda societatis in subsidium comparatis. Proinde mecum ille super hac re fusiùs verba fecit, descriptasque mihi rationes, optimaque Pontificis consilia detulit ; quæ nos itidem, vt in hanc sanctam belli societatem nomen demus, apprimè debent impellere : cumque super hac re multa iam diligenter exagitata sint & consulta, per ipsum Ludouicum Pontifici respondi, me ipso cohortante in hoc fœdus cum Venetâ Republicâ contra Turcas percutiendum conspirare decreuisse. Quod vt faciliùs primo quoque tempore conficiatur, Ioanni Stunica nostro & Consiliario & in Vrbe Oratori, atque Granuellano & Paceco Cardinalibus id negotij dedi transigendum ; qui omnes coniunctis animis, tamquam procuratores nostri, eâ de re agant cum iis viris, quibus eam curam Pontifex ipse, & Veneta Respublica delegauerit. Ac propterea mandatum eius rei conficiendæ ad eos mittimus summâ cum potestate ac monitis de iis rebus, quæ in hoc genere vel præscribendæ vel cauendæ esse videantur. Quâ de re te commonefaciendum esse putauimus, vt intelligas oportere te cum ipso Ioanne Stunicâ, aliisque à nobis delectis viris, optimè conuenire, eosque identidem tibi admonendos esse rerum omnium quæ contingent, & eius item iuris, quod Principatus
noster

noſter Mediolanenſis in Venetos, eorumque ditiones, ſibi eſſe prætendit; præclareque factum iri, ſi per hanc occaſionem id controuerſiæ inter ipſos componatur. Idcirco etiam ipſi Stunica per litteras mandauimus, vt de eo, in quem pro tempore res hæc deducta fuerit, ſtatu te ſtatim certior faciat: vt, cum primùm fœderis ipſius negotium fuerit expeditum, admoneat te de iis rebus, quas in iſtâ ditione noſtrâ eiſmodi expeditionis in ſubſidium adornare oportebit, ſecundùm ea quæ ſuper ipſâ re decreta fuerint & conſtituta. Itaque mandamus tibi atque præcipimus, vt quacumque in iſto noſtro Regno in ſequentem æſtatem noſtro nomine apparanda eſſe idem Stunica monebit, ea tempore antè capto parare velis atque diſponere; ac quidquid ſuper eâ re fiat, cures nobis renuntiare. Hiſpali, XVII. Kalend. Iunij, M. D. LXX.

EPISTOLA XVIII.

Vt Regiam claſſem cum Venetâ contra Turcas quamprimùm iungi procuret, Io. Andream de Auria hortatur. Vide lib. & cap. IV. Vitæ PII V.

Dilecto Filio, nobili viro, Ioanni Andræ
de Auria, Militi Genuenſi.

Dilecte Fili, nobilis vir, ſalutem & Apoſtolicam benedictionem. Non dubitamus, Nobilitatem tuam, pro ſuâ prudentiâ, rerumque bellicarum uſu, intelligere, totam immaniffimo Turcarum

rum Tyranno sæuissimum hac æstate bellum aduersus Rempublicam Christianam molienti resistendi spem in eo positam esse, vt Christianorum maritimæ copię omnes in vnum locum conueniant, quò facilius, coniunctis viribus, potentissimorum hostium impetus ab Reipublicæ Christianæ finibus arceri repellique possit. Quia verò putamus, Nobilitati tuæ à charissimo in CHRISTO Filio Philippo Hispaniarum Rege Catholico mandatum esse, vt cum eo triremium nauiumque numero, qui ei à Maiestate suâ constitutus est, Venetorum classi se coniungat; idcirco Nobilitatem tuam vehementer in Domino hortamur, vt primo quoque tempore versus sinum Corcyrensem, eaque loca nauiget, apud quæ Venetorum classem stationem habere cognoscet. opus est enim celeritate: quæ si, vt speramus, à te adhibita fuerit, resistendi communibus hostibus ratio proculdubio facilior expeditiorque futura est. Quamuis autem multis maximisque in rebus perspecta virtus tuâ, magnam certamque nobis spem asserat, te in hac expeditione communi omnium hominum, nostræque insuper de tuâ virtute expectationi, abundè responsurum esse; tamen rei periculi que communis magnitudine commoti, prætermittere non possumus, quin Nobilitatem tuam ad operam diligentiamque suam hoc tam necessario Reipublicæ Christianæ tempore fortiter nauandam, etiam atque etiam excitemus. Pertinebit

ea res non solum ad populi Christiani salutem, Catholicique Regis securitatem, sed etiam ad nominis sui laudem, quamvis antea quoque insignem, clariùs adhuc illustrandam. A nobis quoque eius rei nomine tantam gratiam inibit, ut quaecumque erga se paternae nostrae voluntatis indicia Nobilitati tuae cum Domino impertiri poterimus, hæc numquam passuri simus ab eâ desiderari. Datum Romæ apud S. Petrum sub annulo Piscatoris, die XXIII. Maij, M. D. LXX. Pontificatus nostri anno quinto.

EPISTOLA XIX.

*Ne quid impediât, quo minùs Ierosolymitani Ordinis
triremes quatuor cum Pontificiâ classè contra Turcas
coniungantur, Ioannem Andream Auriam hortatur.
Vide lib. IV. cap. IV. Vitæ PII V.*

Eidem Ioanni Andreæ Auriae.

Dilecte Fili, nobilis vir, salutem & Apostolicam benedictionem. Quoniam ad propulsandum communium hostium Turcarum aduersus Rempublicam Christianam bellum, vtilissimum esse constat, Christianorum auxilia vnum in locum primo quoque tempore tutò posse conuenire; quò faciliùs deinde, omnibus copiis simul coniunctis, consociatisque auxiliis, potentissimorum hostium conatui vno animo & consilio resistere possimus;
idcirco

idcirco Nobilitatem tuam his nostris litteris vehementer in Domino hortamur, vt ne impedimento esse velit, quo minùs quatuor triremes, quas dilectus Filius Petrus de Monte, Hospitalis sancti Ioannis Ierosolymitani Magister, instructas paratasque ad hoc bellum se habiturum esse nobis pollicitus est, ad nostram Ecclesiasticam classem adiungantur: nam præterquam quòd honestius est, Religiosorum classem auspiciis nostris, qui Religionis caput sumus, militare potiùs quàm aliorum; sic etiam futurum est, vt & illæ quatuor tutius nauigaturæ sint, si se cum nostrâ classe coniunxerint, & nostra classis, additis illis, securiùs se cum reliquis copiis coniunctura sit. Quæ res cùm ad rectè bellum administrandum maximum momentum habitura esse videatur, non dubitamus, Nobilitatem tuam, pro suâ prudentiâ, id vt quamprimùm fiat, omni ope pro suâ parte esse adiuturam. Quod vt nostris paternis vocibus admonita, aliquantò etiam alacriùs faciat, à Nobilitate tuâ magnoperè postulamus. Datum Romæ apud sanctum Petrum sub annulo Piscatoris, die XXIX. Maij, M. D. LXX. Pontificatus nostri anno quinto.

EPISTOLA XX.

Vt Regiam classem Neapolitani Proregis subsidis instructam contra Turcas quamprimum expediat, eundem Andream Auriam hortatur. Vide lib. IV. cap. I.
Et IV. Vita PII V.

Eidem Io. Andreæ Auriaë.

Dilecte Fili, nobilis vir, salutem & Apostolicam benedictionem. Lectis Nobilitatis tuæ litteris, quibus sibi milites ceteraque ad instruendam alendamque classem necessaria deesse significabat, eaque de causâ se impediri aiebat, quo minus (quod ab eâ nostris litteris superioribus diebus petieramus) versus sinum Corcyrensem navigare, seque cum nostrâ & Venetorum classe coniungere posset; subito ad dilectum Filium, nobilem virum, Ducem de Alcalâ, Regni Neapolitani Proregem, litteras dedimus, quibus eum ad milites ceteraque quæ tibi opus erant quamprimum ad te mittenda, vehementer hortati sumus: quibus ille nostris litteris nuper ita respondit, quemadmodum ex illius litterarum exemplo, quod ad te cum his litteris nostris mittimus, intelligere poteris. Quæ cum ita sint, prætereâ totius Reipublicæ Christianæ periculi magnitudo diutiùs non patiatur differri communis salutis auxilia; Nobilitatem tuam vehementer in Domino horta-

hortamur, & quo maiore animi nostri studio possumus, requirimus, vt, postquam milites, & cetera quæ sibi ad nauigandum necessaria sunt, habuerit, eam in suâ cum nostrâ Venetorumque classe coniungendâ pro parte suâ diligentiam ac celeritatem adhibere studeat, quam & rei magnitudo postulat, & nos ab eximio Nobilitatis tuæ in adiuuandâ Republicâ Christianâ studio expectamus: iam enim & Venetorum classem Corcyram appulisse intelligimus, & nostram quoque breuî eodem profecturam cognouimus, vt nihil aliud prætereâ ad resistendum communibus hostibus, quàm tuæ classis in eadem loca aduentus desiderari videatur. Quâ quidem re non solum communem totius populi Christiani causam vehementer adiuuabis; sed etiam charissimi nobis in CHRISTO Filij Regis Hispaniarum Catholici rebus non mediocriter proderis, tibi que apud Omnipotentem Deum merita, & apud homines gloriam comparabis; & à nobis ipsis, eiusdem rei nomine, non paruam gratiam inibis. Datum Romæ apud sanctum Petrum sub annulo Piscatoris, die XX. Iulij, M. D. LXX. Pontificatus nostri anno quinto.

EPISTOLA XXI.

Regiam classem necessariis subsidiis instrui, & contra Turcas quamprimum dirigi procurat. Vide lib. IV. cap. I. & IV. Vitæ PII V.

Dilecto Filio, nobili viro, Perafanio de Ribera, Duci de Alcalâ, in Regno Neapolitano Proregi.

Dilecte Fili, nobilis vir, salutem & Apostolicam benedictionem. Superioribus diebus cum dilectum Filium, nobilem virum, Ioannem Andream Auriam per litteras hortati essemus, vt secum eâ classe, cui à charissimo in CHRISTO Filio nostro Hispaniarum Rege Catholico præfectus est, ad Venetorum classem adiungeret, quò facilius, consociatis auxiliis, communium hostium Turcarum aduersus Rempublicam Christianam impetus repelli possit; ad eas ipsas litteras nuper ita rescripsit, se & hortationem nostram libenter alacriterque suscepisse, & sibi à Maiestate Catholicâ imperatum esse, vt quæcumque illi à nobis, & ab eodem Catholico Rege super hoc negotio Romæ delegatis mandata forent, omnia exequeretur, seque paratum esse in eâ re & voluntati nostræ morem gerere, & eorumdem delegatorum iussa facere; sed tamen & militum quos in classem imponat facultatem sibi deesse,

deesse, & commeatuum copiam ad eosdem milites ac reliquam naualem turbam alendam non habere, ob eamque causam se ad Nobilitatem tuam de utrâque re diligenter scripsisse. Quod cum ita sit, Nobilitatem tuam his nostris litteris in Domino vehementer hortamur, & quo maiore animi nostri studio possumus rogamus, ut prædicto Ioanni Andreæ eas militum commeatuumque copias, quæ ad armandam alendamque illius classem sufficere possint, quam celerrimè mittendas curet. Quantâ celeritate opus sit, ut immanissimi Turearum Tyranni classi Cypro iam imminente in tempore occurrere possimus, Nobilitatem tuam pro suâ prudentiâ intelligere arbitramur. Quantum verò hoc periculum, quamque commune sit, quod non minùs Venetorum, quam toti Christianæ Reipublicæ, ac præcipuè Regi Catholico à communibus hostibus impender, nemo est qui non videat. Quocircà & officio nostro adducti, & communis discriminis magnitudine commoti, à Nobilitate tuâ petimus, ut comparandis mittendisque militibus ac comeatibus, qui in prædicti Ioannis Andreæ classem imponantur, eam diligentiam celeritatemque adhibeat, quam & rei periculi que magnitudo exposcit, quamque nos ab eximio suo Christianæ Religionis defendendæ studio expectamus. Nihil neque Dei Omnipotentis causæ, neque Regi ipsi Catholico vtilius, nobisque ipsis gratius facere potest, quam

quàm si in tanto totius populi Christiani discrimine diligentiam suam à nobis desiderari non patiatur. Quod nos pro suâ erga Deum Omnipotentem pietate Nobilitatem tuam facturam esse non dubitamus. Datum Romæ apud S. Petrum sub annulo Piscatoris, die II. Iulij, M.D.LXX. Pontificatus nostri anno quinto.

EPISTOLA XXII.

Ierosolymitani Ordinis triremes instrui, & cum Pontificiâ Venetâque classe contra Turcas iungi procurat. Vide lib. IV. cap. I. & IV. Vitæ PII V.

Petro de Monte, Magistro Hospitalis sancti Ioannis Ierosolymitani.

Dilecte Fili, salutem & Apostolicam benedictionem. Quamvis superioribus diebus ad te scripserimus, ut tuam & istius Ordinis classem, quam omnibus rebus ad nauale bellum necessariis instructam hoc tam necessario Turcici belli tempore nobis pollicitus es, iam diu paratam haberes, donec nos eam quam in animo habemus classem instrueremus; neque dubitemus, te id ipsum diligenter facturum esse: tamen, cum & Reipublicæ Christianæ necessitas id flagitare, & coniungendarum omnium maritimarum copiarum tempus appropinquare videatur, deuotionem tuam iterum in Domino

Domino hortandam esse præuidimus, vt eas ipsas triremes instructas paratasque habeat, vt, cùm tibi à dilecto Filio, nobili viro Marco Antonio Columnâ, nostræ classis Generali, significatum fuerit, tuâ ad illius classem adiunctâ vnâ cum eo versus ea loca nauigare possis, in quibus Venetorum classem stationem habere auditum fuerit. In quo, etsi non dubitamus, te, pro tuo eximio Reipublicæ Christianæ iuuandæ studio, eam quam par est diligentiam celeritatemque esse adhibiturum; tamen ob rei communisque periculi magnitudinem, tibi quamuis currenti Apostolicæ nostræ hortationis calcar ad-mouendum esse existimauimus. Datum Romæ apud S. Petrum sub annulo Piscatoris, die x. Iunij, M.D.LXX. Pontificatus nostri anno quinto.

EPISTOLA XXIII.

Vt Melitenses triremes contra Turcas ad sinum Corcyrensem quamprimùm adnauigare, & cum Pontificiâ Venetâque classe coniungi curet, Petrum de Monte hortatur. Vide lib. IV. cap. IV. Vitæ PII V.

Eidem Petro de Monte, Magistro Hospitalis sancti Ioannis Ierosolymitani.

Dilecte Fili, salutem & Apostolicam benedictionem. Superioribus diebus binas ad te litteras dedimus; alteras xxvi. Maij, alteras decimo

T r die

die Iunij datas: in vtrisque autem vehementer te hortati sumus ac requisuimus, vt tuas istiusque Ordinis triremes, quas omnibus rebus ad nauale bellum instructas hoc ipso tam necessario Turcici belli tempore nobis obtuleras, paratas instructasque haberes; vt, cum tibi à dilecto Filio, nobili viro Marco Antonio Columnâ, nostræ classis Generali, significatum esset, tuas ad illius triremes adtingeres, & cum eo versus ea loca nauigares, in quibus Venetorum classem stationem habere auditum fuisset. Quod quidem eo ad te consilio scripseramus, quia interea charissimi nobis in CHRISTO Filij Regis Hispaniarum Catholici classem eisdem locis appropinquaturam sperabamus, vt, omnibus maritimis copiis simul coniunctis, communibus hostibus vno animo & consilio facilius obsistere possemus. Sed cum & prædicti Regis classem diutius quàm putabamus tardare videamus, & Venetorum classem Corcyram iam appulisse audiamus, eodemque nostram etiam classem aut profectam esse, aut quamprimùm profecturam intelligamus; deuotionem tuam in Domino vehementer hortamur ac requirimus, vt vnâ cum suis triremibus eodem, hoc est Corcyram, nauigare, seque cum nostrâ & Venetorum classe coniungere quamprimùm studeat. Quâ in re, etsi exploratum habemus, te pro tuo exitio Reipublicæ Christianæ adiuuandæ studio, eam quam par est diligentiam celeritatemque esse adhibiturum;

biturum; tamen, vt ad eam ipsam diligentiam aliquid etiam harum ipsarum ad te litterarum nomine addas, vehementer à te petimus. Datum Romæ apud sanctum Petrum sub annulo Piscatoris, die XIX. Iulij, M. D. LXX. Pontificatus nostri anno quinto.

EPISTOLA XXIV.

Quòd Ioanni Andreæ Auria, vt Regiam cum Pontificia Venetâque classe coniungeret, mandauerit, gratias agit, Regemque ad fœderis negotium conficiendum hortatur.

Philippo Hispaniarum Regi Catholico.

Charissime in CHRISTO Fili noster, salutem & Apostolicam benedictionem. Certiores facti ex his quæ Venerabilis Frater Archiepiscopus Rossanensis, noster & Sedis Apostolicæ apud Maiestatem tuam Nuntius, copiosius ad nos scripsit, quantâ voluntatis suæ erga nos sanctamque hanc Sedem Apostolicam propensione, quamque prompto alacrique animo Maiestas tua rogatu nostro dilecto Filio, nobili viro Ioanni Andreæ Auria, classis suæ Præfecto, mandauerit, vt se, cum eis quibus præest triremibus, ad nostram Venetorumque classem adiungeret, quò facilius, omnibus maritimis copiis in vnum coactis, communibus hostibus communi

auxilio & consilio obfisti posset ; magnas Omnipotenti Deo gratias egimus, qui talem tamque egregiam erga Christianam Rempublicam voluntatem Maiestati tuæ misericorditer indulgisset : in quo etsi nihil fecit Maiestas tua nobis nouum, qui eius erga Christianam Religionem studium benè cognitum habemus; tamen eâ ipsâ de re eas quas debemus Maiestati tuæ gratias agimus, quæ quòd Patris voces Filius non despexit, in eo suam non solum erga nos, sed multò magis erga Redemptorem nostrum pietatem declarauit, eius ipsius pietatis fructum proculdubio æternum ab eo perceptura, qui nihil, quod eius causâ fiat, quantumuis exiguum, sine remuneratione relicturum se pollicitus est. Quia verò tale tantumque de Republicâ Christianâ benè merendi Maiestatis tuæ omnibus perspectissimum studium nobis animum dat, vt quæ ad eiusdem Reipublicæ commune bonum vtilitatemque pertinent, non minore quàm antea fecimus confidentiâ, à Maiestate tuâ postulemus; idcirco eandem Maiestatem tuam hortamur, & quo maiore animi nostri studio possumus, rogamus, vt quod illius iussu auctoritateque nostrâ, inter Maiestatis tuæ mandatarios & à nobis delegatos, de fœdere inter nos sanctamque Sedem Apostolicam, & Maiestatem tuam, Venetorumque Rempublicam, aduersus immanissimum Turcarum Tyrannum incundo apud nos superioribus diebus communi partium confœderanda-

derandarum consensu actum statutumque est, id raturum habere quamprimùm velit: sic vt omnibus rebus, quæ huic sanctissimo fœderi concludendo moram aliquam asferre possint, Maiestatis tuæ pietate prudentiâque sublatis, habeat Respublica Christiana, quorum præsidio ac tutelâ aduersus communium hostium impetum tuta securaque sit. quæ quidem in tanto suæ salutis discrimine, quod ab auidissimâ Christiani sanguinis gente sibi imminere intelligit, in tuam potissimùm Maiestatem oculos suos coniectos habet: videt enim, si (quod absit) Maiestatis tuæ potissimo ad se tuendam auxilio destituta fuerit, frustra se ceterorum Christianorum Regum ac Principum opem præsidiumque esse imploraturam: quibus etiam si voluntas ad se defendendam non defuerit, parem tamen voluntati facultatem ac vires defuturas esse non ignorat. Quæ cùm ita sint, charissime in CHRISTO Fili, Maiestatem tuam per Omnipotentem Deum obsecramus, vt pro parte suâ ad tam salutare piumque fœdus quamprimùm concludendum incumbat; eâque in re tum communi totius populi Christiani de suâ erga Redemptorem nostrum pietate expectationi respondeat, tum nostris paternis hortationibus satisfaciat. Quod quamuis pro certo haberemus, Maiestatem tuam pro suo diuini honoris zelo, Christianæque Reipublicæ adiuuandæ studio, esse facturam; tamen paternam nostram hortationem, vel

ad officij nostri partes implendas susceptam, neque ingratham neque iniucundam Maiestati tuæ, pro suâ erga nos sanctamque hanc Sedem Apostolicam deuotione, fore putauimus. Eisdem autem de rebus vt cum Maiestate tuâ, nostro nomine, copiosius ageret, prædicto Venerabili Fratri nostro & Sedis Apostolicæ apud Maiestatem tuam Nuntio mandauimus: cuius orationi Maiestas tua vt fidem habeat, ab eâ vehementer petimus. Datum Romæ apud sanctum Petrum sub annulo Piscatoris, die vltimo Iulij, M. D. LXX. Pontificatus nostri anno quinto.

EPISTOLA XXV.

De Regiis triremibus Pontificiæ Venetæque classi contra Turcas adiungendis, aliisque de rebus apud Regem Catholicum bene procuratis, gratias agit; atque, vt ad sociale fœdus quamprimum conficiendum Regem inducat, hortatur.

Didaco Cardinali Spinosæ.

Dilecte Fili noster, salutem & Apostolicam benedictionem. Cùm ex litteris tuis proximè scriptis certiores facti essemus, charissimum in CHRISTO Filium nostrum Hispaniarum Regem Catholicum dilecto Filio, nobili viro Ioanni Andree Aurix, classis suæ Præfecto, mandauisse, vt cum
 eis,

eis, quibus Maiestatis suæ Catholicæ nomine præ-
est triremibus, se ad nostram Venetorumque clas-
sem adiungeret, quod nos litteris per tabellarium
deditâ operâ ad Maiestatem suam missum ab eâ ve-
hementer postulaueramus; cumque eâ de re Maie-
stati suæ gratias, quas debemus, egissemus; præ-
termittere noluius, quin eo ipso tempore cum
circumspectione quoque tuâ eodem officio his lit-
teris fungeremur; cuius vnus maximè operâ atque
diligentiâ illud ipsum, quod tantoperè cupiebamus,
ab eâdem Maiestate suâ impetratum esse sciebamus.
Scripsit enim ad nos Venerabilis Frater Archiepi-
scopus Rossanensis, noster & Sedis Apostolicæ apud
Serenissimum Regem Catholicum Nuntius, quali
quantâque humanitate, quamque alacri prompto-
que animo omnem adeundi alloquendi que Regis
laborem, negotiumque ipsum ex nostrâ sententiâ
conficiendi curam, circumspectio tua sponte susce-
perit, sic vt ne ipse quidem prædictus Nuntius no-
ster maiorem in eâ re diligentiam sedulitatemque
adhibere potuisset. Quocircâ circumspectionem
tuam pro tam egregiâ nobis Reipublicæque Chri-
stianæ operâ nauatâ debitis in Domino laudibus
commendantes, illi etiam gratias agimus quas de-
bemus: taliaque suæ erga nos sanctamque hanc Se-
dem Apostolicam obseruantia ac deuotionis indi-
cia, præterquam quòd suâ erga Deum Omnipoten-
tem pietate dignissima sunt, nobis præterea, vt par-
est,

est, gratissima fuisse significamus. Quia verò qui semel ad aratrum manum posuit, eum fas non est retrò aspicere; idcirco vehementer in Domino hortamur, ut quæ ad Reipublicæ Religionisque Christianæ salutem pertinere cognoueris, hæc omni semper studio adiuuare contendas: in primisque omnem gratiam, opem auctoritatemque tuam apud eundem Serenissimum Regem Catholicum interponere studeas, ut quod superioribus diebus de fœdere inter nos Sedemque Apostolicam, ac Maiestatem suam Catholicam, Venetorumque Rempubicam, aduersus immanissimam Turcarum gentem ineundo inter Maiestatis suæ ac Reipublicæ Venetorum mandatarios & à nobis delegatos, illius iussu auctoritateque nostrâ, actum statutumque est; id Maiestas sua quàm celerrimè ratum habere, fœdusque ipsum concludere velit. ut enim talis Christianorum Principum contra communes hostes confœderandorum societas atque coniunctio vna ex omnibus humanis rebus esse videtur, quæ sola imminentem à sæuissimo Turcarum Tyranno Reipublicæ Christianæ calamitatem propulsare posset; sic nos eam rem quamprimùm ad effectum adduci sic desideramus, ut quicumque eius ipsius fœderis celerem conclusionem omnibus viribus adiuuerint, hi, præter diuinæ remunerationis præmium, à nobis quoque magnam sint gratiam inituri. Quod circumspectionem tuam in primis effecturam esse

ita

ita persuasum habemus, vt, quo minùs id ab eâ pluribus verbis petamus, eâ de causâ prohibeamur, ne tam egregiæ tuæ erga nos sanctamque hanc Sedem Apostolicam ac Rempublicam Christianam voluntati diffidere videamur. Cetera verò, quæ tecum agenda erunt, ea prædicto Venerabili Fratri nostro & Sedis Apostolicæ Nuntio tibi exponenda mandauimus: cui in omnibus plenissimam fidem habebis. Datum Romæ apud sanctum Petrum sub annulo Piscatoris, die ultimâ Iulij, M. D. LXX. Pontificatus nostri annò quinto.

EPISTOLA XXVI.

Vt Christianis contra Turcas bellum gerentibus auxilio esse velit, Regem Portugalliæ hortatur. Vide lib. IV. cap. III. Vitæ PII V.

Charissimo in CHRISTO Filio, Sebastiano Portugalliæ & Algarbiorum Regi.

Charissime in CHRISTO Fili noster, salutem & Apostolicam benedictionem. Quod tua singularis in Deum Omnipotentem pietas, & erga nos sanctamque hanc Sedem Apostolicam deuotio nos hortatur, id fidenter admodum facimus, vt in his, quæ ad Reipublicæ Christianæ salutem, Religionis Fideique Catholicæ defensionem pertinent, tuam opem auxiliumque, vbi opus est, im-

ploremus. Quocircà ex litteris charissimi in CHRISTO. Filij nostri Hispaniarum Regis Catholici certiores facti, immanissimum Turcarum Tyrannum, classe maximâ instructâ, magnis equestribus pedestribusque copiis collectis, rupto fœdere, quod ei ad hanc diem cum Venetis fuit, bellum ingenti conatu aduersus Christianos moliri; dilectum hunc Filium Magistrum Ludouicum de Torres, Camerae nostrae Apostolicae Clericum, virum ob eximiam probitatem egregiamque erga nos Sedemque Apostolicam fidem nobis probatissimum, ad Maiestatem suam Catholicam misimus, vt eam ad classem primo quoque tempore mittendam hortaremur. Cui etiam mandauimus, vt ad Maiestatem tuam se conferat, eamque nostro nomine enixè roget, & per Deum Omnipotentem obsecret, vt ad Serenissimi Regis Catholici classem suas quoque triremes, quas decem numero esse audiuius, adiungere velit; vt communi nauali auxilio communibus hostibus, quantum fieri potest, obsisti possit. Quod ita à Maiestate tuâ perimus, vt maiori animi nostri studio petere non possimus. Prædicto autem Magistro Ludouico super his rebus, quas illi nostro nomine exponet, Maiestatem tuam eandem fidem habere volumus, quam nobis præsentibus secumque loquentibus haberet. Datum Romæ apud S. Petrum sub annulo Piscatoris, die XIII. Martij, M.D.LXX. Pontificatus nostri anno quinto.

EPISTO-

EPISTOLA XXVII.

SEBASTIANI Portugalliæ Regis ad PIVM V.

Pontificis consilium de fœdere contra Turcas probat: sed ad eam expeditionem quod petebatur auxilium mittere in præsens non posse excusans, id in posterum daturum se pollicetur.

Sanctissime in CHRISTO Pater, & Beatissime Domine. Sanctitatis tuæ litteras pridie Idus Martij datas reddidit mihi pridie Nonas Iunij Ludouicus de Torres, ac Beatitudinis tuæ nomine quæcumque habuit in mandatis exposuit; de maximâ videlicet expeditione, & exercitu terrâ marique comparato, quem Turca communis hostis, antiquo pacis fœdere, quod cum Venetâ Republicâ pepigerat, soluto, aduersus orbem Christianorum adornabat. Quamobrem admonebat me Sanctitas tua, & etiam atque etiam postulabat, quando, Principum Christianorum communis causa dum agitur, oporteret etiam ipsos communi periculo coniunctis viribus occurrere, ut meas triremes in Siciliam deduci, atque eas ibi unâcum Serenissimi Regis Castellæ auunculi mei triremibus iungi curarem. Certè enim, ut verum fatear, Sanctissime Domine, ita me pius zelus & paterna sollicitudo, quâ nobis communi totius Reipublicæ Christianæ tuendæ causâ ad obeundum munus nostrum persuadet, deuinctum & obligatum reddit, ut existimem nouo quodam nos beneficij genere adstringi

ad ingentes Deo Optimo Maximo gratias persoluendas, quòd his temporibus, dum Christiana Religio Ubique premitur & affligitur, talem Pontificem Ecclesiæ suæ & nobis donauerit, qui omnibus his calamitatibus sufficientissimum remedium præbeat, & qui Principes Christianos ad tam necessariam expeditionem cohortetur, eorum animos concordēs efficiat, & communi fœdere quodammodo in vnum cogat atque coniungat. Et quamquam Ludouicus ipse de his rebus ita mecum egit, vt facili ex eo intellexerim, facultatem mihi à Sanctitate tuâ concedi, vt prius de auxilio, quod petebatur, mittendo maturè considerarem, quid mihi facere pro ratione temporis expediret; nihilominus tamen rationes & causas omnes, quæ desiderium meum ad obsequium, tum in hac re, tum etiam in omnibus aliis, Sanctitati tuæ præstandum commouerent, repetendas esse existimaui. Ad hoc enim facilius ac celerius exequendum sese offerunt primùm maxima & grauissima pericula, quæ Turcica ista classis Christianæ Reipublicæ potest afferre, his præsertim temporibus, quibus Principes Christiani tot & tam variis curis & periculis, quibus est occurrendum, vrgemur: deinde reuerentia & obseruantia, quæ in omnibus Sanctitati tuæ debetur, in hac præcipuè tam publicâ causâ, Principibus quidem omnibus communi, sed Beatitudini tuæ propriâ, & quodammodo peculiari, quam veluti vniuersalis Pastor, & omnium primus & caput, omni præsidiorum genere sollicitè iuuare numquam desinit: tum etiam maiorum meorum exempla, qui in rebus leuioris momenti, & minoris etiam peri-

periculi, prompto animo Sedi Apostolica & Christiana Republica semper adfuerunt. Accedit præterea priuata quædam obligatio, quâ Sanctitati tuæ deuinctus sum, tum propter loci in quo residet celsitudinem, tum propter beneuolentiam & amorem paternum, quo omnes res meas fouet ac prosequitur: vetus etiam & antiqua amicitia, quæ inter hæc nostra Regna & Venetorum Rempublicam semper intercessit; in cuius auxilium felicitis memoriæ Rex Emanuel proauus meus classem olim ingentem misit. Ex aduerso autem quædam alia mihi occurrunt, frequentes scilicet occupationes, quibus me ad meorum Regnorum propugnationem & tutelam, & ad maximi etiam ponderis expeditiones ad hoc ipsum necessarias, sedulo intentum esse oportet; tum verò, quòd, quamuis huiusmodi auxilium nunc mitteretur, opportuno tamen tempore adesse non posset; propterea quòd nunc primum Sanctitatis tuæ litteras receperim, atque inter hæc Regna & portum, quòd tota hæc classis conuenire debet, intersint maxima locorum interualla. Quibus omnibus exactè consideratis, visum tandem mihi fuit de auxilio hoc anno intempestiue mittendo supersedere. Verùm si sequentibus annis bellum hoc continuabitur, & Sanctitas tua subsidium meum duxerit esse necessarium, libenter illud mittam; idque præstabo posthabitâ ratione earum rerum, quæ Regnis & ditionibus meis defendendis debentur. Etenim tanti facio obedientiam & obseruantiam, quam omnes Principes Christiani Sanctitati tuæ meritò ac iure optimo, hoc præsentim tempore, in omnibus præstare debemus, ut

*si summè piis Beatitudinis tuæ monitis paruero, quod me semper facturum spondeo, non dubium quin Deus Optimus Maximus meorum Regnorum patrociniū suscipiat, eorumque tranquillitati & honori benignè prospiciat. Beatissima enim Sanctitatis tuæ benedictio caussa erit potissima non solum ad id sperandum, sed etiam ad optatum tam sancti desiderij finem obtinendum. Atque ita fiet, ut nos omnes Principes Christiani communi consensu vires, o-
pes & facultates nostras ad bellum Turcæ cominūs inferendum præsentēs conferamus, certatimque pro anti-
quâ illarum regionum libertate recuperandâ nostrarum contentionum neruos intendamus, & Ecclesiæ Catholice sanctam Ierosolymam, ut ego impensè desidero, & Deo fautore futurum spero, restituamus. Datum Sintiæ, VI. Idus Iunij, M. D. LXX.*

EPISTOLA XXVIII.

Propensa Regis ad opem Christianæ Reipublicæ contra Turcas ferendam studia commendat: quid auxiliij ab eo sperandum sit edici, ineundi que coniugij negotium confici postulat. Vide lib. IV, cap. III. Vitæ PII V.

Sebastiano Portugalliæ Regi.

Charissime in CHRISTO Fili noster, salutem & Apostolicam benedictionem. Non facile verbis consequi possemus, quantoperè in Domino gauisi sumus, litteras Maiestatis tuæ VIII. die Iunij

Iunij datas legentes, & ea quæ dilectus Filius noster Magister Ludouicus de Torres, Camera nostræ Apostolicæ Clericus, copiosius ad nos scripsit cognoscentes: qui cum inter cetera, de quibus nos certiores fecit, illud etiam adieciſſet, quanto cum honore, quantâque cum Maiestatis tuæ erga nos sanctamque hanc Sedem Apostolicam deuotionis & obseruantia significatione ab eâ exceptus fuerit; opinionem nostram, quam de tuâ erga Deum Omnipotentem pietate ex multis nec dubiis eius signis conceptam iam pridem habebamus, non solum confirmauit, sed etiam vehementer auxit. Quod verò eadem Maiestas tua, & nobis ipsis scripsit, & prædicto etiam Ludouico confirmauit, se, quod ab eâ per litteras nostras postulauimus, classem suam omnibus rebus ad nauale bellum necessariis instructam contra communem hostem Turcarum Tyrannum Reipublicæ Christianæ auxilio mittere paratam esse; laudamus summo perè tam promptum alacremque Maiestatis tuæ animum ad defendendam Religionem Catholicam; piūque istum diuini honoris zelum, eximiumque Reipublicæ Christianæ tuendæ studium debitis laudibus, quemadmodum debemus, vehementer in Domino commendamus. Quâ in re Maiestas tua veterem clarissimorum maiorum suorum inclytæ memoriæ Regum virtutem egregiè imitatur, qui bellis contra infideles gerendis, magnam sibi & apud homines laudem, & maio-

ra apud Redemptorem nostrum merita pepererunt:
& causas quidem, quas Maiestas tua in suis ad nos
litteris affert, quare eam ipsam, quam mittere para-
ta est classem, hoc anno sibi mittendam non esse
existimauerit, verissimas atque iustissimas esse ipsi
quoque intelligimus; satisque habebimus, si se-
quenti anno eiusdem suæ classis auxilium nobis ac
Reipublicæ ipsi Christianæ paratum fuerit. Quam
quidem ad rem Maiestatem quoque tuam pro no-
stro officio hortaremur, nisi eam nullum cernere-
mus hortationibus nostris locum reliquisse. Illud
tantummodò à Maiestate tuâ nobis significari cupi-
mus, quanto vel triremium vel ceterorum nauigio-
rum numero existimet Christianam Rempublicam
in hoc aduersus communes hostes bello à se posse
iuvare, ut sciamus quid nobis certi auxilij ab istâ
parte polliceri possimus. In quo tamen Maiestatem
tuam nolumus quidquam supra vires conari, sed
sui Regnorumque suorum commodi eam quam
parestrationem habere: ut enim exploratum habe-
mus, Maiestatem tuam quibus rectè potuerit viri-
bus communi Reipublicæ Christianæ defensioni
affuturam, ita nihil eam suo incommodo agere vo-
lumus. Quæ verò idem Ludouicus de matrimonio
inter Maiestatem tuam & charissimi nobis in
CHRISTO Filij Regis Christianissimi sororem con-
trahendo, cum eâdem Maiestate tuâ locutus est &
egit nostro nomine; hæc pro certo habere debes,
illum

illum iussu mandatoq; nostro omnia egisse. Quamuis enim in ipsis nostris ad te litteris XIV. die Martij datis nihil tale adscriptum esset, id ob eas causas factum est, quæ tibi à prædicto Ludouico expositæ fuerunt: nostra verò voluntas eadem nunc est, quæ semper fuit ab eo tempore quo ad huiusmodi matrimonium Maiestatem tuam hortari cœpimus; ut scilicet, quamprimùm fieri potest, ad effectum adducatur: videmus enim tali matrimonio non solùm prouideri periculis, quæ isti, quâ Maiestas tua est, ætati imminere solent à variis voluptatum illecebris, sed etiam istius Regni prosperitati consuli; & quod maximè existimamus, Reipublicæ Christianæ tranquillitatem summoperè adiuuari. Nihil enim ad Christianorum Principum concordiam statuendam hac eorum inter se affinitatum coniunctione firmius esse existimamus. Pertinere hoc etiam ad dignitatem nostram, & huius sanctæ Sedis Apostolicæ Maiestatem putamus, ut de quo matrimonio nobis auctoribus, neque inuitâ Maiestate tuâ, semel agi cœptum est, id potissimùm perficiatur. Denique, quia nostræ erga Maiestatem tuam paternæ beneuolentiæ nobis ipsis consciij sumus; illud quoque scimus, nos nullas ob priuatas, vel nostras, vel cuiuscumque alterius rationes, tale matrimonium Maiestati tuæ suadere; sed ob eam tantummodò causam, quia illud & priuatim sibi Regnisque suis vtile, ac communi Reipublicæ Christianæ

tranquillitati conducibile fore non dubitamus. Quæ quidem vel sola causa videtur Maiestatem tuam ad obsequendum nostræ voluntati impellere debere, cum nihil ei exploratius esse debeat, quam nos id cupere, quod in rem Maiestatis tuæ sit. Quæ cum ita sint, Maiestatem tuam hortamur, ut ad tale matrimonium quamprimum contrahendum animum adijciat. Quâ de re copiosius locuti sumus cum dilecto Filio Maiestatis tuæ apud nos Oratore; & ut illam ad eandem rem nostro nomine ipse quoque hortaretur, postulauimus: quæque ad te scribimus, omnia cum ipso communicauimus; ut suspicari non debeat Maiestas tua, nos aliquid earum rerum ignorare, quas nobis per eum notas esse voluerit. Quod si aliquæ fortè difficultates sunt, quæ impendant, quo minus tale matrimonium concludatur, de his Maiestas tuâ si nos certiores fieri curauerit, eas omnes auctoritate nostrâ interpositâ tollere conabimur. Quod idem pro parte suâ Maiestas quoque tua facere debebit, ut scilicet in accipendis huiusmodi matrimonij conditionibus æquam se ac facilem præbeat, neque omnia summo iure prosequatur; sed communis utilitatis causâ de his quæ sibi iusta esse videbuntur, nonnihil remittat, quemadmodum ex prædicto Ludouico de Torres subtilius & copiosius cognoscet. cui & hæc ipsa, quæ scripsimus, & alia etiam Maiestati tuæ nostro nomine in eandem sententiam exponenda mandauimus.

uimus. cuius orationi vt eandem fidem adhibeat, quam nobis, si istic præsentem adesset, secum loquentibus adhiberet, Maiestatem tuam rogamus. Datum Romæ apud sanctum Petrum sub annulo Piscatoris, die VI. Augusti, M. D. LXX. Pontificatus nostri anno quinto.

EPISTOLA XXIX.

SEBASTIANI Portugalliæ Regis ad PIVM V.

Multa & varia excusat impedimenta, quibus fit vt bello contra Turcas auxilio nunc esse non possit; idque ægrè ferens, suam in Pontificem obedientiam & pietatem testatur: de affinitate sibi cum Valesiâ domo iungendâ respondet. Vide lib. IV. cap. III. & IX. Vitæ PII V.

Sanctissime in CHRISTO Pater, ac Beatissime Domine. Per Ludovicum de Torres Sanctitatis tuæ litteras VIII. Idus Augusti datas accepi, quibus iis respondebas, quas ad te illi dederam VI. Idus Iunij super eo quod à me, vt in bellum contra Turcas auxilium mitterem, postulabas. Quâ de re nunc Ludovicus ipse Beatitudinis tuæ nomine mecum est collocutus. Video equidem, Beatissime Domine, planeque perspicio, quàm sapienter ac piè mecum agat Sanctitas tua, me per litteras ac Nuntios super eâ re compellando, summâ tum vniuersæ Christianæ Reipublicæ, tum etiam Regnorum ditionumque mearum,

Et eius item officij, quod eis tutandis præstare in primis debeo, habitâ ratione. Quæ quidem ratio valdè consentanea desiderio est, quo ego, tuorum in me per omnem occasionem collatorum meritorum non immemor, ardeo morem gerendi Sanctitati tue. Ac propterea intelligo, quò magis Beatitudo tua de iis agit quæ mihi conueniunt, eò magis etiam me, vt iussiones eius omnes cumulatè faciam, eniti debere. Mihi verò gratissimum accidisset, si fieri potuisset à me, vt statim Sanctitati tue classem decernerem, numerumque nauium, quas in istius belli subsidium mittere possem, quando Turcica classis in Christianos arma conuerteret. Verùm quæ mihi, ne quod optabam mitterem auxilium, tunc impedimento fuerunt, eadem quoque mihi aduersantur hoc tempore; eoque magis, quòd eiusmodi ego subsidij nominationem facere nequeam. Nam præter eas & expeditiones & classes, quas moliebar eo tempore, quo ad Beatitudinem tuam de conseruandâ augendâque Catholicâ Religione, deque Regnis ac ditionibus meis tutandis perscripsi; alia quamplurima, eaque grauissima, superuenerunt incommoda, quibus ego nullâ interiectâ morâ non providere non possum. Etenim sequenti anno tot armatas cohortes in Indias mittendas esse constitui, vt inibi contra Turcam depugnetur, quot ex more per tres annos eòdem proficisci consueuerunt. Accedit, quòd Regnorum ditionumque mearum maritimos portus denuò iussi communiri, eorumque militem parari & exerceri: cuncta præterea classium mearum Regnorumque nauigia instrui mandauimus. Nunc autem, licet hieme iam ineunte, classis à me
dirigi-

dirigitur aduersus nonnullos piratas Hugonotos, qui plurimis iisque sacratis viris occisis, atque aliis non paruis detrimentis illatis, naues aliquot ceperunt. Alia porro classis in Mini, alia in Congi Regna, alia in insulas dirigenda mihi est; parandæque copiae, & ornanda classēs in hæreticos, quos ex Gallis Angliæque excessuros esse audio, pace inter eos, uti fertur, succedente; & itidem aduersus Seriphum Mauritaniæ Regem, qui præter quas habet terrestres opes, triremes etiam complures instruit, ac subinde maritimas copias adauget, quibus superioribus annis Canarias insulas magnis cladibus affecit. Atque hæc quidem rationes omnes tantoperè me adiungunt deuinciuntque, ut, quemadmodum perspicit Sanctitas tua, hisce rebus vel iuuandis vel curandis deesse nullo modo queam. Equidem Beatitudini tuæ persuasum esse velim, quàm egrè feram his de causis non posse me, quam opto classem ei decernere, atque pro meâ summâ voluntate in rebus omnibus Sanctitati tuæ deseruire, ferreque suppetias vniuersæ Christianæ Reipublicæ: iubeo tamen atque impero, summâ diligentiam atque studio, quibusuis necessariis sumptibus nihil parcendo, curetur, ut quam decreui classem instruaturne orneturque, tum ad paulò antè commemorata depellenda pericula, tum etiam ad omnia Sanctitatis tuæ iussa facienda.

Porro autem quod ad me scribit Sanctitas tua de nuptiis in Galliâ celebrandis, super eo Beatitudinis tuæ nomine mecum verba fecit Ludouicus de Torres; rationibus etiam adhibitis, quibus ego adductus, id ad meam ipsius

Regnorumque meorum Christianaque Reipublicae utilitatem facere deberem. Equidem omnibus in rebus Beatitudinis tuae in me benevolentiam agnosco, atque res mea quanta curae ei sint, planè perspicio. Quibus ego maximis ac plurimis ei adiunctus officiis, sacros pedes tuos venerabundus osculor, tuaeque Beatitudini in mentem renovo, id quod iam antea ad eam scripsi, ac per Ioannem Tellum meum Consiliarium & apud Sedem istam Oratorem, ac proinde per Ludovicum de Torres mandavi referendum Sanctitati tuae, me nimirum ab eiusmodi consilio longè adhuc animo absuisse. Quòd si cogitationibus meis sic anteverterit Deus, ut id aliquando faciendum esse constituam, nihil tamen absque Beatitudinis tuae consilio iudicioque discernendum putabo. At verò, quoniam res iam eo loco sunt, ut quidquam aliud de illis constituere mihi non sit integrum, uti Beatitudini tuae exploratum est, ab eâ supplex peto atque oro, ut, quemadmodum eam facturam esse confido, consiliorum meorum rationes omnes equè bonique consulat. Cetera porrò quae ad haec attinent, Sanctitas tua facile intelliget, tum ex ipso Ludouico, tum etiam ex meo istic Legato: quorum ego sententiae planè subscribam. Sanctissime in CHRISTO Pater, ac Beatissime Domine, Sanctitatem tuam in multos annos ad Ecclesiae suae sanctae utilitatem Deus incolumem conseruet. Sintiae, XVIII. Kal. Octobr. M. D. LXX.

EPISTOLA XXX.

*Quòd Ludouicum internuntium benignè suscepit ac iu-
uerit, gratias agit: oblatae classis officium probat: con-
nubij negotium commendat. Vide lib. IV. cap. III.
& IX. Vitæ PII V.*

Charissimæ in CHRISTO Filix nostræ Ca-
tharinæ, Portugalliæ Reginæ.

CHarissima in CHRISTO Filia nostra, salutem
& Apostolicam benedictionem. Accepimus
litteras Maiestatis tuæ XIII. Iunii die datas: ex qui-
bus, & ex his quæ dilectus Filius Magister Ludoui-
cus de Torres Camera nostræ Apostolicæ Clericus
ad nos scripsit, suam erga nos sanctamque hanc Se-
dem Apostolicam eximiam obseruantiam ac deuo-
tionem, multò etiam antè nobis spectatissimam,
magnâ cum animi nostri lætitiâ cognouimus. Ma-
iestati autem tuæ gratias agimus de omnibus offi-
ciis, quibus nostri atque huius sanctæ Sedis honoris
causâ erga prædictum Ludouicum functa est: quod-
que illi ad conficienda negotia, ob quæ in istud Re-
gnum à nobis missus est, ope, gratiâ auctoritateque
suâ præstò fuerit; in eâ re Maiestas tua fecit id quod
suâ erga Omnipotentem Deum pietate dignum fuit,
quodque semper de suo diuini honoris zelo nobis
polliciti sumus. Valdè autem gauisi sumus in Do-
mino,

mino, charissimum in CHRISTO Filium nostrum Regem Portugalliæ, nepotem suum, tam prompto alacrique animo nobis ac toti Reipublicæ Christianæ, pro eâ aduersus immanissimum Turcarum Tyrannum tuendâ, classis suæ auxilium obtulisse. Quâ de re, etsi Maiestatis suæ studium erga eandem Rempublicam Christianam benè cognitum habentes, numquam dubitauimus; id ipsum tamen ex Maiestatis tuæ suæque litteris cognouisse, gratissimum nobis fuit. Quibus pro hac vtriusque erga se pietate dignum præmium ille ipse reddet Deus, qui nihil quod eius causâ fiat sine remuneratione esse patitur. De matrimonio autem inter eiusdem Serenissimi Regis nepotis tui Maiestatem, & charissimi nobis in CHRISTO Filij Regis Christianissimi sororem, rem confectam velimus. Quocirca Maiestatem tuam hortamur, vt suas partes Regis ad tale matrimonium hortandi suscipiat, omnibusque viribus suis in eam curam incumbât, vt quamprimum fieri potest, ad effectum adducatur. Cuius quidem nostræ voluntatis ac desiderij iustissimas causas, & aliquâ ex parte ad eundem Serenissimum Regem nuper scripsimus, & Maiestati suæ ab eodem Ludouico explicandas iterùm mandauimus: à quo Maiestas tua cetera cognoscere poterit, quæ in hanc sententiam plura scribere potuissimus; ei que fidem plenissimam, super his quæ secum loquetur, adhibebit. Datum Romæ apud sanctum Petrum sub annulo

Pisca-

Piscatoris, die VI. Augusti, M.D.LXX. Pontificatus nostri anno quinto.

EPISTOLA XXXI.

*Ut Christiana classis contra Turcas à Rege opem imploret.
Vide lib. IV. cap. III. Vitæ PII V.*

Dilecto in CHRISTO Filio nostro, Henrico Cardinali Portugalliae.

Dilecte Fili noster, salutem & Apostolicam benedictionem. Certiores facti, sæuissimum ac potentissimum Turcarum Tyrannum ingenti conatu contra Christianos hoc anno bellum apparare, necessarium esse duximus, dilectum hunc Filium, Magistrum Ludouicum de Torres, Camerae nostrae Apostolicae Clericum, virum ob spectatam probitatem & fidem nobis probatissimum, ad charissimum in CHRISTO Filium nostrum Hispaniarum Regem Catholicum implorandi eius auxilij causâ mittere: cui mandauimus, vt istuc quoque se conferret, cumque Serenissimo Rege nepote tuo quibusdam de rebus nostro nomine ageret, ad hoc idem negotium magnoperè pertinentibus. Rogamus autem circumspeditionem tuam, & per Omnipotentem Deum obsecramus, vt pro suâ eximiâ in Deum Omnipotentem pietate, communisque Reipublicae Christianae salutis studio, ei ad conficien-

dum negotium, cuius causâ à nobis missus est, suam opem, consilium fauoremque apud eundem Regem Serenissimum accommodet; eiusque sermoni, super his rebus quas ipsi nostro nomine exponet, perinde fidem habeat, ac si nos præsentes secumque loquentes audiret. erit id nobis certè gratissimum. Datum Romæ apud sanctum Petrum sub annulo Piscatoris, die XIV. Martij, M.D.LXX. Pontificatus nostri anno quinto.

EPISTOLA XXXII.

Quòd auxilium Christianæ Reipublicæ contra Turcas mittendum apud Regem benè curauerit, gratias agit: ipsiusque Regis coniugium ut procuret, hortatur.

Ad eundem.

Dilecte Fili noster, salutem & Apostolicam benedictionem. Quamuis numquam nobis dubium fuerit, quin charissimus in CHRISTO Filius noster Portugalliæ Rex, nepos tuus, pro suâ erga Deum Omnipotentem pietate, & erga nos sanctamque Sedem Apostolicam deuotione, opinioni, quam de Maiestatis suæ erga Rempublicam Christianam studio summam semper habuimus, cumulatè responsurus esset; tamen ex illius circumspeditionisque tuæ litteris VI. & VII. Iunij die ad nos datis, & ex his quæ dilectus Filius Magister Ludouicus

Louiscus de Torres, Camerae nostrae Apostolicae Clericus, ad nos scripsit, certiores facti, quam prompto alacrique animo classis suae auxilium aduersus immanissimum Turcarum Tyrannum pro Republicâ Christianâ tuendâ insequenti anno obtulerit, magnoperè in Domino gauisi sumus, Maiestatiq̃ suae eas quas debuimus gratias continuò egimus; quas easdem circumsp̃ctioni tuae quoque agimus, pro omnibus officiis, quibus & praedictum Ludouicum, quàm diu istic fuit, nostri atque huius sanctae Sedis honoris gratiâ complexa est; & ei ad conficienda negotia, ob quae à nobis missus fuit, operam, gratiam auctoritatēq̃ suam apud eundem Serenissimum Regem nepotem suum praestitit. Illud tantummodò nobis molestum fuit, quòd de matrimonio inter illius Maiestatem & Christianissimi Francorum Regis sororem contrahendo res adhuc confici non potuerit. Quâ de re cùm ad eum nuper diligentissimè scripserimus, eiusq̃ Maiestatem ad tale matrimonium quamprimùm stabiliendum vehementer in Domino hortati fuerimus; visum nobis est eodem tempore super eadem re ad circumsp̃ctionem quoque tuam scribere, eamq̃ (sicut his litteris facimus) hortari, vt apud praedictum Serenissimum Regem de eo ipso matrimonio concludendo agere ne desistat, donec (id quod nos, & priuatae Regis Regniq̃ sui & publicae populi Christiani tranquillitati vtilissimum esse non dubitamus)

adiuuante Domino, tuâque auctoritate intercedente, tandem aliquando perficiatur. Cuius rei causâ prædictum Ludouicum de Torres istuc reuerti volumus, & de eiusmodi matrimonij conclusionem Regem vrgeri. Cuius orationi super hac ipsâ re, ceterisque quæ secum loquetur nostro nomine, vt plenissimam fidem adhibeat, circumspectionem tuam requirimus. id erit nobis gratissimum. Datum Romæ apud sanctum Petrum sub annulo Piscatoris, die VI. Augusti, M.D. LXX. Pontificatus nostri anno quinto.

EPISTOLA XXXIII.

Has PIVS litteras manu suâ scripsit, quibus Cardinalem, vt matrimonium inter Sebastianum Regem & Margaritam Valefiam iungendum curet, hortatur. Vide lib. IV. cap. III. Vita PII V.

Ad eundem Cardinalem.

Dilecte Fili noster, salutem & Apostolicam benedictionem. Diebus elapsis quando missimus ad Serenissimum Regem nepotem tuum, pro implorando auxilio contra immanissimum nominis Christiani hostem Turcarum Tyrannum, Ludouicum à Turribus; ei quoque dederamus in mandatis, vt de matrimonio cum Serenissimâ Margaritâ, Christianissimi Regis sorore, sermonem haberet, quodque

quodque omnia cum tuâ Reuerendissimâ Dominatione conferret, ac cum Serenissimâ ipsius auiâ, reliquisque sanguine attinentibus. Verum quia in litteris nostris ad ipsum Serenissimum Regem nulla de contrahendo matrimonio mentio habebatur; iure Maiestas sua arbitrari potuit, rem non ita nobis cordi esse, prout est, & ob communem Christiani populi tranquillitatem ac pacem, Regnorum suæ Maiestatis bonum, ac in salutem ipsius Regis Serenissimi esse optamus. Idcirco volumus ac mandauimus ipsi Ludouico, vt iterum ad eandem Maiestatem redeat, & eâ de re iterum instet, litterasque manu nostrâ scriptas tradat; prout & præsentibus quoque Reuerendissimæ Dominationi tuæ: vt in omnibus, quæ eâ de re ac de ferendis suppetiis exponet, ea percipiat perinde ac si nos ea coram exponeremus; eandemque fidem eius dictis adhibeat, perinde ac si ex ore nostro prodirent. Seruet Deus Omnipotens Amplitudinem tuam incolumem in bonum Ecclesiæ suæ sanctæ, ac præcipuè Regnorum suæ Maiestatis Serenissimæ. Ex Vrbe XXIII. Augusti, M. D. LXX.

EPISTOLA XXXIV.

Vt Catharinam Lusitaniæ Reginam amitam suam ex illo Regno in Castellam venire cogitantem de sententiâ deducat, & matrimonium cum nepote Rege & Margaritâ

*Valefistâ iungi procuret, Hispaniarum Regem hortatur
Vide lib. IV. cap. IX. Vitæ PII V.*

Philippo Hispaniarum Regi Catholico.

Charissime in CHRISTO Fili noster, salutem & Apostolicam benedictionem. Per litteras Archiepiscopi Rossanensis Nuntij nostri, quæ Maiestas tua respondit, intelleximus: quòd nimirum ad Serenissimæ Lusitanorum Reginæ ex eo Regno discessum atque istuc aduentum attinet, id ne cogitasse quidem te, nedum desiderauisse, nisi quatenus eiusdem Reginæ studio curâque factum est; idque sic se habere, nobis, vt par erat, gratum accidit. Sed quoniam ea nos cura vehementer angit valdeque sollicitat, ob Regis illius atque adeò totius Regni eius tranquillitatem; illud in primis à Maiestate tuâ etiam atque etiam petimus, vt ipsi Reginæ istuc se conferre cupienti atque petenti non modò non facilem se præbeat, sed etiam obsistat; illamque proinde quàm optimis poterit rationibus moneat & adhortetur, vt Regis curam Regni que suscipiat. Et quoniam non ita pridem intelleximus, eandem Reginam Serenissimo Regi nepoti suo de eius Regni administratione quædam proposuisse, quæ dilecti Filij nostri Henrici Cardinalis animum commouere & offendere non mediocriter queunt; atque inter eos oriente dissensione, id ipsi Regi illisque popu-

populis grauissima damna & incommoda posset afferre: idcirco hortamur te ac vehementer petimus, uti auctoritatem tuam interponas, cum pro eâ, quæ tibi cum illis Principibus intercedit, affinitate & amicitia, tum etiam pro suâ in eos beneuolentiâ; perficiasque, ut eorum animi reconcilientur, quò pari studio ac voluntate Regi prodesse possint; & quæ huic concordia mutuæque beneuolentiæ, siue Regis, siue Reginae, siue Cardinalis, in administris & consiliariis, aut in aliis hominibus, obesse iudicaueris, ea prorsus remouenda procures. Et sanè pergratum nobis fuit, illius Regis animum ad Margaritam, Christianissimi Regis sororem, sibi uxorem adsciscendam quotidie magis propendere. Ut igitur negotium primo quoque tempore cures conficiendum, à Maiestate tuâ efflagitamus. Nos autem, si eam rem iuuare aliquo modo posse cognouerimus, libenter, quando tibi ita videbitur, nostram in id auctoritatem interponemus. Datum Romæ apud S. Petrum sub annulo Piscatoris, die VIII. Augusti, M.D.LXX. Pontificatus nostri anno quinto.

EPISTOLA XXXV.

Ad socialis belli fœdus contra Turcas secum & cum aliis Christianis Principibus ineundum, Mosconitarum Ducem hortatur. Vide lib. IV. cap. XIII. Vitæ PII V.

Dilecto

Dilecto Filio, nobili viro, N. Mosco-
uitarum Duci.

Dilecte Fili, nobilis vir, salutem & Apostoli-
cam benedictionem. Non dubitamus in
Nobilitatis tuæ notitiam perlatum esse, quali quan-
toque maritimarum terrestriumque copiarum ap-
paratu immanissimus Turcarum Tyrannus bellum
hoc anno contra Rempublicam Christianam ge-
rendum suscepit, imò potius hoc ipso tempore
iam gerat, cum & maximâ classe instructâ Cyprum
Venetorum insulam oppugnet, & ingentibus quo-
que terrestribus copiis comparatis Christianæ ditio-
nis Regnis atque Imperiis interitum atque exitium
minitetur. Quibus tot tantisque periculis, nobis &
huic sanctæ Sedi Apostolicæ & vniuersæ Christia-
norum Reipublicæ impendentibus, commoti, ne-
cessarium esse duximus, Reges omnes ac Principes
Christianos ad ineundum aduersus communem ho-
stem nobiscum fœdus excitare: vt enim eorum vi-
res disiunctas atque dispersas potentissimorum Tur-
carum viribus pares esse non posse intelligimus, ita
coniunctas & confociatas non desperamus eiusdem
atrocissimæ gentis vim atque impetum frangere
posse. Cuius quidem consilij nostri auctoritatem
charissimus in CHRISTO Filius Hispaniarum Rex
Catholicus, & dilectus itidem Filius, nobilis vir
Aloisius

Aloisius Venetiarum Dux Senatusque Venetus secuti, nobiscum per procuratores suos fœdus aduersus eundem Turcarum Tyrannum inierunt: speramusque Serenissimum Maximilianum Hungariæ & Bohemiæ Regem in Imperatorem electum, & charissimum nobis in CHRISTO Filium Carolum Regem Francorum, paternis nostris hortationibus excitatos in eiusdem fœderis societate esse venturos. Ad huius autem sanctissimi gloriosissimique fœderis societatem visum nobis est Nobilitatem quoque tuam inuitare; illam, prout hisce nostris litteris facimus, hortantes, vt arma, quibus se populosque sibi subiectos Deus Omnipotens tantoperè excellere voluit, pro Christianorum communis salutis defensione aduersus Turcas nobiscum, & cum ceteris Christianis Principibus capere velit. Quod si fecerit, speramus, quæ tua populorumque tuorum tibi subditorum militaris est virtus ac potentia, magnas nobis esse accessuras vires, ad communis omnium Christianorum hostis impetum ac vires debilitandas ac labefactandas. Quanta enim sit potentia tuæ magnitudo, quanta sit gentis tuæ in militaribus rebus fortitudo, non ignoramus. Quam quidem ad rem primùm innata sibi veræ gloriæ cupiditas Nobilitatem tuam hortari, deinde propria etiam vtilitas debet. Fallitur enim Nobilitas tua, si existimat, auidissimam dominandi Turcarum gentem, nisi omnibus prius Regnis ac Potentatibus vel deletis,

vel miserrimâ seruitute oppressis, vniquam esse quieturam. hoc illi vnum semper propositum fuit, hoc semper spectauit & spectat, vt omnes quæ vbiq̃ue terrarum sunt nationes, omnia Regna, omnesq̃ue Principatus, importunâ quâdam regnandi cupiditate in suam redigat seruitutem. Itaque nullum est in Occidentis partibus Regnum, nullus Potentatus, quem non spe iam & cogitatione inuasurit, vique subegerit: nam quia Christianos inter se Principes numquam consensuros esse existimat, idcirco facile putat omnium illorum Regna vi atque armis sibi vindicare: & dum aliquibus Principibus bellum inferens cum aliis interim amicitiam simulat, omnes opprimere ac de medio tollere vult. tibi autem, populisq̃ue tuæ ditioni subiectis, eò maius ab eâ gente periculum impendet, quò ab illius imperio propius abes. Quæ cum ita fiat, Nobilitatem tuam hortamur, vt in prædicti fœderis societatem venire, & aduersus communem hostem Turcarum Tyrannum communi consilio atque armis pium bellum gerere velit, potius quàm omnibus Regnis per eum sublati, dum ad se quoque eiusdem incendij flamma perueniat, expectare. Quia verò certiores facti sumus, Nobilitatem tuam aliquando in animo habuisse, huius sanctæ Romanæ Ecclesiæ proprium Religionis cultum amplecti; idcirco ei pollicemur, nos, si id fecerit, nulla paternæ nostræ erga se voluntatis indicia prætermisuros, & quibuscumque cum

Domino

Domino poterimus officiis nostram illi beneuolentiam declaratu-
ros: quemadmodum Nobilitati tuæ copiosius explicabit dilectus Filius Vincentius Por-
ticus, Notarius noster, & apud Serenissimum Polo-
niæ Regem noster ac Sedis Apostolicæ Nuntius;
quem ad Nobilitatem tuam deditâ operâ venire vo-
luimus: cuius orationi super omnibus, quæ sibi ex-
ponet, eandem fidem vt adhibeat, quam nobis, si
præsentes cum eâ loqueremur, adhiberet, Nobilita-
tem tuam rogamus. Datum Romæ apud S. Petrum
sub annulo Piscatoris, die IX. Augusti, M. D. LXX.
Pontificatus nostri anno quinto.

EPISTOLA XXXVI.

*Anglis Catholicis contra hæreticos auxiliares copias mitti
procurat. Vide lib. III. cap. IX. Vitæ PII V.*

Dilecto Filio, nobili viro Ferdinando
Duci Albæ.

Dilecte Fili, nobilis vir, salutem & Apostoli-
cam benedictionem. De motu rerum Angli-
carum à Catholicis eiusdem Regni contra hæreti-
cos, atque adeò contra illam quæ se pro Angliæ Re-
ginâ gerit, excitato, certiora & maiora indies cog-
noscentes; pro suscepto Apostolicæ seruitutis offi-
cio, anxio & sollicito animo esse cogimur de illorum
salute, qui pro restituendâ in eo Regno Catholicâ

Religione non minùs piis quàm iustis armis susceptis, periculum fortunarum & capitis sui pro Dei Omnipotentis causâ neglexerunt. Quia verò, propter istius cui præes regionis cum eo Regno vicinitatem; te vnum maximè omnium Anglorum Catholicorum copias multis modis iuuare posse intelligimus; idcirco Nobilitatem tuam hortamur, & quo maiore animi nostri studio possumus, rogamus, vt, si hoc charissimi in CHRISTO Filij nostri Hispaniarum Regis Catholici voluntate & commodo facere potest, quidquid ad eas ipsas copias, vel tuendas, vel augendas, vel adiuuandas conferre valet, id ne prætermittere velit. Vt enim, si eorum, qui ferre auxilium possunt, subsidio destitutæ fuerint, periculum est, ne vel ab aduersariis opprimantur, vel per se ipsæ dissipentur: sic etiam, si adiutæ fuerint, sperandum est per eas in Regno illo Religionem Catholicam restitui posse. Quæ res, si Deo in primis adiuuante, teque omnibus quibus potes rebus adnitente, acciderit; vides ipse quantam ex eâ re, quamque solidam veramque gloriam sis consecuturus. Quod, nisi res ipsa per se satis loqueretur, pluribus verbis tecum ageremus: sed quia, & hæc ipsa quæ diximus, & cetera, quæ in eandem sententiam dici possent, Nobilitati tuæ pro suâ prudentiâ & maximo rerum vsu perspectissima esse scimus, ipsamque ad benè de Religione Catholicâ merendum satis suâ sponte incitatum esse intelligimus; idcirco non dubitamus,

bitamus, eam libenter & promptè, quidquid poterit, pro fidei Catholicæ causâ facturam, in eâque re nullum neque nostris neque cuiusquam hortationibus locum relicturam. quod ut faciat, pro nostro tamen officio vehementer in Domino rogamus. Datum Romæ apud sanctum Petrum sub annulo Piscatoris, die IV. Februarij, M. D. LXX. Pontificatus nostri anno quinto.

EPISTOLA XXXVII.

Scotiæ Reginam Catholicâ pro fide in carcere fortiter se gerentem commendat & consolatur. Vide lib. III. cap. VIII. & IX. Vitæ PII V.

Mariæ Reginae Scotiæ.

Charissima in CHRISTO Filia nostra, salutem & Apostolicam benedictionem. Non solum Maiestatis tuæ litteras ultimâ die Aprilis ad nos datas libenter legimus, quibus ad nostras nonâ die Ianuarij scriptas rescribit; sed etiam nuntium ipsum, qui eas attulit, de tuo rerumque tuarum statu nobiscum copiosius loquentem, & benignè, quemadmodum debuimus, excepimus; & attentè audiuiamus. In ipsis autem litteris Maiestatis tuæ duo nos præcipua vehementer in Domino delectauerunt. primum, quòd, quamuis multis magnisque calamitatibus afflicta, consolationem tamen no-

stram Maiestas tua sic suscepit, vt eâ ipsâ non modò leuatum esse dolorem suum, sed sanatum esse significet: alterum, quòd Omnipotentis Dei benignitatis ac misericordiæ sic confidere videtur, vt firmiter speret se nullis neque periculorum ac tormentorum denuntiationibus, neque præmiorum pollicitationibus ab Ecclesiæ Catholicæ communione atque obedientiâ auelli posse. In altero animi tui patientiam diuinæ voluntati acquiescentem, in altero perseverandi voluntatem spei desiderio incensam, debitis in Domino laudibus commendantes, Maiestatem tuam hortamur, vt eam ipsam in Redemptore nostro spem omni studio retinere studeat: nam si in miseriis posita per patientiam & spem Dominum expectabit, viasque eius perseveranter custodierit, potens est Dominus non solum Maiestatem tuam exaltare, vt post breuem hanc vitam hereditate capiat Regnum cæleste; sed etiam vt in hac vitâ constituta, ex tot tantisque calamitatibus aliquando erepta, in pristinam Regni temporalis possessionem restituatur. Quam quidem ad rem, quæcumque potuimus adiumenta, & antea Maiestati tuæ attulimus, & quæ deinceps poterimus, semper afferemus. vt enim nihil est quod suæ isti singulari erga nos sanctamque hanc Sedem Apostolicam deuotioni & Religionis Catholicæ studio deberi non existimemus; sic nulla vnumquam paternæ nostræ erga se voluntatis officia patiemur ab eâ desiderari. Reliquis
autem

autem de rebus, de quibus prædictus Nuntius suus nobiscum Maiestatis tuæ nomine egit, quid respondendum, quidve statuendum duxerimus, ex ipso met Maiestas tua subtiliùs cognoscere poterit, cuius nos orationi referimus. Datum Romæ apud S. Petrum sub annulo Piscatoris, die XIII. Iulij, M.D.LXX. Pontificatus nostri anno quinto.

EPISTOLA XXXVIII.

MARIÆ Scotorum Reginæ ad PIVM V.

Pontificis erga se benignitatem commendat: sociali bello contra Turcas opem ferre cupit: suas ac Regni sui calamitates deplorat: vel duris conditionibus cum Anglis pacem facere se debere scribit: denique Filij sui pietatem in Deum, & in Apostolicam Sedem obedientiam, perpetuam fore pollicetur.

Beatissime Pater, post Sanctissimorum pedum oscula, sub Octobris initium Sanctitatis tuæ litteras tertio Idus Iulij datas accepi, quibus intellexi non solum quòd ad me Beatitudo tua misit Apostolicæ benedictionis munus, quod mihi fuit eritque perpetuò quàm gratissimum; sed etiam quàm apertè illa testaretur se mihi fore consolationi, & quàm libenti animo suâ me benevolentia dignaretur. Ego verò mirificè recreabar antea, cum singulari pietate, quam mihi Beatitudo tua, gravissimis alio-

qui

qui rebus occupata, datis ad me litteris declarabat, tum etiam quòd ei placuisset, & me & res meas potentissimis quibusque Principibus, ac præsertim Serenissimis Galliarum Hispaniarumque Regibus commendare. Verùm enimuerò alterà ex parte reliquum esse video, Christianos impellere, vt, arctissimà inter se conflata societate, nullis aut vigiliis aut laboribus aut sumptibus parcendum putent, quò aliquando possint crudelissimum illum Turcarum Tyrannum, nihil aliud assiduè molientem quàm vt nobis vniuersis bellum inferat, prorsus debellare. Atque vti-
nam cetera omnia meæ responderent voluntati! Nam quid subinde fieret à me, Sanctitati tuæ planè indicaret euentus; foretque, vt non solum ego, sed etiam qui in meâ sunt auctoritate, omnes animis viribusque coniunctis vnà cum ceteris Christianis vniuersis extrema quæque experirentur. Sed quid miserabilius spectari potest, quàm me ex eo, in quo florebam antea statu felicitatis, in tot tantasque misérias deiectam intueri? quid maiore dignum commiseratione, quàm ex liberà, quæ eram, seruam factam esse? Ad has autem misérias illud accedit etiam incommodi, quòd tot tantisque calamitatibus oppressa & dissipata, totque Anglorum incursionibus afflicta reperitur patria mea, vt pagi quamplurimi incendio conflagnarint, multaque castella & sacratæ ædes funditus euerse conspiciantur: sed, quod peius est, ditionum mearum incolæ subiectique mihi populi ab hostibus, nullà vel minimà laceffitisi iniurià, sunt crudelissimè contrucidati. Sed quid? An mihi de me nihil est dicendum? An verò quispiam

quispiam ignorat, quàm certis variisque in periculis assidue verser? Testem inuoco Deum, qui nouit optimè quàm magnis miseriarum fluctibus ad hanc vsque diem sim perpetuò conflictata. Atque interim hac ipsâ sæuâ tempestate furente quotidie magis, qui rebus prouidendis auxilio se mihi futuros esse pollicebantur, ij mox promissis minimè stantes nullam prorsus mihi opem attulere, neque spes est deinceps eos allaturos: nisi fortè hæc hominum ingenia in tutandam rem meam pro tempore propensiora fiant, & ad eiusmodi pro me suscipienda negotia aliquando commoueantur. Verùm vt quod sentio liberè dicam, tametsi ex transmarinis gentibus copie exercitusque fortissimi cogerentur; tamen non sine graui periculo brumalibus diebus in Scotiam traïci possent per Oceanum, qui per id tempus turbulentissimus ac fluctuantissimus esse solet. At Verò alterâ ex parte Angli, qui nullo interfluente amne dirimuntur à Scotis, ipsis bellum queunt inferre: qui quidem vel minimâ inter se ortâ contentione in armis confestim esse consueuerunt. His ego grauissimis adacta consiliis, nisi velim & vitæ & patriæ meæ rationibus summa conflare pericula, facere nullo modo possum, quin conditionibus, mihi vel incommodissimis, cum Anglis pacem conficiam: saluis tamen semper, vt dici solet, honoris & conscientiæ legibus. Honor enim est in administratione ciuili necessarius ad Rempublicam rectè moderandam: conscientia verò, tamquam vis & regula diuina mortalibus indita, solet eos ad optimum quemque finem dirigere. Quæ licet aliquando calamitatibus prematur, nullis tamen vniquam

vel cruciatibus, vel præmiorum pollicitationibus, ab Ecclesiæ Catholicæ communionem & obedientiam distrahi mihi potest vel exturbari. Sed inter cetera illud vnum sanè acerbissimum Sanctitati tuæ referendum putavi: nempe rem eousque processisse, ut cupiant aduersarij vnicum filium meum Regniq̃ue heredem, Anglorum in manus tamquam obsidem ad tempus dari: sic tamen, ut mihi interim sit integrum, quos velim ei moderatores & consiliarios adiungere: ac proinde liberè pateat aditus, non modo mihi, sed etiam ijs omnibus, quos ad eum visendum in Angliam mittendos ipsa decreuero. Neque verò Sanctitati tuæ dubium esse debet, quin ipse bonis sanctisque moribus præditus, sit futurus, quamuis in medio nationis prauæ esset ei viuendum, perfectum Catholicæ Apostolicæq̃ue membrum Ecclesiæ, ad eius opem semper paratissimum. Verùm ne longior fiat Epistola; clausula sit, omnino velle me Beatitudini tuæ identidem nuntiare de statu & successu rerum omnium, quæ inter hoc genus hominum & me fiunt hoc tempore, & item earum quæ paulò grauiores gerantur indies. Et verò quoniam omnia litteris tradere difficillimum est, idcirco de rebus meis omnibus edocui Dublinensem Antistitem, quippe qui mihi semper fidelissimus fuit internuntius, idemq̃ue Sanctitatis tuæ & sacrosanctæ Sedis Apostolicæ studiosissimus. cui sanè in rebus vniuersis, quas ille meo nomine tecum aget, Beatitudo tua fidem habere poterit. Interea verò Deum Dominum nostrum supplex oro, ut pro suâ infinitâ clementiâ à perniciosissimis hostium suorum cogitationibus

nibus Ecclesiam Catholicam protectam velit. In quâ nos omnes in Sanctitatem tuam, tamquam in lumen clarissimum, oculos mentemque defixam habemus, abs te in nomine diuinæ Maiestatis sanctissimam benedictionem tuam continenter expectantes: atque ita cuncti simul animis coniuncti, Sanctitati tue precamur longissimam vitam, ad Omnipotentis Dei gloriam, piorumque omnium consolationem. Catisuorthi in Angliâ pridie Kalend. Nouembris, M. D. LXX.

EPISTOLA XXXIX.

Ut Catholicam Religionem Romanæque Ecclesie dignitatem in Casareo Conuentu contra hæreticos tueatur, Archiepiscopum Treuirensẽ hortatur.

Venerabili Fratri, Ioanni Archiepiscopo Treuirensi, Sacri Romani Imperij Principi Electori.

Venerabilis Frater, salutem & Apostolicam benedictionem. Fraternitatis tuæ erga Catholicam Religionem studium, diuinique honoris zelum benè cognitum habentes, non dubitamus illam omnino non adfuturam esse in eo Conuentu, qui ad Spiram hoc ipso mense à charissimo nobis in CHRISTO Filio Maximiliano in Imperatorem electo indictus esse dicitur: in quo, etsi pro comperto

habemus, eam neque personæ sibi ab Omnipotenti Deo imposita, neque nostræ de suâ eximiâ erga sanctissimam Dei Ecclesiam pietate expectationi defuturam esse; tamen prætermittere non debuimus, quin Fraternitatem tuam his nostris litteris ad officium suum, in eo Conuentu pro Fidei Catholicæ Ecclesiasticiq̃ue Ordinis defensione præstandum, vehementer in Domino hortaremur. quia enim hæreticorum consuetudo ea est, vt eiusmodi Conuentuum occasione sibi oblatâ aliquid semper, vel ad confirmandam hæresum suarum pestem, vel ad huius sanctæ Sedis Apostolicæ maiestatem auctoritatemq̃ue minuendam, moliantur; idcirco Fraternitatis tuæ partes erunt, primùm quidem quantum in se est conari, ne in eo Conuentu aliquid de rebus ad Religionem pertinentibus agatur: deinde, si hoc obtinere non potuerit, id quod proximum est, saltem studere, vt ne quid statuatur ac decernatur, quod vel Religionis Catholicæ statum, tot hæresum pestibus in istâ Prouinciâ labefactatum, ad peiorem conditionem adducere, vel huius sanctæ Sedis Apostolicæ auctoritati maiora, quàm quæ adhuc accepit, detrimenta adferre valeat. In quam eandem sententiam, quia dilecto Filio Magistro Melchiori Bilio, Notario nostro, & apud Cæsaream Maiestatem nostro & Sedis Apostolicæ Nuntio, plura Fraternitati tuæ communicanda scripsimus; idcirco Fraternitatem tuam illius sermoni, quem super eâdem

eâdem re secum nostro est nomine habiturus, eandem fidem habere volumus, quam nobis ipsis præsentibus secumque loquentibus haberet: erit id nobis gratissimum. Datum Romæ apud S. Petrum sub anulo Piscatoris, die II. Iunij, M. D. LXX. Pontificatus nostri anno quinto.

EPISTOLA XL.

Presbyterum & Ludimagistrum hæreticos, ceteris perniciosos, teneri, & in Episcopi potestatem tradi, postulat.

Dilecto Filio, nobili viro, Carolo Archiduci Austriæ.

Dilecte Fili, nobilis vir, salutem & Apostolicam benedictionem. Allatum est ad nos, Cossahui, quod oppidum temporali iurisdictioni Nobilitatis tuæ subiectum esse asseritur, Presbyterum quemdam, Matthæum de Pisino vocatum, commorari, hominem manifestè hæreticum; qui nihil aliud magis studet quàm populos à fidei Catholicæ veritate ad hæreticæ falsitatem auocare: & vbique hæresum, quibus est vehementer infectus, tum priuatim, tum publicè docendo, venenum disseminare conatur, magnâ cum Dominici gregis iacturâ, fideliumque Christo populorum scandalo. Quin etiam superioribus mensibus prædicti oppidi

Domini filiam baptizasse dicitur, & in eo baptis-
mate veterem & sanctam Ecclesiæ Catholicæ for-
mam minimè seruasse. In eodem quoque oppido
quendam Georgium esse audiuius scholæ magi-
strum, virum hæreticæ prauitatis labe infectum,
qui non solum eos, quos docet pueros, sed etiam
quoscumque potest, omnibus artibus seducens, eâ-
dem quâ ipse imbutus est hæresum doctrinâ con-
taminat. Tuam verò Nobilitatem decet, Episcopo,
cuius diœcesi loca tuæ ditionis subiecta sunt, ad
tantæ pestis animarum contagionem coercendam
auxilium fauoremque suum propenso animo im-
pendere. Idcirco Nobilitatem tuam hortamur in
Domino, & ab eâ requirimus, vt prædictos homi-
nes per ministros suos comprehensos, istius diœce-
sis Episcopi ministris tradi iubeat: quibus nisi No-
bilitas tua quam potest opem suam in rebus ad eo-
rum officium pertinentibus præstiterit; breuî futu-
rum esse videmus, vt non solum in eo oppido, sed in
ceteris quoque suæ ditionis locis omnes hæreticæ
prauitatis labe inficiantur, magnâ cum animarum
IESV CHRISTI Domini nostri Sanguine redempta-
rum perniciæ. Id autem & Nobilitas tua studiosius
facere debet, quòd eadem res ad populos in fide &
obsequio continendos, & tranquillâ pace regendos,
maximè pertineat: vt, si id fecerit, non solum id fa-
ctura sit quod decet, sed eodem quoque tempore
ditionis suæ securitati consultura. quod idem vt
nostrâ

nostrâ quoque causâ facere velit, Nobilitatem tuam
 rogamus. Datum Romæ apud sanctum Petrum sub
 annulo Piscatoris, die tertiâ Augusti, M. D. LXX.
 Pontificatus nostri anno quinto.

EPISTOLA XLI.

*Coloniensium, in ciuitate suâ Catholicæ Religionis in offi-
 cio continendâ, & ab hæreticorum consuetudine custo-
 diendâ, pietatis studium commendat.*

Dilectis Filiis, Consulibus & Senatui ciuita-
 tis Coloniae Agrippinæ.

Dilecti Filij, salutem & Apostolicam benedi-
 ctionem. Magnam litteræ vestræ, XIII. Iunij
 die datæ, nobis in Domino lætitiā attulerunt: qui-
 bus vos purgatos esse voluistis de his, quæ ad nos su-
 perioribus diebus delata, dilectionibus vestris, per
 litteras nostras, XXII. Februarij datas, significanda
 esse pro Pastoralis officio nostro existimauimus. Per-
 speximus enim ex illis, quantoperè laboretis de ve-
 strâ apud nos sanctamque hanc Sedem Apostoli-
 cam existimatione retinendâ: quod vestri erga Re-
 ligionem Catholicam studij, & aduersus hæreticos
 perfecti odij signum minimè obscurum esse iudica-
 mus. In primis autem illa nobis fuerunt gratissima,
 quæ ad vitandam hæreticæ prauitatis contagionem,
 super aduenis non passim, sed adhibitâ cautione
 quales

quales sint, recipiendis & approbandis, non minùs religiosè quàm prudenter à vobis constituta sunt. vt enim magnum in eâ cautione momentum positum esse iudicamus ad ciues vestros ab omni prorsus hæresum labe custodiendos; sic eam à vobis adhibitam esse vehementer gauisi sumus, eiusque rei nomine debitis vos in Domino laudibus prosequentes, deuotiones vestras hortamur, vt eâ quâ cœpistis vigilantia ac diligentia, patriam vestram ab hæreticorum venenatâ consuetudine integram atque incorruptam tueri perseueretis. Videtis enim lupos, videtis apros de siluâ, ad laniandas Dominicas oues, ad exterminandam Domini vineam, vbique paratos atque intentos: qui si omnes vndequaque aditus sibi solitudine vestrâ clausos reperient; dentibus illi quidem suis frement, sed tamen tabescent, cùm nullum sibi ad nocendum locum relictum esse conspexerint. Quod verò ad ea pertinet, quæ eisdem vestris litteris falsò ad nos delata esse dolètis: etsi dolorem vestrum iustâ de causâ susceptum esse non dubitamus; magis tamen quòd illa falsa fuerint gaudendum, quàm quòd falsò delata sint, tristandum vobis esse cognoscimus: quippe illud dolendum esset, si verè delata fuissent. quæ tamen cùm à viris spectatæ fidei, integritatis ac grauitatis, nobis dicerentur; nullo modo potuimus, ac debuimus, ea vel contemnere vel dissimulare: fieri tamen potest, vt qui ea nobis dixerunt, ipsi quoque falsa audierint.

rint. Quod ita esse, pro nostrâ erga vos paternâ beneuolentiâ, vestrâque erga nos sanctamque hanc Sedem Apostolicam obseruantîâ, non magis optamus quàm speramus. Datum Romæ apud S. Petrum sub annulo Piscatoris, die XXI. Augusti, M.D.LXX. Pontificatus nostri anno quinto.

EPISTOLA XLII.

Regem Poloniæ hortatur, ut Transiluanix Principi persuadeat, ut in locis ditioni suæ subiectis Catholicæ Religionis cultum recipi, & hæreticos inde pelli procuret. Vide lib. III. cap. X. Vitæ PII V.

Sigismundo Augusto, Regi Poloniæ.

Charissime in CHRISTO Fili.noster, salutem & Apostolicam benedictionem. Quamuis superioribus diebus pacificationis inter charissimum in CHRISTO Filium nostrum Maximilianum in Imperatorem electum & Serenissimum Transiluanix Principem nepotem tuum nuntio accepto, Maiestati tuæ totiq; Reipublicæ Christianæ eam pacificationem per litteras gratulati fuerimus, & quædam etiam de ipso Principe ad Religionis Catholicæ professionem per Maiestatem tuam inducendo adiecerimus: tamen pro nostro erga eam paternæ beneuolentiæ affectu cupientes, ipsam Omnipotentis Dei, cuius perfecta sunt opera, virtutem, eo ipso

adiuuante, quoad eius fieri potest, imitari; Maie-
statem tuam vehementer in Domino hortamur, ei-
dem Serenissimo Principi nepoti suo, omni quam
apud illum habet auctoritate interpositâ, persuade-
re conetur, vt in locis ditioni suâ subiectis veræ Ca-
tholicæque Religionis cultum quamprimùm reci-
pere, receptum constanter tenere, atque inde hære-
ticos aduenas expellere velit. Quod si fecerit, pro
certo habeat, nullum se quàm hoc in rebus aduer-
sis contra infideles firmitus tutiusque præsidium
esse habiturum. Vanum est enim existimare, quem-
quam vel potentissimum Principem Imperij sui fi-
nes ciuitatesque tueri posse, nisi eas Dominus cu-
stodiuerit: quomodo autem eas Dominus custo-
diet, nisi ei Princeps per veræ Religionis professio-
nem adhæreat? Quo quidem officio eò studiosius
fungi debet Maiestas tua, quo, vt aliis ad eam lit-
teris scripsimus, aliquanto ipsi gloriosius futurum
est, nepotem suum Omnipotenti Deo atque huic
sanctæ Sedi Apostolicæ quàm Cæsari reconcilia-
uisse. Etenim Cæsare reconciliato, videri potest il-
lius Imperio consuluisse: si verò eundem Redem-
ptori nostro, sanctissimæque illius Ecclesiæ com-
munioni, restituerit; non solum de Imperio illius
conseruando, sed de animæ ipsius salute sollicita
fuisse videbitur: cuius quidem animæ si ille in suâ
ditione Religionem Catholicam non admittens,
detrimentum patiatur; quid ei non modò Cæsaris
recon-

reconciliatio, sed etiam si vniuersum mundum lucretur, prodesse poterit? Decet autem præcipuè Maiestatem tuam, Serenissimo illi Principi nepoti suo ita consulere, vt, quæ in eo pretiosior est, animam scilicet ante omnia saluam atque incolumem esse studeat: nam, quemadmodum est apud Apostolum, qui suis non prouidet, & maximè domesticis, fidem abnegat, & est infideli deterior. Quæ omnia non ideo pluribus ad Maiestatem tuam verbis scripsimus, quòd eius erga Serenissimum nepotem suum charitati pietatiquè diffidamus; sed vt nostro ipsi officio fungentes, paternæ nostræ erga vtrumque vestrum voluntatis affectum Maiestati tuæ declaremus. Datum Romæ apud sanctum Petrum sub annulo Piscatoris, die VII. Octobris, M.D.LXX. Pontificatus nostri anno quinto.

EPISTOLA XLIII.

Regis Polonia pietatem commendat, quòd extortum decretum de permissione Augustanæ Confessionis reuocauit, eumque, vt in Regno suo Catholicam Religionem protegat, hortatur. Vide lib. III. cap. X. Vita PII V.

Sigismundo Augusto, Regi Poloniae.

Charissime in CHRISTO Fili noster, salutem & Apostolicam benedictionem. Quantâ superioribus diebus animi molestiâ affecti fuimus,

cùm in notitiam nostram perlatum esset, quorumdam hæreticorum fallaciis ab istius Regni Cancellario mandatum extortum fuisse, in quo Maiestatis tuæ nomine Magistratibus Derschouiensis ciuitatis facultas dabatur, vt in quibusdam Ecclesiis, secundùm Confessionis Augustanæ præscriptum, & haberi conciones & administrari Sacramenta possent, & earum ipsarum rerum ministri in Maiestatis tuæ fidem ac protectionem fusciperentur; tantam postea lætitiā accepimus, cùm à Maiestate tuâ tam pestiferum Religioni Catholicæ mandatum reuocatum fuisse cognouimus. In quo reuocando, sicut Maiestas tua fecit id quod suo maiorumque inclytæ memoriæ Regum perpetuo Christianæ orthodoxæque fidei studio dignum fuit: sic nos talem tamque eximium suum erga Deum Omnipotentem pietatis affectum debitis in Domino laudibus commendamus. Ex hoc vno hæreticorum ipsius Regni crimine, facile est Maiestati tuæ, quid reliquis omnibus animi audaciæque sit, intelligere; quando non veriti sunt, ad spargendum confusionis illius Augustanæ in vulgus venenum, Regij tui nominis auctoritate turpiter abuti. Quod ne amplius audeant, nève aduersus inueteratam tot annorum sæculis Ecclesiæ Catholicæ ac Romanæ auctoritatem profanas vocum nouitates introducere studeant; decet te, charissime in CHRISTO Fili, omni quâ potes adhibita diligentia prouidere. Vna est Fides Catholica,

ab

ab Apostolorum temporibus per longam Romanorum Pontificum seriem vsque ad Pontificatum nostrum atque hæc tempora deducta: à quâ qui vnâ in re deficit, factus est omnium reus. Augustana autem Confessio, etsi similis est ceteris hæresum prauitatibus; tamen ob eam causam periculosior est, quòd leuius quàm ceteræ à Catholicæ Fidei professione declinans, speciem quamdam Religionis retinere videatur; eò perniciosior aliis, quòd venenum eius occultius latet, nec eminet foras. Erras, si putas eos vno confusionis Augustanæ nomine atque errore contentos fore: hoc illi principio Maiestatis tuæ patientiam tentant, initiumque solùm ab Apostolicâ doctrinâ atque ab hac sanctâ Sede desciscendi quærunt. quod illicò atque obtinere potuerint, Regnum tuum innumerabilibus dissentientium inter se hæresum discordiis miserabiliter distrahi lacerarique videbis. Hæc, quæ vera sunt & ipsâ rerum experienciâ comprobata, liberè, sicut personâ officioque nostro dignum est, ad Maiestatem tuam scribere voluimus; hortantes eam in Domino, & quo maiore animi nostri studio possumus rogantes, vt, quod sui muneris regiaque personæ sibi ab Omnipotenti Deo impositæ proprium est, operam det, ne & istic Religio Catholica (quod Deus auertat) ab hæreticorum fallaciis detrimentum aliquod patiatur; & nos hîc ea, quæ nollemus, magno cum animi nostri dolore audire cogamur.

Quod Maieſtatem tuam, pro eximio ſuo Fidei Catholicae ſtudio, & erga nos ſanctamque hanc Sedem Apoſtolicam obſervantiâ, facturam eſſe pro comperto habemus. Datum Romæ apud S. Petrum ſub annulo Piſcatoris, die v. Decembris, M. D. LXX. Pontificatus noſtri anno quinto.

EPISTOLA XLIV.

Tribus Melitenſium triremibus captis, ac centum ferè militibus partim caſis, partim in ſervitutem abreptis à Turcis, dolentem Petrum, communicato dolore, conſalatur.

Dilecto Filio Petro de Monte, Magiſtro Hoſpitalis ſancti Ioannis Ieroſolymitani.

Dilecte Fili, ſalutem & Apoſtolicam benedictionem. Reddidit nobis dilectus Filius Frater Laurentius Guaſconius, iſtius Ordinis Eques, litteras tuas XXIII. Iulij die ad nos datas, iuſtiſſimi doloris & moleſtiæ pleniffimas: in quibus de tribus triremibus amiſſis, de tot Religionis tuæ nobiliſſimis Equitibus ab infidelibus interfectis, magnâq; ab iſto Ordine acceptâ calamitate, certiores nos feciſti. Quâ in re, etſi non minorem nos, & tota Chriſtiana Reſpublica, quàm tu, iacturam fecerimus; dolor tamen tuus, quem de tot Fratrum tuorum amiſſione magnum te accepſiſſe ex tuis litteris cognouimus, tantam

tantam nobis mœroris causam attulit, vt, quia nos de duobus charitas vnum efficit, animum nostrum ob tuam atque istius Ordinis calamitatem præcipuo quodam dolore afficiat. Non parum nos ea, quam nobis significas, animi tui inductio est consolata, quâ, id quod accidit, aut volente, aut certè permittente Domino accidisse intelligis: à cuius diuinâ voluntate vel consilio nefas sit animi nostri sensum abhorrere. Decet autem te, cùm communis tibi cum ceteris Christifidelibus Christianæ Religionis, tum præcipuè istius Ordinis professionis nomine, ex Fratrum tuorum morte, potioris vitæ spe, diuturno non affici dolore: qui enim contra infideles fortiter pugnantes occubuerunt, hos credendum est ad veram vitam moriendo peruenisse. Habent illi fortasse non iniustam diuturni doloris excusationem, qui nonnisi præsentem vitam agnoscunt, qui de hoc sæculo ad melius transitum esse non sperant: nos autem, qui nouimus, qui hoc & credimus, & alios docemus, nimio de hisce rebus humanis perturbari dolore non debemus: ne quod apud alios pietatis obtinet speciem, id nobis desperationis culpam asferre videatur. Quocircà deuotionem tuam hortamur, vt aduersis rebus animum non deijciat; sed, iuxta Sapientis vocem, in die malorum memor sit bonorum: potens est enim Deus in mortuorum tuorum Fratrum locum alios vel ex istius insulæ lapidibus excitare. Nos autem, quod reli-

quum

quum est, quantum per exiguas atque afflictas huius sanctæ Sedis Apostolicæ facultates licebit, operam dabimus, ut istam tuam Ordinisque iacturam quamprimùm sarciamus. Quam quidem ad rem, non solum quantum vires nostræ ferre poterunt, sed aliquanto etiam plura impendere non recusabimus; & omnino aliquam rationem inibimus, quâ tuis atque istius honestissimi Ordinis, de Republicâ Christianâ optimè semper meriti, rationibus, adiuuante Domino, consulamus: quemadmodum prædicto Laurentio, internuntio apud nos in præsentia tuo, pluribus verbis diximus. quem hominem in negotiis istius Religionis tractandis diligentem & prudentem, tuique & suæ Religionis studiosissimum cognouimus. Datum Romæ apud S. Petrum sub annulo Piscatoris, die VI. Augusti, M.D.LXX. Pontificatus nostri anno quinto.

EPISTOLA XLV.

De Ferrariâ terræmotu afflictâ dolorem se percepisse, & piis precibus & vitæ integritate iram Dei, qui mortalium peccatis offensus, eiusmodi clades quandoque permittit, placandam esse ostendit.

Dilecto Filio, nobili viro, Alfonso Estensi,
Duci Ferrariæ.

Dilecte Fili, nobilis vir, salutem & Apostolicam benedictionem. Magno dolore affecti

Etī fuīmus ex his quæ de istius vr̄bis calamitate, ob
vehementes in eā terræmotus excitatos, ad nos alla-
ta sunt; quibus multas eiusdem ciuitatis partes, ma-
gnâ cum ædificiorum publicorum & priuatorum
ruinâ, hominumque etiā ipsorum strage, afflictas
esse cognouimus. Quibus tuis incommodis com-
moti, totque hominum miserabilem casum dolen-
tes, Nobilitatem tuam, quam paterno charitatis af-
fectu vehementer in Domino diligimus, in eodem
his litteris consolari volumus. Quamuis autem
eiusmodi terrarum motus naturalibus ex causis o-
riantur; tamen diligenter attendendum est, ne illis
peccata nostra causam fortasse attulerint. Solet
enim Deus his quoque rebus iram suam in populos,
atque adeò in ipsos Principes, non obscure quan-
doque significare: quam pro suâ misericordiâ vt
ab istâ ciuitate populoque auertere velit, humiliter
in puritate cordis est obsecrandus. quod nec ipsi
pro nostro officio prætermittimus, & vt idem No-
bilitas tua & ipsa faciat, & à piis hominibus facien-
dum curet, magnoperè illam in Domino hortamur.
Dilecto autem Filio Turonî Bertano, Internuntio
apud nos; tuo nomine à nobis benedictionem pe-
tenti, libenter admodum dedimus; Omnipoten-
temque Deum precamur, vt actiones tuas ad sui no-
minis gloriam, subiectorumque tibi populorum
utilitatem, dirigere misericorditer dignetur. Da-
tum Romæ apud sanctum Petrum sub annulo Pi-
C c c scatoris,

scatoris, die primâ Decembris, M. D. LXX. Pontificatus nostri anno quinto.

EPISTOLA XLVI.

Cosinum Medicem Magnum Etruriæ Ducem abs se creatum, commendat. De quo lib. III. cap. XVI. Vita PII V.

Carolo Francorum Regi Christianissimo.

Charissime in CHRISTO Fili noster, salutem & Apostolicam benedictionem. Quibus de causis, quàm iustis quamque honestis, adducti, superiore anno dilectum Filium, nobilem virum Cosinum Medicem, litteris nostris Apostolicis sub plumbo editis Magnum in Etruriâ sibi subiectâ Ducem creauerimus, eundemque paulò post inter Missarum solemnia regali coronâ ceterisque insignibus, manibus ipsi nostris ornauerimus; Maiestati tuæ, neque ignotum, neque obscurum esse putamus, quæ eximium eiusdem Principis erga Rempublicam Christianam studium, & propensissimam erga se Regnumque suum voluntatem benè cognitam habet. Quia verò ad nostram atque huius sanctę Sedis Apostolicę dignitatem valdè pertinere intelligimus, ut quem illi ob egregias ipsius virtutes, præclaraque erga Religionem Catholicam merita, honorem habuimus, eundem ceteri quoque

quoque Christiani Principes habeant; & in eâ ipsâ re illam, quam par est, Apostolicis litteris ac decretis obedientiam reuerentiamque exhibeant: idcirco Maiestatem tuam hortamur, & quo maiore animi studio possumus, rogamus, vt quod prædicto Magno Duci facturam sese demonstraui, vt ei loci sui, qui earumdem litterarum nostrarum decreto ipsi debetur, possessionem vel assignaret, vel assignatam conseruaret, id sine vllâ longioris temporis morâ quamprimùm exequi, atque ad effectum adducere velit. In quo præterquam quòd Maiestas tua id factura est, quod litteris nostris concessioniq̃ue Apostolicæ est consentaneum; prætereà Principem sibi coniunctissimum, tuæque Maiestatis studiosissimum, perpetuò sibi est obligatura, nobis autem ipsis rem gratissimam factura. Nostrâ enim maximè interest, non solum vt huius sanctæ Sedis Apostolicæ dignitatem apud Christianos Principes conseruemus, beneficiumque, quod Principi pietatis Religionisque laude præstantissimo dedimus, quantum est in nobis, tueamur; sed etiam tantam apud Maiestatem tuam auctoritatem habere videamur, vt in eius Regno, ea quæ debet, Apostolicarum concessionum ratio habeatur. Quod si Maiestas tua fecerit, quemadmodum facturam esse pro certo habemus, id gratissimo animo accipiemus, tale erga nos sanctamque hanc Sedem Apostolicam Maiestatis tuæ obsequium in memoriâ semper ha-

bituri, & quibuscumque paternæ nostræ erga Maiestatem tuam benevolentia ac voluntatis officiis, quando cum Domino poterimus, libentissimè idoneâ occasione oblatâ remuneraturi. Datum Romæ apud sanctum Petrum sub annulo Piscatoris, die III. Nouembris, M. D. LXX. Pontificatus nostri anno quinto.



APOSTOLICARVM
 PII QVINTI

PONT. MAX.

EPISTOLARVM

LIBER QVINTVS,

Continens Epistolas anni sexti
 eius PONTIFICATVS.

EPISTOLA PRIMA.

ARGVMENTVM.

*Polonia Regem, legitimam uxorem suam sterilitatis
 causâ repudiare deliberantem, à consilio renocat. Vi-
 de lib. III. cap. X. Vitæ PII V.*

Charissimo Sigismundo Augusto, Po-
 loniæ Regi, PIVS Papa V.



Harissime noster in CHRISTO Fili, sa-
 lutem & Apostolicam benedictionem.
 Etsi nobis maximè compertum est, eam
 esse Maiestatis tuæ prudentiam, eamque
 in Deum pietatem, vt nihil temerè, nihil nisi piè sis

Ccc 3

effectu-

effecturus: tamen non potuimus non vehementer commoueri ex quodam hîc diuulgato rumore; scilicet de repudiandâ Reginâ coniuge tuâ, deque aliâ tibi insuper adsciscendâ cogitare. Cui quidem rumori ac famæ identidem increbrescenti, quamuis nullam fidem esse iudicarem; nihilominus tamen omittendum non esse putauimus, quin pro munere nostro has ad te litteras mitteremus: quibus non solum tibi molestiam, ac quem ex ipso rumore, utcumque euulgato, cepimus dolorem, enuntiarem; sed etiam si fortè (id quod non credimus) aliquo niteretur fundamento, te ab huiusmodi proposito reuocarem. In primis verò considerare debes, eos qui rem huiusmodi per speciem sperandæ successionis tibi persuadere conantur, aut hæreticos esse aut hæreticorum fautores: quibus nihil curæ magis est, quàm ut te ad Catholicæ Veritatis fines vel semel transgrediendos inducant, rati, si hoc abs te impetrare vel potius extorquere possint, cetera sibi futura esse faciliora; atque ita fore breuî, ut Regnum istud vnâ tecum in eandem perniciem, in quam dæmonis instinctu sunt prolapsi, pariter conijciant. Quorum quidem perniciofa consilia, ac pestilentes artes planius ipse perspicies, si rem omnem quomodo se habeat, perpenderis diligentius. Res enim est eiusmodi, ut si eam committas, primùm affirmem abs te Redemptorem nostrum grauissimè offensum iri, sanctissimum eius violando Sacramentum: deinde

de nobis ipsis, qui eius licet indigni in terris potestatem gerimus, magnam inferes iniuriam; præterea Christianis omnibus Catholicisque ruinarum occasionem: denique Regium nomen tuum, atque domus istius Regum inclytæ memoriæ splendorem, qui ad hanc usque diem clarus & illæsus permanſit, tam turpi atque ignominiosâ tibi aspersâ labe vehementer obscurabis. Nam quod ad successionem attinet, cuius videlicet spe te volunt allicere, considerare debes, cuiusque Regni successionem positam esse in manu & voluntate potentissimi Dei, qui eam tribuit atque aufert quibus ipse voluerit: à quo etiam eò minùs illam poteris impetrare, quò magis eius consequendæ causâ diuinam ipsius Maiestatem offenderis. Porro autem eò iam ætatis processisti, ut primùm valdè incertum sit ac dubium, an sis liberos suscepturus. Ad hæc, si ex alterâ vxore minùs legitimè ductâ filium procreares; scire tamen ipse nequis, cum tibi in Regno successurum, cum etiam Regno ipsi inutile sit, infantem atque sub aliorum tutelâ Regem positum habere. Quod cum antea semper periculosum fuit, tum verò hisce turbulentissimis temporibus erit ipsi Regno periculosissimum. Verùm hac de re vel ex eo poteris pariter edoceri, quod nostrâ ætate in nonnullis amplioribus Christianæ Reipublicæ Regnis accidisse conspiciamus. Ad has autem æquissimas & honestissimas rationes illud etiam accedit, quòd, cum non ita dudum

dudum Serenissimus Transilvaniae Princeps cognatus tuus è viuis excesserit, tibi commodum non accideret innouandarum rerum inire consilia; earum præsertim, quæ Christianorum Principum & sanguine coniunctorum animos possint offendere, ne crudelissimus Turcarum Tyrannus, ceteræque perfidæ gentes isti Regno finitimæ, huiusmodi sibi oblatâ occasione ad eam prouinciam aggrediendam vtantur. Quæ cum ita sint, hortamur Maiestatem tuam, atque per Deum præpotentem obsecramus, vt memor ipsius Dei nostrique, tuæ ipsius salutis ac nominis memor, splendori domus tuæ gloriosæ recordationis Regum tam exitialis atque ignominiosi consilij cogitationem, si fortè (quod non credimus) suscepisses, eam prorsus abijcere atque abs te longè propulsare velis; certò sciens, nos ad id tibi suadendum, nullâ re magis inductos esse, quàm munere nostro, & item pro singulari quodam paternæ charitatis amore, quo tuam complectimur Maiestatem. Quæ si paternis cohortationibus nostris minùs auscultans (quod minimè putamus, etsi rumor vulgauit & fama) id omnino præstandum sibi esse censerit; nos aliud nihil facere poterimus, nisi id ipsum factum ægrè ferre vel maximè, & istius Regni vicem dolere, in ærore confici, ac denique vniuersæ Christianæ Reipublicæ calamitates deplorare. Confidimus tamen, pro tuâ in Deum potentissimum pietate, & pro tuâ in nos & in sacrosanctam hanc

Sedem

Sedem Apostolicam, de te deque maioribus tuis optimè meritam, obseruantia ac veneratione, tutiora te ac saniora capturum esse consilia; nihilque commissurum, quod tibi ac Regno tuo perniciem, nobis verò atque omnibus Catholicis Principibus dolorem & afflictionem, vniuersis denique Christifidelibus ruinarum occasionem afferre queat. Ob id etiam dilecto Filio Laurentio Madio, Religioso viro ex Societate I E S V, mandauimus, vt ad Maiestatem tuam proficiscatur, atque hæc quæ ad eum scripsimus, & si quæ alia sunt in eam sententiam, coram te præsens exponat: cui volumus à Maiestate tuâ citra vllam dubitationem fidem haberi. Datum Romæ apud sanctum Petrum sub annulo Piscatoris, die XI. Kalend. Maij, M.D.LXX. Pontificatus nostri anno sexto.

EPISTOLA II.

ANNA Sigismundi Augusti Poloniæ Regis
foror Pio Papæ V.

Anna Sigismundi Poloniæ Regis foror de sacro Romanarum Stationum munere aliisque Pontificiis in se officiis gratias agit: Vincentium Porticum Internuntium Apostolicum commendat, suam in Pontificem pietatem ac fidem profitetur.

Sanctissime ac Beatissime Pater, ac Domine clementissime, quotiescumque mecum ipsa considero, quam aperte ac sæpe Sanctitas tua clementem planeque paternum erga me animum suum per litteras mihi testatum esse voluerit; toties me, scilicet immeritam, corripit tremor quidam, atque obmutesco, nec quibus verbis illi gratias agam inuenio. Velim equidem, clementissime Pater, re ipsâ præstare, id quod in sacrosanctæ Sedis Apostolicæ gratiam apprimè cupio, atque ita, quæ in me beneficia confers, largè compensare: sed facultas haud respondet voluntati. At verò propensionem ac promptitudinem animi mei plurimis in rebus perspicere potuit Reuerendus Internuntius, qui pro munere suo de Religione sollicitus mecum nonnulla communicauit. Iam verò est sanè cur ad gloriam Dei plurimum later, quòd Beatitudo tua pro suâ patriâ charitate me dignata fuerit cælestis gratiæ cumulo, Romanis videlicet Stationibus mihi concessis atque transmissis. In quo Deus Optimus Maximus, ut à me vehementius diligeretur, singulari hoc Indulgentiæ dono me per Vicarium suum voluit exornare: atque ut diuinæ gratiæ suæ lumen clariùs elucesceret, spiritualia eiusmodi munera contulit in eam, in quâ nulla inuenit subsidia meritorum. Is igitur, qui donorum omnium est auctor, quique in iis distribuendis Sanctitatis tuæ utitur ministerio, eiusmodi mihi virtutem ac vires elargiatur, ut pro meâ imbecillitate tanto beneficiorum ponderi non succumbam; sed potius me piè ac religiosè in eis exerceam. Idem verò Beatitudinem tuam, cum in præsentem tum in futurâ vitâ, cumulet omni genere

genere felicitatis. Quod reliquum est, id ego per hanc, quæ mihi sese offert, Sanctitati tuæ respondendi occasionem, tum pro conscientia mea rationibus, tum etiam pro eo quod Christianæ Religionis in hoc Regno iam reslorescenti, atque adeo Ecclesiæ Dei præstare debeo, apertè non fateri non queo: nempe, si mihi liceret Sanctitatem tuam in hæc Regni Sedes adducere, ut suis ipsamet oculis intueri posset, quos fructus in hisce hominum moribus trañdendis, ad huius tranquillitatem Regni, & ad imminentes rerum difficultates tollendas, protulerit, ac proferat indies, ipsius Internuntij Apostolici splendor virtutis, ac dignitas egregia cum vitæ integritate, modestiâ, prudentiâque coniuncta; haud dubie Sanctitas tuâ, pro ardenti suo Religionis atque huius Regni felicitatis studio, & meis, & Regiæ Maiestatis, & Catholicorum, ac demum piorum omnium id videre cupientium votis responderet, summæ dignitatis ornamenta in ipsum Internuntium conferendo. quod omnino, præsertim hoc tempore, & Christiana Religio, & Regni quies, videntur exposcere. Illud equidem vulgatum esse cognosco, id solùm ad maiorem hominum salutem Ecclesiæque incrementum ab omnibus vehementer optari. Interim verò cupio Sanctitati tuæ prospera cuncta succedere, ei que perpetuam observantiam & studium tamquam obsequentissima filia polliceor ac defero; precor que Deum, ut diuturnam illi vitam atque Christianæ pietatis augmentum largiatur. Datum Varsoviæ pridie Nonas Aprilis, M. D. LXXI.

EPISTOLA III.

Isto iam fœdere, vt ad id iunctis opibus ac viribus conspīret, Maximilianum Imperatorem grauius cohortatur. Vide lib. IV. cap. X. Vitæ PII V.

Charissimo in CHRISTO Filio nostro, Maximiliano II. Imperatori designato.

Charissime noster in CHRISTO Fili, salutem & Apostolicam benedictionem. Etsi dilectum nostrum in CHRISTO Filium Cardinalem Commendonum, quem nostrum Sedisq̃ue Apostolicæ Legatum à latere ad Maiestatem tuam, & ad Regem Poloniæ nunc misimus, istinc non longè abesse arbitramur; tamen ad Pastoralem curam nostram ac vigilantiam pertinere iudicauimus, illius aduentum his litteris præuenire, ac te non modò commonefacere & cohortari, sed obsecrare etiam in CHRISTO IESV Domino nostro, vt omnino velis hoc tempore studia viresq̃ue tuas omnes conferre ad protegendam Christianam Rempublicam tot tantisq̃ue malis & incommodis oppressam; vt, nisi præsentī aliquo validoq̃ue subsidio ei succurratur, vix aliqua spes de eius tuendâ salute reliqua iam fore videatur. Ac licet ad Christianos Principes omnes ea cura pertineat, id tamen præcipuum Maiestatis tuæ munus esse videtur. Constat enim onus
tuendæ

tuendæ Christianæ rei, post CHRISTI Vicarium, inter omnes Romani Imperatoris esse præcipuum. Quare non pauci fortasse mirabuntur, cur aut vnde fieri potuerit, vt ipse præ aliis omnibus sacri huius contra Turcam belli societatem primus non iniueris. Verùm, vt qui meliore sunt præditi iudicio, id occultâ de causâ, aut certo prudenti quæ consilio factum esse queant interpretari; quando iam ope diuinâ ob eam rem inter nos ac Regem Philippum Veneram quæ Rempublicam fœdus sancitum est, & crudelissimi hostis nostri furor augetur ac sentitur indies, si tu in nostram hanc societatem ad eius impetus repellendos initam nomen dare diutius differres, nullo modo videmus, quomodo boni omnes prudentes quæ viri inde iure non demirari, imò verò vehementer non dolere possent. Etenim te sic agente, eorum subiret animos cogitare, præclaris illustrium maiorum tuorum vestigiis & exemplis te minùs quàm par esset, diligenter insistere; te quæ (quod omnino Deus auertat) summum in discrimen ac periculum Imperium tuum esse coniecturum. Sed magna nos iam tenet spes, id per te numquam commissum iri. Quin etiam confidimus, te rei conficiendæ tarditatem celeritate nunc facile compensaturum: id quæ eò magis, quòd nulla causa est, quæ ad bellum aduersus aliquem suscipiendum magis compellere hominem possit, quàm id quod satis super quæ in hanc sententiam potest Maiestatem tuam

adducere. Ac primùm quidem sese offert odium ob priuata dissidia dissensionesque, non solum tibi sed parentibus etiam ac maioribus tuis perfido isto cum hoste intercedere; vlciscendarum præterea quas ab illo accepistis iniuriarum appetitus; denique præclara amplificandi nominis occasio. Nos autem hoc loco pro naturæ humanæ imbecillitate humanitus etiam scribere volumus. Et quidem haudquam ignoramus, hæc quæ tetigimus, momenta rerum suo quæque dedecore notari. Sed cum id iam sit in more positum, ut his rationibus homines magis persuadeantur, ea nobis tangenda quoque putauimus: non enim culpandum est, cum ægrotis ægrotum agere, ut qui reuera languent, salutem consequantur. Iam verò, ut bonos Christianos decet, nos nunc inter nos agamus. Veræ igitur certissimæque causæ, quæ Maiestatem tuam ad hanc facri belli in communem hostem gerendi societatem ineundam vehementer debent incitare, duæ præter ceteras potissimæ esse nobis videntur: altera quidem, ardor acرهque studium tutandæ Christianæ Religionis, Ecclesiamque Dei protegendæ: quam, sicuti hostis ille, dæmonis instinctu, totis viribus labefactare & conuellere conatur; ita nos omnes, ac multò etiam magis, auxiliante Deo, quoad fieri à nobis potest, conseruare tutarique debemus. Altera verò est amor in homines: quos sanè, diuinis mandatis impulsæ, sicut nos ipsos diligere, complecti ac
fouere

fouere debemus. Nam etsi multi, vnum tamen corpus sumus in CHRISTO; singuli autem alter alterius membra. Hoc autem, qui Christianam Religionem profitentur, si cogitarent identidem, nihil vniquam dissidiorum esset hoc tempore; sed in se mutuis officiis curandis atque iuuantis sollicitè occupata membra videremus. Quorum quidem membrorum vnum, & illud quidem præcipuum, cum ipse sis; æquum est omnino, vt, afflictis ceteris membris, id etiam incommodi perpetiaris simul, atque in communem totius curandi corporis sententiam conueniens, tuam quoque opem ei nobiscum velis afferre. Et quamquam corpus ipsum vsquequaque languidum & affectum videmus, eius tamen de salute nequaquam desperandum est. Numquid contracta est manus Domini? ecce enim ipse in increpatione tuâ mare corripiet sic, prorsus vt exsiccet. Diuinæ igitur & potentiae & bonitatis muniti præsidio, animos nullo modo despondere, sed optimâ spe nixi, tam pium tamque sanctum negotium & suscipere & conficere omnino debemus. Quod si nos ipsi tot tantisque hostibus debellandis haud pares esse videmur; certè considerare par est, nos plurimum in eo posse qui nostram corroborat infirmitatem. Sed nos has litteras longiores non faciemus, ne vel prudentiae vel pietati tuæ, vel etiam consilio fideique ipsius Legati nostri, cui vt hæc eadem tecum ageret coram imperauimus, diffidere videamur.

mur. Tantùm illud adiiciemus, abs te, aut ad tuam ipsius gloriam illustrius, aut ad voluntatem nostram accommodatius, aut Deo gratius nihil hoc tempore fieri posse; quàm si libenti animo & expeditè in hanc nostram cum Rege Catholico propinquo ac genero tuo, Venetaque Republicâ, belli societatem ingressus & adscriptus, arma, milites, bellicas denique vires tuas omnes conferendas decreueris, ad accerrimum Christiani nominis hostem profligandum. Deus Dominus noster Maiestatem tuam incolumem ac præpotentem diutissimè conseruet, voluntatemque tuam inflammet ad ea exequenda, quæ ad diuinam ipsius gloriam propagandam, ad Ecclesiamque Catholicam magis ac magis amplificandam, ac denique ad vniuersi terrarum orbis quietem & pacem confirmandam accommodata esse videantur, vt omnes homines eiusdem fidei charitatisque vinculo coniuncti, Deo gloriam tribuant in die suæ ipsorum visitationis. Datum Romæ apud sanctum Petrum sub annulo Piscatoris, die xvii. Iulij, M.D.LXXI. Pontificatus nostri anno sexto.

EPISTOLA IV.

Partâ de Turcis victoriâ, Francorum Regem denuò ad sociale bellum contra eos ineundum adhortatur. Vide lib. III. cap. IX. Vitæ PII V.

Charissi-

Charissimo in CHRISTO Filio nostro, Carolo
Francorum Regi Christianissimo.

Charissime in CHRISTO Fili noster, salutem & Apostolicam benedictionem. Cogit nos grauiissimum hoc summi Apostolatus munus, nostris humeris à Deo impositum, omni studio & curâ incumbere in eas cogitationes, quæ hac temporum conditione & statu possunt esse Ecclesiæ Christianæ maximè salutare. Quâ quidem curâ à Deo incendimur & stimulamur, vt nihil potius habeamus, quàm, vt ea quæ maximè cupimus, in Ecclesiâ Dei, suâ primùm ope, tum Christianorum Principum (in quibus Maiestatem tuam, vt nomine, sic re ipsâ Christianissimam cognouimus) consilio atque operâ constituta videamus. Hinc factum est, vt, cum dilectum Filium Michaëlem Cardinalem Alexandrinum nuncupatum, nostrum de latere Legatum, cui ad Maiestatem tuam mandata de rebus grauiissimis dederamus, tardiùs desiderio nostro venturum esse arbitraremur; Venerabilem Fratrem Antonium Mariam Episcopum Saluiatum, nobis multo vsu tuæque (vt speramus) Maieitati probatissimum, eisdem de rebus mitteremus. Quod autem à Maiestate tuâ in primis cupimus, illud est: Nostro semper malo experti sumus, quantum ex Christianorum disunctione & dissidiis creuerit te-

E c c

terri-

terrimus ille barbarus, atque hostis CHRISTI, & eius nominis deletor. Postquam verò, suâ ipsius impietate & rabie excæcatus, nullâ non solùm re, sed ne cogitatione quidem laceffit, fracto fœdere, atque omni non modò diuino, à quo ille semper fuit alienissimus, sed humano etiam ac gentium iure violato, vniuersum Cypri Regnum internecione deleuit, nec tanto sanguine satiatus, quacumq; peruasit, classè illâ funestissimâ sempiternum suæ crudelitatis monimentum reliquit; diuino consilio factum est, vt nobiscum vnâ charissimi in CHRISTO Filij nostri, Philippus Hispaniarum Rex Catholicus, & Serenissimus Venetiarum Dux, ad extinguendum commune incendium iunctis viribus concurrerent. Itaque icto fœdere statim, & classè instructâ, venerunt, viderunt, vicerunt: partâque victoriâ ex omni memoriâ maximâ & gloriosissimâ, re ipsâ experti sumus, non minùs. aduersus canem illum rabidissimum valere nostram voluntatum ac virium coniunctionem, quàm aduersum nos valeat nostra dis-iunctio. Hac igitur viâ, quam nobis digito suo commonstrauit atque aperuit Deus, incedere statui-mus: cuius quidem viæ te Regem Christianissimum comitem, gloriæque consortem, omnes in primis cupimus, rogamus, &, quantum possumus, per viscera Dei nostri, per quem Reges regnant, obsecramus. Hoc te ipso, id est tuâ virtute & potentia, dignissimum est, tuis rebus vtilissimum, tuæ
matri

matri Ecclesiæ, quæ nati sui opem implorat, maximè salutare. Et quamquam non putamus, Maiestatem tuam nostrâ cohortatione indigere; tamen longiores nos fecit nostrum desiderium, quo incredibiliter ardemus. Cetera hac de re, de quæ aliis quas ei mandauimus, accipies ab eodem Episcopo: cuius orationem ut cum nostrâ sententiâ planè congruere existimabis, & quasi à nobis ipsis præsentibus eam proferri; sic tuam operam desiderio nostro, atque huic rerum statui congruentissimam, & tuâ Maiestate dignissimam, expectamus. Datum Romæ apud S. Petrum sub annulo Piscatoris, die XII. Decembris, M. D. LXXI. Pontificatus nostri anno sexto.

EPISTOLA V.

SEBASTIANI Lusitanorum Regis ad PIVM V.

Cardinalis Alexandrini legationis litteris respondet, naualem victoriam commendat, & gratulatur: opes suas & auxilium contra Turcas pollicetur. Quid de Gallicis nuptiis decreuerit atque mandarit ostendit. Postremò quasi bellicum canens, suum in Ecclesiam Dei protegendam ac vindicandam studium proficitur.

S *Antissime in CHRISTO Pater, ac Beatissime Domine. Beatitudinis tuæ litteras, summæ in Deum pietatis*

pietatis ardentissimi studiij, & in eius Ecclesiam charitatis, ac singularis erga nos beneuolentiae plenas, accepimus; quibus nos ad rem Christianam tum tutandam, tum etiam augendam, vehementer sanè sumus incensi. Et quidem pro incredibili vigilantia, & quam tu, Sanctissime & Beatissime Domine, in Dominico grege non solum diligenter custodiendo, sed etiam amplificando, geris sollicitudinem, ad nos eximia cum pietate datis litteris non contentus, pro eâ quâ nos complecteris paternâ charitate, benignè quoque voluisti ad nos mittere, tamquam optimum istius testem voluntatis, amplissimum Cardinalem Alexandrinum, Sanctitatis tuæ sanctæque Sedis Apostolica Legatum à latere, sororis tuæ nepotem, vel posthabitis iis leuamentis, commodis & officiis, quæ ipse in amplissimis grauissimisque negotiis Beatitudini tuæ præstare consuevit. Ex cuius quidem præsentia, & sermonibus inter nos Ultrò citroque habitis, ex eiusque pietate ac religione, quantum ceperimus voluptatis, vix à nobis poterit explicari. Nam in eo, tamquam in speculo, præclaris earum omnium, quas ille abs te tam sancto auunculo suo acceptas habet, virtutum ornamentis decoratam imaginem elucere perspeximus. Quantam porrò latitiam ac incunditatem vniuersæ Lusitaniæ optatissimus eius aduentus attulerit, ex magnâ hominum frequentia illi obuiam prodeuntium, ex inusitatoque ad eum honorificè excipierdum atque spectandum omnium factò concursu, agnoscî facile potuit. Enimuerò cunctis veniebat in mentem cogitare, ipsum esse & Legatum & affinem eius Pontificis, cui multò

multò pluris & antiquior sit Christiana Religio, salusque mortalium, quàm vita ipsa, quæ alioqui ceteris rebus omnibus carior hominibus esse solet. Ac tanto quidem gaudio cunctorum animi perfusi sunt, vix vt possit æstimari; fereque triumphum agentibus, subibat memoria gloriosissimæ victoriæ, Beatitudinis tuæ diligentia, Vigiliis ac precibus assiduis, de crudelissimo Christiani nominis hoste reportata; ob idque ad eum conspiciendum ardentissimis animis certatim omnes confluebant. Nam, post natos homines, de Christianæ Religionis hoste tam illustrem præclaramque victoriam naualem Christiani Principes nunquam retulerunt: de quâ tu, Sanctissime ac Beatissime Domine, quâ es in omnes humanitate, ac pro eo quo nos Regnumque nostrum summo complecteris amore, nos commonefacere voluisti. Ex quo quidem nuntio nos incredibilem sanè percepimus voluptatem, non secus ac si hæc, quæ Sanctitatis tuæ propria est, nostra victoria fuisset: atque, vt par erat, quantas maximas potuimus Deo potentissimo gratias egimus: cui benignè placuerit, pias Beatitudinis tuæ lacrymas, assiduaque ieiunia, quibus in istâ tam graui deuexâque iam ætate te ipse diutiùs afflictaſti, clementer aspiciere, ac voti compotem facere; quique ardentissimas preces tuas, gemitusque quibus diuinæ Maiestatis oculos inclinasti, voluerit exaudire. Summo præterea studio faciendum imperauimus, vti Regno nostro toto, pro tam singulari diuinitus accepto beneficio, magnâ celebritate Supplicationes instituantur; atque vt à sacris Concionatoribus per omnes ditionis nostræ populos ineffa-

bilis clementissimi Dei misericordia prædicetur, ut scilicet
 vniuersi gratissimi huius nuntij participes effecti, quis-
 que per se, CHRISTO Deo ac Domino nostro gratias
 agerent immortales. Neque verò quispiam est omnium,
 qui ore plenissimo non confiteatur, hoc tam inexpectatum
 bonum primò quidem Deo Optimo Maximo, tum verò
 Beatitudinis tuæ meritis acceptum iure esse referendum.
 Venio nunc ad litteras ac legationem Beatitudinis tuæ.
 Ego verò, Sanctissime in CHRISTO Pater, ac Beatissime
 Domine, posteaquam ipse mecum rem omnem diligenter
 consideravi, atque prout sanè tanti negotij à me dignitas
 ac magnitudo postulabat, cuncta maturo consilio perpendi,
 ad eiusmodi expeditionem libentissimo animo conspiran-
 dum mihi esse constitui; cum propter ipsius rei splendorem
 & amplitudinem (utpote cum hîc totius Christianæ Rei-
 publicæ salus agatur) tum etiam, ut prompto magnoque
 animo paream Sanctissimo CHRISTI Domini Vicario.
 Cui quidem ego Vicario me præter ceteros omnes sanè plu-
 rimum debere intelligo, & propter maxima quæ ille in
 me benignè contulit beneficia, & ob summam eius in me
 beneuolentiam; tum denique, ne fortè cuiquam Christiano
 Principi Veniret in mentem suspicari, vtcumque velle
 me exemplo meo vel minimam occasionem dare, ut non-
 nulli ab hoc sanctissimo iungendo fœdere aliquando possint
 retardari. Quòd si Potentissimi Dei clementiâ res fuerit
 eò loci, ut ceteri Christiani Principes gloriosissimam hanc
 expeditionem simul aggredi decernant; polliceor ego, &
 constanter affirmo (quamquam, utpote in extremis or-
 bis

bis terrarum finibus collocatus, à Turcarum Imperio longissimè absim) Velle me primum in hanc sacri belli societatem adscribi, ipsique expeditioni praesentem interesse. At licet id belli iam felicissimè instituti, si priuata comoda respiciamus, non tam ad me quàm ad alios Christianos Principes pertinere videatur, quippe quorum Regnis sibi propinquioribus maxima damna Turcæ olim intulerint, maioraque sint indies illaturi, nisi impiis illorum conatibus obsistatur: tamen, quando tanti refert Christianæ Reipublicæ istos scelestos hostes è medio tolli, ut nulla maior hoc tempore nobis incumbere necessitas possit; cumque id bellum sit sanctæ Ecclesiæ causâ susceptum, cuius gubernacula pro suâ providentiâ Deus Optimus Maximus hoc infelicissimo tempore tradidit Beatitudini tuæ; atque ego, cum res ipsius Ecclesiæ ac Sanctitatis tuæ, æquè ac meas, vel graui fortunarum mearum, siue etiam vitæ cum detrimento defendere debeam; sacrosanctæ huic societati, & me ipsum, & fortunas, & opes meas, seu quæ in Lusitaniâ, seu quæ mihi sunt in Indiâ, sponte meâ offero deuoueoque, modò res eo, quo dixi, loco sint. Atque hæc, ut Ecclesia CHRISTI Domini ac Saluatoris nostri, tot tantisque tempestatibus atque immanissimæ tyrannidis æstibus conflictata, in tuto ac tranquillo libertatis portu aliquando tandem conquiescat: ut proinde sanctissima Ierosolymitana domus pretiosissimo Redemptoris nostri Sanguine respersa, pristinum in statum ac dignitatem suam vindicetur: ut denique Christianorum in Europâ, in Asiâ & in Africâ, summo sæuæ tyrannidis oppressæ

oppressa scelere prouinciæ, demum à tam intolerabili seruitutis iugo liberatæ, diuinum cultum & honorem CHRISTO Deo ac Domino nostro tribuere, & quam debent sacrosanctæ Sedi Apostolica, Romanæque Ecclesiæ obseruantiam atque obedientiam, præstare queant. Interim igitur dum optimi istius rerum status cogitatio nos ipsos recreat & consolatur, dumque hoc faustum initium optimos successus pollicetur, nouum quiddam aliud nobis sese offert decernendum. Nam etsi res Indiæ eo loco sunt hoc tempore, ut, cunctis perfidis Regibus continenter in eâ coniurantibus, magis quàm cetera loca subsidiis indigeant; nihilo secius nos diligentissimè mandabimus, ut ingens classis adornetur, & commeatibus & veterano milite, bellisque in Turcas gerendis assueto, egregiè communiatur: quâ quidem classe ad Mare rubrum hostem aggrediantur. Cui sanè rei si clementissimus Deus, uti speramus, aspirauerit; maximo id sanctæ huic societati erit adiumento. Enimuerò cùm Reges Arabum dirâ Turcarum tyrannide premantur, in eo potissimùm laborant, ut à ceruicibus suis grauisimum illud seruitutis iugum excutiant; quippe qui iam ab illis defecerint, aliquotiesque terrestri commisso prælio victores euaserint: sed tamen naualibus pugnis congregiendi, aut certè nauibus, ne suppetiæ ferantur hostibus, impediendi, haud pares vires habent. Itaque & nostro fœdere & à nobis expediendâ classe ipsi vehementius incitati, diuinoque auxilio præmuniti, hostilibus minis ac terroribus contemptis, stabunt à nobis. Hac enim classe Turcarum portus atque perfugia,

que

quæ sunt maritimis in illis oris, permittente Deo, conflabuntur. Hac classe deinceps intercludetur aditus eorum nauibus, quibus pretiosissimis mercibus, Orientalibusque diuitiis onustis tyrannicum imperium suum ditare consueuerunt. Hac classe fiet, ut in posterum illis facultas omnis eripiat remiges, aliosque homines nauigandi peritos & exercitados, quos ille Tyrannus ad classium suarum usum vel ex Arabiâ solet euocare; quorum etiam hoc tempore, ob grauissimam acceptam cladem, summâ laborat inopiâ. tanta scilicet est in Arabiâ huius generis hominum copia, ut ferè omnes, quorum seruitio in nauigationibus utuntur Lusitani, Arabes sint. Huius præterea classis ope, maximum illud Æthiopum Imperium, cuius salus & restitutio continenter sollicitat Beatitudinem tuam, quodque Turcæ sapius inuaserunt, ac pro eâ quâ eius potiundi (quod omnino Deus auertat, id enim magno Christianæ Religionis esset incommodo) spe & cupiditate flagrant, inflammatis animis insolescunt, diuinâ fauente clementiâ respirabit, atque ad sanctæ Ecclesiæ Dei præstandam obedientiam excitabitur. Præter hæc autem, hoc toto Lusitano Regno militem, munitiones, commeatum, naues, & omnia quibus ad instruendam classem opus fuerit, confestim imperabimus: ut id subsidij, vel ex toto, vel ex parte, sanctæ huic belli societati opem queat afferre, nisi fortè necessitas aliqua, cui non obtemperari non posset, id nobis consilij præpediret; aut Lutherani, aut etiam Africani Saraceni colligerent copias, quibus copiis nos obsistere oporteret. Id quod accidit hoc ipso anno. Ete-

nim cum ipsi Lutherani validissimam sexaginta aut septuaginta nauium classem edificauissent, quã furenter has Occidentis oras, in primisque Lusitanos diripere & vexare moliebantur; ubi classem nostram ad bellum gerendum expeditam esse cognouerunt, perniciosam illam cogitationem statim abiecerunt: atque inde factum, ut eorum è faucibus ingens præda sit erepta. Nam si malo aliquo fato contigisset, & istæ ex Oriente Occidenteque profectæ naues, utriusque Indiae diuitiis onustæ, quas ipsi spe quadam & cogitatione deuorauerant, eorum in potestatem peruenissent, facile cruento bello Christianam Rempublicam afflictere potuissent. Hac nos adducti necessitate, & verò quoniam Ludouicus de Torres serò admodum Beatitudinis tuæ mandata retulit, exacto vere proximo, id quod vehementer optabamus, sanctæ isti societati auxilium mittere nequiuimus. Quòd si etiam rerum difficultate coacti, hoc anno pariter classem in id belli subsidium mittere non potuerimus; curabimus tamen, ut aliquo saltem numero nauium, præter eas quæ in Mare rubrum diriguntur ex Indiis, fœderatorum classibus opem feramus. Quod autem ad matrimonium attinet, narro tibi, Sanctissime in CHRISTO Pater, ac Beatissime Domine, nos id, quemadmodum vel quam sustinemus personæ dignitas, vel etiam huius Regni nostri honor & salus postulabat, adhuc tractauisse. Sed nunc maxime Reuerendus Cardinalis Alexandrinus eadem super re Beatitudinis tuæ nomine mecum sermonem contulit. Quòd quidem Sanctitatis tuæ iussa fecisse illum cognouimus, non solum,

Ut vel rebus nostris optimè consuleres, Regijque nominis nostri rationem haberes, Vel ut summam tuam in nos charitatem atque clementiam planius omnes agnoscerent, Vel denique ut posteris nostris tantæ, in primisque memorabilis rei testimonium relinqueres; sed eò etiam ampliùs, Ut per eiusmodi occasionem afflictis Gallie rebus, cuius salus tibi dies noctesque ante oculos obuersatur, opem ferre tua posset Beatitudo: idque Ut ea Prouincia aliquando tandem pristinum in statum restituatur, atque in posterum conseruetur incolumis: atque ideò, Ut Christianos Reges omnes, quorum quidem mutua beneuolentia charitasque magis ac magis indies refrigerari videtur, ad Christiane pacis & concordie se vinculis coniungendos accenderes atque inflammares. Hinc Verò, Sanctissime Pater in CHRISTO, ac Beatissime Domine, Sanctitas tua confidit fore, ut sacrosanctæ huic, qua aduersus crudelissimum Tyrannum Christianique nominis hostem conflatur, societati prospera cuncta faustaque sint euentura. Quæ quidem omnia cum ita reuerà sese habeant, cognouerimusque non solum à Beatitudine tuâ, sed etiam ex aliorum cum sermonibus, tum litteris, Christianissimi Gallie Regis sororem maximis clarissimisque Virtutum ornamentis ita fulgere; Ut ea iure optimo nobis placere possit; faciendum esse decreuimus, Ut eâ de re cum eodem Cardinali Alexandrino apertiùs ageremus, idque negotij ipsius in manu poneremus, Ut ipse Beatitudinis tue nomine, cum primum peruenerit in Galliam, quò nunc ab ipsâ legatus contendit, eadem super re loquatur cum

Oratore nostro ibidem agente. Quòd si Gallica res, quod ad negotium attinet, eo loco fuerint, ut saluà & auctoritate & existimatione nostrâ de iis agi posse videatur; tunc solùm ad prapotentis Dei honorem & gloriam, ad sanctâque Matris Ecclesie salutem & tutelam, atque ad Christianorum Principum inter se concordiam & pacem retinendam, libenti animo feram, ut huiusce matrimonij affinitatisque vinculis Beâtitudo tua me obliget atque deuinciat. Enimuero si umquam antea, nunc certè commodissima atque opportunissima sese offert occasio, quâ Christiani Principes suam in Deum pietatem, propensamque ad officia promerenda voluntatem, atque in Ecclesiam Catholicam amorem mortalibus optimè declarare queant. Nunc enim præclarissima datur opportunitas Christianam Rempublicam non tutandi solùm, sed etiam amplificandi. Nunc aditus patet ad gloriosum Christi Dei & Domini nostri Sepulchrum, ceteraque amplissima diuinæ suæ in nos charitatis monumenta pristinum in statum & honorem restituenda. Nunc optata nobis tribuitur facultas, quâ immanis illius atque importunissimæ belluæ feritatem nefariosque conatus reprimere ac labefactare faciliè possumus. Nunc egregiam nobis defert Deus commoditatem debitas à sceleratissimo tyranno pœnas fumendi. Ad hanc porrò tam illustrem, tam gloriosam, Christianisque Principibus tantoperè dignam expeditionem nos clementissimus Deus adhortatur, hac ipsâ gloriosissimâ concessâ victoriâ, cum arrhabone certissimâque spe, fore ut inde triumphos omnes agamus. Deus immortalis! Vos nunc appello,

Reges

Reges ac Principes Christiani, quousque tandem per dissensiones nostras ac temeritatem fieri patiemur, ut sordidissimis Turcarum pedibus conculcentur ea loca, quæ sacratissimo IESV CHRISTI Dei & Domini nostri madefacta sunt Sanguine? Hæc, hæc, inquam, sunt bella Domini, hæc veræ Christianoquæ nomine dignæ expeditiones. Cum igitur ad has conficiendas nuptias, Christi Domini ac Liberatoris nostri Sponsæ & salutis & libertatis studio moueamur; ac licet nobis persuasum sit, Christianissimum Gallorum Regem fratrem nostrum in hoc sanctissimo fœdere ita se gesturum, uti antea in rebus eiusmodi perpetuò se gessit; atque ad rem Christianam & tutandam & etiam augendam, eam charitatem adhibiturum esse ac pietatem, quam maiores eius semper contulerunt, ex quo etiam Christianissimorum Regum sibi nomen pepererunt: tamen ut huic Regi nonnullam optimæ nostræ iurum voluntatis significationem demus, vniuersoque declaremus orbi, quanti faciamus & affinitatem illius, & etiam totius Ecclesiæ Catholicæ conseruationem; nos sanè amplissimæ atque opulentissimæ dotis loco ponemus, si hanc ipse nobiscum belli societatem coire voluerit, unaquæ nobiscum in hunc Christianæ Reipublicæ omniumquæ salutis hostem infestissimum coniurare. Sanctissime in CHRISTO Pater, & Beatissime Domine, Deus Optimus Maximus Beatitudinem tuam diutissime seruet incolumem, ad nostram totiusquæ Christianæ Reipublicæ utilitatem. Datum Olisipone, XIII. Kalend. Ianuarij, M. D. LXXI.

EPISTOLA VI.

*Navalis victoria pondus ostendit : epistolarum de Turci-
co bello ad exteros Reges datarum exempla mittit; eas-
que epistolas per certos nuntios, qui rem bene iuvent,
ad illos perferendas curat. Vide lib. v. cap. ix. Vita
PII V.*

Charissimo in CHRISTO Filio, Sebastiano
Lusitaniæ Regi.

Charissime noster in CHRISTO Fili, salutem
& Apostolicam benedictionem. Maximam
& gloriosissimam de Turcis relata[m] victoriam Om-
nipotentis Dei benignitate nuper nobis concessam,
de quâ superioribus diebus per litteras nostras Ma-
iestatem tuam certiore[m] fecimus, vniuersæ Chri-
stianæ Republicæ tanto adiumento futuram esse
confidimus, vt nihil in eo genere maius sanè possit
vinq[uam] excogitari : si modò posthac tam oppor-
tunam rei benè gerendæ occasionem Christiani
Principes, atque alij ipsis hostibus finitimi Reges
minimè negligent aut abijciant : quin potius quâ
par est celeritate virtuteque eandem arripiant, ac
fortiter persequantur, sique nos vllum, quod à no-
bis proficisci possit officium, haudquaquam præter-
miserimus. Nos igitur Æthiopum Persarumque
Regibus, ac ceteris illarum gentium Principibus,
sine cunctatione perscribendum esse putauimus in

eam

eam sententiam, quam ex ipsis litterarum exemplis, quæ cum hisce ad te mittimus, poteris intelligere. Quocircà abs te etiam atque etiam petimus, vt eisdem litteris nostris tuas quoque (si commodum id esse iudicaueris) ad eosdem Reges ac Principes magnâ efficacitate scriptas velis adiungere, curareque diligentissimè, vt illæ per homines eius tantùm rei causâ missos, qui & virtute & eloquentiâ suâ rem conficiendam procurare valeant, summâ fide ad ipsorum Regum ac Principum vnumquemque singillatim perferantur. Quod quidem Maiestatem tuam, tum Christianæ Reipublicæ causâ, tum etiam suo Regnorumque suorum beneficio, libenti promptoque animo facturam non dubitamus. Datum Romæ apud S. Petrum sub annulo Piscatoris, xv. Kalend. Decembris, M. D. LXXI. Pontificatus nostri anno sexto.

EPISTOLA VII.

Naualē Christianorum victoriam ad Echinadas partem significat; ac Regem, vt ad eam expeditionem contra Turcas conspiret, hortatur. Vide lib. v. cap. IX. Vita PII V.

Illustri viro, Siecco Persarum Regi
Potentissimo.

Illustri viro Siecco Tahamaso Persarum Regi
Spiritus veritatis illuminationem. Nullum nobis

bis dubium est, quin & litteris multorum & nuntiis, ac denique rumore ipso ad te sit allatum de ingenti & gloriosissimâ atque adeò post hominum memoriam maximâ, nauali victoriâ, quam Dei Optimi Maximi ope ac benignitate Nonis Octobris proximè præteritis Christiani Principes fœdere sociati, in sinu Corinthiaco prælio cum validissimâ in primisque copiosâ ferocissimi ac potentissimi Selymi Othomanni Turcarum Tyranni classe commisso, diuinitus reportarunt. Quo quidem in prælio videre fuit captas vel depressas ad trecentas easdemq; instructissimas atque ornatissimas hostium triremes, æneis tormentis partim receptis, partim verò demersis, trierarchis suis ac ducibus nauarchis, militibus atque remigibus, cum omni apparatu militari, fufis, occisis, ac penitus occidione deletis, paucis quibusdam exceptis, qui statim arreptâ fugâ periculum euaserunt. Quod sanè diuinâ prouidentiâ factum esse, certè scito. Nam anno superiore non sine summo animi nostri dolore cùm intelligeremus, Selymum pro effrenatâ atque inexplebili aliena rapiendi cupiditate, ac pro insito sibi ac perpetuo rerum potiendi desiderio, rupto pacis vinculo, quo se non ita pridem cum dilecto Filio nostro nobiliq; viro Venetorum Principe, eâque cum Republicâ, sese coniunxerat parens eius Solymannus, quodque ipsemet, posteaquam est ad maximam illam, ac præter alias omnes formidabilem Regni potestatem eue-

ctus,

ctus, arctius confirmauerat, cunctis siue humanis siue diuinis legibus nefariè violatis, ac collectis vndique militibus, se Cyprium in Regnum iam diu Venetis subiectum intulisse, summisque belli viribus instructum vrbes crudelissimè expugnasse diripuisseque, ac demum eam insulam omnem deuastando in potestatem redegissee; ad boni Pastoris officium nobis diuinitus commissum pertinere existimauimus, tantâ super re nihil amplius esse cunctandum, sed vehementer in Deo Domino cohortari & commonere & rogare oportere Christianos Principes omnes, in primisque charissimum nostrum in CHRISTO Filium Philippum Catholicum Hispaniarum Regem, vtpote inter ceteros præpotentem & Regnorum amplitudine & multorum robore populorum, & opum diuitiarumque splendore florentissimum, vt ipsi omnes nobiscum vnâ, & cum iisdem Venetis, sensibus viribusque coniunctis, in istius Tyranni rabiem & furorem comprimendum, atque in eum à nefariis cogitationibus suis reuocandum conspiraremus. Quo quidem laudabili vtilique consilio nostro, perpetuis laboribus, assiduis vigiliis, singulari sollicitudine nostrâ ac patientiâ, Deo benè iuuante, feliciter constituto; optabilem æquè ac necessariam inter nos societatem coiuimus, ad laudem & gloriam Dei. idque non quidem, quòd bellicas ac militares cogitationes libenti animo suscipiamus, cum alioqui pacis amantissimi

vindices simus; sed vt, quæ attollere superbia solet cornua, deprimamus omnino, atque adeò confringamus. Nobis igitur talem, vti diximus, ac tantam victoriam adeptis, id profus non solum Christianis, sed cunctis etiam Regibus totiusque terrarum orbis Principibus maximo est adiumento futurum; in primisque tibi, perpetuas easdemque grauissimas cum Ottomannicâ domo inimicitias gerenti, pro veteri vestro & inexpressibili in eam odio à maioribus vestris hereditario quasi iure in vos vsque deriuato. Quod quidem facile fiet, si hanc, quæ vltro tibi sese offert, opportunam rei benè gerendæ facultatem haudquaquam prætermittendam esse iudicaueris. Quamobrem eius te meritò admonendum esse duximus, quin etiam ad communem vtriusque nostrum vtilitatem ob oculos tibi omnino decernendum proponere voluimus, vt eiusmodi occasionem, diuinitus oblatam, forti alacrique animo complecti ac persequi velis, quâ nullam meliorem poteris vnquam reperire. Itaque primo quoque tempore iustum exercitum colligere, atque in istis Orientalibus plagis de improviso communem hostem inuadere debes omnino, vt, dum ipse rebus suis afflictis, atque ipsâ maximâ, quam suprà commemorauimus, clade conflictatus interiacet, possis eas, quas Ottomannus clarissimis Persarum Regibus identidem intulit iniurias, vlcisci, vel damna compensare ac resarcire: atque etiam vt Mesopotamiam ac Syriam

riam prouincias, nec ita pridem vobis subiectas, sed creptas, & à Selymo iniquè per vim occupatas, eodem tempore recipias atque recuperes. Quæ res tibi haud difficilis erit obtentu. Nos enim ita nobiscum considerantes, verè colligimus: Selymus incredibili hac calamitate fractus ac debilitatus, vidensque maritimo se spoliatum imperio, teque istinc fortissimè depugnantem, ex aliâ verò parte Christianos fœderatos validissimas ac fortissimas copias ex Europâ ad bellum in eum terrâ marique gerendum educentes, vno & eodem tempore tôt tantosque impetus sustinere, aut paribus viribus congregi nullo modo poterit. Quapropter nos potentissimum Deum, in cuius manu Regum sunt corda, supplices deprecamur, vt te ad præclara illustriaque fortiter aggredienda facinora, ad eademque deinceps summis viribus conficienda, commoueat, accendat, inflammet: atque vt res tuas omnes ab acerbissimo ac teterrimo humani generis hoste benignè tueatur, simulque felices euentus tuos augere velit ac prosperare. Quæ quidem omnia, is quem cum his litteris ad te mittimus, planius explicabit. Datum Romæ apud sanctum Petrum sub annulo Piscatoris, xvi. Kalend. Decembris, M.D.LXXI. Pontificatus nostri anno sexto.

EPISTOLA VIII.

*Regem Arabiæ de nauali Christianorum victoriâ certior
rem facit, eique, vt contra Turcas arma capiat, sua-
det. Vide lib. v. cap. IX. Vita PIL V.*

Potenti Seripho Mutahar, Regi Ara-
biæ Felicis.

POtenti Seripho Mutahar, Arabiæ Felicis Regi,
Spiritus veritatis illustrationem. Dubium
non est, quin communis imminentium periculo-
rum metus, iniuriarumque earundem communio,
ad quorumvis vel Principum vel populorum ani-
mos consociandos plurimum valeat, tametsi maxi-
mis locorum interuallis disiuncti, aliisque permul-
tis rationibus inæquales essent & impares. Turca-
rum Tyranni tantâ dominandi propagandique sui
fines Imperij cupiditate, tantâque diuitiarum & au-
ri siti, continenter exardescunt, omnibus vt Princi-
pibus & gentibus ob id infesti esse non desinant,
mortalesque omnes æquæ sibi subiicere, eosdemque
opprimere concupiscant. Sed quoniam vires suas,
ac potestatem quamvis magnam, haud satis esse
subinde cognoscunt, hac semper arte astutiâque sunt
vsi, vt tantisper dum bellum in certos aduersarios
mouerent, cum ceteris interim pacatos se & amicos
esse simularent. Ex quo factum est, vt, summo per-
fidia

fidia scelere, Persis, Arabibus, Græcis, Alemannis, Hungaris, Italis, nobilissima Regna prouinciasque identidem eripere, tyrannidique suæ adiungere non dubitarint. Quarum quidem felice rerum successu, Regni que potentiâ & amplitudine, eorum audacia, temeritas atque superbia eousque peruenit, vt, qui illorum armis sese audeat opponere, neminem esse sibi persuadeant: quin omnes homines vel ad nutum dicto sibi putant audituros. His igitur consiliis Selymus, qui nunc Tyrannus imperat Turcis, diligenter instructus, anno superiore nobilissimæ Venetæ Reipublicæ Cypri Regnum, atque alia tum maritima tum terrestria loca eidem Reipublicæ subiecta, hostilem in modum eripere cœpit atque occupare, spreto inre societatis, violatis pactis & conuentis, nullâque iurisiurandi à semetipso dati habitâ ratione, neque vllâ vel minimâ occasione lacesstitus. Quamobrem nos & pro paternâ quam nobis, meritis licet imparibus, Christiani totius populi sustinendi curam Deus commisit, repente per litteras ac nuntios Christianos Principes omnes monere cœpimus & cohortari, ad conspirandum in maximam istius crudelissimi hostis nostri comprimendam insolentiam ac ferocitatem. Hinc igitur fœdere inter Catholicum Hispaniarum Regem & nos & ipsos Venetos icto, ac quanta maxima breui temporis spatio colligi potuit classe comparatâ atque missâ contra Turcas, cum iis sub sinu Corinthiaco

Nonis Octobris proximè decursis nauale prælium est commissum. Quo quidem prælio tantoperè dignam gloriosamque victoriam nostri sunt consecuti, vt numquam antea par vel visa fuerit, vel etiam audita. Nam validissima & optimè instructa Turcarum classis, quæ trecentarum nauium cuiusuis generis erat, eoque amplius, maximam partem capta est; reliqua verò depressa, ac penitus excisa. Cæsa præterea sunt plus triginta Turcarum millia, vnâ cum ducibus suis, in quibus erat illorum militiæ robur. In primis verò centum & nonaginta triremes, cum eximiâ captiuorum multitudine, nostrorum in potestatem peruenerunt. Quare cum hostis noster sæuissimus omni suâ sit classe spoliatus, acceptaque grauissimâ clade fractus meritò iaceat, cumque omnis eius maritima ditio nostrarum classium incursionibus liberè pateat; in eam curam incumbere omnino debemus, vt tam præclaræ illustrisque victoriæ fructus quàm vberrimos colligamus. Neque verò nos conquiescemus vnquam, donec Christianos Principes omnes incitauerimus, efflagitando, vt adauctâ societate, & quàm maximis poterunt belli præsidiis & copiis comparatis, insequenti vere terrâ marique immanem hostem circumueniant atque aggrediantur. Sed hoc ipsum etiam consilij tibi significandum esse censuimus, vt intelligeres in præsentia cominodissimam tibi atque optatissimam occasionem offerri, sic vt fortasse nul-

lam

lam talem vniquam sis habiturus, communem videlicet hostem aggrediendi ac persequendi, recuperandi que res tuas, si quas olim ille per iniuriam occupauit. Quod quidem ad agendum, atque ad hanc ipsam & rei tuæ benè gerendæ, & istius scelerati hostis deprimendi opportunitatem arripiendam, ac summo studio complectendam, te etiam atque etiam hortamur & suademus, ac simul etiam obtestamur. Sic enim dubitare nemo debet, quin hostis iste circumseptus maximis ac validissimis exercitiis, & classibus diuexatus, vestros simul & nostros acerrimos impetus haudquaquam sustinere queat. Potentissimus Deus optimam quamque huiusce te consilij rationem edoceat, vt prorsus moliaris id atque perficias, quod & tibi sigillatim & vniuerso terrarum orbi sit salutis futurum; quemadmodum etiam, qui has nostras ad te litteras perferet, latiùs edocebit. Datum Romæ apud sanctum Petrum sub annulo Piscatoris, xv. Kal. Decembris, M. D. LXXI. Pontificatus nostri anno sexto.

EPISTOLA IX.

Æthiopum Regem, cognomento Pretiosum Ioannem, corrupto vocabulo Preteianmem appellatum, admonet de nautali victoriâ, eumque, vt contra Turcas bellum suscipiat, cohortatur. Vide lib. v. cap. IX. Vita PII V.

Charissi-

Charissimo nostro in CHRISTO Filio, Mennæ
Regi Regum, Illustri Æthiopum Regi.

Charissime noster in CHRISTO Fili, salutem & Apostolicam benedictionem. Quoniam pro eâ charitate quâ decet, in Domino nos valdè diligimus atq; æstimamus Maiestatem tuam, utpote magnum, excelsum ac præpotentem Principem, atque Christianæ Religionis amantem, cumque prætereâ istis in oris ad gloriam & honorem Dei ac Domini nostri IESV CHRISTI, potentiam tuam auctam esse cupiamus; faciendum esse duximus, ut his litteris nostris certior fieres de maximâ gloriosissimâque victoriâ, quâ idem Dominus ac Redemptor noster Christianorum classem exercitumque nuper dignatus est. Etenim anno superiore Selymus Turcarum Tyrannus, societatis pactorumque legibus nefario periurij scelere violatis, neque ullâ vel minimâ occasione prouocatus, sed suâ ipsius sibi que insitâ toti terrarum orbi imperitandi cupiditate permotus, clarissimam Venetorum Republicam, & Cypri Regno atque insulâ, aliisque prætereâ tum terrestribus tum maritimis locis, eidem Reipublicæ subiectis, hostilem in modum spoliare ac diripere aggressus est. Quo quidem iniquo nos facinore commoti, pro eâ, quam sic Deo disponente Christianæ Reipublicæ curam gerimus, confestim

festum animum adiecimus, & per litteras, & per internuntios, ad Christianos Principes cohortandos & incitandos, nihil vt non agerent, quo possent perfidissimi huius Tyranni furorem & insolentiam reprimere ac cohibere. Itaque inter Serenissimum Hispaniarum Regem Catholicum, & nos Venetosque ipsos, fœdere percussio, ac non ita magno temporis intervallo ingenti classe ædificatâ missâque contra Turcas, cum iis Nonis Octobris proximè lapsis in Græciâ sub sinu Corinthiaco nauali pugnâ signa nostri contulerunt: indeque tam illustrem gloriosamque victoriam reportarunt, vt prioribus sæculis similem numquam viderint homines, aut etiam audierint. Nam Turcica classis, quæ erat omni genere nauium numero trecentarum eoque amplius instructa, summisque belli præsidii & viribus egregiè communita, maiori ex parte capta fuit; reliqua verò vel demersa, vel prorsus occisione deleta. Occisa præterea sunt triginta & amplius Turcarum millia, vnâ cum ductoribus suis: ac proinde nostrorum in potestatem venerunt, cum ingenti captiuorum multitudine, centum & nonaginta triremes, in quibus summum eorum militiæ robur atque præsidium inerat. Cùm igitur noster hic immanissimus hostis omni suâ classe dispoliatus, grauissimâque acceptâ clade perterrefactus, ac meritò fusus & fractus succumbat, cumque omnis eius ora maritima nostrorum pateat excursionibus; nos

H h h

neque

neque prætermisimus antea, neque adhuc indies prætermittimus, Christianos Principes excitare & impellere ad tam præclaræ nobilisque victoriæ fructus vberrimos percipiendos; vt & ipsi etiam in societatem adscripti, quantis maximis poterunt bellicis apparatusibus ac viribus instructi, teterrimum hostem terrâ marique petere, atque vndique cingere aggrediantur. Quocircà nos pariter hortamur Maiestatem tuam, oramusque, vt, posteaquam potentissimo Deo, Patri misericordiarum & Deo consolationis, Dominoq; exercituum, de tam excellenti honorificâque victoriâ, vti nos quoque fecimus, quas decet gratias egeris; libenti promptoque animo velis opportunissimam hanc captare occasionem crudelissimi cunctisque infestissimi Tyranni, ac potissimum Christiani nominis hostis acerrimi, temeritatem, ferociam atque superbiam compescendi. Id autem eueniet, si, vndecumque fieri à te poterit, bellum in eum commouendum esse decreueris, quò longiùs latiusque fines tui possis Imperij, ac simul Christi Religionem propagare. Quâ quidem in expeditione conficiendâ nihil omnino dubitamus, quin Latini sanguinis vires, opera & studia Maiestati tuæ sint adiumento futura. Datum Romæ apud S. Petrum sub annulo Piscatoris, xv. Kal. Decembris, M. D. LXXI. Pontificatus nostri anno sexto.

EPISTOLA X.

Grati animi Virtutem Reginae Matri Christianissimi Regis commendat: ut afflictis Anglis Catholicis opem ferat coniunctis Gallorum viribus, Elisabetham Britanniae Reginam haereticam expugnet, Catholicamque Religionem protegat, hortatur: ad eas res bene gerendas auxilium suum non defuturum pollicetur.

Catharinæ Reginae, Matri Christianissimi Gallorum Regis.

Charissima nostra in CHRISTO Filia, salutem & Apostolicam benedictionem. Beneficiorum, praesertim afflictis in rebus atque in periculis acceptorum, memorem sese praebere, non solum Principes decet, sed illis est id quoque valde necessarium: sic enim & aliis in eiusmodi difficultatibus animus additur in posterum, & ij qui malè se gesserint, non sine suo dedecore meritis poenis afficiuntur. Nullam porrò nos virtutem hac ipsâ grati animi maiorem aestimamus: quâ efficitur, ut non modò terrena Regna stabiliantur, sed efferatae ac barbaræ quæque gentes arctiori amoris vinculo confociantur. Debet igitur Maiestas tua in hac cogitatione sibi constare, neque pati ut inanibus Protestantium hæreticorum pollicitationibus eâ bonâ de mente deducaris, quam antea prætulisti Angli-

cis Optimatibus, atque iis omnibus, qui Scotorum Reginae partes sustinent, protegendis: ex quibus, ut perspicuum est, pendeat tranquillitas Gallicarum rerum, quæ absque illorum ope proximis temporibus in magnis planè periculis versabantur. Etenim quando Admiralius Colignius acie instructus, multis, quæ illi submittebat Anglia, fulciebatur auxiliis, eodem tempore si pessima illa Regina se Colignio fauere apertè declarasset (quod inhibitum fuit ne Protestantium artibus accideret) proculdubio Galliarum Regnum in maximum ruinæ discrimen incurrisset. Quamobrem ex Angliâ nobiles complures, solum ut Christianissimam Maiestatem ceterosque Catholicos, Mortæ Antistite eius in Angliâ oratore suadente, Robertoque Rodulpho intercedente, sustentarent, peruersis improbæ illius feminæ consiliis obstiterunt; atque tum apertè tum clanculò perfecerunt, ne tam duro Gallia conflaret incendio. Atque huius quidem rei optimus testis esse potest ipse Mortensis Antistes: cui nomine nonnullorum Principum ex ipsis Optimatibus Rodulphus enuntiauit, Maiestatem Christianissimam posse in eorum studiis conuiescere. Nam se curaturos, quod deinde curarunt, ne Anglorum quam vocant Regina illi se hostem apertè profiteretur. Quod si facere illa voluisset, sese illi opposituros esse, eiusque conatibus summis viribus aduersaturos: eâ tamen lege, ut Galliarum Rex se illis auxilio

xilio fore, Scotiæque Reginae legitimè ipsis impetrantis causam omnino defensurum polliceretur. Quod quidem desponsum est, atque illis Christianissimæ Maiestatis nomine ab Antistite Mottenfi renuntiatum: scilicet illis per omnem occasionem suppetias latum iri, ipsis Nobilibus ad moliendum nouas res excitandis, atque interim duobus hominum millibus mittendis in Scotiam. Quod etiam fieri cœptum est, exercitu per speciem in Angliâ maturè comparato: sed posteaquam Rex voti sui compos est factus, atque cum Admiratio rediit in gratiam, illi ipsi deserti sunt. Ac licet sæpè fuerit postulatum, tamen illis promissa minimè seruata sunt. Quin etiam spe quâdam ducebantur, fore ut certo tempore nonnulla fierent ac dicerentur; neque futurum cogitabant, ut, si ob res inde gestas nobiles ipsi perderentur, Regnum istud in easdem incideret difficultates: cum præsertim nemo nesciat, Elisabetham Regiæ isti Maiestati promissa non esse perfecturam, vigente pessimo quo utitur consilio, suadentium non posse eam tutò regnare, nisi quantum in se est, Galliæ Belgijque Protestantium causam rueatur. Itaque leuissimâ quâque sumptâ occasione, non habens illa qui eius praua temperare consilia queat, facilè se Galliarum hostem esse palàm demonstrabit. Quo quidem tempore Maiestas tua planè cognosceret, quàm ingens in se detrimentum recideret ex tot nobilium Anglorum fa-

etâ iacturâ; qui si protegantur, magno erunt Gallia præsidio. Adhæc autem, deferri nullo pacto debet causa Scotorum Regina, cui Maiestas tua & affinitatis & antiqui fœderis iure plurimum debet. Quòd si, volente Deo, Anglicum illa Regnum obtineret, Gallicos tumultus numquam sanè pateretur: neque fieri posset, ut ea insula veniret in ditionem Principis alicuius ex Protestantibus, qui proculdubio Galliam, ac reliquam omnem rem Christianam vexare non desisteret. Gallia verò Protestantes, quamvis eos Maiestas tua in pace contineat, perpetua tamen habent in Angliâ commercia; eamque Reginam admonent earum rerum, quæ non modò in Galliâ, sed etiam in toto orbe Christiano geruntur. Atque hisce artibus magis ac magis confirmantur indies, ut exitiosa consilia sua aliquando possint obtegere, nefariasque cupiditates explere. Quod utinam citò non videamus! Etenim nobis exploratum est, illos, eo quod habent in Angliâ subsidio munitos, coaceruandis pecuniis continenter operam dare; quas præter stata ac publica vestigalia, quæ ex Anglicis cogunt Ecclesiis, ex latrociniiis quoque & Catholicorum bonis ad mare direptis colligere consueverunt. Quod sanè damnum incredibile est, redarguitque vehementer omnium Principum conscientiam id mali non auertentium. siquidem liquidò constat, Protestantes illos propriis Catholicorum bonis armatos bellum renouaturos, idque primo

primo quoque tempore haud dubiè facturos; cùm non satis tutos se fore arbitrentur, nisi quatenus Christianissimam Maiestatem implicitam teneant, eandemque sui ipsorum auxiliij necessariò indigere, ac per speciem Gallici Regni fines amplificandi in Hispaniam bellum inferre curauerint: idque ad ipsorum factionem magis constabiliendam, adigendumque Regem, vt cum ipsis moderatiùs se gerat. Quòd si Anglia, cuius ope ipsi maximè nituntur, vndeque subsidia cuncta petere perpetuò solent, ab illis aliquando fuerit abalienata, fouendis Optimatibus illis & populis, qui ad Catholicæ virtutis lucem redire desiderant, fieret vt Christianissima Maiestas tutior esset ab hostibus, qui eam assiduè circumstant, ac fortasse contra illam coniurant. Quin ipsa Regno suo toti liberiùs imperaret, atque vniuerso terrarum orbi magis quàm vquam antea se terribilem præberet; ac præterea Deo pergratum faceret, quodque sui muneris est egregiè præstaret. Quæ cum ita sint, debes omnino iis stare promissis, quibus te ipsa iam obligasti, nobisque spondesti, ad vniuersæ Christianæ rei salutem. In quo si fuerit ipsis Optimatibus satisfactum, poteris ipsa deinceps rationes excogitare, quibus commodius fieri possit, vt in Regnum illud Regina Scotiæ succedat, ac magno Catholicæ Religionis beneficio nobiscum ineat belli societatem. Quandoquidem quæcumque à nobis dari subsidia poterunt, ea deside-

desiderari non patiemur, ac magnam eorum partem iam comparauimus: neque aliud quidquam præstolamur, nisi vt consilia sua expediat Maiestas tua, quæ, præter sibi à Deo in futurâ vitâ reposita præmia, gloriam apud homines inde referet immortalē. Quod reliquum est Sancti Populi Episcopus coràm explicabit: qui tum de hac ipsâ re, tum etiam de fœdere vniuersæ Christianæ Reipublicæ tantoperè necessario, aliisque de rebus ad istius Regni vtilitatem pertinentibus, nostro nomine cum Maiestate tuâ fusiùs tractabit. Datum Romæ apud S. Petrum sub annulo Piscatoris, XVIII. Kalend. Ianuarij, M. D. LXXI. Pontificatus nostri anno sexto.

EPISTOLA XI.

Partâ iam nauali victoriâ, vt in sociale bellum contra Turcas conspirent, Ducem & Gubernatores Reipub. Genuensis hortatur.

Dilectis Filiis, nobili viro Duci, & Gubernatoribus Reipublicæ Genuensis.

Dilecti Filij, salutem & Apostolicam benedictionem. Quod semper optauimus, atque omni mente à Deo precati sumus, vt videamus CHRISTI fidem toto orbe propagari, eiusque hostes aut resipiscere, aut, si nolint, ab eius facie vt
fumum

fumum & ceram liquefcere & difperire; hoc, poftquam ad fumum Apoftolatus gradum nullo noftro merito fumus à Diuinâ voluntate prouecti, non optandum modò, fed pro noftro etiam munere curandum atque efficiendum cognouimus. Quam quidem voluntatem vt nos à summâ Dei benignitate accepiffè proſitemur; fic immortales ei gratias agimus, quòd & nobis & chariffimo in CHRISTO Filio noftro Philippo Hispaniarum Regi Catholico, nec non dilecto Filio, nobili viro Aloyſio Mocenigo Duci Venetiarum, eandem mentem & voluntatem immiſerit: quodque nos non ad noſtra tantùm tuenda (quamquam ne hanc quidem cogitationem abijciendam putauimus) fed ad totius etiam Catholicæ Eccleſiæ ſalutem atque amplitudinem procurandam, ſanctiſſimo fœdere obſtrinxerit. In quo incepto non præſentia tantùm nobis ſpectanda eſſe duximus, fed futura etiam prouidenda: ſemperque illud tenendum, vt neque in aduerſis ita frangeremur & caderemus animis, vt non aliquando ſperaremus meliora & latiora; neque ruſum in proſperis & ad voluntatem fluentibus adeò efferremur, vt non putaremus poſſe ea interdum commutari & veri: fed in omni ſtatu omnem primùm ſpem repositam haberemus in Deo, tum nihil prætermitteremus, quantum quidem humanâ ope & conſilio prouideri atque effici poſſet, ad ea, quæ vel nunc eſſent, vel in futurum eſſe poſſent, ad-

nerfa repellenda, ac meliora vel paranda, vel quæ in manu eſſent, retinenda. Hæc cogitatio effecit, vt neque initio deſperaremus de rebus Eccleſiæ, tum cùm monſtrum illud teterrimum videbatur omnia maria occupaturum, atque omnes Chriſtianorum oras vaſtaturum; neque hoc tempore putemus ita fractum & comminutum quieturum, quin potiùs exiſtimemus, illud hac plagâ irritatum noctes atque dies cogitare, quâ ratione poſſit virus ſuum in Chriſtianos euomere, & inſigni aliquâ illorum clade ſuum mœrorem conſolari. Poſtquam autem pulſum eſt mări, nihil videtur eius furori aptius, quàm ſi chariſſimi in CHRISTO Filij noſtri Maximiliani in Imperatorem electi vicinam & finitimam ditionem magnâ aliquâ manu inuaſerit. Quod quidem periculum, & cum communi omnium Chriſtianorum periculo coniunctiſſimum eſt, & ab omnibus, quando fieri poteſt, propulſandum; & nos quidem, & nobiſcum vnâ quos diximus fœderati, quidquid hoc tempore potuimus pecuniarum, peditatus, equitatus, eidem Maximiliano polliciti ſumus. Verùm cùm eæ copię ſint pauciores, quia tam ingentem nos claſſem ſuſtinere oportet, cogimur alios etiam dilectos Filios (in quibus vos veſtro merito chariſſimos habemus) ad opem ferendam vocare. Quâ in re non putamus vtendum aliâ cohortatione, quàm eâ quæ ducitur à veſtrâ ipſorum, atque ab illius perſonâ qui veſtram opem implorat: ſumus

sumus enim vnum corpus in CHRISTO, ipsi autem inter nos membra: omnes igitur debemus concurrere ad CHRISTVM tuendum, quem quotidie in suis membris conficere parat hostis immanissimus. Implorat porrò hanc opem CHRISTVS ipse, qui noster pater & mater est. Qui autem subtrahit aliquid à patre suo vel à matre, & dicit hoc non esse peccatum, particeps homicidæ est. Vt autem intelligeretis, quantum præsidij in communem salutem conferre possetis; sic arbitrati sumus de Venerabilium Fratrum nostrorum sanctæ Romanæ Ecclesiæ Cardinalium consilio, posse vos toto huius fœderis tempore facillè dare pecuniarum centum & viginti millia scuta. Hac de re Venerabilem Fratrem Antonium Mariam, Episcopum Saluiatum, ad vos mittimus: cuius orationi eandem quam nostræ fidem adhibebitis. vestrum autem responsum cupidissimè expectamus; quod nobis, quantò celerius poteritis, dabitis, quò possimus Maximilianum certiore reddere, ipsumq; non solùm ad hostium impressionem sustinendam, atque ad Christianam Rempublicam communis præsidij spe tuendam, sed ad communem etiam hostem inuadendum & superandum animare. Huius autem auxilij, quod vos libenter atque alacriter missuros non dubitamus, non solùm magnam vobis ab omnibus Christianis laudem, sed maximam etiam à Deo mercedem pollicemur: is enim neque in hac vitâ suo vos ac res vestras auxi-

lio destituet; ac Christianorum Principum, quos vos hoc facto deuincietis, animos atque opes ad vestram amplitudinem aggregabit, & in futurâ vitâ hanc vestram pietatem coronabit sempiterno honore & gloriâ. Quotquot in hanc rem pecuniarum indigebitis, eas omnes vt à vestris subditis æquâ pro cuiusque facultate portione, nouis etiam tributis imponendis, sumere possitis, Apostolicâ auctoritate concedimus. Datum Romæ apud S. Petrum sub annulo Piscatoris, die XVI. Decembris, M.D.LXXI. Pontificatus nostri anno sexto.

EPISTOLA XII.

Ducis & Reipublicæ Genuensis ac' PIVM V.

Pontificis diligentiam ac piam in curando Christianorum fœdere sollicitudinem commendant: ad id quò minùs pro desiderio suo conspirare possint, varia ac multiplicia excusant incommoda; vires tamen & opes suas contra Turcas pollicentur.

Sanctissime ac Beatissime Pater. Quod inter omnes constat, Sanctitatem tuam nihil nisi diuinum cogitare; id nimirum hoc bello aduersus Turcam conflando, Christianorumque Principum dissipatis viribus cogendis, mirifico cum studio ac pietate tuâ, tum verò etiam pari prudentiâ ac felicitate prastitisti. Ac cum ex omnibus
premiis

premiis Virtutis amplissimum premium sit gloria, iure idcirco te omnes gentes prædicant, diuinis exornant laudibus, sempiternæ denique gloriæ commendant. Sed non tu hanc caducam inanemque gloriam spectasti: alia, alia maiora, quæ nulla vetustas obruet, nulla vñquam delebit obliuio, Sanctitatem tuam ad decus, ad laudem, ad communem denique salutem amplectendam incitarunt. Nam, qui à Deo ipse es, quique in calum omnia refers Spiritu sancto afflatus; quid Christi Vicario dignum esset, animo ac mente complexus, partes tibi ab ipso Deo impositas tantum spectasti. Præterea litteræ tuæ, quas nobis Episcopus reddidit Saluiatus, quibus nos ad communem causam bellumque capeffendum adhortaris, quàm amanter illæ quidem scriptæ, quo studio, quâ charitate, quâ prudentiâ? Quod si non nostrâ sponte, exemploque maiorum inuitati, studio arderemus Christiani nominis augendi; tuæ certè litteræ in eam nos mentem impulissent, ut omnia nostra ad commune bellum, ipsumque discrimen rerum, libentissimis animis adduceremus. Atque Utinam officio ac Voluntati par sit facultas, viresque Reipublicæ nostræ responderent! profectò potentissimorum Regum ac nationum præclaros conatus adæquaremus. Sed Sanctitatem tuam latere non arbitramur, quàm imbecilla à fructibus nostra sit Respublica; quæ porrò bella, quamque recentia, multis abhinc annis, pacandis rebus Corsicis, sustinuerit, cum omnes pænè eius insulæ populi, nonnullorum Principum premiis pollicitationibusque allekti, Turcarum classe accersitâ prædonibus ad prædam euocatis, di-

mino cultu Religioneque prolapsâ, insulam panè totam armis miscerent: quam nimirum tandem, summo Dei beneficio, maximis laboribus impensisque nostris, in potestatem nostram redegit. Quæ res non nobis solum, sed Italiae toti Christianaeque Reipublicæ tranquillitatem peperit atque otium. Corsico verò confecto bello, cum reficere nos à tantis laboribus speraremus, nouum deinde bellum, ac fortasse etiam durius exortum est: namque paucis abhinc annis siue temporum acerbitas, siue mortalium cupiditas, eò annonam ipsam redegit, ut qui saxosis in montibus siti frumento utimur importato, multos apud nos fames ipsa necauerit; ac non multi illi sint, qui pane expleti vitam agant. Quæ nimirum res Reipublicæ nostræ vires vsque adeò fregit atque imminuit, ut ære alieno oppressis vix tantum supersit fructuum, ut nobis suppetat ad necessarios sumptus perferendos. Supplices igitur petimus à Sanctitate tuâ, cum pecuniam exprimi à nobis imbecillitas nostra non patiatur, ut ardorem pietatemque nostram, non rem ipsam spectes; nosque subleuandos potius quàm vrgendos existimes. Namque quod nostrum est, quoque armorum genere valemus, ut desiderari à nobis possit, nequaquam certè commitemus. Porro cum bellum instrui, reliquosque Christianos Principes communem incumbere in causam perspexerimus, quidquid maritimarum virium, quod superiori æstate fecimus, contrahere poterimus, id omne ad hoc pium ac sociabile bellum cupidissimè conferemus: ut, si minùs pecuniâ, at sanguine ipso corporibusque nostris, quod maiores nostri

stri

stri semper fecerunt, satis Sanctitati tuæ, satis pietati, satis etiam nobis ipsi aliquâ ex parte facere videamur. Hac omnia uberius nostro nomine Illustrissimi ac Reuerendissimi Cardinales Lomellinus & Iustinianus prosequuntur apud Sanctitatem tuam: cui nos humillimè commendantes, sanctissimos eius pedes venerantes piè deosculamur. Datum Genuæ, XII. Ianuarij, M.D.LXXII.

EPISTOLA XIII.

Ad fœderis in Turcas societatem ineundam cohortatur: affinitatem cum Henrico Borbonio Nauarræ Principe iungendam dissuadet: Equitem quemdam hæreticum rectè quæsitum esse, insana pestilentium hominum consilia Regi cauenda, & in causâ Religionis de iure decedere se non posse, admonet. Vide lib. IV. cap. IX. Vita PII V.

Charissimo in CHRISTO Filio Carolo, Francorum Regi Christianissimo.

Charissime noster in CHRISTO Fili, salutem & Apostolicam benedictionem. Tametsi Venerabili Fratri S. Populi Episcopo mandauimus, vt suæ istuc profectionis rationes coràm explicaret; tamen facere nolimus, quin his litteris Maiestati tuæ in mentem reuocaremus, sacrosancti fœderis negotium Christianæ Reipublicæ causâ tantoperè nobis esse cordi, vt dies ac noctes quiescere nequeamus,

mus, donec in eandem societatem coëat Maiestas tua. Memineris verò, maiores tuos inclytæ memoriæ viros pro virtute suâ Christianissimi nominis dignitatem sibi peperisse, Saracenis, Turcis, ac ceteris infidelibus subigendis, iisque pellendis de sedibus quas per iniuriam Christianis eripuerant; atque Hispaniâ, Ierosolymâ, ceterisque ditionibus recipiendis: id quod veteres annales, sed in primis Sacri belli testatur historia. Porro autem ad id commoueri debes, vt eius gloriæ particeps fias, quam inde referent fœderati: quos quidem, Deo Optimo Max. iuuante, confidimus gloriosas victorias reportaturos, quæ subinde immortalibus litterarum monumentis mandabuntur; sed sempiterno tuo cum dedecore, si fortè huiuscemodi fœderis & euentuum expers esse volueris. Ac tantò quidem id maiorem tibi maculam adspargeret, quantò verius illud esse probabitur (quod min' nè credimus) perduelles Catholicæ Religionis inuituros esse consilia, quibus sua in cuiusvis fœderatorum ditionem inferant arma. Neque verò nobis placere potest, abs te nunc ad Turcarum Tyrannum, Christiani nominis hostem, mitti eum qui se Aquensium profitetur Episcopum. Quæ res planè magnum piis hominibus terrorem iniiciet, eamque spem vehementer imminuet, quam afflicti illi Christiani ipsi Tyranno subiecti conceperant, fore vt per occasionem huius victoriæ, quam Deus pro suâ pietate Christianæ classi concessit,

cessit, ex illius tyrannide optatam in libertatem as-
fererentur. Præterea illud nos valdè sollicitat, quòd
scilicet tantoperè Nauarræ Principis nuptiæ cum
Margaritâ sorore tuâ istic vrgeantur, inani quâdam
spe, fore vt per eam ad Catholicam Religionem
Princeps ille reducat: quin potius verendum est,
ne illa ab ipso peruertatur. Eius igitur animæ salus
ita negligitur: etenim ipsi Catholicè viuere volenti
nulla pax, nulla quies vnquam erit cum hæretico
marito; neque is vnquam illi gratus esse poterit,
sed vitam omnem perpetuis in cruciatibus traducet.
Quòd si ipsa ad mariti se voluerit errores confor-
mare, fortasse quidem illa quiuerit humanâ ac fal-
laci quâdam miseræ huius vitæ quiete potiri; sed
cum sempiternâ deinceps damnatione infelicitate-
que nunquam apud inferos terminaturâ. Per-
spicere planè auxilia potuisti, quæ tibi ad tuam &
salutem & amplitudinem identidem suppeditau-
mus, vel ipsam vitam nostram proijcere cupientes
pro nobilissimo isto Regno ad veterem erga diui-
nam Maiestatem deuotionem suique Regis obe-
dientiam reuocando. Itaque illud satis mirari ne-
quimus, quòd tuo nomine Cardinalis Remboldus
nobiscum exposulauit de Equite Ordinis tui ac
militum Tribuno in custodiam deducto, qui am-
plius quadriennium proclamatur hæreticus, atque
eius criminis reus apud sacros Inquisitores grauiter
postulatur. cumque hoc iudicij sit sacri Magistra-

tus, non est cur seuerius, quàm par est, id factum esse cogitetur. Neque verò licet eum aliquo modo liberare, nisi iudicio constituto de illius causâ cognoscatur, resque per sententiam definiatur. Sed arbitramur, iis qui erga Catholicam Religionem malè sunt animati, optimam illam quæ nobis tecum intercedit sensuum & consiliorum communionem valdè displicere, ac propterea eos ad illam inturbandam intentis animis excubare, tibi quæ sæpè proponere, si à Pontifice dissideas, futurum ut in Germaniâ tibi nomen amplifies, viamque communias ad res præclare feliciterque gerendas. Hæc autem, Fili charissime, omnino insanarum mentium inania sunt, atque adeò temeraria consilia, quæ Deus dissipabit: quippe quæ nullo modo, vel honesto, vel laudabili, vel utili nitantur fundamento. Verùm si in mentem tibi reuocare volueris, id quod non solum tibi, sed maioribus quoque tuis, in primisque felicis recordationis Regibus, Henrico & Francisco auo tuo, iam inde à Maximiliani Cæsaris obitu contigit, facile poteris intelligere, quanti ad augendam amplitudinem tuam facere debeas eiusmodi consilia. In Germaniâ verò quisquis pecuniis affluens eas voluerit impendere, hac vnâ ratione suum ibi nomen illustrabit; idque tamen non nisi quodam modo. Quare circumspiciendum prudenter est, atque, ne à peruersis consiliariis Catholique nominis hostibus decipiamur, nobis cautè providendum.

dendum. At verò, quod ad mentem meam attinet, certò scito, si in hac re deliberandâ cuiuslibet occupatæ ciuitatis ad hanc sacrosanctam Sedem pertinentis recuperatio, atque adeò mea ipsius libertas ageretur, non posse me in hoc negotio Religionis ad gratiam alicui faciendam inclinari. secùs enim & diuina Maiestas grauiter offenderetur, & nos hæreticorum fautores esse iudicaremur: & proinde eius rei non solum Deo nos reddere rationem oporteret, sed etiam (quamuis CHRISTI Vicarius nemini nisi soli Deo actionum suarum rationem reddere teneatur) si in rebus Fidei erraremus, statuit Diuina Maiestas, vt humano iudicio Vicarius eius subijci queat. Quamobrem te, vt hoc incepto desistas, & hortamur & obsecramus. Nam etsi amplitudinem tuam valdè diligimus, haudquaquam tamen quidpiam bono Pontifice indignum, cum iniuriâ Dei, mundi que periculo, & animarum offensione, committere volumus aut debemus. Quâ de re, ac de negotio conciliationis Catholicis tam exitiali, quando pacta conuenta à Maiestate tuâ optimè quidem, non autem ab Hugonotis Protestantibusque seruantur, tecum aget idem Venerabilis Frater noster: cui eandem fidem habebis, quam haberes nobis ipsis, si præsentibus tecum colloqueremur. Datum Romæ apud S. Petrum sub annulo Piscatoris, xxv. Ianuarij, Pontificatus nostri anno septimo.

EPISTOLA XIV.

Principem Virum hortatur, ne apud se, aut in ditione suâ, hereticos toleret. De his habes multa lib. III. cap. XII. Vitæ PII V.

Ad N. Principem Virum.

Dilecte Fili, salutem & Apostolicam benedictionem. Inter alias multiplices curas, quæ animum nostrum, pro munere diuinâ prouidentia nobis commissio, dies ac noctes excruciant, ea maior est atque præcipua; videre nonnullos, qui aliquando ex nobis esse videbantur, ex nobis exiisse, atque à Catholicâ Romanâ Ecclesiâ, in quâ vnâ vera salus existit, inconsutilem CHRISTI tunicam, quantum in se est, temerè proscindentes, deficere. Enimverò verbis satis explicari non potest, quantoperè cupiamus omnes in vnum sanctæ vniuersalisque Ecclesiæ gremium colligi. Atque hac in re diligentia ac sollicitudo, quam locis istis haud mediocrem impendimus, latere non potuit quosdam in hæreticâ prauitate exercitatos, è cauernarum suarum latibulis, tamquam virulentas viperas egressos, qui per ditionis tuæ vrbes & loca vagantes, breui temporis interuallo veneni tantum effuderunt, vt complures tibi subiectos pestiferis opinionibus infecerint. Quod sanè pietatis nostræ viscera ita com-
mouit

mouit ac perculit, vt, nullâ interiectâ morâ, te his litteris commonefaciendum putauerimus, vt peritos ac prudentes medicos imitatus, eiusmodi morbo præsens remedium quamprimum velis adhibere. Nam in impietate valdè progrediuntur hæretici, eorumque sermo passim serpit vt cancer. ac si quibus in rebus periculosa mora est, in hac planè est periculosissima. In quâ omnino vel dissimulare, vel minùs leniter agere, an sæpenuerò damnum attulerit Ecclesiæ Dei, non solum vetères, sed recentes quoque nostræ calamitates, profectò quàm vellemus, clariùs testantur. Et sanè lenitas nulla potest esse tanta, vt istorum flectere malitiam queat; qui Catholicorum patientiam exercere malunt, quàm eorum sapientiam aut humanitatem experiri. In quo identidem illi, Domino sic disponente, vitis CHRISTI membris malè agendo profunt vel inuiti. Compertum est autem hæreses esse oportere, vt qui probati sunt, manifesti fiant: verumtamen væ illis per quos illæ sunt. Quòd autem subsistant, non solum ex earum auctoribus fautoribusve, sed ex iis etiam qui vel per malitiam vel per iniuriam illos vigere permittunt, plus satis liquet. Id igitur ne tibi contingat, quantum in te est, perpetuo studio cura quàm diligentissimè: secùs enim in Dei & nostram simul offensionem incurreres, facultatesque tuas omnes maximum in discrimen adduceres, ac præclaram quam de te homines opinionem adhuc

habuerunt, turpiter falleres & obscurares; ne dicamus, de illâ iam, atque adeò de existimatione tuâ, apud quosdam nonnihil esse detractum. Enimuero quia nihil quod nobis relatum est ignorare te volumus, scito nonnullos de te quidpiam Nobilitate tuâ prorsus indignum iam suspicari cœpisse. Ac scito id ex malâ famâ, quæ non ita pridem de ciuibz tuis increbuit, profectum esse. Cuius quidem rei ea ratio est, quòd vix alicui fortasse fiat verisimile, vt ciues Catholicam Religionem deserant in eâ ciuitate, in quâ Princeps eandem quo decet cultu retineat ac profiteatur. Nobis verò quemadmodum hucusque nihil nisi pium de Nobilitate tuâ credere libet aut cogitare; ita sanè si pestem hanc serpere ac progredi diutiùs patiaris, quam ad hunc vsque diem de te opinionem habuimus, retinere nequaquam possemus. Nam in eis rebus quæ ad Fidem pertinent, nec minimam quidem alicui suspicionem iniicere debemus. Excita igitur colligeque te ipsum, Fili; atque istos, qui, vt audiuius, aranearum instar apud te inuolucra sua construxerunt, confestim sic accipiendos decerne, prout eorum merita postulant, aut prorsus eijciendos. Itidemque præsta in quosuis ciues tuos, qui falsâ illorum doctrinâ fuerint deprauati. Nescis modico fermento totam massam corrumpi? Expurga vetus fermentum, sic vt ne minimum quidem tam fæuæ pestis intra tuæ fides ditionis relinquatur indicium. Quòd
si

si hoc ad agendum auctoritate ac potestate, quam nobis licet indignis Deus impertiuit, tibi opus esse iudicaueris; eâ de re nos facies illicò certiores: nam vel hoc nomine tibi nos plurimum debere profitebimur. Neque verò quidquam, quod ad animarum, pro quibus CHRISTVS est mortuus, salutem procurandam sit accommodatum, prætermittimus: aut enim ad sanctitatem redire volentibus paternæ indulgentiæ dexteram porrigemus; aut, si res ita tulerit, spiritualibus armis iustè in eos animaduertemus qui in errore fuerint pertinaces; trademusque homines huiusmodi in interitum carnis, vt spiritus saluus sit in die Domini nostri IESV CHRISTI. Datum Romæ apud S. Petrum sub annulo Piscatoris.



I N D E X

E P I S T O L A R V M

C V M

A R G V M E N T I S.



ABBATIBVS, Capitulis, Præpositis, Canonici, & Clero vniuerso in FRISINGENSI DIOECESANA SYNODO congregandis. Epist. XIII. Lib. I.

Argum. *Diœcesanam Synodum ritè haberi, & Clericorum Seminarium institui, recteq; curari hortatur.* 39

ABBATIBVS quorumcumque Ordinum, & Præpositis in FRISINGENSI DIOECESI constitutis. Epist. XII. Lib. I.

Argum. *Deprauatis sacrorum hominum moribus hæreses potissimùm excitari ostendit: quod ut caueatur, eos ad vitam moresq; suos piè componendos, & ad Christianam disciplinam religiosè conformandos, Clericorumq; Seminarium ritè instituendum, hortatur.* 28

ALBERTO Palatino Siradiæ. Epist. XXXIV. Lib. III.

Argum. *Palatino Siradia ad Catholica Religionis cultum conuersionem gratulatur; atque ut in suscepto vera pietatis consilio persistat, & alios ab erroribus ad rectam salutis viam renocare studeat, hortatur.* 208

ALFONSO Archiepiscopo Mexicano. Epist. XIX. Lib. I.

Argum. *De litteris suis & Concilij Tridentini Decretis ad Archiepiscopum Mexicanum missis: de statu Indiciæ illius Prouinciæ, certio rem se fieri cupit: ad illarum Ecclesiarum regimen*

INDEX EPISTOLARVM.

regimen officium suum non defuturum pollicetur : Gentiles ad Christianam fidem conuersos à militum iniuriis defendi curat. 44

ALFONSO ESTENSI Duci Ferrariæ. Epist. XLV. Lib. IV.

Argum. De Ferrariâ terre motu afflictâ dolorem se percepisse, & piis precibus & vitæ integritate iram Dei, qui mortalium peccatis offensus, eiusmodi clades quandoque permittit, placandam esse ostendit. 384

ANTONIO Episcopo Agriæ. Epist. XXXIII. Lib. III.

Argum. Sedulam Episcopi Agriæ operam in Pastoralis officio egregie præstando commendat; atque, ut benè cæpit, pietatis cursum teneat, animarumq; sibi commissarum salutis diligenter consulat, hortatur. 206

ARCHIEPISCOPO GNESNENSI. Epist. II. Lib. III.

Argum. Ut in Regni Comitibus Catholicam Religionem tueatur, Cleriq; disciplinam & mores restituat, & sacri Concilij Tridentini Decreta in usum induci curet, hortatur. 129

ARCHIEPISCOPO PRAGENSI. Epist. XIV. Lib. II.

Argum. Catholicos in officio Religionis continendos, lapsos ad fidem reuocandos, exequenda Decreta Concilij Tridentini, prouinciales & diocesanas Synodos habendas, Clericorum Seminarium instituendum, bonos tantum & idoneos sacris Ordinibus initiandos, Hæreticos, nisi resipiscant, non promouendos, interdictos libros cauendos, quæ per se agere non possit, per adiutorem confici curet, Archiepiscopum Pragensem hortatur. 93

ARCHIEPISCOPO STRIGONIENSI, Regni Hungariæ Primati, & Suffraganeis eius. Epist. II. Lib. I.

Argum. Sacri Concilij Tridentini Decreta seruari, Clericorum Seminarium iubet institui. 6

CAPITVLO & CANONICIS Ecclesiæ BISVNTINÆ.

Epist. VI. Lib. III.

Argum. Ad retinendam inter se & illius ciuitatis Magi-

INDEX EPISTOLARVM.

*stratus piarum mentium concordiam, ad se ipsos & patriam
ab hereticorum commercio & fraude tutam conseruandam,
& ad vitam moresq; piè conformandos, Canonicos Ecclesiæ
Bisuntina hortatur.*

141

CAPITVLO & CANONICIS Ecclesiæ VALENTINÆ
in Galliâ. Epist. XLII. Lib. III.

*Argum. Hereses, & ira diuinæ flagella unde maximè pro-
uocentur, ostendit. Clericos, ut vitam quisque suam ad pri-
stinam morum sanctitatem reuocent, diuinorumq; Sacramen-
torum vsum piè frequentent, ac bono exemplo sint, horta-
tur.*

233

CAROLO Austriæ Archiduci. Epist. I. Lib. II.

*Argum. Horrendum scelus in sacrosanctam Eucharistiam
admissum, grauissimè puniendum esse admonet.*

66

Eidem CAROLO Archiduci. Epist. XI. Lib. IV.

*Argum. Presbyterum & Ludimagistrum hereticos, ceteris
perniciosos, teneri, & in Episcopi potestatem tradi, postu-
lat.*

373

CAROLO Cardinali BORBONIO. Epist. IV. Lib. III.

*Argum. Ut hereticos quamprimum profligari curet, Caro-
lum Cardinalem hortatur.*

135.

Eidem CAROLO Card. BORBONIO. Epist. XVIII. Lib. III.

*Argum. Consiliis suis de Christianâ disciplinâ ubique resti-
tuendâ cum Legato communicatis, cum, ut id in Auenionensi
Venaissinâque ditio-
ne, per idoneos ministros diligenter præ-
stet, hortatur.*

169

Eidem CAROLO Card. BORBONIO. Epist. XXIII.
Lib. III.

*Argum. Concilij Tridentini Decreta in Auenionensi ditio-
ne obseruari curat.*

184.

Eidem CAROLO Card. BORBONIO. Epist. XXVIII. Lib. III.

*Argum. Cardinalem Borbonium, ut per fideles ministros
bellum contra hereticos geri procuret, hortatur.*

195

Eidem

INDEX EPISTOLARVM.

Eidem CAROLO Card. BORBONIO. Epist. XLVII. Lib. III.
 Argum. *Cardinali Borbonio relata de hæreticis victoriam gratulanti respondet; atque ut belli reliquias eius suas Rex prosequatur, contendit.* 244

Eidem CAROLO Card. BORBONIO. Epist. VI. Lib. IV.
 Argum. *Ineunda cum hæreticis perniciofa pacificationis consilia reprobatur; Cardinalemq; Borbonium, ut id, quoad eius fieri possit, impediatur, Catholicamq; Religionem strenuè pro munere suo protegat, hortatur.* 279

Eidem CAROLO Card. BORBONIO. Epist. VII. Lib. IV.
 Argum. *Factam inter Regem & rebelles hæreticos pacem, ut Regi Regnòque, & Catholica Religioni infaustam & perniciosam improbat; Cardinalémque ad munus suum in ipsius Religionis tutelâ strenuè præstandum cohortatur.* 282

CAROLO Cardinali A LOTHARINGIA. Epist. V. Lib. III.
 Argum. *Ut bellum in hæreticos confici, eorumq; bona proscribi diligenter curet, Carolum Cardinalem à Lotharingâ hortatur.* 138

Eidem CAROLO Card. A LOTHARINGIA. Epist. XIV. Lib. III.
 Argum. *Hæreticorum exercitu ad Iarnacium caeso, eorumq; Duce Condensi Principe interfecto, victoriam Cardinali à Lotharingâ gratulatur; eumq; ut Regem Christianissimum ad Dei Omnipotentis suosq; hostes iuste ulciscendos incitet, hortatur.* 161

Eidem CAROLO Card. A LOTHARINGIA. Epist. XXIX. Lib. III.
 Argum. *Bellum in hæreticos per concordēs fidelesq; viros probè administrandum procurat.* 197

Eidem CAROLO Card. A LOTHARINGIA. Epist. V. Lib. IV.
 Argum. *Cardinalem à Lotharingâ, ut pacis cum hæreticis*

INDEX EPISTOLARVM.

- & rebellibus ineunda consilia disturbare ac dissiuere conetur, hortatur.* 276
- Eidem CAROLO CARD. A LOTHARINGIA. Epist. VIII. Lib. IV.
 Argum. *Factam inter Regem & rebelles hæreticos pacem, ut Regi Regnòque, & Catholica Religioni infaustam & perniciosam improbat; Cardinalemq; ad munus suum in ipsius Religionis tutelâ strenuè præstandum cohortatur.* 285
- CAROLO Francorum Regi Christianissimo. Epist. XXIX. Lib. I.
 Argum. *Vt Melite insula contra Turcas opem ferat, Francorum Regem hortatur.* 61
- Eidem CAROLO Regi. Epist. IX. Lib. III.
 Argum. *Auxiliares copias contra hæreticos mittit in Galliam, Duce Sfortiâ, Comite sanctæ Floræ; & Catholicis victoriam à Deo supplex exposcit.* 148
- Eidem CAROLO Regi. Epist. X. Lib. III.
 Argum. *Hæreticorum exercitu ad Iarnacium caso, eorumq; Duce Condensi Principe interfecto, victoriam Regi gratulatur; eumque, ut reliquos hæreticos ad internecionem persequatur, incendit.* 151
- Eidem CAROLO Regi. Epist. XVI. Lib. III. *quæ eiusdem est cum superiore argumenti.* 164
- Eidem CAROLO Regi. Epist. XLI. Lib. III.
 Argum. *Regem Christianissimum, quòd Gasparem Colignium, hæreticorum ducem, omnibus, quos vsurpabat, honoribus ac titulis spoliatum, condemnauerit, aliumq; in eius locum, virum Catholicum, Regni Admiralium constituerit, valdè commendat; atque ut reliquos hæreticos à Galliâ profliget aut tollat, hortatur.* 230
- Eidem CAROLO Regi. Epist. XLV. Lib. III.
 Argum. *Partam ad Monconturium de hæreticis victoriam gratulatur; Regemque, ut bellum strenuè prosequatur, hæreticisq; inexorabilem se prabeat, incitat.* 240
- Eidem

INDEX EPISTOLARVM.

Eidem CAROLO Regi. Epist. XLVIII. Lib. III.

Argum. Regis victoriam de hereticis reportatam gratulantis pietatem commendat. Matrimonij inter ipsum Regem & Isabellam Casaris filiam contrahendi potestatem se fecisse ostendit. 246

Eidem CAROLO Regi. Epist. I. Lib. IV.

Argum. Pacem cum hereticis & rebellibus componere dissuadet, eosq; armis compescendos esse ostendit. 266

Eidem CAROLO Regi. Epist. IV. Lib. IV. qua eiusdem est cum superiore argumenti. 274

Eidem CAROLO Regi. Epist. XI. Lib. IV.

Argum. Regem Francorum ad sociale fœdus contra Turcas ineundum cohortatur. 294

Eidem CAROLO Regi. Epist. XII. Lib. IV.

Argum. Regem Francorum à Turcicâ amicitia renocat, & ad sociale bellum contra Turcas suscipiendum adhortatur. 298.

Eidem CAROLO Regi. Epist. XLVI. Lib. IV.

Argum. Cosmum Medicem Magnam Etruriæ Ducem abs se creatum commendat. 386

Eidem CAROLO Regi. Epist. IV. Lib. V.

Argum. Partâ de Turcis victoriâ, Francorum Regem denuò ad sociale bellum contra eos ineundum adhortatur. 400

Eidem CAROLO Regi. Epist. XIII. Lib. V.

Argum. Ad fœderis in Turcas societatem ineundam cohortatur: affinitatem cum Henrico Borbonio Nauarra Principe iungendam dissuadet: Equitem quemdam hereticum rectè quæstum esse, insana pestilentium hominum consilia Regi cauenda, & in causâ Religionis de iure decedere se non posse, admonet. 439

CATHARINÆ Francorum Reginae Christianissimæ.

Epist. XI. Lib. III.

Argum. Hereticorum exercitu ad Iarnacium caeso, eorumq;

INDEX EPISTOLARVM.

- Duce Condensi Principe interfecto, victoriam Reginae gratulatur, eamq̃, ut reliquos hereticos ad internecionem persequatur, incendit.* 154
- Eidem CATHARINÆ Reginae. Epist. XII. Lib. III. *que eiusdem cum superiore argumenti.* 156
- Eidem CATHARINÆ Reginae. Epist. XLIII. Lib. III.
Argum. Gasparem de Coligny, hereticorum ducem, iuste damnatum gratulatur; idq̃, Gallia rebus salutare fore ostendens, Regina pietatem commendat. 236
- Eidem CATHARINÆ Reginae. Epist. II. Lib. IV.
Argum. Pacem cum hereticis & rebellibus componere dissuadet, eosq̃, armis compescendos esse ostendit. 269
- Eidem CATHARINÆ Reginae. Epist. X. Lib. V.
Argum. Grati animi virtutem Reginae Matri Christianissimi Regis commendat: ut afflictis Anglis Catholicis opem ferat, coniunctis Gallorum viribus, Elisabetham Britannia Reginam hereticam expugnet, Catholicamq̃, Religionem protegat, hortatur: ad eas res bene gerendas auxilium suum non defuturum pollicetur. 427
- CATHARINÆ Portugalliae Reginae. Epist. XXX. Lib. IV.
Argum. Quod Ludouicum internuntium benignè susceperit ac inuerit, gratias agit: oblatae classis officium probat: conubij negotium commendat. 351
- CHRISTOPHORO Episcopo Palentino. Epist. I. Lib. I.
Argum. Sacri Concilij Tridentini Decreta in usum induci, Clericorum disciplinam restitui, eorumq̃, ritè educandorum Seminarium institui, ab hereticis caueri, proborum virorum, quibus Ecclesiastica munera mandari possint, censu habito, certum ad se indicem mitti procurat. I
- CONSVLIBVS & SENATV CIUITATIS COLONIAE AGRIPPINAE. Epist. XLI. Lib. IV.
Argum. Coloniensum, in ciuitate sua Catholica Religionis in officio continenda, & ab hereticorum consuetudine custo-

INDEX EPISTOLARVM.

- custodiendâ , pietatis studium commendat.* 375
- COSMO Duci Florentiæ & Senarum. Epist. XLVI. Lib. III.
- Argum. *Cosmo Florentia Duci victoriam de hæreticis in Galliâ partam pie gratulanti gratias agit; indeq; perceptam letitiam suam, quod ad eam victoriam Ducis auxilia non mediocriter contulissent, auctam esse ostendit.* 243
- DECANO & CAPITVLO Ecclesiæ COLONIENSIS. Epistola XXVII. Lib. I.
- Argum. *Vt optatum Archiepiscopum eligant, Decanum & Capitulum Ecclesiæ Coloniensis hortatur.* 57
- DECANO & CAPITVLO Ecclesiæ ELBORENSIS. Epist. XXX. Lib. III.
- Argum. *Clericorum Seminarium ex Tridentini Concilij Decreto ritè institui præcipit: idq; ad Christianæ Reipublicæ salutem, Ecclesiæ utilitatem, pertinere ostendit.* 200
- DECANO & CAPITVLO Ecclesiæ HALBERSTADENSIS. Epist. III. Lib. II.
- Argum. *Puerum in Episcopum eligentium postulationem rejicit, legitimam idonei viri electionem diutius non differri iubet; alias id suâ auctoritate faciendum denuntiat.* 69
- DIDACO Cardinali SPINOSÆ. Epist. XVII. Lib. II.
- Argum. *Vt Christianam Religionem in Indiâ propagari apud Regem Catholicum procuraret, Didacum Cardinalem hortatur.* 101
- Eidem DIDACO Card. SPINOSÆ. Epist. XXV. Lib. IV.
- Argum. *De Regiis triremibus Pontificiæ Venetæq; classi contra Turcas adiungendis, aliisq; de rebus apud Regem Catholicum benè procuratis, gratias agit; atque, vt ad sociale fœdus quamprimum consociendum Regem inducat, hortatur.* 334
- DVCI & GVBERNATORIBVS Reipublicæ GENVENSIS. Epist. XIX. Lib. III.
- Argum. *Corficam, post rebellionem, in Genuensium potestatem*

INDEX EPISTOLARVM.

tem rediſſe latatur, cuiusq; inſule populos, Chriſtianis legibus & diſciplinis in officio continendos, pieq; moderandos eſſe aſtendit. 173

EIDEM DUCI & GVBERNATORIBVS Reipublicæ GENVEN-
SIS. Epist. XI. Lib. V.

Argum. Partâ iam nauali victoriâ, vt in ſociale bellum contra Turcas conſpirent, Ducem & Gubernatores Reipublicæ Genuenſis hortatur. 432

EMANVELI PHILIBERTO Duci Sabaudia. Epist. XXV.
Lib. I.

Argum. Vt Galliarum Regi, Regnôque, contra hæreticos rebelles ſuccurrat, Ducem Sabaudia hortatur. 54

EIDEM EMANVELI PHILIBERTO. Epist. XXVI. Lib. I.

Argum. Decem aureorum millia Gallia Regno contra hæreticos ſubſidio mittit; aliaq; ad id ſe auxilia contuliſſe, & ab aliis Principibus tum procuraviſſe, tum procuraturum ſe, oſtendis. 56

EIDEM EMANVELI PHILIBERTO. Epist. VI. Lib. II.

Argum. Eccleſiaſticam libertatem defendit. 76

EPISCOPIſ per FLANDRIAM conſtitutis. Epist. XIII. Lib. II.

Argum. Simoniacam prauitatem omnino cauendam eſſe præcipit. 91

EPISCOPO EGITANENſI. Epist. XXVII. Lib. III.

Argum. Episcopum Egitanenſem, quod Clericorum Seminarium in Eccleſiâ ſua nondum inſtituerit, obiurgat, ad idq; primo quoque tempore inſtituendum hortatur. 192

EPISCOPO HERBIPOLENſI. Epist. IX. Lib. IV.

Argum. Episcopum Herbipolenſem hortatur, ne quempiam à Catholicâ Religione alienum, aut hæreſis ſuſpectum, in illius Eccleſiæ Sacerdotum Collegium recipi permittat. 288

EPISCOPO VERDVNENſI. Epist. XXVI. Lib. III.

Argum. Episcopi Verdunenſis virtutem commendans, Paſtoraliſq; muneris ſui pondus oſtendens, cuius piis ſe precibus apud

INDEX EPISTOLARVM.

apud Deum cupit subleuari, eiusq. iudicium in confirmatione collationis certæ Præbendæ comprobatur. 191

FABIO Episcopo Calatino. Epist. xxxvii. Lib. iii.

Argum. Antonium Posseuinum Iesuitam à calumniis vindicat. 217

FERDINANDO Duci Albæ. Epist. xv. Lib. ii.

Argum. Reportatam in Belgio de hæreticis victoriam Duci Albæ gratulatur; ipsumq. ad eos bello profligandos, Catholicamq. Religionem tuendam, hortatur. 97

Eidem FERDINANDO Duci. Epist. xxi. Lib. ii.

Argum. Ducem Albæ in Belgio contra hæreticos bellum feliciter gerentem commendat, eumq. ad rem Christianam strenuè protegendam cohortatur. 110

Eidem FERDINANDO Duci. Epist. xxxvi. Lib. iv.

Argum. Anglis Catholicis contra hæreticos auxiliares copias mitti procurat. 363

FERNANDEZ DE VASCONCELLOS Brasiliæ Gubernatori.

Epist. xxv. Lib. iii.

Argum. Christiana Religionis propagationem & cultum Gubernatori Brasiliæ commendat. 188

FRANCISCO TOLETO Proregi Prouinciæ Peru. Epist. xviii. Lib. ii.

Argum. Fidem Catholicam in Prouinciâ Peruanâ propagandam curat. 103

GABRIELI A CVEVA, Duci de Albuquerque, Status Mediolanensis Gubernatori. Epist. xvi. Lib. i.

Argum. Ecclesiæ Mediolanensis iura defendit. 37

Eidem GABRIELI A CVEVA. Epist. xvii. Lib. i.

Argum. Io. Paulum ab Ecclesiâ, Senatorem Mediolanensem, quem ipse deinde elegit Cardinalem, quod Ducis nomine certum negotium Romæ diligenter procurasset, commendat; hortaturq. Ducem ipsum, vt Ecclesiæ Mediolanensis dignitatem & iura tueatur. 39

M m m

Eidem

INDEX EPISTOLARVM.

- Eidem GABRIELI A CVEVA. Epist. XXXVIII. Lib. III.
 Argum. *Ecclesie Mediolanensis iurisdictionem, & Carolum Cardinalem Borromeum, eius Ecclesie Archiepiscopum, defendit.* 219
- Eidem GABRIELI A CVEVA. Epist. XXXIX. Lib. III.
 Argum. *Eundem Carolum Borromeum Cardinalem, Mediolanensem Archiepiscopum, in causâ Ecclesiastica iurisdictionis defendit; Ducemque, ut Ecclesiam illam esse velit, hortatur.* 222
- ad eundem GABRIELEM A CVEVA Ducem Albuquercium, PHILIPPI II. Regis Catholici Epistola XVII.
 Lib. IV.
 Argum. *Quid de præbendo Venetis auxilio, ac de fœdere sanciendo statuerit, ostendit; inbetq̃, ut fœdus ipsum aliâq̃ Regia negotia cures diligenter.* 318
- GASPARI Archiepiscopo Goano. Epistola XVIII.
 Lib. I.
 Argum. *De sacri Concilij Tridentini Decretis abs se in Indiam transmissis: de iniuncto sibi Summi Pontificis officio; vicem suam dolendam potius quàm gratulandam ostendit: Ecclesiam Dei in Indiâ crescere & propagari latatur: Cardinalis Portugallia pietatis studium commendat: Antistitem, pastoralis curâ se eximi postulantem, confirmat in officio, & exemplo suo consolatur: dispensandi ritè in causis coniugalibus, & certis diebus sacras Indulgentias elargiendi, tribuit facultatem.* 41
- Eidem GASPARI Archiepiscopo. Epist. LII. Lib. III.
 Argum. *Prouincialis Concilij Goani Decreta examinanda, & quatenus opus fuerit approbanda, librumq̃, ad se missum libenter accepisse nuntiat: Archiepiscopum, ut Pastoralis officio suo strenuè fungi pergat, hortatur: Fratres Dominicanos, Franciscanosque, & Iesuitas in infidelium conuersione laborantes confirmat.* 256

GASPA-

INDEX EPISTOLARVM.

GASPARI QUIROGÆ Consiliario Regio. Epist. vi. Lib. i.
 Argum. *Ecclesiarum in Regno Neapolitano visitationem
 impediri non debere.* 16

GEORGIO Cardinali DE ARMENIACO. Epist. iii. Lib. iii.
 Argum. *Ex proscriptis hereticorum bonis templa & alia
 publica adificia, ab illis incensa vel diruta, rursus adifi-
 cari; ex iisq; bonis, nihil omnino ipsis hereticis, vel eo-
 rum propinquis, quamuis bonis & Catholicis, donari iubet.*

133

GEORGIO Episcopo Zagabriæ. Epist. xxxi. Lib. iii.
 Argum. *Catholica Religionis studium Episcopo Zagabriæ
 gratulatur; atque ut Pastoralis curæ munera diligenter ob-
 eat, hortatur.* 202

GVBERNATORIBVS ciuitatis BISVNTINÆ. Epist. viii.
 Lib. iii.

Argum. *Gubernatores ciuitatis Bisuntinae de pietatis stu-
 dio commendat, & ad tuendam Catholicam Religionem, fir-
 mamq; inter se & Ecclesiasticos viros retinendam concor-
 diam, & ab hereticis cauendum, hortatur.* 144

HENRICO Cardinali Portugalliæ Infanti. Epist. x. Lib. ii.
 Argum. *Ne laici, quauis dignitate sint, in Ecclesiarum Sa-
 cellis maioribus, vel in Choris, aut Presbyteriis, dum diuina
 celebrantur Officia, sedere seu stare permittantur. Neque
 mulieres, cuiusuis gradus sint, virorum aut seminarum Mo-
 nasteria ingredi audeant.* 85

Eidem HENRICO Cardinali. Epist. xii. Lib. ii.
 Argum. *Adolescentem Regem optimis magni patrui Car-
 dinalis, & Reginae Catharinae eius auiae, consiliis in Regni ad-
 ministratione adiutum iri confidens, id sedulo fieri commen-
 dat.* 90

Eidem HENRICO Cardinali. Epist. l. Lib. iii.
 Argum. *Vt Regem ad Aethiopicam expeditionem pro glo-
 riâ Dei, Christianeq; Reipublica salute, suscipiendam adiu-
 uet,*

INDEX EPISTOLARVM.

- uct, Henricum Cardinalem Portugallia hortatur. 251
- Eidem HENRICO Cardinali. Epist. xxxi. Lib. iv.
 Argum. *Vt Christiana classi contra Turcas à Rege opem imploret.* 353
- Eidem HENRICO Cardinali. Epist. xxxii. Lib. iv.
 Argum. *Quòd auxilium Christiana Reipublica contra Turcas mittendum apud Regem benè curauerit, gratias agit: ipsiusq; Regis coniugium vt procuret, hortatur.* 354
- Eidem HENRICO Cardinali. Epist. xxxiii. Lib. iv.
 Argum. *Has PIVS litteras manu suâ scripsit, quibus Cardinalem, vt matrimonium inter Sebastianum Regem & Margaritam Valesiam iungendum curet, hortatur.* 356
- HENRICO Duci Andegauenli Regis Christianissimi fratri.
 Epist. xiii. Lib. iii.
 Argum. *Hereticorum exercitu ad Iarnacium caso, eorumq; Duce Condensi Principe interfecto, victoriam Duci Andegauenli gratulatur; eumque, vt Regem Christianissimum, fratrem suum, ad rebelles suos seuerissimè puniendos incitet, hortatur.* 359
- Eidem HENRICO Duci. Epist. xvii. Lib. iii.
 Argum. *Signa militaria de hereticis acie victis capta, ex Gallia ad se missa accipit; atque vt reliquos Dei Ecclesie hostes bello conterat, Ducem Andegauensem hortatur.* 167
- Eidem HENRICO Duci. Epist. iii. Lib. iv.
 Argum. *Pacem cum hereticis & rebellibus componere dissuadet, eosq; armis compescendos esse ostendit.* 272
- HENRICO Iuniori Duci Brunsvicensi. Epist. xv. Lib. i.
 Argum. *Puerum in Episcopum electum approbare se non posse ostendit.* 35
- HIERONYMO Abbati Clara-vallis, electo S.R.E. Cardinali. Epist. vii. Lib. ii.
 Argum. *Abbati Clara-vallis, Cardinalatum suscipere pro suâ modestiâ recusanti, vt electioni acquiescat, iterum prae-*

precipit in virtute sancta obedientia. 78
HIERONYMO PRIVLO Duci Venetiarum. Epist. xxiv.
Lib. i.

Argum. *Galliarum Regno contra hereticos auxilium postulat.* 53

IACOBO Archiepiscopo Gnesnensi, Legato nato, Regni Poloniae Primate, & reliquis eiusdem Regni Episcopis Lublini in Comitibus congregatis. Epist. xxxvi. Lib. iii.

Argum. *Super pluribus Ecclesiasticis Beneficiis obtinendis & residentiâ dispensare recusat; & ut terrena despicientes, ad caelestia & aeterna bona respiciant & aspirent, Poloniae Episcopos hortatur.* 214

IACOBO Episcopo Vasonensi, Patriarchae Alexandrino. Epist. xxi. Lib. iii.

Argum. *Ad mores pie conformandos, Ecclesiasticamq; disciplinam rite ordinandam, Episcopum Vasonensem adhortatur.* 179

IOANNI ANDREAE DE AVRIA Militi Genuensi. Epistola xviii. Lib. iv.

Argum. *Vt Regiam classem cum Venetâ contra Turcas quamprimum iungi procuret, Ioannem Andream de Auria hortatur.* 320

Eidem IOANNI ANDREAE DE AVRIA. Epist. xix. Lib. iv.

Argum. *Ne quid impediat, quo minus Ierosolymitani Ordinis triremes quatuor cum Pontificiâ classe contra Turcas coniungantur, Ioannem Andream Auriam hortatur.* 322

Eidem IOANNI ANDREAE DE AVRIA. Epist. xx. Lib. iv.

Argum. *Vt Regiam classem Neapolitani Proregis subsidiis instructam contra Turcas quamprimum expediat, eundem Andream Auriam hortatur.* 324

IOANNI Archiepiscopo Treuirensi, Sacri Romani Imperij Principi Electori. Epist. xxxix. Lib. iv.

Argum. *Vt Catholicam Religionem, Romanâq; Ecclesia dignitatem*

INDEX EPISTOLARVM.

- gnitatem in Casareo Conuentu contra hereticos tueatur, Archiepiscopum Treuirensē hortatur.* 371
- IOANNI BAPTISTÆ Archiepiscopo Rossianensi. Epist. II. Lib. II.
- Argum. Vltimum supplicium subituris, pridie quàm illo afficiantur, post confessionem Sacerdoti ritè factam, Dominici Corporis viaticum administrari iubet.* 68
- IOANNI Episcopo Adiaciensi in Corsicâ. Epistola xx. Lib. III.
- Argum. Ad Episcopalis curæ munera diligenter obeunda, Episcopum Adiaciensem cohortatur.* 176
- IC. IACOBO Archiepiscopo Salisburgensi. Epist. IV. Lib. I.
- Argum. Concubinatus labem ex Clero omnino tolli, & Ecclesiasticorum mores corrigi iubet.* 12
- IOANNI Patriarchæ Antiocheno. Epist. XL. Lib. III.
- Argum. Patriarcham Antiochenum Episcopalis curæ onus deponere cogitantem à consilio reuocat, ad illudq; strenuè sustinendum hortatur.* 227
- IOANNI DE VALETTA, Magistro Hospitalis S. Ioannis Ierosolymitani. Epist. III. Lib. I.
- Argum. Magistrum Hospitalis S. Ioannis Ierosolymitani, quòd nouam urbem in insulâ Melisâ contra Turcas praestidio futuram seriùs inchoasset, clementer excusat, eumq; à consilio inde discedendi reuocat.* 8
- LVDOVICO Cardinali MADRVTIO, Episcopo Tridentino. Epist. XXIV. Lib. II.
- Argum. Ecclesia fructus in stipendijs militaris solutionem impendi non debere.* 120
- LVDOVICO GONZAGÆ Duci Niuernensi. Epist. XXIII. Lib. I.
- Argum. Carolum Gallie Regem ex hereticorum manibus euasisse gratulatur, eiq; se pecuniarum vel militum auxilia præbitorum pollicetur.* 51

INDEX EPISTOLARVM.

MARCHIONI DE FALCES Nouæ Hispaniæ Proregi. Epistola XX. Lib. I.

Argum. *Felicem Marchionis in Nouam Hispaniam aduentum gratulans, inibi Catholica fidei propagationem à Deo benè precatus, sedulam rei Christianæ procurationem commendat, spiritualiaq; munera transmittit.* 46

MARCHIONI DE VILLARS Regni Franciæ Admiranti. Epist. XLIV. Lib. III.

Argum. *Marchioni de Villars delatum honorem gratulatur, atque, ut susceptis pro Catholicâ Religione laboribus ac periculis, ad cælestia præmia semper affiret, hortatur.* 238

MARIÆ Scotiæ Reginæ. Epist. VIII. Lib. I.

Argum. *Scotiæ Reginæ virtutem ac pietatem commendat, eiq; de filio nato gratulatur, atque illum Catholico ritu baptizari mandat.* 21

Eidem MARIÆ Reginæ. Epist. LIV. Lib. III.

Argum. *Reginam Scotiæ in custodiâ ab Elisabethâ in Angliâ detentam & afflictam consolatur.* 263

Eidem MARIÆ Reginæ. Epist. XXXVII. Lib. IV.

Argum. *Scotiæ Reginam Catholicâ pro fide in carcere fortiter se gerentem commendat & consolatur.* 365

MAXIMILIANO Archiepiscopo Cameracensi. Epist. IX. Lib. I.

Argum. *Concilij Tridentini Decreta exequi, deprauatosq; mores corrigi, ut pro suo munere procuret, Archiepiscopum Cameracensem hortatur.* 23

MAXIMILIANO II. Romanorum Imperatori. Epist. VIII. Lib. II.

Argum. *Casarem, ut Ecclesiæ Tridentinæ iura defendat, hortatur.* 81

Eidem MAXIMILIANO Imperatori. Epist. XIX. Lib. II.

Argum. *Casarem collaudat, quòd Augustanam Confessionem non concesserit: ac terrena Regna Regumq; studia ad cæle-*

INDEX EPISTOLARVM.

- caelestis Regni adeptionem omnino conferenda esse demonstrat.* 104
- Eidem MAXIMILIANO Imperatori. Epist. xxv. Lib. ii.
Argum. Ecclesie Tridentinae causam Maximiliano Imperatori commendat. 122
- Eidem MAXIMILIANO Imperatori. Epist. iii. Lib. v.
Argum. Icto iam fœdere, ut ad id iunctis opibus ac viribus conspiret, Maximilianum Imperatorem grauitur cohortatur. 396
- MELCHIORI electo Episcopo. Epist. xx. Lib. ii.
Argum. Ut quamprimum ritè consecrari se procuret, bonique Pastoris munera strenuè præstans, mores Ecclesiasticos disciplinam restituat, electum Episcopum hortatur. 107
- MENNÆ Æthiopum Regi. Epist. ix. Lib. v.
Argum. Æthiopum Regem, cognomento Pretiosum Ioannem, corrupto vocabulo Preteianum appellatum, admonet de nauali victoriâ, eumque, ut contra Turcas bellum suscipiat, cohortatur. 423
- MOSCOVITARVM Duci. Epist. xxxv. Lib. iv.
Argum. Ad socialis belli fœdus contra Turcas secum & cum aliis Christianis Principibus ineundum, Mosconitarum Ducem hortatur. 359
- PAVLO Nitriæ Episcopo. Epist. xxxii. Lib. iii.
Argum. Nitriæ Episcopi in Pastoralis munere strenuè obeundo diligentiam collaudat, ipsūque, ut in eo quod cepit, sedulo perseueret, grauitur hortatur. 204
- PERAFANIO DE RIBERA, Duci de Alcalâ, in Regno Neapolitano Proregi. Epist. xxi. Lib. iv.
Argum. Regiam classem necessariis subsidiis instrui, & contra Turcas quamprimum dirigi procurat. 326
- PETRO Episcopo sancti Saluatoris in prouinciâ Brasiliâ.
 Epist. xxiv. Lib. iii.
Argum. Ad rem Christianam in Brasiliâ benè curandam, Petrum

INDEX EPISTOLARVM.

Petrum Episcopum adhortatur.

186

PETRO LAVREDANO Duci Venetiarum. Epist. xxx. Lib. i.

Argum. *Melitenfibus à Duce Venetorum contra Turcas subsidia postulat.*

63

PETRO DE MONTE Magistro Hospitalis S. Ioannis Ierosolymitani. Epist. xxii. Lib. iii.

Argum. *Nobilem Scotum Religionis causâ ab hæreticis patriâ pulsum omni charitatis officio suscipiendum commendat.*

182

Eidem PETRO DE MONTE. Epist. xxii. Lib. iv.

Argum. *Ierosolymitani Ordinis triremes instrui, & cum Pontificiâ Venetâque classe contra Turcas iungi procurat.*

328

Eidem PETRO DE MONTE. Epist. xxiii. Lib. iv.

Argum. *Vt Melitenses triremes contra Turcas ad sinum Corcyrensem quamprimum adnauigare, & cum Pontificiâ Venetâque classe coniungi curet, Petrum de Monte hortatur.*

329

Eidem PETRO DE MONTE. Epist. xliv. Lib. iv.

Argum. *Tribus Melitensium triremibus captis, ac centum fere militibus partim cæsis, partim in seruitutem abreptis à Turcis, dolentem Petrum, communicato dolore, consolatur.*

382

PHILIPPO Episcopo Cracouiensi. Epist. i. Lib. iii.

Argum. *Ad Catholicæ fidei defensionem, Ecclesiasticâq; disciplinæ ac morum correctionem, & ad sacri Concilij Tridentini Decretorum executionem hortatur.*

125

PHILIPPO II. Hispaniarum Regi Catholico. Epist. v. Lib. ii.

Argum. *Vt ad sedandos tumultus in Flandriam trayciat, Hispaniarum Regem hortatur.*

14

Eidem PHILIPPO Regi. Epist. xi. Lib. i.

Argum. *Anglos Catholicos Religionis causâ patriâ pulsos;*

Nnn

INDEX EPISTOLARVM.

- fos, & in Belgium receptos, ut omnibus charitatis officiis benigne fouendos curet, Regi commendat.* 26
- Eidem PHILIPPO Regi. Epist. XXII. Lib. I.
Argum. Ut Gallia Regi contra hereticos & rebelles opem ferat, Regem Hispaniarum hortatur. 50
- Eidem PHILIPPO Regi. Epist. XXVIII. Lib. I.
Argum. Melita insule contra Turcam auxilium implorat. 59
- Eidem PHILIPPO Regi. Epist. XVI. Lib. II.
Argum. Ut rem Christianam in Indiâ propagare recteq; habere curet, Regem Hispaniarum hortatur. 99
- Eidem PHILIPPO Regi. Epist. XIII. Lib. IV.
Argum. Afflicta Christiana Reipublice statum deplorat, ut Regem Hispaniarum ad opem Ecclesie ferendam, ac fœderis societatem contra Turcas ineundam permoneat; idq; ab eo etiam atque etiam petit. 302
- Eidem PHILIPPO Regi. Epist. XV. Lib. IV.
Argum. Studia Regis Catholici & officia de ineundo fœdere commendat. 315
- Eidem PHILIPPO Regi. Epist. XVI. Lib. IV.
Argum. Ut Regiam classem contra Turcas Venetis auxilio mittat, Hispaniarum Regem hortatur. 316
- Eidem PHILIPPO Regi. Epist. XXIV. Lib. IV.
Argum. Quod Ioanni Andrea Auria, ut Regiam cum Pontificiâ Venetâque classe coniungeret, mandauerit, gratias agit, Regemq; ad fœderis negotium conficiendum hortatur. 331
- Eidem PHILIPPO Regi. Epist. XXXIV. Lib. IV.
Argum. Ut Catharinam Lusitania Reginam amitam suam ex illo Regno in Castellam venire cogitantem de sententiâ deducat, & matrimonium cum nepote Rege & Margaritâ Valesiâ iungi procuret, Hispaniarum Regem hortatur. 357

INDEX EPISTOLARVM.

ad PIVM V. Pont. Max. ANNÆ SIGISMVNDI Poloniæ
Regis sororis Epist. II. Lib. v.

Argum. *Anna Sigismundi Polonia Regis soror de sacro Romanarum Stationum munere alijsq; Pontificis in se officiis gratias agit: Vincentium Porticum Internuntium Apostolicum commendat, suam in Pontificem pietatem ac fidem proficitur.* 393

ad eundem PIVM V. Pont. Max. DVCIS & Reipublicæ
GENVENSIS Epist. XII. Lib. v.

Argum. *Pontificis diligentiam ac piam in curando Christianorum fœdere sollicitudinem commendat: ad id quò minus pro desiderio suo conspirare possint, varia ac multiplicia excusant incommoda; vires tamen & opes suas contra Turcas pollicentur.* 436

ad eundem PIVM V. Pont. Max. Mariæ Scotorum Regi-
niæ Epist. XXXVIII. Lib. IV.

Argum. *Pontificis erga se benignitatem commendat: sociali bello contra Turcas opem ferre cupit: suas ac Regni sui calamitates deplorat: vel duris conditionibus cum Anglis pacem facere se debere scribit: denique filij sui pietatem in Deum, & in Apostolicam Sedem obedientiam perpetuam fore pollicetur.* 367

ad eundem PIVM V. Pont. Max. PHILIPPI II. HISPAN-
iarum Regis Catholici Epist. XIV. Lib. IV.

Argum. *Pontificis consilium approbat de fœdere contra Turcas; & ad hoc ipse conspirans, per quos Roma id tractari ac confici mandauerit, ostendit.* 312

ad eundem PIVM V. Pont. Max. SEBASTIANI Portuga-
liæ Regis Epist. XXVII. Lib. IV.

Argum. *Pontificis consilium de fœdere contra Turcas probat: sed ad eam expeditionem quod petebatur auxilium mittere in præsens non posse excusans, id in posterum daturum se pollicetur.* 339

INDEX EPISTOLARVM.

ad eundem PIVM V. Pont. Max. eiusdem SEBASTIANI
Regis Epist. XXIX. Lib. IV.

Argum. *Multa & varia excusat impedimenta, quibus fit, ut bello contra Turcas auxilio nunc esse non possit; idq; agere ferens, suam in Pontificem obedientiam & pietatem testatur: de affinitate sibi cum Valesiâ domo iungendâ respondet.* 347

ad eundem PIVM V. Pont. Max. eiusdem SEBASTIANI
Regis Epist. v. Lib. v.

Argum. *Cardinalis Alexandrini legationis litteris respondet, naualem victoriam commendat, & gratulatur: opes suas & auxilium contra Turcas pollicetur. Quid de Gallicis nuptiis decreuerit atque mandarit, ostendit. Postremò quasi bellicum canens, suum in Ecclesiâ Dei protegendam ac vindicandam studium proficietur.* 403

PRÆPOSITO, DECANO, & reliquo CAPITVLO Ecclesiæ
HALBERSTADENSIS. Epist. XIV. Lib. I.

Argum. *Puerum Episcopum non eligendum, in eâq; re non temporalia, sed spiritualia bona spectari oportere, atque Halberstadensi Ecclesiâ virum tanto muneri idoneum Episcopum dandum esse demonstrat.* 32

PRINCIPI VIRO. Epist. XIV. Lib. v.

Argum. *Principem Virum hortatur, ne apud se, aut in ditione suâ, hereticos toleret.* 444

SENATORIBVS Palatinis, & Castellanis omnibus in Diætâ
LVBLINENSI congregatis. Epist. XXIII. Lib. II.

Argum. *Ad Catholicam Religionem, & ad Apostolica Sedis auctoritatem protegendam, Senatores Palatinos & Castellanos in Diætâ Lublinensi congregatos hortatur.* 116

SEBASTIANO Portugalliæ & Algarbiorum Regi. Epist. XI.
Lib. II.

Argum. *Regem Portugalliæ post annum ætatis suæ XIV. Regni gubernacula suscepisse gratulatur, atque ut in administratione optimis suorum consiliis acquiescens probè se gerat,*

in

INDEX EPISTOLARVM.

- in primisq; pietatem in Deum, & augenda propagandaq;
Christiana Religionis studium propositum habeat, hortatur.* 88
- Eidem SEBASTIANO Regi. Epist. XLIX. Lib. III.
- Argum. Aethiopes ad sanctae Sedis Apostolicae obedientiam
redire cupientes, Regisq; Lusitanorum auxilia contra Turcas
postulantes, Regis copiis iuuari postulat.* 248
- Eidem SEBASTIANO Regi. Epist. LI. Lib. III.
- Argum. Coniugium inter Regem Portugalliae & Margari-
tam Valesiam quamprimum iungi procurat; ac Regis consi-
lium de subigendâ Africa, Regniq; militaribus Ordinibus
restituendis, commendat.* 253
- Eidem SEBASTIANO Regi. Epist. LIII. Lib. III.
- Argum. Regem Portugalliae hortatur, ut quae pro Religione
iustitiâq; tuendâ prestare instituerat, prosequatur; ciuita-
temq; Olisiponem a pestilentia liberatam esse gratulans, inde
maximas Deo gratias agit.* 258
- Eidem SEBASTIANO Regi. Epist. XXVI. Lib. IV.
- Argum. Ut Christianis contra Turcas bellum gerentibus
auxilio esse velit, Regem Portugalliae hortatur.* 337
- Eidem SEBASTIANO Regi. Epist. XXVIII. Lib. IV.
- Argum. Propensa Regis ad opem Christiana Reipublica con-
tra Turcas ferendam studia commendat: quid auxilij ab eo
sperandum sit edici, incundiq; coniugij negotium confici po-
stulat.* 342
- Eidem SEBASTIANO Regi. Epist. VI. Lib. V.
- Argum. Naualis victoriae pondus ostendit: epistolarum de
Turcico bello ad externos Reges datarum exempla mittit; easq;
epistolas per certos nuntios, qui rem bene iuuent, ad illos
perferendas curat.* 414
- SERIPHO MVTAHAR Regi Arabiae Felicis. Epist. VIII. Lib. V.
- Argum. Regem Arabiae de nauali Christianorum victoria
certiorem facit, eiq; ut contra Turcas arma capiat, suadet.*

INDEX EPISTOLARVM.

SIECCO Persarum Regi. Epist. vii. Lib. v.

Argum. *Navalem Christianorum victoriam ad Echinadas partem significat; ac Regem, ut ad eam expeditionem contra Turcas conspiret, hortatur.* 415

SIGISMUNDO Regi Poloniae. Epist. vii. Lib. i.

Argum. *Præstitum per Oratorem obedientiae officium se grato animo accepisse scribit; Regem Poloniae, ut, hæreticis amotis, probis administris Catholicis uti velit, hortatur.* 18

Eidem SIGISMUNDO Regi. Epist. iv. Lib. ii.

Argum. *Vt Episcopum hæreticum, qui indignè occupabat Ecclesiam, dimitti curet, Regem Poloniae hortatur.* 72

Eidem SIGISMUNDO Regi. Epist. v. Lib. ii.

Argum. *Lasam in Polonia Ecclesiasticam libertatem defendi curat.* 74

Eidem SIGISMUNDO Regi, & SENATORIBVS Palatinis, & Castellanis omnibus in Diætâ LVBLINENSI congregatis. Epist. xxii. Lib. ii.

Argum. *Ad Catholicam Religionem retinendam & tuendam, Regem Poloniae hortatur.* 113

Eidem SIGISMUNDO Regi. Epist. viii. Lib. iii.

Argum. *Vacaturi Beneficij Ecclesiastici expectationem facere recusat.* 147

Eidem SIGISMUNDO Regi. Epist. xxxv. Lib. iii.

Argum. *Beneficiorum vacaturorum reservationes, & plura Beneficia cum animarum curâ obtinendi ac non residendi facultatem dari non licere.* 211

Eidem SIGISMUNDO Regi. Epist. xlii. Lib. iv.

Argum. *Regem Poloniae hortatur, ut Transilvania Principi persuadeat, ut in locis ditiori sue subiectis Catholica Religionis cultum recipi, & hæreticos inde pelli procuret.* 377

Eidem SIGISMUNDO Regi. Epist. xliiii. Lib. iv.

Argum. *Regis Poloniae pietatem commendat, quod extortum decretum de permissione Augustanae Confessionis renocavit;*

INDEX EPISTOLARVM.

rit; eumq̃, ut in Regno suo Catholicam Religionem protegat, hortatur. 379

Eidem SIGISMUNDO Regi. Epist. i. Lib. v.

Argum. Polonia Regem, legitimam uxorem suam sterilitatis causâ repudiare deliberantem, à consilio reuocat. 389

SIMONI THADÆO ECHIO, ALBERTI Bauariæ Ducis Cancellario. Epist. x. Lib. i.

Argum. Cancellarij in tuendâ Catholicâ Religione studium commendat, ut Clericorum Seminarium in Ecclesiâ Frisingensi institui, aliâq̃ pietatis officia præstari curet, hortatur. 24

THOMÆ Comiti Northumbriæ, & CAROLO Comiti VVestemerlandiæ in Angliâ. Epist. x. Lib. iv.

Argum. Comites Catholicam Religionem contra Elisabetham in Angliâ vindicare conantes benignè consolatur, eorumq̃, pios conatus & studia valdè commendat. 290

VICE-REGI, & CONSILIARIIS Portugalliæ & Algarbiorum Regis in partibus Indiæ Orientalis. Epist. xxi. Lib. i.

Argum. Ecclesia sanctæ filios ex infidelium conuersione in Indiâ crescere latatur: inde Lusitania Regum pietatem commendans, eorum administratos, ut ad Gentilium conuersionem, & conuersos benignè curandos incumbant, adhortatur. 47

VRBANO Episcopo Pataviensi. Epist. ix. Lib. ii.

Argum. De sacrosanctâ Communione sub utraq̃ue specie laicis nullo modo concedendâ. 83

INDEX

INDEX RERVM MEMORABILIVM.

A.



BBATEM Clara-vallis
Cardinalatum susci-
pere PIVS mandat in
virtute sanctæ obe-
dientie. Pag. 79
Adrianus Ballionus. 53
Emilij Maluerij causâ aduer-
sus Fucaros, à Polonia Rege
PIO commendatur. 213
Ethiopes ad sanctæ Sedis obe-
dientiam redire cupientes, Lu-
sitænanorum Regi PIVS commen-
dat. 249. 252
Alberto Laschio Palatino Si-
radie ob conuersionem ad Ca-
tholicam fidem PIVS gratula-
tur. 208
Aloisius Mocenigus Venetiarum
Dux. 361. 433
Amicitia patrum cum infideli-
bus causâ Deus à filiis quan-
doque, etiam delicti expertibus,
pœnas reposcit. 300
Anglos Catholicos Religionis
causâ patriâ pulsos, & in
Belgium receptos Regi PIVS
commendat. 27
-is contra hæreticos auxiliares
copias submitti procurat. 363

Annibal Auricellarius, Le-
gatus Regis Christianissimi.
51. 55
Antistitem Pastoralis curâ se exi-
mi postulantem PIVS exemplo
suo consolatur. 43. 227
Antonius de Grosupro, Ordinis
Predicatorum Professor. 7
Antonius Maria Saluiatus, Le-
gatus à PIO in Galliam mis-
sus. 401. 435
Antonium Posseninum Societa-
tis Iesu. PIVS à calumniis
vindicat. 217
Apostolica seruitutis officium,
non sine timore ac tremore, in
spiritus humilitate suscipien-
dum. 6
Aquensium Episcopus à Rege
Francorum ad Selymum Tur-
carum Tyrannum missus. 440
Augustana Confessio à Casare
non concessa. 105. 380
hac eò ceteris perniciosior, quòd
lenius à Catholica Fidei pro-
fessione declinans, speciem
quamdam Religionis retinere
videatur. 381
Aurangia Princeps. 139
Austriacorum Imperatorum
religio. 106. 107
Belgica

B.

Belgica flebilem statum PIVS
predicit. 16
Bello hominum corrupti mores
emendantur. 275
Bello administrando celeritas ne-
cessaria est, at cunctatio maxi-
me obest. 136. 139. 140. 321.
325. 327
Beneficij Ecclesiastici vacaturi
expectationem PIVS facere
recusat. 147
Beneficiorum vacaturorum re-
servationes, ac plura Beneficia
cum animarum cura obtinendi
licentiam dare PIVS recusat.
211. 215
Boni, sine malis, perfecte boni
esse non possunt. 205
Brunsvicensis Ducis pietatem
PIVS commendat. 333. 35

C.

Cardinales quare purpurâ
vestiantur. 284. 286
Cardinalis Alexandrini pietas.
404
Cardinalis Borromeus. 38. 219
Cardinalis Iustinianus. 439
Cardinalis Lomelinus. ibid.
Cardinalis Madrutius Episco-
pus Tridentinus. 81. 123
Cardinalis Remboldus. 441
Carolus Cardinalis Borbonius ci-
uitatis Auenionensis de Late-
re Legatus. 179. 218
Carolus Gallie Regem ex here-

ticorum manibus euasisse gra-
tulaturs PIVS. 51
eius pietatem laudat. 156. 165.
167. 231. 238. 247. 301. 446
dissuadet ei affinitatem cum
Henrico Navarra Principe.
441
Catharinam matrem Christia-
nissimi Gallorum Regis PIVS
hortatur, vt Scotia Regine
opem ferat. 427
Christiana Resp. Regis Catholici
auxilio maxime nititur. 333
Clericorum Seminarium PIVS
inbet institui. 47. 25. 31. 94.
95. 193. 200
Communio laicis sub virâque
specie non concedenda. 84
Concilij Tridentini observatio, v-
nicum remedium, ad iram Dei
auertendam. 3. 6. 23. 31. 128.
132. 177. 181. 185
Condensis Princeps hæreticorum
Dux, ad Iarnacium occisus.
151. 154
ad Conuersionem animarum PIVS
hortatur. 187. 189. 225
Conuersi ad Christi fidem, sicut
tenere in vineâ Domini plan-
te, amore fouendi. 100
Coniugium inter Portugallie Re-
gem, & Margaritam Vale-
siam, PIVS procurat. 252.
344. 352. 355. 357. 359.
Corsicam post rebellionem in Ge-
nuensium potestatem rediisse
PIVS letatur. 174
Cosmum Medicem, Magnum
O O O Etruria

INDEX RERVM.

Erparia Ducem abs se creatum PIVS commendat. 386

Ernestus Alberti Bavaria Ducis filius. 25

D.

D *Idacus Spinosa Regij Concilij Praeses.* 18
eum PIVS laudat. 335

Disciplinam Christianam PIVS restitui curat. 169.175.177.178.180.

Dux Sfortia, Comes sanctae Florae, cum auxiliaribus copiis in Galliam mittitur. 149

Ducem Albe PIVS ad Catholicam Religionem tuendam hortatur. 98.111.112

Duci Albuquerque Rex Hispanie iniungit, ut foedus aliaque Regia negotia curet. 318

Dux Andegauensis. 151

E.

E *ccllesia Dei, dum ab haereticis oppugnatur, ardentius in Dei charitate inflammatur.* 118.241

Ecclesiarum visitatio impediri non debet. 17

Ecclesiastica bona, Episcopis non ad dominium, sed ad dispensationem sunt concessa. 194

Elisabetha Anglicana Ecclesia se caput dicit. 305

Episcopum qualem oporteat esse. 34.58.206.215

Episcopum haeticum dimitti mandat PIVS. 72

F.

F *Erdsinandus Archidux Austria.* 81.122

Fidei orthodoxa descriptio & commendatio. 114.115.116

Franciscus Dietalensis mittitur a PIO ad Episcopos Pannonios. 203.205.208

Francisco Toletio Proregi Peruviano, fidei propagationem PIVS commendat. 105

G.

G *Alliarum Regno auxilium PIVS postulat.* 50.52.54.55

cui & a PIO auxilia missa. 52.56.60.149.293.308.384.431

Galliae Regi victoriam ad Montconturium PIVS gratulatur. 240.247

eius cum haereticis pacem PIVS luget. 282.285

eum vero ad sociale bellum contra Turcas ineundum hortatur. 295.301

etiam post victoriam de eis relatum. 401.439

Gallorum Regum cum Turcis amicitia improbatur. 296.299.300.440

Galliae Reges haereses dissimulando, Regnum illud in extremum periculum adduxerunt. 73.

Gaspar Colignius, haeticorum dux,

INDEX RERVM.

dux, à Rege Christianissimo
omnibus honoribus spoliatur.
231.237
Genuensem Rempublicam ad so-
ciale bellum PIVS hortatur.
432
Ducis & Reipublica Genuensis
ad PII V. litteras responsum.
436
Georgius Cardinalis Armenia-
cus, collega Legati Auenio-
nensis. 179

H.

Heresi nascenti occurren-
dum. 189.445
Heresim profligari curat PIVS.
136.140.152.155.160.166.
168.195.267.270.446
Hereses, & ira diuina flagella,
unde maximè prouocentur.
233
Hæreticorum operâ in Magi-
stratibus uti, perniciosum.
19
Hæretici, diuinâ permittente pro-
nidentia, numquam in unum
corpus possunt coalescere. 114
Hæreticorum proscriptis bonis,
templa ab illis diruta edificari
PIVS iubet. 134
Hæreticorum nefanda scelera in
Belgio perpetrata, PIVS re-
censet. 304
Henricus Iulius puer Episcopus
non eligendus. 33.36.70
Henricus Portugallia Cardina-
lis. 42.88

Hispaniarum Regum potentia.
333.417
Philippi Hispaniarum Regis pic-
tatem laudat PIVS. 27.53.
101.307.308.315.332
eum ad fœdus contra Turcas
suscipiendum hortatur. 306
item, vt ad sedandos tumultus
in Belgium traiciat. 14
ipse consilium Pontificis de
fœdere contra Turcas appro-
bat. 312
eum PIVS hortatur, vt suam
classẽ contra Turcas auxilio
mittat. 317
item, vt Catharinam Lusita-
nia Reginam, amitam suam,
in Castellam venire cogitan-
tem, à sententiâ deducat. 358

I.

Iacobum Scotum nobilem Re-
ligionis causâ patriâ pul-
sum PIVS commendat. 182
Imperator precipuus Ecclesia
Aduocatus. 107.124
India propagationis fidei causâ
Hispaniarum Regi concessa.
100.250
Ioannem Andream de Auriâ,
vt Regiam classẽ cum Ve-
netâ iungi procurer, PIVS
hortatur. 320
& ne quid impediât, quo mi-
nùs Ierosolymitani Ordinis tri-
remes quatuor cum Pontificiâ
classẽ iungantur, hortatur.
322

eidem mand. ut Regiam clas-
sem Neapolitani Prorogis sub-
fidiis instructam quamprimum
expediat. 324
Ioannem Paulum ab Ecclesiâ S-
natores Mediolanensem PIVS
commendat. 39
Ioannes Phisterus, Canonicus
Frisingensis. 26. 32
Ioannes Stunica, Senator & in
Urbe Orator. 98. 319
Ioannes Tellus, Lusitania Regis
in Urbe Legatus. 350
Iure Ecclesiarum Presulibus re-
seruato, ius temporale Princi-
pum stabilitur. 38. 40. 49.
 100. 102. 260

L.

L *Aici, in Sacellis maioribus*
vel in Choris dum diuina
celebrantur Officia, stare vel
sedere prohibentur. 86
Laurentius Guasconius, Ierosoly-
mitani Ordinis Eques. 382
Laurentius Madius ex Societate
Iesu, in Poloniam à Pio mis-
sus. 393
Libertas Ecclesiastica defenditur.
 76. 77. 82. 126. 127. 130
Ludovicus de Torres Camera
Apostolica Clericus, à Pio
in Hispaniam pro fœdere con-
tra Turcas inuendo missus.
 311. 312. 313. 317.
Lusitania Regum pietatem PIVS
commendat. 48. 343

M.

M *Agistratui saculari facul-*
tatem PIVS tribuit sup-
plicium sumendi de Ecclesia-
stico. 68
Mala facienda non sunt, ut in-
de eueniant bona. 299
Marchio Rangonius Regis Ord-
inis Eques. 159
Marchioni de Villars de suscepto
Admirantis officio PIVS con-
gratulatur. 239
Marcus Antonius Columna Pon-
tificis classis Generalis. 329.
 330
Maria Scotorum Regina flebi-
lem statum suum deplorat. 368
Matthæus de Pisino, Presbyter
hereticus. 373
Maximilianum Imperatorem act-
iam fœdere, ad sociale bellum
contra Turcam PIVS cohort-
tatur. 396
Mediolanensis Ecclesie iura de-
fendit PIVS. 38 40. 71. 120.
 223
Melchior Bilius, Notarius A-
postolicus, & apud Casaream
Muestatem Nuntius. 372
Melitâ insulâ amisâ tota Chri-
stiana Respublica in maximum
periculum adducetur. 20. 60.
 62. 64
Melita insula Magistrum à
consilio inde discedendi reuo-
cat. 10
Melita insula contra Tarcas
auxilia

INDEX RERVM.

auxilia PIVS postulat. 60. 62. 64
Mennam *Ethiopum Regem,*
cognomento Pretiosum Ioan-
nem, ad sociale bellum contra
Turcas PIVS hortatur. 424
Metellus Venturellus *Canonicus*
Visucensis. 147
Ministrorum ipsorum inter se
discordia rebus recte admini-
strandis maxime aduersatur.
 196. 198
Misericordia Dei quanta sit.
 309
Morum correctio ab Vrbe pri-
mum, ac locis ad *Ecclesiasticam*
diuionem pertinentibus est in-
icipienda. 170. 185
Mosconitarum Ducem ad socia-
lis belli fœdus secum & cum a-
liis Christianis Principibus in-
eundum PIVS hortatur. 360
Mulieribus ingressus in Mona-
stera tam virorum quam mu-
lierum prohibetur. 87

N.

N *Analem de Turcis ad Echi-*
nadas victoriam PIVS
prædicat. 310
victoria huius descriptio. 416
 422. 425

O.

O *Beditentia fundamentum*
Ecclesia. 130
Ordinibus sacris idonei tantum
initiandi. 95. 201

P.

P *Acem cum hereticis componi*
PIVS dissuadet. 267. 269.
 272. 274. 277. 280
Pastorum negligentia hæreses ex-
citantur. 2. 13. 24. 29. 34. 58.
 109. 128. 132. 180
Perafanium de Riberâ Ducem
de Alcalâ, Neapolitani Re-
gni Proregem, ut Regiam clas-
sem quamprimum instrui &
contra Turcas dirigi procurer,
PIVS hortatur. 326
Petrus Barzeus *Orator Regis*
Polonia. 18
Petrus de Giou, Ordinis S. Ioan-
nis Ierosolymitani Marechal-
lus. 62
Petrus Iustinianus, Prior Prio-
ratus Messana, Miles Ordinis
S. Ioannis Ierosolymitani. 65
Petrus de Mendoza, Miles &
Præceptor Ordinis S. Ioannis
Ierosolymitani. 60
Petrus Misconius *Polonia Vice-*
cancellarius. 19
Petrus de Monte Hospitalis san-
cti Ioannis Ierosolymitani Ma-
gister. 323
eum, ut eius Ordinis trire-
mes instrui, & cum Pontificiâ
Venetâque classe iungi procu-
ret, PIVS hortatur. 328
& ut Melitenses triremes ad
sinum Corcyrensem adnaviga-
re, & cum Pontificiâ Venetâ-
que classe iungi curet. 330

O o o 3

eum

INDEX RERVM.

eum de tribus Meliense sum-
 triremibus captis consolatur.
 382
 Philippus Hispaniarum Rex,
 vide Hispaniarum Rex.
 PIVS V. de iniuncto sibi Summi
 Pontificis officio, vicem suam
 deplorandam potius quam sibi
 gratulandum ostendit. 41
 eius Zelus pro defensione fidei.
 127. 130. 131. 136. 139
 eius cura de incolumitate Re-
 gni Gallie. 195. 198
 Pastoralis officij munus exercet.
 29. 134
 eius latitia de propagatione fi-
 dei. 48. 105. 106. 134. 151.
 154. 156. 209. 241. 249. 257
 eius Zelus contra Turcas. 308
 eius constantia in rebus aduer-
 sis. 383. 399. 433
 eius lacrymæ ac ieiunia pro
 incolumitate Respublicæ Chri-
 stianæ. 405
 Cardinalibus Granuellano &
 Paceco, atque Ioanni Stunica
 mandat, ut apud Philippum
 fœdus contra Turcas conficien-
 dum procurent. 314. 317. 319
 Polonia Regem PIVS hortatur,
 Transilvanie Principi per-
 suadeat, ut in locis ditioni sue
 subiectis Catholice Religionis
 cultum recipi procuret. 377
 eundem legitimam uxorem
 suam sterilitatis causâ repu-
 diare deliberantem à consilio
 PIVS renocat. 389

Polonia Regum pietatem PIVS
 laudat. 380. 393
 Populi, belli calamitatibus affli-
 cti, benevolentiam potius sunt,
 quam vi aut armis in officio
 retinendi. 176
 Praefules subditis suis ad recte
 vivendum exemplar esse de-
 bent. 334. 180. 203. 215. 236
 Principibus resistens, Dei ordi-
 nationi resistit. 175

R.

R Eformatio trium Milita-
 rium Ordinum, Lusitanie
 Regi conceditur. 225
 Reges ad celestis Regni adeptio-
 nem aspirare debent. 106
 Reges contemptam diuinarum
 iniuriarum ultione, ipsius Dei
 iram prouocant. 153. 155. 157.
 161. 163. 166. 168. 242
 nec non impiorum amicitiam
 admittendo. 296. 300
 Regia potestas ita Regibus à sum-
 mo Rege Regum data, ut ope-
 rum suorum rationem reddi-
 turi sint. 20. 118. 119
 Regis gratiam omnes malunt cum
 securitate, quam iram & offen-
 sionem eius cum periculo. 76
 Religio Catholica impugnari po-
 test, sed non expugnari. 115.
 291
 Religione Imperia & Principatus
 conseruantur. 106. 114. 157. 378
 PIVS admonet se in causâ Reli-
 gionis de iure suo decedere

INDEX RERVM.

non posse. 443
Reipublica Christiana afflicta sta-
tum PIVS deplorat. 294. 298.

303.
Robertus Rodulfus à Pio in An-
gliam missus. 293. 428

S.

S Candala tolerando, Regni
tranquillitati non consuli-
tur. 73. 374

Scotia Regina de filio nato PIVS
congratulatur. 21

eam ab Elisabethâ in custodiâ
detentam PIVS consolatur.

263 365. vide Maria.

Sebastiani Portugallia Regis pie-
tas. 89. 91. 259. 343. 406

& zelus. 407

ei de Regni gubernaculo XIV.
atatis anno suscepto PIVS gra-
tulatur. 88

consilium eius de subigendâ A-
fricâ approbat. 255.

eum, ut Christianis contra
Turcas auxilio esse vellet, hor-
tatur. 337. 343. 353

Sebastianus Portugallia Rex,
PII consilium de fœdere contra
Turcas probat; & quamvis
non in præsens, in posterum
tamen auxilium suum pollice-
tur. 339. 347

ei respondet de affinitate sibi
cum domo Vallesiâ iungenda.

349. 410

ei ob navalem victoriam gra-
tulatur. 405

Seriphum Mutahar Regent A-
rabia Felici, ad sociale bellum
contra Turcas PIVS hortat-
ur. 420

Siegem Tahamasum, Persarum
Regem, ad sociale bellum contra
Turcas PIVS hortatur. 415

Simonem Echium, Bavaria Du-
cis Cancellarium, ob singularem
pietatem vetere Germaniâ di-
gnum, PIVS laudat. 25

Simoniaca prauitas prima here-
sis fuit. 92

Spiritualis ac temporalis iuris
descriptio. 259.

Stamslaus, Canonicus Cracovien-
sis, à Secretis Regis Polonia.
213

T.

T Emporalibus consulere ni-
hil prodest, si spiritualia
negligantur. 34

Terrarum motu (quamvis na-
turalibus ex causis oriatur)
Deus iram suam in populos
solet significare. 385

Thomam Comitem Northum-
bria & Carolum Comitem
Westmerlandia, Religionem
Catholicam vindicare conan-
tes, benignè PIVS solatur. 290

Timore Domini homines edocen-
tur, ut sublimioribus potesta-
tibus subiecti sint. 175

Turca, amicitia Europæ atque A-
sia Reges deleuit. 300 307. 420.

Turcarum Tyrannus Impera-

INDEX RERVM.

ter appellari non potest. 299
Turcarum cupiditas. 307. 362
 402. 417. 420
Tuxo Bertanus, Internuntius
Ferraria Ducis. 385

V.

Vaticum Dominici Corporis
 ultimum supplicium
 subituris non denegandum. 69
Victoria nautalis de Turcis rela-
ta quanti sit momenti. 402.
 405. 408. 414

Vincenius Porticus apud Sere-
nissimum Polonia Regem nun-
tius. 208
ad Mosconitarum Ducem
missus. 363

Virorum proborum, quibus Ec-
clesiastica munera mandari
possint, indicem ad se mitti
Pius iubet. 5

Z.

Zacharias Cardinalis Det-
 finus. 7



SVMMA

SVMMA PRIVILEGII
REGIS CATHOLICI.

PHILIPPVS IV. Hispaniarum & India-
rum Rex Catholicus, ac Potentissimus
Belgarum & Burgundionum Princeps, Di-
plomate suo sanxit, ne quis *Apostolicarum*
Pii V. Pont. Max. *Epistolarum libros quin-*
que, nunc primum in lucem editos operâ & curâ
Francisci Goubau, præter Balthasaris Moreti
voluntatem vlllo modo intra nouennium im-
primat, aut alibi terrarum impressos in Infe-
rioris Germaniæ ditiones importet, vena-
lésve habeat. Qui secùs faxit, confiscatione
librorum, & aliâ graui pœnâ mulctabitur;
vti latiùs patet in litteris datis Bruxellæ
III. Martij, M. DC. XXXIX.

Signat.

P. le Mire.









93-B16876

St. Pius V.


1564-1572;

PM. 1566-72

D.O.M.

Meche Ghilari

festi 5 May



VPii. V.
Epistolae
Libri. V.